


Xtidxcoob Dios ni
biädinä dad Jesucrist



New Testament in Zapotec, Mitla (MX:zaw:Zapotec, Mitla)

Xtidxcoob Dios ni biädnä dad Jesucrist

New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

5cff1274-8dc3-5398-a94d-f6033bb363c9

Contents

San Mateo	1
San Marcos	68
San Lucas	110
San Juan	182
Hechos	233
Romanos	301
1 Corintios	327
2 Corintios	353
Gálatas	369
Efesios	378
Filipenses	387
Colosenses	393
1 Tesalonicenses	399
2 Tesalonicenses	404
1 Timoteo	407
2 Timoteo	414
Tito	419
Filemón	422
Hebreos	424
Santiago	444
1 Pedro	451
2 Pedro	459
1 Juan	464
2 Juan	471
3 Juan	472
Judas	474
Apocalipsis	476

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

¹ Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

² Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni. ³ Judá con Tamar gujc xcuzajn Fares con Zara. Fares gujc xtd Esrom, Esrom gujc xtd Aram.

⁴ Aram gujc xtd Aminadab. Aminadab gujc xtd Naasón. Naasón gujc xtd Salmón. ⁵ Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtd Isaí. ⁶ Isaí gujc xtd reii David. David con nani gujc chääł Urías gujc xcuzajn Salomón.

⁷ Salomón gujc xtd Roboam. Roboam gujc xtd Abías. Abías gujc xtd Asa. ⁸ Asa gujc xtd Josafat. Josafat gujc xtd Joram. Joram gujc xtd Uzías. ⁹ Uzías gujc xtd Jotam. Jotam gujc xtd Acáz. Acáz gujc xtd Ezequías. ¹⁰ Ezequías gujc xtd Manasés. Manasés gujc xtd Amón. Amón gujc xtd Josías. ¹¹ Josías gujc xtd Jeconías con rebetzni cheni huij rebeñ Israel pres lo guedx Babilonia.

¹² Che gudejd huij rebejnga pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. ¹³ Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. ¹⁴ Azor gujc xtd Sadoc. Sadoc gujc xtd Aquim. Aquim gujc xtd Eliud. ¹⁵ Eliud gujc xtd Eleazar. Eleazar gujc xtd Matán. Matán gujc xtd Jacob. ¹⁶ Jacob gujc xtd José chääł Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajñli toAbram cheni gubajñliza toreii David. Tzudajza rexagdoo najc reni gudejd cheni gubajñli toDavid cheni huijli rebeñ Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchñaani José ni gac chääłni. Per ansde xca' sa'reni, Marii agac nuxi'nni sa'csi biääd Sprit Dxañ xten Dios lojni. ¹⁹ José com najcni te beñsa'c, di rlanjni nuřo'nni Marii nez loj rebeñ te niacheereni, ni'c bejñni xhigab Guřonxhiga'tzni Marii. ²⁰ Xhigabga cayujñni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni chäällu sa'csi xi'nni nani chu najc xten Sprit Dxan xten Dios. ²¹ Che gaal xi'nni cuälajluni Jesús sa'csi laani guslaani rexpejn̄ni lo rextojl̄reni.

²² Guiraa redee gujc si'c te guzobj̄ diidx̄ ni gunii tej̄ ni bacuaa xtid̄x Dios. Räj̄pni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabaj̄n con nuure).

²⁴ Che gubaj̄n José lo bacal, bejn̄ni si'cni räj̄p xangl Dad lojni. Cua'ni Marii gujc chäälni. ²⁵ Luxh dini niembeeni si'c chäälni dxejli cheni gudejd gojl̄ xingangalojni ni gulälajni Jesús.

2

Che biädhuui reben̄ nanduxh ni laa remagos lojni

¹ Cheni gojl̄ Jesús nen̄ guedx Belén xten guedx Judea, najc Herodes reii xten guedx Judea. Dxejc bidzuj̄n rebennaj̄n ni najc remagos, siädreni nejz cadro rliejn̄ gubij̄dx, bidzuj̄nreni guedx Jerusalén. ² Rniabdiidxreni:

—¿Con reii xten reben̄ Israel nani golgaj, ä? Nurnu abihuiinu xpajl̄ni laadxlinu, ni'cni siopdoñnuni.

³ Che biejn̄ diajg reii Herodes diidxga, guyuduxhni yärsia' näjza guiraa reben̄ Jerusalén. ⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluii xleii Moisés lo rebejn̄ te gunabdiidxni lojreni:

—¿Caro gaal Crist?

⁵ Laareni räj̄preni:

—Nen̄ guedx Belén xten guedx Judea sa'csi si'c gunii niguii ni bacuaa xtid̄x Dios che räj̄pni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen̄ guejdxre guirii tej̄ nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhal̄nireni guedx Belén, räj̄pni lojreni:

—Colchäj ro'c, colnabdiidxsa'c xcuent biuuxga te che abidxältuni jiädniitu loä te näjza narä chaganäni.

⁹ Che biejn̄ diajgreni xtid̄x reii, sä'tireni. Bajl nani bahuiireni lajajc lajdxreni lahtis nijdni lojreni. Che bidzuj̄nlireni cadro yu' bázga, dxejcru guzobdx̄i bajlga. ¹⁰ Che bahuii remagos loj bajlga, rbalazduxh̄reni. ¹¹ Si'c bidzuj̄nreni. Che biu'reni nen̄ yu', bahuiireni lo bázga con xnanni Marii. Dxejcti bazuxhij̄breni, goj̄nreni bázga, baxhal̄reni rexcäl̄nasa'creni bazalajzreni oor, näjza yaal näjza yalnejxh. ¹² Che agojl̄ guibi'reni, gunixcäl̄reni, räj̄p Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rlanjz ni ju'tnini.

¹⁴ Dxejc huistiegajc José, cua'ni biuxe're näjza xnanni, la-gajc yäälga biriireni, siireni nez Egipto. ¹⁵ Ro'c guyu'reni cheni gujtl Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbäz

¹⁶ Che gucbee Herodes abasguee remagosni, bidxech-duxhni. Gunibeeni guet guiraa rebiuxniguii ni yu' tio'p iij näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

¹⁸ Biejn xse' bejn neñ guedx Ramá, te yälhuinduxh, te yälrbedxdij, yälrbedxnen:

laa Raquel ni roon yejc rexi'nni.

Naaddini jiäjł lajz ni sa'csi agujt rexi'nni.

¹⁹ Cheni gujt Herodes, dxejc lo te bacal huiluloj xangl Dios loj José neñ Egipto. ²⁰ Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlanjz ju't biuxe're.

²¹ Dxejcti huistie José, cua'ni biuxe're näjza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtdani, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³ Dxejc biädläjz ni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

3

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn. 1:19-28)

¹ Neñ redxejga biääd Juan Bautist lo reyubijdz xten guedx Judea, ro'c cagulijdxni, ² cayäjpni:

—Colgusiechlajztu rextojłtu sa'csi xcälrnibee Dios abidzũgajxhni.

³ Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxa't nájza dzujn xten baseerguijxh. ⁵ Riäd reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riädcuadiajgreni xtiidxni. ⁶ Che ruxhobdojlreni xtojlrereni, rutiobnis Juanreni ro' gueu Jordán.

⁷ Che bahuiini siäd xhidajl reben guidoo ni najc refarisee nájza ni najc resaducee, rlanjreni gutiobnisniren, räjpni lojreni:

—La'tu benguidxduxh, najctu si'c bäl. ¿Chu balijdxtu guxuntu loj xcälrdxe'ch Dios ni siäd? ⁸ Colguibañsa'c si'cni nungäjl te fiipac rebejn guliipac abasiechlajztu. ⁹ Na'c litis guntu xhigab naatu: “¡Ni nurnu najcnu rexagdoo toAbram!” Rniliä lojtu, sajc xca' Dios reguijre gunni gacreni rexi'n toAbram. ¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹ Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siäd detzä sutiobnisni la'tu con Sprit Dxañ xten Dios nájza con guiboo. Rnibeeruni löä. Bënsacduxhni. Nicla xcura'chni digacdi chanää. ¹² Aca'ni xhi cojn gusiani triuu xtenni te chuchee triuuga neñ ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni. ¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siädldu löä te gutiobnisälu.

¹⁵ Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädyañt Sprit Dxañ xten Dios si'c te palom, biäjtni lojni. ¹⁷ Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz

(Mr. 1:12-13; Lc. 4:1-13)

¹ Dxejc bejn Sprit Dxan xten Dios huij Jesús nez lo reyubijdz te nejzga nuhual beṇdxab Jesús.

² Che gulujx bacua'n Jesús tiuu gubijdx, tiuu guxhijṇ, gu-laanni. ³ Sas biääd beṇdxab lojni, räjpni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yältxtiil guibajṇ rebejṇ; sibajṇzani con guiraa diidx nani rnii Dios.”

⁵ Dxejcti huinä beṇdxab Jesús guedx Jerusalén. Gulä'pnini jiaa yejc xques guidoro. Dxejcro räjp beṇdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con naareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c falḷu Dad ni najc Xtioslu.”

⁸ Stee huält huinä beṇdxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcäl'nasa'creni. ⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec beṇdxab! Scree caj loj rexquijtz Dios: “Dad Xtioistislu ganlu; lojtisni chulu.”

¹¹ Dxejcti gubicaj beṇdxab loj Jesús. Dxejc biääd rexangl Dios biädhuiireni Jesús.

Gusloj Jesús cayujṇ xtzuunni

(Mr. 1:14-15; Lc. 4:14-15)

¹² Che biejn diajg Jesús yu' Juan neṇ ladzguuib, huijni nez Galilee. ¹³ Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejṇ nani di gac rexpēṇ Israel.

¹⁶ Rebejṇ nani rbäjz neṇ te yälcäy abahuiireni te bajlga, luxh bajlga basanij xcäriejṇ renani nabajṇ lo xcälrdxejb, lo xpalaa yälgujt.

¹⁷ Dxejcti gusloj cagulijdx Jesús, räjpni:

—Colgusiejchlajztu, colguxhobdojl te guibaṇsa'ctu sa'csi abidzuṇgajxh xcälrnibee Dios.

Che gurejdx Jesús tajp xpejṇni

(Mr. 1:16-20; Lc. 5:1-11)

18 Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bājł, ni'c cacuaareni guijxh lo nisdoo. 19 Dxejcti rājł Jesús lojreni:

—Coltanajł narā. Naj riniaaztu bājł, niluxh narā gunā cuedxtu rebejł.

20 Lagajc dxejc basa'nreni xquijxhreni te sanajłreni laani.

21 Che gudejreni ro'c, bahuiini loj stio'p niguii, Jacobo con bejtzni Juan. Yu'reni neņ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

22 Lagajc dxejc basa'nreni barcw nājza xtadreni te sanajłreni Jesús.

Caguluii Jesús xhidajł bejł

(Lc. 6:17-19)

23 Sasajti Jesús guideb nez región xten Galilee, caguluiini neņ teja rexquidooreni. Cagusule'ni redidxcoob xten xcälřnibee Dios. Cagusiajczani guiraa yälřacxhuu ni rajc rebejł guejdxga, guiraa yälguijdx. 24 Biejł diajg rebeņ Siria diidx xcuent ni cayujł Jesús. Sas biädñäreni guiraa rebenřacxhuu ni cayajc guiraloj yälguijdx, yälřnayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'ņ tiejxhreni. Dxejcti basiajł Jesús rebejłga. 25 Xhidalduxh beņ Galilee huinajłni, nāj rebenřeguedx Decápolis, nājza rebenřguedx Jerusalén, nājza rebenřJudea nājza rebejł ni tre' stelaad gueu Jordán.

5

Yejc te dajł balijdx Jesucrist rebejł

1 Che bahuii Jesús loj rebeņ xhidajł, huä'pni yejł te dajł. Dxejcti gubig rexpejłni ni gurejdxni lojni. 2 Dxejc gusloj caguluii Jesús reni'c, scree rājłni:

Rebejł ni sibaalajł

(Lc. 6:20-23)

3 —Sibaalajł rebejł nani nanchee rquinduxhreni xcälřracnāj Dios, sa'csi laareni nungājłreni xcälřnibee Dios.

4 'Sibaalajł rebejł nani rac-huin lajzreni xcuent rextojłreni, sa'csi sudzucaj Dios xtojłreni, susiājłni lajzreni.

5 'Sibaalajł rebejł nani nadolajł nani rlajł guntis si'cni rnibee Dios, sa'csi sacnāj Diosreni lo xcälřnabajłreni lo guedxliujre.

6 'Sibaalajł rebejł ni nastoocanu rliaanreni, riojłreni, sa'csi rlajzreni guibaņsa'ctisreni nez loj Dios, sa'csi sudeed Dios lojreni guiraa ni rniabreni.

⁷ 'Sibaalajz rebejn nani rulaslajz sa'reni, sa'csi sulaslajzza Diosreni.

⁸ 'Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ 'Sibaalajz rebejn nani ruscuedxilajz sabejnreni, sa'csi laareni sirilajreni rexi'n Dios.

¹⁰ 'Sibaalajz rebejn nani rusutijp lajzreni che rusacsí bejnreni sa'csi nabaṅsa'creni nez loj Dios, sa'csi xtenreni najc xcälṛnibee Dios xhaguibaa.

¹¹ Colṣpaalajztu che gusacsí bejntu tilnäjreni la'tu, guiniireni guiraloj didx-xhii xcuent xtidxä. ¹² Colguibaalajz, colbalajz sa'csi xhaguibaali sunidxduxh Dios xcuent xtzuuntu. Sigajza basacsíreni reniguii ni gubajṅ galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Räjzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejṅni dxejc? Susälreni sejdga detz yu', suläj bejṅ yejcní.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jäuuni neṅ te caj. Maazru huen soobni jiaa neṅ te gandilieer te gusanijni loj guiraa rebejn ni tre' neṅ yu'. ¹⁶ Xcälṅnabaṅsa'ctu najc si'c te bajl loj rebeṅ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Rului Jesús xcuent leii

¹⁷ Räjzani:

—Na'c guntu xhigab siädgudzucaä leii xten toMoisés, niclaza rediidx ni baluii redad ni gunii xtidx Dios. Xhet siäddzucaädini, narä siälä te guluiäpacni si'cni najcni. ¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlanj gusaan te diidx nani caj loj leii, mase te didxbäzni, luxh ruluiini gun bejṅ si'c, laani guxiduxh sajcní lajdx Dios guibaa. Niluxh renani rucudiajg xtidx leii, luxh rujnpacreni si'cni caj lo leii, ruluiizani leii, beṅsacduxh gacni lajdx Dios guibaa. ²⁰ Ni'cni rniä lojtu, palga ditu gunsa'cru xtzun Dios, ditu guibaṅsa'cru loj reni najn xcuent xleii toMoisés, näjza loj rebeṅ guidoo ni laa farisee, dipactu jiu' lajdx Dios xhaguibaa.

Rului Jesús xcuent yäṛdx'e'ch

(Lc. 12:57-59)

²¹ Räjzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jïäuuni nen latzguuib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “beñnayällajz” sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di guteedni luj lo juejz. Luxh juejz suteedni luj loj reguixhajg te gusäureni luj nen latzguuib. ²⁶ Rniliäpac lojlu: “Dilu guirii ro'c palga dilu cue'c giralii meel nani guiniabni lojlu.”

Rului Jesús xcuent yälrusquee sa'ni

²⁷ Räjpzani:

—Abiejn diajgtu guniireni galoo: “Na'c guesnäjtu gunaa nani di gac chäältu.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl nen lastooni. ²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. ³⁰ Palga ñaalu ladbee rujn rujnlu dojl, batiu'ni sa'csi hueenru gunijtlu te ñaalu quela chää guideb tiejxhlu gabijl.

Rului Jesús xcuent yälru'o'n chää bejn

(Mt. 19:9; Mr. 10:11-12; Lc. 16:18)

³¹ Räjpzani:

—Abiejn diajgtu guniireni galoo: “Chutis niguii ni rlajz guro'n chäälni, nanabtis gudeedni te guijtz nani rniä abar'o'nni chäälni.” ³² Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchñaaga gunaaga sujnzani yälgubejxh.

Rului Jesús xcuent che ria'n diidx

³³ Räjpzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiirro, ³⁶ niclaza por lagajc bitiuvejclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitisl: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

Chanälajzni rebejn ni rdxe'ch lojni
(Lc. 6:29-30)

³⁸ Räj pzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c tilnäjlü te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rläjz tilnäjlü te xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guini-abxlia'ni lojlu, badeedni. Nani guiniablaa xhi guinablaani lojlu na'c gudxoijnluni lojni, na'c gäblu: “Xhetini.”

⁴³ 'Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” ⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuedx, colnab loj Dios xcuent rebejn nani rdxagdijltu, rusacsíreni la'tu, ⁴⁵ te si'c gactu xi'n xtadtu ni yu' xhaguibaa nani rujn ri x Cubijdxni lo reben'sa'c sigajcza lo reben guijdx. Rujnzani riajb nisguij lo reben'sa'c sigajcza lo rebenguijdx. ⁴⁶ Palga la'tu chanälajztu lagajtis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: “Xchan”, lagajtis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸ Colyajc ben'sa'c si'c ni najc xtadtu ni yu' xhaguibaa.

6

Rulüi Jesús xho gudeedni gojn

¹ Räj pzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, näjza lad nezyuj. Rujnsireni si'c te ruhüi rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtadlu ni cahüi nani bejnlu xhiga'tz, sacnäjni luj nez loj rebejn.

Rulüi Jesucrist xho cueedx, guiniabni lo Dios
(Lc. 11:2-4)

⁵ Räj pzani:

—Cheni rbejdx, rniabtu lo Dios, na'c guntu si'c rujn reben_guidoo ni rusguee. Rchaglajzreni rniabreni lo Dios rsiulireni ne_n reyu' cadro riel xtidx Dios, näjza guiraa resquiin, näjza nez ronejz te ruhuii rebejn_n xho rujnreni. Rniliäpac, acua'reni gaan xtenreni. ⁶ Näj luj cheni cueedx, guiniablu lo Dios, biu' ne_n xyu'lu. Basäuu ro' yu'ga, dxejcti xhiga'tz gunii loj xtdalu ni yu' xhaguibaa. Dxejcti xtdalu ni cahuii xhi rujnlu xhiga'tz, sacnäjni luj nez loj rebejn.

⁷ 'Cheni caniitu lo Dios, na'c guinisactu balti huält rediidx nani aguniitu. Si'c rujn rebejn_n nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. ⁸ Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹ Ni'cni scree colguinii lo Dios:

Xtdadnu ni yu' xhaguibaa dxan najc lajlu.

¹⁰ Sujiääd xcäl_rnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäj_l lajzlu redojl_l xtenu si'c riäj_l lajznu redojl_l xten rebejn_n ni rujn dojl_l loonu.

¹³ Na'c gusaanlu jiaabnu xhigabguijdx,

bas_laa nuure lo dojl,

sa'csi xten guejblu najc yäl_rnibee, yäl_nadip näjza yäl_rdimbicha' par tejpas.

Sugacni si'c.

¹⁴ Palga la'tu gusiäj_l lajztu redojl_l ni rujn rebejn_n lojtu, xtadtu ni yu' xhaguibaa susiäj_lza lajzni rextojl_ltu. ¹⁵ Palga ditu gusiäj_l lajztu redojl_l ni rujn rebejn_n lojtu, sigajcza xtdadnu ni yu' xhaguibaa di lajzni jiäj_lza rextojl_ltu.

Ruluii Jesús xho gucua'n bejn

¹⁶ Räj_pzani:

—Che rucua'ntu na'c guntu si'c rujn rebejn_n nani rusguee; rumbaa lojreni te fii rebejn_n cagucua'nreni. Rniliä acua'reni rexgaanreni. ¹⁷ Niluxh la'tu, che rucua'ntu, col_cun_n yejctu, col_quiib lojtu ¹⁸ te na'c gacbee rebejn_n cagucua'ntu, xtadtistu suhuii cagucuanxhiga'tztu. Xtdadtu ni cahuii xhi cayunxhiga'tztu suniidxni xhi xca'tu nez loj rebejn.

Yäl_nasa'c ni yu' xhaguibaa

(Lc. 12:33-34)

¹⁹ Räj_pzani:

—Na'c gapdajntu yäl_nasa'c lo guedxliujre cadro rajw reman o rbihtiejn xhixtentu, niluxh richu' gubaan rolijz bejn_n te rbajnreni. ²⁰ Hueenru ga'ptu xcäl_nasa'ctu xhaguibaa cadro di

reman gauu, diza rehxixtentu cuibtiejn, diza regubaan jiu' te cuanreni. ²¹ Sa'csi cadro yu' xcäl'nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²² Räj pzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, jlinacäiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguültistu xcäl'nasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajcru lo yäl'rajw, luxh sajcru tiejxhtu lo xhajbtu.

²⁶ Col'huii remane' ni rtajt xhaguibaa. Direni cue'c binij, dizareni guilia' gäj, dizareni cuchee xhi gaureni nen yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? ²⁷ ¿Chu tej la'tu sa'csi ru'tu yärsia' sajci tiobrutu ste bo'c jiaaru?

²⁸ ¿Xhicuent runduxhtu xhigab xcuent xhajbtu? jCol'huii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹ Narä rniä lojtu, nicla rei Salomón guideb najcwni rexhabsa'c xtenni di nisiuchee si'c rsiuchee tej reguiiga. ³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? ³¹ Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³² Sa'csi rebejn nani di gumbee Dios xhigabtisga rujnreni, caguülreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Col'quilxgaa yäl'rnibee xten Dios näjza yäl'nabansa'c si'cni rlajz Dios dxejc sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

Na'c cubeetu sa'tu

(Lc. 6:37-38, 41-42)

¹ Räj pzani:

—Na'c cubeetu sa'tu te na'cza cubee Dios la'tu. ² Sa'csi siganci rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiexh Dios lojtu. ³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ¿Xhicuent gäblu lo sa'lu,

nädonnu cuää guijxh ni yu' neñ balojlu, luxh dilu fii loj yagro ni yu' neñ balojlu? ⁵ Beñguijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

Colnab, colquiil, colgusejz rolä'

(Lc. 11:9-13; 6:31)

⁷ Räjpzani:

—Colnab lo Dios te guniidxni nani rniabtu. Colquiilni te guidxäjltuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

⁹ '¿La yu' chu tejtü che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäjl, ¿la sudeedni te bäj? ¹¹ Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹² 'Ni'cni guira'ti cos ni rlanjztu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yälñabajn najc dää

(Lc. 13:24)

¹³ 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhida-jlreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yälñabajn, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga

(Lc. 6:43-44)

¹⁵ Räjpzani:

—Colnatiro rebejn nani rlanjz gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeeturenini. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cdi, ganax ninejxh ni di ganaxsa'c rcaj lojni. ¹⁸ Digacdi xcaj ninexhdx-uudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c

xcaj lojni, nanab guidinni te checni. ²⁰ Sigajcza sajc gumbeetu be_nsa'c sa'csi rujnreni dzunsa'c.

Xhet guiraadi bejn jiu' lo xcäl̄rnibee Dios
(Lc. 13:25-27)

²¹ Räjpzani:

—Xhet guiraadi renani rnii, “Dad, Dad”, jiu' lo xcäl̄rnibee Dios xhaguibaa. Ganaxtis renani rujn si'cni rlajz Xtadä ni yu' xhaguibaa. ²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläenu rebe_ndxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Col̄bicaj loä be_nlatsiaj.”

Tio'p cimient
(Lc. 6:47-49; Mr. 1:22)

²⁴ Räjpzani:

—Chutis nani rucuardiajg diidx nani caniä, luxh ruzoob xtidxä, laani najc si'c te be_nsin̄ nani basoob rolijzni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh dini guzoob xtidxä najc si'c te be_n guyalajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejn̄ga.

²⁸ Che gulujx gunii Jesús rediidxga, lacti bidxeloj rebejn rediidx ni baluini, ²⁹ sa'csi baluini rebejn si'cpac te nani rnibee, xhet si'c ruluidi rebejn ni najn lei.

8

Rusiajc Jesús te bejn ni ral̄ tiejxhni
(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejn̄ huinajlni. ² Dxejcti biäd te be_nracxhuu ni ral̄ tiejxhni nez loj Jesús. Bazuxhijbni, räjpni:

—Dad, palga rlajzlu, sajc gusiajclu narä.

³ Dxejcti basгаа Jesús ñaani, gudajnni dade'ga con ñaani, räjpni:

—Rlazä jiajclu. Siajc tiejxhlu.

Lagajc dxejc gubicaj guejdx ni ral̄ tiejxhni. ⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn̄ ni riajc, te fii rebixhojzga abiajclu.

Rusiajc Jesús te xmos capitán roman̄
(Lc. 7:1-10)

⁵ Che biu' Jesús guedx Capernaum, bidzujñ te capitán roman nani rnibee te gayuu soldaad. Gunabduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäjł jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnajni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajł beñzijt nez ladjiaa, nez ladjiaät, te jädcuenäjreni Abram, Isaac, Jacoob lajdx Dios xhaguibaa. ¹² Luxh reben Israel nani niajc xi'n Dios sijreni te laad lo yälcäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujñ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. ¹⁵ Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajł beñ racxhuu

(Mr. 1:32-34; Lc. 4:40-41)

¹⁶ Che biu' guxhijñ, biädñäreni loj Jesús xhidajł bejn ni yu' rebeñdxab lostooreni; con xtiidxni gunibeeni birii guiraa rebeñdxabga. Basiajczani guiraa reben racxhuu. ¹⁷ Si'c bejn ni te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcälñayannu.

Reni rlajz ninajł Jesús

(Lc. 9:57-62)

¹⁸ Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpejn pacni stelaad ro' nis.

¹⁹ Dxejcti biääd te beñnajñ loj Jesús, räjpni:

—Mastr, sisiaäza cadrotis chäálu.

20 Räj̄p Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguüi dina gapä cadro gaa yecä.

21 Stee rexpejn̄pacni räj̄p lojni:

—Dad, basaan chaxgaä ladxä te chacuatzä xtadä.

22 Räj̄p Jesús lojni:

—Gudanajl narä. Basaan sugucua'tz resabengutreni rebejn̄ nani najc si'c beṅgut sa'csi najcreni beṅdojl̄.

Basiacdxi Jesús te beduxh

(Mr. 4:35-41; Lc. 8:22-25)

23 Che biu' Jesús neṅ barcw, biu'za rexpejn̄pacni lagajc neṅga. 24 Dxejc huäjs te bedonduxh lo nisdoo. Lirusiääzni barcw neṅ nisdoo. Luxh Jesús nagayejsni. 25 Dxejcti huij rexpejn̄pacni huicuäänni, räj̄preni:

—Dad, gucnäj nuure te di guetnu.

26 Dxejc räj̄p Jesús:

—¿Xhicuent rdxejbtu, bejn̄ ni guxii rililajz?

Dxejcti huistieni, gudidxa'ni lo bej näjza lo nisdoo, te bi-acdxireni. 27 Dxejc bidxeloduxh rexpejn̄pacni, räj̄preni:

—¿Chuni'c najc niguiire? ¡Ahuilaa xho rucuardiajg bej näjza nisdoo xtiidxn̄i!

Rebeṅdxab ni yu' lajdx regadarenos

(Mr. 5:1-20; Lc. 8:26-39)

28 Che bidzujn̄ Jesús stelaad nisdoo cadro najc lajdx regadarenos, tio'p bejn̄ ni yu' beṅdxab lastooreni biädchaglojreni Jesús. Rebejn̄ga riireni neṅ rebaa, nialazduxhrene, ni'cni rut rajcdi rdejz nezyujga. 29 Guredxa'reni räj̄preni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad gal̄di xornu, ä?

30 Nez te laad, zijte' cadro suga'reni, cayajp bejn̄ xhidarlo cuch. 31 Dxejcti gunab rebeṅdxabga loj Jesús, räj̄preni:

—Palga cuääl̄u nuure, basaan jiu'nu neṅ recuchre.

32 Dxejcti räj̄p Jesús:

—Cołchäj.

Dxejcti biriireni neṅ lastoo redade'ga, huichu'reni neṅ recuchga. Dxejcti guiragajc recuchga caguxun̄reni, huitejbreni ro' te guilaj, biääzreni neṅ nisdoo, gujttireni neṅ nis.

33 Rebejn̄ ni cayajp recuchga, baxun̄reni, huijreni lajdxreni, huiyeireni diidx guiraa ni guzajcreni näjza ni guzajc redade' ni guyu' rebeṅdxab lastooreni. 34 Dxejcti guiraa rebeṅguedxga huichaglojreni Jesús. Che bahuiireni lojni, gunabduxhrene lojni, jiunejn̄ni lajdxreni.

9

Basiajc Jesús te bejn nani abixu'n tiejxhni

(Mr. 2:1-12; Lc. 5:17-26)

¹ Dxejcti biu' Jesús neñ barcw. Gudejdni stelaad ro' nis te bidzujñni lajdxni. ² Ro'c biädnäreni lojni te bejn nani abixu'n ñaani, ni'ni. Naga'ni lo te da'. Che bahuii Jesús lacti rililajzreni, räjpni loj beñracxhuuga:

—iBaspaa lajzlu xi'nä! Agubicaj rextojllu.

³ Dxejcti gaii beñnajn ni ruluii xleii Moisés cayujñreni xhigab ensilaareni, caniyaj dee Dios con rextiidxni. ⁴ Dxejc gucbegajc Jesús xhi xhigab cayujñreni, dxejc räjpni lojreni:

—¿Xhicuent cayujntu xhigabguijdx neñ lastootu? ⁵ ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” ⁶ Dec gunä te gacbeetu Xi'n Dios ni gujc Niguui räjp yälñrabee lo guedxliujre te gudzucajni dojl.

Dxejcti räjpni loj beñracxhuuga:

—Huistie, cua' xta'lu, huij rolijzlu.

⁷ Dxejcti huistie beñracxhuuga, siini rolijzni. ⁸ Che bahuii rebejn lojni, bidxeloduxhreni, gulä'preni xpala'n Dios, ni badeed yälñrabeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajcnii beñracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpeñ Israel, gurejzarenii lo mex näj Jesús näjza reni najc rexpejñpacni. ¹¹ Che bahuii rebeñ guidoo, ni laa refarisee, xhi cayujñ Jesús, räjpreni loj rexpejñpac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpeñ Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcnii, niluxh rebejn racxhuu ni'c rquiinreni chu gusiajcnii. ¹³ Colchäj te colchaseed xhi säloj diidxre ni caj loj reguijtz: “Yälñrulaslajz rlazä, dina rlazä guniidxtu guidxaa loä.” Sa'csi narä dina niädtedxä rebeñsa'c, narä siädtedxä rebeñdojl te gusiechla-jzreni.

Gunabdiidxreni xcuent yälñrucua'n

(Mr. 2:18-22; Lc. 5:33-39)

¹⁴ Dxejcti biääd rexpejñpac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn̄paclu gucua'n, ä?

¹⁵ Räj̄p Jesús lojreni:

—Che ruch̄naa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ 'Rut gundi remiend te ladbiejw con te la' ladcoob sa'csi sixu'n ladcoobga, sutiäjsr̄uni ladbiejwga, sajc xhiroobru cadro biräjs̄ga. ¹⁷ Niclaza gac guida' bincoob neñ reguidbiejw, sa'csi reguidbiejw siräjs̄ni dxejc sixe' bin, sinijtza reguijdga. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudaj̄n xhajb Jesús
(Mr. 5:21-43; Lc. 8:40-56)

¹⁸ Lāl ni caniini rediidx̄ga, biäd te dade' ni rnibee neñ guidoo xten rexpejn̄ Israel. Bazuxhijbni nez loj Jesús räj̄pni:

—Entis gujt xindxa'pä. Gudaa, badzuub ñaalu yej̄cni te guibañsacni.

¹⁹ Dxejcti huisu Jesús, sanäni Jairo. Näj rexpejn̄pacni sana-jlreni. ²⁰ Luxh guyu' te gunaracxhuu nani agujc tzubitio'p ijz cayaj̄cni yälguidxbäi. Bidzuj̄ni nez dejt̄z Jesús, gudaj̄nni ro' xhajbni, ²¹ sa'csi bejn̄ni xhigab neñ lastooni: “Palga sajc canätis ro' xhajbni, siacä.” ²² Dxejc gubiré Jesús bahuiini loj gunaaga, dxejc räj̄pni:

—Gulecdxilajzlu xindxa'pä. Yäl̄rililajz xtenlu abasiaj̄clu.

Luxh lagajc dxejc biajc gunaaga.

²³ Cheni biu' Jesús rolijz dade' nani rnibee neñ xquidoo xpen̄ Israel, bahuiini rebejn̄ ni rōl bizej̄ näjza xhidaj̄l rebejn̄ ni cabedxa' cayoon, li te bieȳ cayajc, dxejc ²⁴ räj̄pni loj rebejn̄ga:

—Colguibicaj. Nagayejstis dxa'pga, gaj̄dni guet.

Dxejc rebejn̄ga alga ruxhiznäj̄reni Jesús. ²⁵ Cheni abirii rebejn̄ neñ yu', biu' Jesús, gunaazni ñaa dxape', dxejc huistie dxape'ga. ²⁶ Dxejcti bire'ch diidx̄ga guiraa neñ reguej̄dx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinaj̄l tio'p bejn̄ni nani di fii. Rbedxa'reni roonreni räj̄preni:

—Balaslajz nuure, Xi'n toDavid.

²⁸ Che bidzuj̄n Jesús cadro caya'nni, gubigreni lojni. Dxejcti gunabdiidx̄ Jesús lojreni, räj̄pni:

—¿La rililajz̄tu sajc gunä ni rniabtu?

Redade'ga basejc diidx̄, räj̄preni:

—Sajc gunluni, Dad.

²⁹ Dxejcti gudaj̄nni balojreni, räj̄pni:

—Sugacni si'cpacni rililajz̄tu.

³⁰ Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacheedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro biajc baloj rebejn̄ga, biääd sgaii bejn̄ biädnäreni te gop loj Jesús. Yu' xp̄rit beñdxab neñ lastoo bejn̄ga.

³³ Che barilaagw Jesús xp̄rit beñdxab neñ lastoo beñgopga, guslogajcni caniini. Rdxeloduxh rebejn̄ räjpreni:

—Gajdpacnu guihuii sa' redzuunre lajdx rexpejn̄ Israel.

³⁴ Dxejc reben̄ guidoo ni najc refarisee, räjpreni:

—Rbääni rexpr̄it beñdxab con yäl̄rnibee xten beñdxabro.

Rulaslajz Jesús rebejn̄

³⁵ Gudejd Jesús guiraa reguedxro näjza reguedxbäz, bäsule'ni xtidx Dios neñ reguidoo xten rexpejn̄ Israel. Basääbni diidx xten xcäl̄rnibee Dios. Basiajczani guiraloj yäl̄racxhuu, guiraloj yäl̄guijdx ni rajc bejn̄ neñ reguejdxga. ³⁶ Che bahuiini loj reben̄ xhidajl biaduxhni rebejn̄ga sa'csi rdebya' lajzreni, rac-huin lajzreni, najczeni si'c najc rexiil nani di ga'p baxtoor.

³⁷ Dxejcti räjpni loj rexpejn̄pacni:

—Guliipac xhidalduxh beñ guedxliuj di gan xtidxä, luxh guxii najc reni guluiireni; najcni si'c gäj̄l ni agojl guilia', niluxh ruti mos ni guilia'ni. ³⁸ Col̄nab lo Dad nani najc xtenni guedxliujre te guxhal̄ni rebejn̄ ni sajc guluii reben̄ guedxliujre, gacreni si'c mos ni rlia' gäj̄l.

10

Gule Jesús guitzubitio'p rexpejn̄pacni

(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejn̄pacni, badeedni yäl̄rnibee lojreni te gurilaagwreni rexpr̄it beñdxab lastoo bejn̄ näjza te gusiajcreni guiraloj yäl̄guijdx näjza yäl̄racxhuu.

² Laj reguitzubitio'p rexpejn̄ni ni guleni najc: Simón, ni laaza Pedr; Andrés bejtz Simón; Jacobo xi'n Zebedeo; Juan bejtz Jacobo; ³ Felipe; Bartolomé; Tomás; Mateo, ni najc colectoor; Jacobo, xi'n Alfeo; Lebeo ni rniireni Tadeo; ⁴ Simón, te bejn̄ ni yu' loj recananita; Judas Iscariote, nani bateed Jesús ladz̄naa rebejn̄ nani rdxe'ch lojni.

Baxhal Jesús rexpejn̄pacni gutie'chreni diidx

(Mr. 6:7-13; Lc. 9:1-6)

⁵ Guitzubitio'p rebejn̄re baxhal̄ Jesús. Balijdxnireni räjpni:

—Na'c chäätu nez cad yu' rebejn̄ ni di gumbee Dios. Na'c jiu'tu lajdx reben̄ samaritan̄. ⁶ Col̄chäxgaa lo rexpejn̄ Israel nani agunij̄t neñ dojl̄. ⁷ Col̄chäj̄, col̄zäbdiidx lo rebejn̄, colye'tz

lojreni xcäl̄rnibee Dios abidzungajxh. ⁸ Colgusiajc beñ racxhuu, colgusiajc tiejxh rebejn̄ ni ral̄ guejch tiejxhreni, colguspajn̄ beñgut. Colgurilaagw xp̄rit beñdxab lastoo rebejn̄. Ligaj cua'tu yäl̄rnibee, ligajza colyejn̄ dzuun.

⁹ Räjpzani:

—Na'c chanätu oor, niclaza pla't, niclaza coobr nen xdobdäjltu, ¹⁰ niclaza guiexh na'c chanätu lo nejz. Na'cza chanätu tio'p xhajbtu, nicla gura'ch, nicla baston̄ sa'csi bejn̄ ni rujn̄ dzuun nungäj̄l̄ xca'ni xhi gauni.

¹¹ Räjpzani:

—Che guidzujntu xhitis te guedxro, xhitis te guedxbäz, colquuil te beñsa'c. Rolijztisni coljia'n dxejli ni jiunejztu guejdxga. ¹² Cheni jiu'tu neñ yu', colnii xtidx Dios lo rebejn̄ga. ¹³ Palga najcreni bejn̄ ni numbee Dios, sujia'n yäl̄rbedxilajz loj rebejn̄ga. Niluxh palga direni gac beñsa'c, naaddireni xca'reni xtidx Dios, suguibi' yäl̄rbedxilajzga lojtu, coljiunejz ro'c. ¹⁴ Palga direni gusaan jiu'tu rolizreni, palga di rlajzreni gucuadiajgreni xtiidxtu, dxejc coljiunejz roliz bejn̄ga, o coljiunejz guejdxga, dxejc colcuijb guxhuj ni'tu si'c te seen gulälazreni xtidx Dios. ¹⁵ Rniliäpac lojtu, dxej ni gun Dios xcäl̄guxhtisni, te yäl̄guxhtisoru gun Dios rebejn̄ga, quela yäl̄guxhtis ni gujc rebeñ guedx Sodoma näj Gomorra.

Yäl̄rusacsí ni siääd

¹⁶ Räjpzani:

—iCol̄huiire! Narä suxhalä la'tu si'c xile' nez loj reloob, ni'cni colgacnasiñduxh si'c najc te bäl̄, colyajza nadolajz si'c te palom. ¹⁷ Col̄natiro rebejn̄ sa'csi suteedreni la'tu ladzñaa rexcuxhtisreni, siguijnzareni la'tu neñ xquidooreni. ¹⁸ Sinäzareni la'tu nez loj regubier, nez loj reñei xcuent rextidxä, te gusule'tu xtidxä nez lojreni näjza nez loj rebejn̄ nani di gumbee Dios. ¹⁹ Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' neñ lastootu, laani guinii neñ lastootu.

²¹ 'Luxh rebejn̄ suteedreni lagajc bejtzreni ladzñaa reni ju'treni. Redad suteedreni lagajc xi'nreni, rexi'n bejn̄ sidxe'chzareni lo xcuzajnreni te ju't bejn̄ xcuzajnreni. ²² Guiraa rebejn̄ guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn̄ gaan yäl̄nabajn̄ par tejpas. ²³ Che guirinajlreni la'tu te gusacsíreni la'tu neñ te guejdx, colguxun̄ ro'c, colchäj̄ stee guejdx. Rniliä lojtu, ditu gun gaan tedtu guiraa reguejdx xten rexpejn̄ Israel ansde jiääd Xi'n Dios ni gujc Niguii.

²⁴ 'Di te bejn ni casieedgaj be_nroru lo xmastrni, diza te mos gac be_nroru lo xlam_nni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlam_nni te gacni si'c najc xlam_nni. Palga rbälajreni Beelzebú nani rnibee be_ndxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räjzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzuj_n dxej guixal lojni, te fii chutis bejn lojni. Xhetiza te cos xhiga'tzdi ni di guidzuj_n dxej siejn diajg bejn xcuentni. ²⁷ Diidx nani rniä lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

²⁹ ¿La di bejn guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Räjzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa. ³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Räjzani:

—Na'c guntu xhigab siädnää yäl_rbedxilajz lo reben guedxliujre, xhet yäl_cuedxidi ni siädnää, yäl_rdxagdijl siädnää. ³⁵ Narä siädnää yäl_rdxagdijl te bi'n con xtadni; te dxa'p con xnanni; te gulijzni con xnansueegri. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä. ³⁸ Nani di guu xcruzjni, nalajznu tedni trabajw, jiädnajlni narä, di gacdi gacni xpenä. ³⁹ Nani guidxäl xcäl_nabaj_nni lo guedxliujre, sunitni yäl_nabaj_n xhaguibaa. Luxh nani gunijt xcäl_nabaj_nni lo guedxliujre xcuent rextidxä, sidxäl_ni yäl_nabaja'c xhaguibaa.

Gaan nani xca'ni
(Mr. 9:41)

⁴⁰ Räjpszani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä. ⁴¹ Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejnnga lagajc gaan ni xca' niguii ni rnii xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan ni xca' beñsa'cga. ⁴² Chutis nani gudeed mase te xhijgtis nis niäliuj xcuentä lo rebiuxe're, rniliäpac lojtu, direni gunijt, sica'pacreni nani nungäjl xca'reni.

11

Renani baxhal Juan Bautist loj Jesús
(Lc. 7:18-35)

¹ Che gulujx baluui Jesús rexpejnpacni xho gunreni dzuun, dxejcti biriini ro'c te saluiini, chasule'ni diidx lajdx rexpejnpacni.

² Juan yu' neñ latzguiib. Che biejn diajgni xhi cayujn Jesús, baxhalni tio'p xpejnpacni ³ te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn?

⁴ Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu. ⁵ Reni di fii, ruhuiireni; reni di sa, arsi-ajreni, reni ral tiejxhni, abiajc tiejxhreni; reni di jien diajg, ariejn diajgreni; rebengut, ahüäjzreni, gubañsacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn neñ dojl. ⁶ Chicbaa renani di jieed narä.

⁷ Cheni sii rebejnnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolijz rereii. ⁹ La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni. ¹⁰ Laa Juan nani rusä't ni bacuaa lo reguijtz cadre caj scree:

Narä suxhalä te niguii nani guinii xtidxä nez lojlu; laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te beñsacduxh loj Dios si'c ni najc Juan Bautist. Niluxh bejn nani najc beñ huinru lo xcälrnibee Dios xhaguibaa, bejnnga maazru sajcnii loj Juan.

12 'Cheni gucli dxej ni gusloj rusule' Juan Bautist diidx najli, yu'duxh reni rlaizpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rlaizreni cuäxuuni xcälrnibee Dios. 13 Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. 14 Palga rlaiztu chalilajztu, lagajc Juan najc Elías, niguii xten Dios nani bia'n diidx jiääd. 15 Nani sobdiajg diidx, gucuadiajgni.

16 '¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadro rdo', rbejdxreni lo sa'reni, 17 rniireni: "Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon." 18 Sa'csi che biääd Juan dini niajw dizani niä', luxh räjp rebejn najcni te xpejn beñdxab. 19 Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätejzani bin, najcni xamigw rebeñdojl näjza reniguii ni ruquijx xcuent reyuj ni rajx lo gubier." Luxh loj rebejn ni najc xpejn Dios yuduxh xcäl'najn Dios, ni'cni baxhałni guiro'p rebejnre.

Reguejdx gyalajz

(Lc. 10:13-15)

20 Dxejcti gusloj Jesús gudilnäjni rebeñguejdx cadro benduxhni remilaagwr, sa'csi naaddireni gusiechlajzreni xtojłreni, sanuutis nabajnreni neñ dojl. Dxejcti räjpni:

21 —¡Gunatiru guedx Corazín! ¡Gunatiro guedx Betsaida! Paru neñ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojłreni, cadxejli niajcwreni neñ godx, nidäáb cobdäj yejcreni. 22 Luxh rniä lojtu: che guidzujñ dxej ni gun Dios xcälguxhtisni, sidejdrutu castiigw loj rebejn ni guläjz guedx Tiro näjza guedx Sidón. 23 Luj guedx Capernaum di gunlu xhigab chäslu xhaguibaa; jiajt neñ baa jiajblu, sa'csi paru neñ guedx Sodoma niajc sa' remilaagwr nani gujc guedxlajdxlu, pet najli tresijc guejdxga. 24 Luxh rniä lojtu, dxej ni gun Dios xcälguxhtisni, trabajw-duxhru tedtu loj rebejn Sodoma.

Coltaa loä, te gusilajztu

(Lc. 10:21-22)

25 Laa dxejcti räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebeñnajn, lo rebejn ni rachee, te baluiiluni loj rebeñnadolajz ni najc si'c biuxbäz. 26 O'n. Guliini, Xtadä, sa'csi rujnlu xhigab si'c najc hueen gacni.

27 'Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni,

xtebtis xingaanni, näjza loj renani gudeed xingaanni gumbee xtdadni. ²⁸ Coltaa loä guiraatu nani abadxajg, nani rsina', narä sunidxä yälrusilajz lojtu. ²⁹ Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä beñnayedxlajz neñ lastoä, ni'cni sidxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

12

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

¹ Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwrenini. ² Che bahuii reben guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäjł gunreni dxej nani rusilajz bejn.

³ Luxh laani räjpni lojreni:

—¿La gajdte goł xhi caj loj reguijtz xcuent ni bejn toDavid che gulannäjni rexpejn ni, ä? ⁴ Biu'reni xquidoo Dios, gudajwreni yätxtiil nani di nungäjł gauni, nicla laani, niclaza rebejn nani sanäni, sa'csi yätxtiilga rebixhojztis rajwni. ⁵ O ¿la gajdte goł lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzunreni niluxh xhet dojłdi rujnreni. ⁶ Narä rniä lojtu, ree suga' tej nani saj cru loj guidoo. ⁷ Paru niacheetu xhi säloj dee: “Yäl rulaslajz rlazä, xhet yälrejtdi guidxaa”, ditu nucuaquij redee ni xhet bejndi. ⁸ Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani

(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni. ¹⁰ Ro'c suga' te bejn ni gubijdz te naani. Luxh sa'csi caguuilreni xho gucuaujreni Jesús, gusloj canabdiidxreni lojni, räjpreni:

—¿La rusaan leii gusiaj cni beñ racxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcni tebloj si'c najc stelaad naani. ¹⁴ Dxejcti birii reben guidoo ni laa farisee, bachagsa'zreni te bia'nreni diidx ju'treni Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu.

¹⁶ Dxejc räjpni lojreni:

—Na'cpac gäbreni chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa'; rudza jiejni diajni xse'ni lad nezyuj.

²⁰ Dini qui'ch nicla te nijt ni cabiejc, dizani gusui te duxiil ni cayujn guxh, dxejli che gunni gaan guinibeeni yälguxhtis.

²¹ Lajtisni sustioob lastoo reben ni digac xpejn Israel.

Rucuaquijreni Jesús rajpni yälrnibee xten bendxab

(Mr. 3:19-30; Lc. 11:14-23; 12:10)

²² Dxejcti biädnäreni loj Jesús te bejn ni di fii, dizani guinii, yu' te bendxab lastooni. Dxejcti basiajc Jesúsni, te gujc guniini, te gujca bahuiini. ²³ Guiraa rebejn bidxelojreni, räjpreni:

—¿Xhaa laa Xi'n toDavidni, ä?

²⁴ Che biejn diajg reben guidoo ni laa farisee rediidxga, räjpreni:

—Bejnre rbää rebenxab con yälrnibee xten Beelzebú ni rnibee loj rebenxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnä j sa'reni, sinitlojreni.

²⁶ Sigajcza palga bendxab rbää sabendxabni, silia' sa'reni, dxejc ¿xho gac chanuu xcälrnibeereni? ²⁷ Palga narä rbää rebenxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää rebenxab con Xpriet xten Dios, guliipacni abidzujn xcälrnibee Dios lojtu.

²⁹ 'Bahuilaare. ¿Xho gac jiu' te bejn cuan roliz te bendaan, xho gac cuanni xhixten bejnga, palga dini gulibxgaani bendaanga? Che abilib bejnga, sajc cuanni rehxixten bejnga.

³⁰ 'Nani xhet yu'di xladä, rdxe'chni loä. Nani di jiädna j narä, rutie'chni reni siädna j narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäjl lajzni xtebtis yälrnijaj Sprit Dxan xten Dios di Dios gusiäjl lajzni. ³² Chutis ni guinii xhi te diidx yälrnijaj Xi'n Dios ni gujc Niguii sajc gusiäjl lajzni, luxh chutis ni guiniyaj Sprit

Dxan xten Dios, di Dios gusiäjł lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu beņguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejn rniitis rexhigab ni yu' neņ lastoo bejn. ³⁵ Te beņsa'c rniini didxsa'c, sa'csi ganax xhigabsa'c yu' neņ lastooni, te beņguijdx rniitisni cosguijdx sa'csi ganax xhigabguijdx yu' neņ lastooni. ³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yälğuxhtis, ³⁷ sa'csi lagajc rextiidxlu sujn guinii Dios najclu beņsa'c, lagajc rextiidxlu sujn gunijtlu lo Dios.

Rebeņguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluii xleii to Moisés näjza rebeņ guidoo ni laa farisee, räjpreni loj Jesús:

—Mastr, nuurnu rłajznu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebeņguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰ Sa'csi lagajc si'cni guyu' Jonás xque' te bälro choņ dxej, choņ yääl, si'cza chu Xi'n Dios ni gujc Niguii neņ lastoo guedxliuj choņ dxej, choņza yääl. ⁴¹ Cheni gac yälğuxhtis xten Dios pet sistie rebejn ni siääd Nínive te fiireni gac yälğuxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeņ Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza reiņ xten rebeņ sur sistieni te fini gac yälğuxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac
(Lc. 11:24-26)

⁴³ Räjpszani:

—Cheni rii te spritdxab neņ lastoo te bejn, ricanzajni nez lo reybijdz, ritiilni cadro gusilajzni, per cad rdxäldini.

⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujņni si'c rdzujņ te bejn neņ te yu' ni naya neņni, naliobsa'cni, sucheeni, luxh rut rbäjzdi ro'c. ⁴⁵ Dxejcti

rijni, rixiini sgajdz sprit nani najc nadxuudxru lojni te jiadläznäjrenini neñ lastoo bejn̄ga. Dxejcti rxhinduxhru bejn̄ga lojni gujcn̄i galoo. Sigajcza gac rebejn̄ ni tre' lo guedxliujre n̄aj.

Xnan Jesús con rebejtzni
(Mr. 3:31-35; Lc. 8:19-21)

⁴⁶ Laḷ ni caninäjni rebejn̄, bidzujñ xnanni con rebejtzni, suga'reni rolä' rlanjzreni guiniireni lojni. ⁴⁷ Dxejcti biääd tej ni räjp loj Jesús:

—Xnanlu nājza rebejtzlu suga' rolä' rlanjzreni guininäjreni luj.

⁴⁸ Laani badzu'ni diidx lo bejn̄ga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani ñaani nez loj rexpejn̄pacni, räjpni:

—¡Redee najc xnanä redeeza najc rebetzä! ⁵⁰ Chutis nani rujñ si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn̄ nani rbe'c binij
(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn̄ bire' cadro suga'ni, sas biu'ni neñ te barcw, ro'c gurejni. Dxejcti rebejn̄ gurej nez lo plaii. ³ Dxejc gusloj caguluii Jesús con recuent, räjpni:

—Coḷcuadiajg. Birii te dade' ni rbe'c binij te cue'cni binij.

⁴ Laḷ ni cabe'cni binij yu' binij ni bitejb gajxh nez ro' nesiuñ, biääd remane' ni rutajt, sas gudajwreni binijga. ⁵ Yu' binij ni bitejb nez neñ reguiñ cadro guxii yu' yuj. Gulengajc binijga sa'csi direni nibej jiaät neñ yuj. ⁶ Che birii gubijdx, bigoḷreni sa'csi xhetiza xlobaani, dxejc gubijdzni. ⁷ Yu'za binij ni bitejb neñ reguejch. Che guroob reguejchga, dini nusaan niroob regäjl'e, gubijdzitireni. ⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

Xhi pajr najc recuent xten Jesús
(Mr. 4:10-12; Lc. 8:9-10)

¹⁰ Dxejcti gubig rexpejn̄pacni, gunabdiidx lojni, räjpreni:

—¿Xhicuent rusule'lu diidx loj rebejn̄ con recuent?

¹¹ Dxejcti badzu' Jesús diidx räjpni lojreni:

—Sacñj Dios la'tu te gacheetu recos xhiga'tz xten xcäl'rnibee Dios xhaguibaa, luxh laareni digacdi gacheerenini. ¹² Chutis ni arajp yäl'racbee, sica'runi te gapruni yäl'racbee. Sas nani

guxii rajp yälracbee, guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. ¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu,
sidxelojactu, niluxh ditu fii.

¹⁵ Sa'csi gualajz rebejnre, lastooreni najc si'c te guij,
di diajgreni jiejn,

luxh niäuzä balojreni, didi fisa'creni con balojreni,
didi jiejnza diajgreni, didi gacbeeza lastooreni,
didi gusiejch lajzreni guibi'reni loä te gusiäcä lastooreni.

¹⁶ 'La'tu colguibalaznä j balojtu sa'csi rhuisa'ctu, riensa'cza diajgtu. ¹⁷ Rniliäpac, xhidajl redade' ni gunii xtidx Dios, näjza xhidajl beṇsa'c rlazduxh nuhüi sa' recos ni cahuiitu, luxh direni nuhüiini, rlajzreni niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸ 'Colcuadiajg xhi säloj xcuent bejn nani rbe'c binij. ¹⁹ Rebejn nani rucuardiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesuyj; riääd beṇdxab rudzucajni rediidx nani biu' neṇ lastooni. ²⁰ Rebinij nani bitejb nez neṇ reguij, najc si'c rebejn nani rucuardiajg diidx, gustli rca'reni diidxga, ²¹ luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi rucuardiajgreni xtidx Dios, rusiejch lajzreni, rbälazni diidxga. ²² Rebinij nani gurej neṇ reyaguejch säloj rebejn nani rucuardiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios neṇ lastoo rebejnre, dini gusaan gac te cosechsa'c neṇ lastoo rebejnre. ²³ Dxejc rebinij nani rtejb lo reyusa'c, ni'c najc si'c rebejn nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzoo.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. ²⁵ Laḷ nagaguejs bejnṅa, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnṅa, dxejcti sääni. ²⁶ Cheni gulejn

triuuga, birii doj lojni, dxejc biricaj nājza cuanguejch ro'c. ²⁷ Dxejcti rājṗ remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸ Rājṗ xlamreni: “Te bejṗ ni rdexchlajz loä biädle'cchani.” Dxejcti gunabdiidx rexmosni rājṗreni: “¿La rlajz guebḷu cholädxa'nu recuanguejchga, ä?” ²⁹ Dxejc rājṗ xlamreni: “Na'c, sa'csi che guiliädxtu cuanguejchga, nāgajza triuu guiliädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajṗ gutie'reni triuu chucheeni neṗ yu'.”

Xcuent bedz muxhtas
(Mr. 4:30-32; Lc. 13:18-19)

³¹ Bijza Jesús stee cuent rājṗni:

—Xcälṗnibee Dios xhaguibaa najcni si'c te bedz muxhtas nani cue'c te bejṗ lo xyujni. ³² Guliü bejdzga najc bāze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riäd remane' ni rutajṗ riädyujṗ xpitiädzreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, rājṗni:

—Xcälṗnibee Dios xhaguibaa najc si'c levaduur nani rugu'ch te gunaa lo choṗ mediid arin, dxejc ni'c rusaguijṗni guideb cojḷga.

Xhicuent baluii Jesús ganaxtis con cuent
(Mr. 4:33-34)

³⁴ Baluii Jesús guiraa rebejṗ ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejṗni te guzojḷ xtidḷ dade' ni gunii xtidḷ Dios che bacuaani lo reguijṗ, rājṗni: Suiyā diidx con recuent, suiyā diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch neṗ triuu

³⁶ Dxejcti basadiidx Jesús rebejṗ, biu'tini neṗ yu' cadre bire' rexpejṗpacni lojni, rājṗreni lojni:

—Basule' loonu xcuent cuanguejch ni guyu' loniaa.

³⁷ Rājṗ Jesús lojreni:

—Bejṗ nani rbe'c retriusa'c, najc Xi'n Dios ni gujc Niguii; ³⁸ loniaaga najc guedxliuj; retriusa'c najc rebejṗ nani najc xpejṗ Dios, nani rucudiajḷ xtiidxni; recuanguejchga najc rebejṗ ni najc xpejṗ bendxab. ³⁹ Bejṗ nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguejch te

chääni lo guiboo te checni, sigajcza gac che gac fis guedxliuj.
⁴¹ Xi'n Dios ni gujc Niguii suxhal rexanglni te jiädgutie'reni, te
 jiädlääreni lo xcälrnibeeni guiraa renani rujn riajb bejn nen
 dojl, näjza reni rujn cosguijdx. ⁴² Susälreni rebejnnga nen te
 or cadro cayecduxh. Ro'c sonduxhreni, sauya'reni läijyreni.
⁴³ Dxejcti reben'sa'c sidimbicha'reni si'c gubijdx lo xcälrnibee
 Xtadreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räjpzani:

—Si'cza xcälrnibee Dios xhaguibaa najc si'c te cossacduxh ni
 naga'tz lo te yuj loniaa. Bidxäl te dade'ni, luxh bacuatzsac-
 nini. Dxejcti rbalajzni, huijni, huito'ni guiraa xhixtenni te
 rajpni meel siini yujga.

Perl nani sacduxh

⁴⁵ Räjpzani:

—Xcälrnibee Dios xhaguibaa najcza si'c najc te dad rapduxh
 nani caguiil perlsa'c te siini. ⁴⁶ Che bidxälni te perlsa'c, tejni
 sacduxh, bato'ni guiraa xhixtenni te gusiini perlga.

Guijxh ni rniaaz bäjl

⁴⁷ Räjpzani:

—Xcälrnibee Dios xhaguibaa najcza si'c te guijxh ni rusäl
 bejn lo nis te rniaazreni giralaj cuaa bäjl. ⁴⁸ Cheni agudx-
 ajni, rbäärenini nez ro' nisdoo, te ro'c rbereni loj rebäjl.
 Rebäjl ni najc hueen rucheeni nen te dxijm; nani di gac
 hueen rusälrenini te laad. ⁴⁹ Si'cza gac che gac fis guedxliuj;
 sirii rexangl Dios te sudzucajreni reben'guijdx lo reben'sa'c.
⁵⁰ Dxejcti susälreni reben'guijdx nen te or cadro cayecduxh; ro'c
 sonduxhreni, sauya'reni läijyreni.

Te ben rajp

⁵¹ Dxejcti gunabdiidx Jesús lojreni, räjpni:

—¿La racbeetu guiraa ni cania lojtu, ä?

Dxejcti räjpreni:

—O', racbeenuni Dad.

⁵² Dxejcti räjpni lojreni:

—Cheni rsieed te bejn nani najn leii xcuent yälrnibee
 xten Dios xhaguibaa, najcni si'c te lam nani rajc rbää lo
 rexcäl'nasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni.
⁵⁴ Huijni lagajc lajdxni. Ro'c gusloj caguluiini nen
 xquidobäzreni ro'c. Dxejcti rdxeloduxh reben' ro'c, räjpreni:

—¿Caro bisieedni reyäl_nnajnre? ¿Xho rajc rujnni remilagwr?
⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacoob, José, Simón con Judas.
⁵⁶ Luxh rebisiajn_ni rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojnreni:

—Guiraa rebejn rinälajz te niguui nani rnii xtidx Dios, biädla reben lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc neñ redxejga Herodes, ni laaza tetrarca, biejn diajni diidx xcuent ni cayujn Jesús. ² Dxejc räjpni lo rexmosni:

—Dee najc Juan Bautist. Pet agubansacni lo rebengut, ni'cni rajpni yäl_nribee te rujnni remilagwr.

³ Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääl bejtzni Felipe. ⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguui ni rnii xtidx Dios.

⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guini-abtisl.

⁸ Dxejcti gunaaga, abalijdx xnannini, räjpni lo Herodes:

—Loj te platón baniidx bitiuyejc Juan Bautist.

⁹ Diidxga benhuin lastoo rei Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist neñ latzguiib. ¹¹ Sas biädnäreni yejcti lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujn rexpejn Juan sanäreni togoolga te huicua'tzrenini. Dxejcru huisa'nreni diidx loj Jesús.

Bayaan Jesús gaii mil bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee

rebejn caro sääni, huinajlreni Jesús lo yuj. Guiraa neñ reguejdxga biriireni. ¹⁴ Che birii Jesús neñ barcw, bahuiini loj xhidalduxh bejn, dxejc balazlajznireni, basiajcní rebejn nani racxhuu. ¹⁵ Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajl. ²⁰ Guiraaareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹ Renani gudajw najcreni si'cti gaii miñ niguii, xhet näjdi regunaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²² Sas gunibee Jesús biu' rexpejn pacni neñ barcw te gani-dreni tedreni stee lad nis lañi casadiidxni rebejn. ²³ Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojl guxhijn, ro'c sugaxteb Jesús. ²⁴ Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni. ²⁵ Rsildooru gubig Jesús, bidzujñni lojreni, siädsajni lo nisdoo. ²⁶ Che bahuii rexpejn pacni siädsajni lo nisdoo, bidxejbreni, räjpreni:

—Colhuii te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yälirililajz. ¿Xhicuent guctio'p lajzlu?

³² Che huä'preni neñ barcw, guläzgjajc bej. ³³ Dxejcti renani säa neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx Genesare't
(Mr: 6:53-56)

³⁴ Che gudejdreni lo nis, bidzujñreni nez lo reyuj xten Genesare't. ³⁵ Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

15

Nani ruxhin bejn
(Mr: 7:1-23)

¹ Dxejcti gubig gaii rebejn nani ruluii leii näjza rebejn guidoo ni laa farisee. Siädreni guedx Jerusalén, räjpreni loj Jesús:

² —¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib ñaareni che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴ Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵ Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” ⁶ Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷ ¡Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸ Rebenguejdxre con ro'reni rliä'preni xpala'nä niluxh las-tooreni zijt suga' nez loä.

⁹ Xlia'si rajñreni narä, sa'csi ruluiireni si'c xtidxä reyälrnibee xten reben guedxliuj.

¹⁰ Dxejcti gurejdxni rebejn, räjpni lojreni:

—Colcuadiajg, colyacbee. ¹¹ Nani riu' ro' bejn di guxhin bejnga, sanga nani rii ro' bejnga ni'cni ruxhin bejnga.

¹² Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii canejz chää stee lotiä'p, guiro'preni sitejbreni neñ te gueed.

15 Räjƿ Pedr loj Jesús:

—Basule' cuentre loonu.

16 Räjƿ Jesús:

—¿La nájza la'tu ditu gachee, ä? 17 ¿La ditu gachee guiraa ni rajw bejn ru' xque'ni, dxejcti che rdejdni xque'ni, abigo'n̄ni? 18 Niluxh diidx nani rii ro' bejn, nen̄ lastoo bejn riini; dee ni ruxhin̄ bejn. 19 Sa'csi nen̄ lastoo bejn rii rexhigabguijdx xten rebejn̄ ni rugu't sa'ni; xten rebejn̄ ni rusguee gunaa; xten rebejn̄ ni rusguee cháäl sa'ni; xten rebejn̄ ni rbajn; xten rebejn̄ ni rnii didxxhii lo sa'ni; xtenza rebejn̄ ni rutijl̄ sa'ni. 20 Laa sa' recosre ni ruxhin̄ bejn. Che dini gusoob recostumbr xte yälrdiib̄ naani, di ni'c guxhin̄ bejn.

Te gunazit nani huililajz xtidx Jesús

(Mr. 7:24-30)

21 Biriiti Jesús ro'c, sääni nez región xten Tiro nájza Sidón. 22 Nejzga rbäjz te gunaa cananee, cabedxa'ni biädni lo Jesús, räjƿni:

—Dad, xi'n toDavid, balaslajz narä. Xindxa'pä yu' xpej bejdxab lastooni, niluxh cagusacsíduxhnini.

23 Xhet räjƿdi Jesús lojni. Dxejcti biädndubdxh rexpejn̄pacni lojni, räjƿreni:

—Barilaagw gunaare, didi rbedxa'ni siädnajni luj.

24 Dxejcti räjƿ Jesús lojni:

—Dios baxhal̄ narä lojtis xpeñ Israel nani agunijt nen̄ dojl̄.

25 Dxejcti gubig gunaaga, bazuxhijbni nez loj Jesús, räjƿni:

—Dad, gucnäj narä.

26 Dxejc räjƿ Jesús lojni:

—Di gac hueen xca' bejn̄ xcuxtiil rexi'nni gusal̄nini lo rebä'cw.

27 Dxejc räjƿ gunaaga lojni:

—Guliini Dad, nájza rebä'cw rajw te la' yätxtiil ni rtejb lo mex xten xpaxhuaanni.

28 Dxejcti räjƿ Jesús lojni:

—Nane', lacti guroob najc xcäl̄rililajzlu. Sugac si'cni rlajzlu.

Lagajc dxejc biajc xindxa'pni.

Basiajc Jesús xhidal beñ racxhuu

29 Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni. 30 Xhidajl bejn̄ bidzujñ cad sobga'ni. Siädnäreni reben̄ ni rajc ni'ni, reben̄ ni najc lotiä'p, reben̄ gop, reben̄ ni xheti naani, nájza xhidaltro beñ racxhuu, bidzunnäjrenini nez loj Jesús. Dxejcti basiajcnireni. 31 Ni'cni lacti bidxeloduxh reben̄ xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'p̄reni xpala'n̄ Xtios rexpeñ Israel.

Badeed Jesús xhi gudajw tajp mil bejn

(Mr. 8:1-10)

³² Gurejdx Jesús rexpejn_{pacni} räjpni lojreni:

—Riaã rebejn_{re} sa'csi agujc choñ dxej yunäjreni narä luxh xhet ca'direni gaureni. Di rlazä guxhaläreni jüireni rolizreni palga gajdreni gau didi guidxajgreni lo nezyuj.

³³ Dxejcti räjp rexpejn_{pacni} lojni:

—¿Xho guidxälnu xhi gau rebeñ xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn lo yuj. ³⁶ Dxejc cua' Jesús guigajdz yätxtiilga näjza rebäjł, badeedni xquixtios lo Dios dxejc gula'ni reyätxtiilga näjza rebäjłga badeednireni loj rexpejn_{pacni}. Dxejcti laareni gudisreni yätxtiilga con rebäjłga lo rebejn xhidajłga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni. ³⁸ Renani gudajwga najc si'cti tajp mil bejn, niluxh xhet näjdi regunaa niclaza rebiuux bigab. ³⁹ Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

16

Rebeñ guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

¹ Refarisee näjza resaducee bidzujn_{reni} lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlazjreni guiga' Jesús. ² Dxejc badzu' Jesús diidxre räjpni lojreni:

—Che rajł gudxej, rniitu: “Saru gac te dxej guixee sa'csi naxniaa xhaguibaa.” ³ Che rajł rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseñ ni rien xhaguibaa, luxh ditu gumbee xhi säloj reseñ xcuñ redxejre, nalajznu recos ni cayajc.

⁴ Rebeñ guijdxre, rebeñ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejn_{pacni} stelaad nisdoo biäl-lajzreni ninäreni yätxtiil. ⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.” ⁸ Luxh gucbee Jesús xhigabga, dxejcräjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinduxh najc xcälirililajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii miñ bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap miñ bejn, ä? ¿Bal dxijmni batie'tu? ¹¹ ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxejcro gucbeerene dini niäjp: “Colnati levaduur xten yätxtiil.” Laani caniini: “Colnaáti yälrlului xten refarisee näjza resaducee.”

Bicäjp Pedr Jesús najc Cristpac

(Mr: 8:27-30; Lc. 9:18-21)

¹³ Che bidzujñ Jesús región xten Cesarea xten guedx Filipino, gunabdiidx Jesús loj rexpejn pacni, räjpni:

—¿Chu naj rebejn nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn di baluii dee lojlu, Xtadätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrnibee lojlu te gulijdxlu rebejn nani ahuiliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn pacni laani najc Guejb Crist.

Gunii Jesús xho guetni

(Mr: 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejn pacni, guniini lojreni xho nanabpac chääni guedx Jerusalén te ro'c tedni trabajwduxh ladzñaa rebeñgool xten guidoo, ladzñaa rebixhojz, näjza rebejn ni najñ xleii Moisés. Guniizani sugu'trenini, niluxh ni riojn dxej sibansacni lo rebeñgut.

²² Dxejcti huinä Pedr Jesús te laad, gusloj cadilnäjnini, räjpn:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpn lo Pedr:

—¡Gubicaj loä beñxab! Na'c rusiejytislu loä. Luj dilu gun xhigab xten Dios, alga xhigab xten rebeñguedxliuj rujnlu.

²⁴ Dxejcti räjpn Jesús loj rexpejn pacni:

—Palga yu' chu tejturu rälaz guirinajl narä, sucuälazni lagajc laani, suguuni xcruzni, nalaznu tedni trabajw, sujiädnajlni narä. ²⁵ Sa'csi nani rälaz gunni gaan xcäl nabajnni, sunijtnini. Luxh nani runijt xcäl nabajnni por narä, sidxälni xcäl nabajnni par tejpas. ²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? ²⁷ Sa'csi narä Xi'n Dios ni gujc Niguii siälä lo yälrdimbicha' xten Xtadä con rexanglni, dxejcti siguixä tebgaj bejn si'ctis ni gujc xtzuunni. ²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälrnibeä.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinä Jesús Pedr, Jacobo, con Juan betz Jacobo, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl. ³ Dxejc bahuigajczeni loj Moisés nájza loj Elías, cayujyreni diidx con Jesús. ⁴ Dxejcti räjpn Pedr loj Jesús:

—Dad, ¡huenduxh suga'nu ree! Palga rälazlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

⁵ Lalni canii Pedr, biäjt te za ni rdimbicha' guideb gabireni; nen zaga biejn te xse' ni räjpn:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶ Che biejn diajg rexpejn pac Jesús diidxga, bazuxhijbreni, basajbreni lojreni lo yuj, bidxebduxhreni. ⁷ Dxejcti gubig Jesús lojreni, batzuubni ñaani yejcreni, räjpn:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäj dini.

⁹ Cheni sayäjtreni yejc dajnga, gunibee Jesús lojreni, räjpn:

—Rutlojdi gäbtu xhini'c bahuiitu dxejli ni guibañsacä narä Xi'n Dios ni gujc Niguii lo rebeñgut.

¹⁰ Dxejcti gunabdiidx rexpejn pacni lojni:

—¿Xhicuent rnii rebejn ni najn xleii Moisés ganid Elías nanab jiäd, ä?

11 Badzu' Jesús diidxre, räjpni:

—Guliini siädxgaa Elías, laani gusa'cni guira'ti, 12 niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlajzreni, basacsíduxhrenini. Sigajcza gunnäjreni narä Xi'n Dios ni gujc Niguüi, susacsíduxhreni narä.

13 Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej beñdxab

(Mr. 9:14-29; Lc. 9:37-43)

14 Cheni bidzujnreni cadro tre' xhidajl bejn, gubig te bejn lojni bazuxhijbni, dxejc räjpni:

15 —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälgujidxgani, yu' huält rtejbni lo guiboo yu' huält rtejbni lo nis. 16 Biädnäáni loj rexpejnpaclu, luxh di niajcdi nusiajrenini.

17 Jesús badzu' diidxre lojreni räjpni:

—Beñgujidx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

18 Dxejcti gudilnäj Jesús beñdxab ni yu' lastoo biuuxga, gubeeeni biriini, lagajc dxejc biajc biuuxga.

19 Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu beñdxab neñ lastoo biuuxga?

20 Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrlilajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpacu, xhetliidi yu' ni di gacdi guntu. 21 Niluxh sa' beñdxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

22 Lañi sasajreni nez región xten Galilee, räjp Jesús:

—Suteedreni narä Xi'n Dios ni gujc Niguüi ladzña rebeñdojl te gusacsíreni narä. 23 Niluxh sugu'treni narä, dxejc ni riojn dxej sibansacä lo rebeñgut.

Che biejn diajgreni diidxga, guc-huinuxh lajzreni.

Gudijxni impuest xten guidoo

24 Che bidzujn Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmasrtu quiix impuest xten guidoo?

25 Räjp Pedr:

—Rguijxnini.

Che biu' Pedr neñ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Reben lajdxreni o rebenzijt?

²⁶ Badzu' Pedr diidxre räjpni:

—Rebenzijt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bäjł ni guiniazngaalu. Ro' bäjłga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcnı gubıg rexpejnıpac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejctı gurejdx Jesús te biuxbáz, bazujnıni nez galäıireni,

³ dxejc räjpni:

—Rniliápıac lojtu, palga dıtu gusiechlajztu, palga dıtu gac nadolajz sı'c te biuxbáz, dıtu jıu' lajdx Dios xhaguibaa. ⁴ Ni'cni chutıs bejn nani gac nadolajz sı'c biuxe're, laani gac ni sajcru lajdx Dios xhaguibaa. ⁵ Chutıs ni rıu te sa' biuxe're, sa'csi rınälajzni narä, lagajc narä riuni.

Riezgw jıajbni neı dojl

(Mr. 9:42-48; Lc. 17:1-2)

⁶ Räjpzani:

—Chutıs ni gudzucaj lo xnezyuä te sa' biuxe're ni ahuılıla-jzıni xtıdxä, maazru huen nılııb te guıj xten molın dojb vejınnı, chatejbıni loj nisdoo, palga gunnı jıajb teı renı'c lo dojl. ⁷ Proobza guedxlıuj sa'csi yuduxh xhıgabguıjdx lojni. Sa'csi nanıbpıac chu xhıgabguıjdx. Gunatıro, bejn ni ruzobloj rexhıgabguıjdxre, ni rujn rıajbza lo dojl renı rılılıajz xtıdxä, ni najc sı'c biuxe're.

⁸ Palga ni'lu o ñaalu gun jıajblu lo dojl, batıu'ni. Hueenru jıu'lu lo xcälñabajı Dios nıtıujınglu o ñatıujınglu lacuaa jıılu con guıro'p ni'lu o guıro'p ñaalu lo balduxh ni rejc par teıpas.

⁹ Palga te baloıılu rujn rıajblu lo dojl, gulääni. Hueenru jıu'lu lo xcälñıbee Dios najclu lotıä'p lacuaa chu guıro'p baloıı chazälrenı luj lo balduxh ni rejc par teıpas.

Xcuent xııl ni gunıjt

(Lc. 15:3-7)

¹⁰ Räjpza Jesús lojreni:

—Colñatıro, andı cuälaztu rebejn ni najc sı'c biuxbázre ni sasaj lo xnez Dios, sa'csi rexangl Dios ni cahııireni, guıraatıs

dxej yu'reni loj Dios. ¹¹ Sa'csi Xi'n Dios ni gujc Niguui biääd te guslaani rebejn nani agunijt neñ dojl.

¹² Räjpszani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' neñ gurajl te chatiilni xile' ni gunijt, ä? ¹³ Luxh palga guidxälni xile'ga, rniliä lojtu, sibalazduxhruni xcuent xile'ga luxh guxi-iru guibanäj lajzni xcuent rexiil nani di ninijt. ¹⁴ Sigajcza Xtdadnu ni yu' xhaguibaa di rrajz nit lo Dios nicla tej reni ahuililajz xtiidxni, ni najc si'c biuxbäzre.

Xho gunnäjlu bejtzlu

(Lc. 17:3)

¹⁵ Räjpszani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejnni lojlu. Palga saru gucuadiajgni xtiidxlu, abiäjł lajztu. ¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnga, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnga, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te beñguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliäpac lojtu, guiraa yälguxhtis xten bejn ni di gusiechlajz xtojłreni ni guntu lo guedxliuj, si'c jia'nni xhaguibaa; guiraa redojl nani gusiäjł lajztu lo guedxliuj sa'csi basiechlajz beñdojłga, si'cza jia'nni xhaguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtdadä ni yu' xhaguibaa suniidxni ni rniabtu lojni. ²⁰ Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejnga.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjł lazä? ¿La sajl gajdzli huält, ä?

²² Badzu' Jesús diidxre lojni räjzni:

—Dina guiniä gajdztis huält, rniä gayonbidzuu huält, nalajznu si'ctiza huält basiäjł lajzlu.

Xcuent tio'p bejn ni nazäab meel

²³ 'Xcälribee Dios xhaguibaa najc si'c te reii ni rrajz gunni cuent lac nazäab rexmosni lojni. ²⁴ Agusloj cayujnni xcuentni chela bidzunnäjreni te mos ni nazäab balti mil lojni. ²⁵ Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chäälni, näjza rexi'nni, nägajcza

guiralii xhixtenni, te gaxh xti'nni. ²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiopchon dxej, Dad, te gac quixä xti'nä.” ²⁷ Dxejcti lamga balazlajzni xmosni, badzucajni guiraa ni nazäab mosga lojni, baslaanini. ²⁸ Cheni birii mosga rolijz xlamni, bidxaagni stee samosni ni nazäab bale'si beex lojni. Gunaaznini, baxhiya'ni yejnni, dxejc räjpni: “Gudijxga ni nazääblu loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni nen latzguiib te bejnii gaan gudijxni guiraa ni nazäabni. ³¹ Cheni bahuii sgaii mos xhini'c bejnii, gucnaduxhlajzreni, huiye'tzreni lo xlamreni xhi huiyejnii. ³² Dxejcti gurejdx xlamreni mosga, räjpni lojni: “iMos guiidx! Narä badzucäa di'n ni nazääblu loä, sa'csi gunabduxhlu loä. ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazäabni lo xlamni.

³⁵ Baluux Jesús cuentga, räjpni:

—Sigajcza gunnäy Xtadä ni yu' xhaguibaa guiraa rebejn ni di gusiällajzpac guiraa redojl ni rujn resa'ni lojni.

19

Jesús ruluii xcuent yälru'o'n sa'ni
(Mr. 10:1-12; Lc. 16:18)

¹ Che gulujx gunii Jesús recuentre, biunejnii Galilee, huijni lo región xten Judea, stelaad gueu Jordán. ² Xhidajl bejn birinajlni, ro'c basiajcnii rebenracxhuu, ³ dxejc gubig refarisee lojni, rlajzreni gusguesireni Jesús ni'c räjpreni lojni:

—¿La sajc guro'n te niguii chäälni che rlajztisni, ä?

⁴ Badzu' Jesús diidxre lojnii, räjpni:

—¿La gajdtu gol lo reguijtz nani bacuaa to Moisés cadre caj xho benchee Dios bejn galooli: “Niguii näjza gunaa bencheenireni?” ⁵ Guniiiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” ⁶ Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nii gunaaga, ä?

⁸ Räjp Jesús lojnii:

—Sa'csi najc lastootu si'c te guij, ni'c basaan to Moisés baro'n niguii chäälni, niluxh galodoo et si'cti gujcnii. ⁹ Luxh rniä lojtu, niguii nani gusaan chäälni, luxh xhet dojldi bennäj chäälni stee niguii, dxejcti guchnaani ste'ca gunaa, rujnni

dojl. Sigajcza niguii ni guch_naa gunaaga ni abaro'n chäälnini, rujnza niguiiga dojl.

¹⁰ Dxejc räjp rexpejn_npacni lojni:

—Palga si'c najc xcuent niguii con chäälni, hueenru na'c guch_naaani.

¹¹ Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹² Yu' xhicuent digacdi guch_naa niguii: yu'reni digacdi guch_naa sa'csi si'c goj_nreni; yu'reni digacdi guch_naa sa'csi baxhi_n sabejn_nreni; yu'zareni digacdi guch_naaareni sa'csi rlajzreni gunreni xtzuuntis Dios. Nani rajc racbeeni rediidxre, sugacbeenireni.

Biäd_näreni rebiuux loj Jesús

(Mr. 10:13-16; Lc. 18:15-17)

¹³ Dxejcti biäd_näreni rebiuxe' loj Jesús te gudzuubni _naaani yejcreni, guiniabni lo Dios xcuentreni. Luxh rexpejn_npacni gudil_näj rebejn ni siäd_nä rebiuxe'ga. ¹⁴ Dxejc räjp Jesús lojreni:

—Colgusaan guibig rebiuxe' loä, na'c gudxojt_nureni, sa'csi xcäl_nribee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni _naaani yejc rebiuxe', biunejzni ro'c.

Te be_n ni rajp guninäj Jesús

(Mr. 10:17-31; Lc. 18:18-30)

¹⁶ Dxejc biäd_n te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl_nabaj_n lo Dios par tejpas?

¹⁷ Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlajzlu xca'lu yäl_nabaj_n lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl_nu bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx x_nadlu con xnanlu, huinä_nälajz sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäd_näx gunä?

²¹ Dxejc räjp Jesús lojni:

—Palga rlajzlu gaclu be_nsa'c lo Dios, huij, bato' guiraa ni rajplu, dxejc gudisni lo reben_nproob, dxejc xhaguibaa sapduxhlu xhixtenlu. Dxejcti gudaa te jiäd_najllu narä.

²² Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

²³ Sas Jesús räj̄p loj rexpej̄pacni:

—Rniliäpac lojtu, naganduxh jiu' te bej̄n rajp loj xcäl̄rnibee Dios. ²⁴ Rnisacä lojtu, guyasiru ted te cameii neñ baloj te guux; naganduxhru jiu' te bej̄n ni rajp lo xcäl̄rnibee Dios.

²⁵ Che biejn diajg rexpej̄pacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcäl̄rnibee Dios?

²⁶ Dxejc bahuidzu'tz Jesús lojreni, räj̄pni:

—Naganduxh gun rebej̄n dee, Diostis sajc gun guiraloj.

²⁷ Dxejcti Pedr räj̄p lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

²⁸ Jesús räj̄p lojreni:

—Rniliäpac lojtu, la'tu ni biädnajl̄tu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben̄ guedxliuj, la'tu ni siädnajl̄tu narä sibejzatu lo tzubitio'p yagxhil te guinibeetu loj guitzubitio'p guejdx xten rexpej̄n Israel. ²⁹ Luxh guiraa rebej̄n ni basa'n rolijzni o rebejtzni, o rebisiajnni, o xtadni, o xnanni, o chääl̄ni, o xi'nni, o rexhujni, te siädnajl̄ni narä, rebej̄nga sajp te gayuu huält locni gojpn̄i, nägajc ga'preni xcäl̄nabaj̄n Dios par tejpas. ³⁰ Rebej̄n nani rchalo najcreni beñroru lo sa'reni nez loj Dios, reni'c gac bej̄n ni guxii sajc nez loj Dios. Rebej̄n nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räj̄pzani:

—Xcäl̄rnibee Dios najc si'c te bej̄n ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxäl̄ni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhal̄nireni loj xyujni sayujnreni dzuun. ³ Birisacni, satiilni sgaii mos si'cti rcagaa, rsil. Bidxaagni sgaii bej̄n ni xhet cayujndi, suga'sireni nez lo guii. ⁴ Räj̄pni lojreni: “Näjza la'tu col̄chayujn dzuun lo xyuä. Narä siguixä si'cni riäj̄l̄ xca'tu.” Sä'ti rebej̄nga lo dzuun. ⁵ Birisac dade' si'cti läiidxej, birisaczani si'cti rcachon̄ gudxej. Bidxaagni sgaii bej̄n, sigajcza räj̄pni loj rebej̄nga. ⁶ Dxejc si'cti rcagaii birisacni, huijni lo guii. Ro'c bidxäl̄ni sgaii bej̄n ni xhet cayujndireni, suga'sireni nez lo guii. Dxejc räj̄pni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räj̄preni lojni: “Sa'csi rut

siädttiildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.” ⁸ Che biu' guxhijñ, räjp lam lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yälñanlaa.” ¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdexchlajzlu loä sa'csi nacä hueen, ä?” ¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni
(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rex-pejnpacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladzñaa reni rnibee lo rebixhojz, näjza lo rebejn ni najñ leii. Laareni sinibeereni guetä. ¹⁹ Suteedreni narä ladzñaa rebenzijt te cubeereni narä quininreni narä, dxejc gucuaareni narä lo cruzj. Luxh ni riojn dxej, sibansacä loj rebengut.

Ni gunab xnan Jacoob näjza Juan
(Mr. 10:35-45)

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

²¹ Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcälñrnibeelu, gunibelaa cue tej rexi'nä xlad-beelu, steeni cue xladbäjgwlu.

²² Dxejc räjp Jesús:

—¡Ditu gan xhini'c rniabtul! ¿La sajc tedtu yälñsacsí sa'ni tedä? ¿La sajc tedtu trabajwdux sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtaďa ni yu' xhaguibaa alaguleni rebejn̄ga.

²⁴ Che biejn diajg stzuu rexpejn̄pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn̄ga si'c xlamreni. Luxh reni najc rebenro lojreni runnäjreni rebejn̄ga si'ctis ni rlajzreni. ²⁶ Et si'cni gunditu la'tu loj rebejn̄. Chutis rlajz gac benro lojtu, nanab gunni dzuun gacnäjni guiraliitu si'c te mos. ²⁷ Luxh chutis tejt̄u ni rlajz guiliä'p xpala'nni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn̄, badeedzani lagajc yäl̄nabajn̄ xtenni te gudijxni baslaani xhidäl bejn̄ ni yu' lo dojl̄.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn̄ sana-jlni. ³⁰ Dxejcti sobga' tio'p bejn̄ ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnäj rebejn̄reni, te gusäuren̄i ro'reni. Luxh laaren̄i dipru guredxa'reni:

—jDad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlajztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddzũngajxhreni guedx Jerusalén, bidzujn̄reni te guedxbäz ni laa Betfagé, cuä' dajn̄ ni laa Oliib. Baxhal̄ Jesús tio'p xpejn̄pacni, ² räjpni lojreni:

—Colchäj loj guedxbäzre ni tre' nez lojtu. Ro'c guidxäl̄tu te bur̄gunaa caduu näjza tebur̄huin. Colguxhecni, coltanäni loä.

³ Palga yu' chu naa: “¿Xhini'c rujntu?”, colye'tz lojni: “Dad caquinnini terate'. Suxhal̄gajcni.”

⁴ Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión,
bahuii xreilu siäd lojlu,
nadolajzni bijbni te burbäz, te burbäz, xi'n man ni rujn dzuun,
ni ruu cargw.

⁶ Dxejcti huij rexpejn pacni, bejnreni si'c gunibee Jesús
gunreni. ⁷ Biädnäreni burga näjza burbäz xi'nni. Gudixhreni
xhajnreni detz burbäzga, dxejc gubijb Jesús burbäzga.
⁸ Xhidalduxh bejn tre' ro'c, luxh yu' reni gudixh xhajnreni
lo nez yuj, peta sgaiireni batiu' balajg te gudixhreni rebalajg
lo nez yuj cadro ted Jesús. ⁹ Rebejn ni nijd, näjza reni siäd
dejtzni gusloj cabedxa'reni, räjpreni:

—¿Xchej guibajn Xi'n toDavid! ¿Chicbaa ni siäd xcuent Gueb
Dios! Rliä'pnu xpala'n Guejblu Dios.

¹⁰ Cheni biu' Jesús neñ guedx Jerusalén, guiraa rebeñ gue-
jdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zaren i räjp:

—Dee najc Jesús, niguii ni rusule' xtidx Dios. Guedx
Nazare't xten Galilee siädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús neñ guidoro xten Dios, gulääni guiraa
rebeñ ni caguto' näjza rebeñ ni casii. Barexhätni remex xten
reni ruchaa meel xten rebeñ, näjza reyagxhil xten reni ruto'
repalom. ¹³ Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu'
xten yälrbejdx, yälrniab loj Dios.” Niluxh la'tu abejntuni xpiliää
gubaan.

¹⁴ Lagajc neñ guidooga, gubig loj Jesús gaii bejn ni di fii näjza
gaii bejn ni rsiacoj, luxh basiajcnireni. ¹⁵ Cheni bahuii reni
rnibee loj rebixhojz, näjza reni najn leii remilagwr ni bejn
Jesús, luxh biejnza diajgreni xho cabedxa' rebixue' caniireni:
“Rliä'pnu xpala'nlu Xi'n torei David”, bidxe'ch rebixhojzga.

¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goļ lo reguijtz ni bacuaa te
dade' ni gunii xtidx Dios? Ro'c caj xcuent redee, cadro caj
rediidxre:

Abejnlu goļ rebiuux näjza rebäznite' dij ni rliäpsa'cpac xpala'n
Dios.

¹⁷ Dxejcti basaan Jesúsreni, biunejzni ro'c sääni guedxe' ni
laa Betania, ro'c gudejdni yäl.

Te yag iigw ni gubijdz

(Mr. 11:12-14, 20-26)

18 Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. 19 Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzgajc yajgga. 20 Cheni bahuii rexpejnḡpacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

21 Räjp Jesús lojreni:

—Rniliäpac lojtu, palga chalilajzḡpactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. 22 Guiraa ni guiniabtu loj Dios, palga chalilajzḡpactu, suniidxnini.

Xcälḡrnibee Jesús

(Mr. 11:27-33; Lc. 20:1-8)

23 Dxejcti biu' Jesús nenḡ guidoro, dxejc laḷ ni caguluiini rebejnḡ gubig reni rnibee loj rebixhojz näjza rebengool, gunabdiidxreni lojni:

—¿Xhi yälḡrnibee rajplu ni'cni rajc rujnlu recosre? ¿Chuni'c baniidx yälḡrnibeere lojlu?

24 Badzu' Jesús diidxre lojreni räjpni:

—Sigajcza narä gunä te yälḡgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälḡrnibee te runä recosre. 25 ¿Chuni'c gunibee gutiobnis Juan ni rutiobnis? ¿La Dios o la beḡ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicient ditu nililajz xtiidxni? 26 Palga jie'tznu bejnḡ guedxliuj gunibeeni, dxejc sixa't rebejnḡ yejcnu sa'csi guiraareni rililajzreni Juan najc te Dade' ni gunii xtidx Dios. 27 Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälḡrnibee te runä guiraa recosre.

Te dade' ni guyu' tio'p xi'nni

28 Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” 29 Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. 30 Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. 31 Loj guiro'preni, ¿chuni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcäl̄rnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosgüjdx

(Mr. 12:1-12; Lc. 20:9-19)

³³ ¡Co!cuadijg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhał baxhuaanga gaii xmosni loj xyujni te chaxiireni cose'ch ni riäjł xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhałsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejn baxhuaanga xhigab: “Maazru huen guxhałä xi'nä; sucuadijgrureni xtiidxni.” ³⁸ Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannänu yujre.” ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiäd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:

—Dini gulazlajz rebeņgujdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gał guire' cose'chga.

⁴² Dxejcti räjp Jesús lojreni:

—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴³ Ni'cni rniä lojtu, sibicaj xcäl̄rnibee Dios lojtu, sidejdni loj rebejn nani gudeed ni riäjł xca' xcäl̄rnibee Dios, nalajznu renani chalilajzpac xtiidxni. ⁴⁴ Luxh xcuent guijga: nani jiajb

lo guijga, silia'ni, per nani guitejb guijga yejcní, li siujyni, gacni dáj.

⁴⁵ Che biejn diajg reni rnibee lo rebixhojz nájza refarisee recuent ni canii Jesús, gucbeereni cagusä'tni lagajc laareni.

⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yäl'ruchnaa

¹ Guslosac canii Jesús lojreni con recuent, räjpni:

² —Xcäl'rnibee Dios najc si'c te reii ni bejn te sa' te guchnaa xi'nni. ³ Baxhal'ni rexmosni te saxiireni regolnejdx chääreni sa', niluxh rebejnre di rlajzdireni. ⁴ Dxejc baxhal'sacni rexmosni, räjpni: "Colye'tz loj reni abidon, agujc comiid. ¡Abagutä balti gonsa'c, gonguro! Anacchee guira'ti yäl'rajw. Col'taa."

⁵ Niluxh reni abidonga di niu xtiidxreni. Tejni sahuui rexyujni, steeni säa lo rexnegosni, ⁶ dxejcti sgaii reni niajc biooz gunaazreni rexmos reii, basacsíreni remosga, sas bagu'trenini.

⁷ Che biejn diajg reiiga, bidxe'chduxhni, baxhal'ni rexsoldaadni te sagu'treni guiraa reben'guijdxga, te saze'czareni guejdx cadro rbäjzreni. ⁸ Dxejcti räjpni loj rexmosni: "Guiraa dee anacchee, di nungäj'l jiäädru reni abidon. ⁹ Col'chäj, pues, lo resquiin lo nezyuj, col'cuejdx chutis bejn ni guidxaagtistu."

¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc ben'guijdx sigajc reni najc ben'hueen te gudxaj roliz reiiga.

¹¹ 'Dxejc biu' reii biädhuini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. ¹² Dxejc räjp reii lojni: "Xamigwä, ¿xho bejnlu biu'lu ree luxh xhet xhablanijdilu najcwlu?" Dxitis sobga' bejnga, xhet rniidini. ¹³ Dxejc räjp reii loj rexmosni: "Col'guliib ni'ni nájza naani, col'säl'ni detzyu' cadro nacäjy te ro'c gonduxhni chubejli reläjyni." ¹⁴ Sa'csi xhidajl najc reni bidon luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

¹⁵ Dxejcti sii refarisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhal'reni gaii xpejnreni nájza gaii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcro lo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni nen lastooreni, dxejc räjpni lojreni:

—¡Benguixdx! ¿Xhicuent rlaiztu guquiiltu narä? ¹⁹ Colguluii te meel loä.

Dxejc badeedreni te meel ni laa denario. ²⁰ Che bahuui Jesús loj meelga, gunabdiidxni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibaṅsac rebejn

(Mr. 12:18-27; Lc. 20:27-40)

²³ Lagajc dxejga bidzujṅ gatii reni laa saducee, reni di chalilajz sibaṅsac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachṅaa, luxh ruti xi'nni che guetni, riäjł guchṅaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachṅaa, dxejc gujtni, luxh di xi'nni niu'. Basa'nni chääłni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojṅ bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, nájza gunaaga gujt. ²⁸ Che guibaṅsac rebejṅga lo rebengut, ¿chu tej lo rebejtzga gac chääłpac gunaaga, ni guiraareni bachṅaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälṅnibee Dios. ³⁰ Ni che guibajṅ rebengut, diru yälṅruchṅaa chu, diruza bejn gudeed rexindxa'preni guchṅaa. Dxejc sajcreni si'c rexanṅl Dios ni yu' xhaguibaa.

³¹ Dxejc xcuent yälṅrbaṅsac loj rebengut, ¿la gajdtu goł reguijtz ni bacuaa toMoisés che räjp Dios xcuent retoxtadgoldoonu:

³² “Narä nacä Xtios Abram, Xtios Isaac, nájza Xtios Jacob”, ä? Dios di gac Xtios bengut, Xtioistis rebejn ni nabajṅ najcni.

³³ Che biejn diajg rebejn xtidx Jesús, bidxeloduxhreni diidx ni ruluini.

Diidx ni maazru sajz

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn lei, rlaizni guquiilni Jesús ni'c gunabdiidxni lojni räjpni:

³⁶ —Mastr, ¿xhi diidx ni gunibee Dios sajczu lojreni caj lo lei?

³⁷ Rāj̄p̄ Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, nājza guidebgajc xcäriejnlu.” ³⁸ Diidxre ni gunibee Dios najc ni sajcr̄u, luxh ganidni siädni loj rextid̄x Dios. ³⁹ Ni ro'p̄ga sigajcza najcni: “Huinälajz resa'lu sigajc ni sanälajzlu lagajc luj.” ⁴⁰ Guiro'p̄ remandamientre nanab te guzoob bejn̄ guiraa rediid̄x ni bacuaa toMoisés nājza ni bacuaa redade' nani gunii xtid̄x Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lał̄ni tre' refarisee, gunabdiid̄x Jesús lojreni, rāj̄p̄ni:

⁴² —¿Xhi rujntu xhigab xcuent Crist? ¿Chu xi'n najcni?

Rāj̄preni lojni:

—Laani najc xajg toDavid.

⁴³ Rāj̄p̄ Jesús lojreni:

—¿Xhicuent rāj̄p̄ David “Xtadä” lojni che basanij Sprit D̄xan xten Dios lastooni? Ni'c bacuaa toDavid rediid̄xre:

⁴⁴ Dad Dios rāj̄p̄ lo Xtadä,

gurej xladbeä lał̄ ni gudzugä guiraa reni rd̄xe'ch lojlu ladz̄ni'lu.

⁴⁵ Palga lagajc David rnii: “Dad” lojni, ¿xho mood najcni xi'n̄ni?

⁴⁶ D̄xejc rut gujcdi badzu' nicla te diid̄x lojni, luxh d̄xejliga rutru gojpd̄i xhi diid̄x niniabdiid̄xr̄ureni lojni.

23

Rucuaquij Jesús refarisee nājza rebejn̄ nani najn̄ leii

(Mr. 12:38-40; Lc. 11:37-54; 20:45-47)

¹ D̄xejc rāj̄p̄ Jesús loj rebejn̄ xhidaalga nājza loj rexpejn̄pacni:

² —Rebejn̄ ni najn̄ leii nājza refarisee rajp̄ yäl̄najn̄ te gusule'reni xleii Moisés. ³ Ni'cni col̄guzoob guiraa rextid̄xreni, na'c guntu sa' recos ni rujn̄reni, sa'csi laareni rniireni xhini'c guntu, d̄xejcti lagajc laareni direni gun ni rnibeereni guntu. ⁴ Rnibeereni gun rebejn̄ cos naganduxh ni najc si'c te cargw naduxh ni di gac guu bejn̄, per laareni nicla con te bicueñaareni direni gusniibni. ⁵ Guiraa recos ni rujn̄reni, rujn̄renini te fiitis rebejn̄. Rchaglajzreni rc̄aj lo cuajsreni nājza roxhajgwreni recaje' cadro yu' tla' guijt̄z ni caj xtid̄x Dios lojni. Rustioolzareni xi' xhajbreni. ⁶ Rlajzreni ganidreni tedreni lo mex che gal̄ te lanij; rlajzreni cuereni lo rebancw ni suga' delant̄ nejn̄ reguidobäz. ⁷ Sigajcza rlajzreni guchagro' bejn̄ ñaareni nez lo guii, guiniiza rebejn̄ “Mastr” lojreni.

⁸ Na'c gusaantu guinii rebejn̄ “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te bejn̄ guedxliuj sa'csi yu'

tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu "Mastr" sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc be_nroru loj resa'ni. ¹² Sa'csi chutis ni rchaloni najcni be_nro lo sa'ni, ni'c sustuiyā lojni, chutis ni najc nadolajz loj Dios, ni'c sunāni be_nro lo sa'ni.

¹³ 'iProobzatu remastr xten leii nājzatu refarisee, najctu be_nguijdx! Sa'csi rudxojntu jiu' rebej_n loj xcāl_rnibee Dios. Lagajc la'tu ditu jiu' luxh dizatu gusaan jiu' rebej_n ni r_lajz jiu'.

¹⁴ 'iProobzatu remastr xten leii nājzatu refarisee, najctu be_nguijdx! Sa'csi rudzucajtu rolijz renanbiuud la_si cabedx canabduxhtu lo Dios, naatu gusgueetu bej_n si'c. Sa'csi rujntu scree, siabduxh fis xten Dios yejctu.

¹⁵ 'iProobzatu remastr xten leii nājzatu refarisee, najctu be_nguijdx! Zijt rijtu lo renezyuj nājza lo nisdoo te guntu gaan guchaa mase tejtis bej_n xmoodni te gan_ni Dios si'c raj_ntuni. Luxh che ahuililajz bej_nga xtiidxtu, rujntuni tio'p huālt maazru te xi'n gabijl loj ni najctu.

¹⁶ 'iProobzatu, najctu si'c lotiā'p, r_lajztu guluiitu nezyuj! La'tu ni rnii palga te bej_n guiniliipac xtiidxni guzā'tni guidoro, xhet sajcdi xtiidxni. Palga guiniliipacni guzā'tni oor ni yu' ne_n guidoo, dxejc sii rniliini dxejc nungāj_l guzoobni xtiidxni. ¹⁷ iBe_n nayāäl, be_nlotiā'p! ¿Xhini'c saj_cru? ¿La oor la guidoro ni rundxan oorga? ¹⁸ Rniizatu: "Palga te bej_n guiniliipacni guzā'tni lo bacuug ni yu' ne_n guidoro, di xcuentdi xtiidxni. Luxh palga yu' chu guiniliipac guzā'tni gojn ni dzuub lo bacuug, dxejc sii rniliipacni dxejc nungāj_l gusoobni xtiidxni." ¹⁹ iBe_n nayāäl, be_nlotiā'p! ¿Xhini'c saj_cru? ¿La gojn o la bacuug nani rundxan gojnga, ä? ²⁰ Nani ruzā't lo bacuug che rniliipacni, et ganaxdi lo bacuug ruzā'tni, nājza guiraa ni tre' lo bacuug ruzā'tni. ²¹ Ni ruzā't guidoro che rniliipacni, et ganaxdi guidoro ruzā'tni, nājza Dios ni rbājza ne_n guidoro ruzā'tni. ²² Sigajcza ni ruzā't guibaa che rniliipacni caguzā'tzani yagxhilro xten Dios nājza lagajc Dios ni sobga' ro'c.

²³ 'iProobzatu remastr xten leii nājzatu refarisee, najctu be_nguijdx! Bedzxtiil, anis nājza comi_n ni raj_ptu, rudeedtu lo Dios tej tantga yejc cade te tzuu, niluxh ditu jiu' ni saj_cru lo xtidx Dios, cadro caj xcuent yāl_nabanya, yāl_rulazlajz, nājza yāl_rililajz. Deeza ni riāj_lpac guntu la_l ni cayujnzatu steega. ²⁴ iLa'tu, lotiā'p ni r_lajz guluii nezyuj! Riutu rediidx ni guxii saj_c, niluxh rediidx ni sacduxh ditu jiuni, najctu si'c bej_n ni rbāā te rex lo xpla'tni dxej_cru rāj_mni te cameii.

²⁵ 'iProobzatu remastr xten leii nājzatu refarisee, najctu be_nguijdx! Rusiatu detz bas nājza pla't luxh ne_nni najc_dxuudx. Sigajcza la'tu riuduxhtu recostumbr, luxh lastootu

guidxa yäl gubaan näjza yälrdxe' chljaz. ²⁶ Farisee ni najc lotiä'p: gudibxgaa nen bas näjza nen pla't, dxejc näj dejtzni sajc naya.

²⁷ 'iProobzatu remastr xten leii näjzatu refarisee, najctu beṅguijdx!, sa'csi najctu si'c rebaa ni nacchesa'c; nolbäjreni, saru rluini, luxh nenreni guidxa dzujt xte beṅgut näjza bälyudx. ²⁸ Sigajcza najctu la'tu. Saru rujn lojtu, rchalo rebejn najctu beṅsa'c, niluxh lastootu guidxa yälrusguee näjza yäl guyalajz.

²⁹ 'iProobzatu remastr xten leii näjza refarisee, najctu beṅguijdx! Runcheetu xpaa redade' ni gunii xtidx Dios galoo, rusucheezatu ro' xpaa rebejn ni gujc beṅsa'c, ³⁰ dxejc rniitu: "Paru nibajṅnu nen redxej ni gubajṅ retoxtadgoldoonu dinu niacnäj reni bagu't redade' ni gunii xtidx Dios." ³¹ Lagajc con rediidxre rcäjptu najctu rexajg renani bagu't redade' nani gunii xtidx Dios. ³² 'iColguscuääz guntu sa' recos ni guläxtiej retoxtadgoldootu!

³³ 'iLa'tu ni najc si'c bäl, la'tu ni najc si'c te bitiääz guidxa bälñialajz! ¿Xho guntu te na'c chäätu gabijl par tejpas?

³⁴ Ni'cni, guxhalä rexpenä ni guinii xtidxä, näjza beṅnajṅ, näjza mastr. Luxh yu'reni sugu'ttu sucuaatureni lo cruzj; yu'zareni siguijntu nen reguidobäz, sirinajltureni guejdx por guejdx. ³⁵ Si'cza yejctu jiajb xtiejn guiraa rebeṅnadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu nen guidoro gajxh lo bacuug. ³⁶ Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Räj pza Jesús:

—iJerusalén, Jerusalén! Xpejṅlu rugu't redade' ni rniit xtidx Dios, rucuaazareni guij yejc rebejn ni ruxhal Dios te gusule'reni xtiidxni lojtu. iBalti huält rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb! ³⁸ Colhunii xho jianxteb xquidootu cuälazrenini. ³⁹ Rnixgää lojtu, naj dirutu fii loä, dxejli che guiniitu: "Benle' Dios nani siääd xcuentni."

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús nen guidoro te asiini, dxejc gubig rexpejṅpacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

*Cos ni guluiloj gac fis**(Mr. 13:3-23; Lc. 21:7-24; 17:22-24)*

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn_{pacni} lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

⁴ Dxejc räjp Jesús lojreni:

—¡Col_{natiro} te rut gusgueedi la'tu! ⁵ Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, näjza xcuent cadro rlajz chu guer, na'c guidxeybtu sa'csi si'c nungäjl gac, niluxh gajd gal_{di} nitloj guedxliuj. ⁷ Sa'csi siäjs te naciön sidil_{näjni} stee naciön; te yäl_{rnibee} sujn guer con stee yäl_{rnibee}, luxh su' gubijn, su' yäl_{guijdx}, su'za xuduxh xhidajl lajt. ⁸ Luxh guiraa redee cuäxtiejtis retribajwduxh ni churu chu.

⁹ 'Dxejc gutedreni la'tu ladz_{naa} rebendojl te gusacsíreni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä. ¹⁰ Ne_n redxejga, xhidajlreni sibälaz xcäl_{rilitajzreni}, sidxe'ch lo sa'reni, suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yäl_{nabajn} par tejpas. ¹⁴ Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

¹⁵ 'Cheni fiitu asobga' te benguidxduxh ne_n yu' ni najc dxan ne_n guidoro, si'cni gunixgaa toDaniel ni gunii xtidx Dios gacni, bejn ni go_l dee sugacbeeni nani ro_lni, ¹⁶ dxejc renani rbäjz lo guedx Judea, suguxu_nreni gucuat_zlojreni ne_n dajn. ¹⁷ Bejn ni niä'p yejc xyu'ni dxejga di gal_{di} jiäjtni te chalääni xhixtenni ne_n xyu'ni, ¹⁸ bejn nani cayujn dzuun lo niaa, na'c guibi'ni niclaza chaxhiini xhajbni. ¹⁹ ¡Proobza regunaa ni nuxi'n, näjza reni cagusiä' báz ne_n redxejga! ²⁰ Col_{nabduxh} loj Dios xhet ne_ndi redxej ni cayacnalduxhdi nanab guxu_nditu, niclaza dxej che rusilajz bejn. ²¹ Sa'csi su' trabajwduxh ne_n redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, nicla tej bejn di laa. Luxh sutiü' Dios yejc redxejga sa'csi rinälajzni reni aguleni.

²³ 'Ne_n redxejga palga yu' chu naa lojtu: “Col_{huii}, aree Crist”, o “Col_{huii} ani arec”, na'c chalilajztuni. ²⁴ Siääd xhidajl niguii ni rusguee, gäbreni najcreni crist; sidzuj_nza rebejn ni rusguee ni gäb xtiidxpac Dios rusule'reni; luxh sujnreni remi-lagwr sujnzareni senro, parsi gusgueereni, susgueduxhreni

rebejn, niluxh rlazzeni gusguezareni rebejn ni agule Dios, ni rililajz xtiidxni. ²⁵ Agunixgaä lojtu xhini'c gac. ²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztureni. ²⁷ Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguui, cheni jiälsacä lo guedxliuj. ²⁸ Ni najntu cadre naga' te mangut, ro'c re' regolbetz.

Cheni jiädsac Xi'n Dios ni gujc Niguui

(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguui, luxh guiraa rebejn ni rbäjz neñ guiraa reguejdx lo guedxliujre, sonduxhrene suhuiireni siääd Xi'n Niguui lo reza xhaguibaali. Siäädni con yälrnibee näjza yälrdimbichaduxh. ³¹ Dxejc suxhañi rexangl ni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'iColguisied ni ruluii yajg iigw! Che naren reñaani che cabääni be'n, asiääd bäi curex, ³³ sigajcza cheni fiitu cayajc guiraa recosre, sacbeetu asiädgajxh fis, rolä'li abidzujñni. ³⁴ Rniliäpac lojtu, guiraa redee sajclal ni nabajñ gatii rebejn ni suga' ree naj. ³⁵ Guibaa näjza guedxliuj sinitloj, niluxh xtidxa di nitloj.

³⁶ 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc neñ redxej che gubajñ toNoé, si'cza gac che jiälä Xi'n Dios ni gujc Niguui. ³⁸ Neñ redxe galoo, cheni gajd nisguiduxhga jiajb, rebejn ni nabajñ dx-
ejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé neñ barcwro. ³⁹ Direni niacbee xtiidxni; cheni biäädli nisguiduxh ni sanä guiraareni dxejru gucbeerene. Sigajcza gacni che jiälsacä narä Xi'n Dios ni gujc Niguui. ⁴⁰ Neñ redxejga palga cayujñ tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni colsusin, sa'csi ditu gan xhi dxej jiääd Dad xtentu. ⁴³ Colganchee, paru niacbee baxhuaan xten yu' cor yääl niääd gubaan ni siädlan rolizni, nisiusiñni dxejc, dini nusaan niu'ni rolizni te cuanni. ⁴⁴ Ni'cni colsusinza la'tu, sa'csi siääd Xi'n Dios ni gujc Niguui lagajc or ni ditu gun xhigab jiäädni.

*Xcuent te mossa'c näjza te mosguijdx**(Lc. 12:41-48)*

⁴⁵ '¿Chuni'c najc mossa'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä?
⁴⁶ Chicbaa mos ni saru cayujn xtzuunni che guidzujn xlamni.
⁴⁷ Rniliäpac lojtu, lamga susa'nni sa' mosga te fiini guiraa xhixteni. ⁴⁸ Dxejc palga mosga di gusoob xtidx xlamni, gunni xhigab: "Sacladuxh guibi' xlamä", ⁴⁹ dxejc guisloj cagusacsini resamosni, guislojni gaunäjni, yänäjni rebengu.
⁵⁰ Dxejc sidzujn xlamni dxej che dini gun xhigab jäädni, luxh or ni dini gan guidzujni. ⁵¹ Dxejc siguinduxhni mosguijdxga, surilaagwnini te guidxagsa'ni sabenguixdxi, dxejc sonduxhni, chubejli reläjni.

25*Xcuent tzuu gunaa*¹ Räjpa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayäälga sanäreni xcandilreni, niluxh direni nica' sijl se't. ⁴ Niluxh reni nasinga sanäreni sijl se't te guze'creni neñ xcandilreni. ⁵ Sa'csi bi'nga di nidzungej, gunaaz bacal regunadxa'pga, gudiejstireni. ⁶ Dxejc si'cti garol yääl, biejn te xse' ni räjp: "Bi'n asiääd, colchäj, colchachaglojni."
⁷ Guiraa regunaare huistieguxunreni, dxejc bensa'creni xcandilreni, te cuagujreni. ⁸ Dxejc guigaii regunayääl räjpreni loj reni nasin: "Colgunidxlaa te bo'c se't gusanijnu xcandilnu, sa'csi arlajzni jiuini." ⁹ Dxejcti regunanasin räjp lojreni: "Digaccini, dxejc dini gal nicla par nuurnu nicla par la'tu. Colchäj cadre ruto'reni se't colchazii xse'ttu." ¹⁰ Lałni sasio guigaii regunaa-nayäälga se't, bidzujn bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujn regunanayäälga, räjpreni: "Dad, Dad, baxhal ro lä'." ¹² Dxejc räjpni lojreni: "Rniliäpac lojtu, dina gumbeātu."

¹³ Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni guj Niguii.

Xcuent lam ni badeed meel

¹⁴ 'Xcälrnibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

¹⁵ 'Lo tejni badeedni si'cti gaii mil meel, lo steeni badeedni si'cti tio'p mil, dxejc steeni cua' te mil. Loj tejgani badeedni si'cti ni rujni xhigab sajc gunnäjreni dzuun, dxejcti biriini

xpiajni. ¹⁶ Ni cua' gaii mīl meel bejn te dzunro, bejnni gaan sgaii mīl meel. ¹⁷ Sigajcza ni cua' tio'p mīl meel, bejnni gaan stio'p mīl. ¹⁸ Dxejcti ni cua' te mīl meel, huicua'tzni xmeel xlamni neñ te gueed ni gudäänni lo yuj.

¹⁹ 'Gudejdti balti bäii, dxejc gubi' xlam remosga, bejnni cuent loj guiraareni. ²⁰ Che bidzujñ ni cua' gaii mīl meel, bidzunñajni sgaii mīl meel ni bejnni gaan, räjpni loj xlamni: "Dad, baniidx guejblu gaii mīl loä. Aree sgaii mīl meel ni benä gaan." ²¹ Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu beñsa'c con te cos bäz, ñaj sunidxä guinibeelu xhiroobru. Biu' loä, bibalazñaj narä." ²² Che bidzujñni ni cua' tio'p mīl meelga, räjpni loj xlamni: "Baniidx guejblu tio'p mīl meel loä, aree stio'p mīl meel ni benä gaan." ²³ Räjp xlamni lojni: "Mbaj. Mos hueen najclu rusoobzalu diidx. Sa'csi gujclu beñsa'c con te cosbäz, ñaj sunidxä guinibeelu xhiroobru. Biu' loä, bibalazñaj narä." ²⁴ Che bidzujñ mos ni cua' te mīl meel, räjpni lo xlamni: "Dad, ananä najclu te bejñ ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. ²⁵ Ni'cni bidxebä, huicua'tzä xmeellu neñ yuj. Niluxh axh aree xmeellu." ²⁶ Dxejc räjp xlamni lojni: "¡Mos guiidx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. ²⁷ Riäj! nisa'nlu xmelä neñ te bancw te che nibi'ä nicasacä xmelä con xi'nni ni niujni gaan." ²⁸ Dxejc räjpni loj reni suga' ro'c: "Colgudzucaj te mīl meel ni ca'ni colgudeedni loj ni rajp tzuu mīl meel. ²⁹ Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni." ³⁰ Dxejc räjpni: "Colca' mosre ni xhet sajcdi, colguzälñi lo yälñacäy, cadre chu yälñronduxh, näjza yälñrajw reläy bejñ."

Yälguxhtis xten reguejdx

³¹ 'Che jiädsac Xi'n Dios ni gujc Niguü con yälrdimbicha' xteni, siädnäni rexangl Dios. Dxejc sibejni lo tron ni rdimbicha' xteni te guinibeeni. ³² Dxejc sidojp nez lojni guiraa rebeñ guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjgwni. ³⁴ Dxejc säjb reii loj reni suga' xladbeeni: "Coltaa, la'tu ni beñle' Xtaä. Coljiu' lo yälñnibee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te beñzajt, la'tu banidxlaatu cadre bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguuib, biädhuiitu narä." ³⁷ Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc

bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te beñzajt, baniidxnu cadre bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu neñ latzguiib, biophuiinu lojlu?" ⁴⁰ Dxejc reiiga säjb lojreni: "Rniliäpac lojtu, xhitis xhi bejntu loj te rexpenä ni rnii xtidxä mase proobreni, lagajc loä bejntu recosga."

⁴¹ 'Dxejc säjpszani loj reni suga' ladbäjgwni: "Colguibicaj loä, beñguijdx, colchäj lo balduxh ni cayejc par tejpas ni cayejc par beñdxab ni rnibee näjza rexpenäxabni. ⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³ cuanzaä si'c te beñzajt, luxh ditu nunidxlaa cadre nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguiib, niluxh ditu niädhuii loä." ⁴⁴ Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te beñzajt, o cayäädx xhajblu, o cayacxhuulu, o yu'lu neñ latzguiib, luxh dinu niacnäjlu?" ⁴⁵ Dxejc säjb reiiga lojreni: "Rniliäpac lojtu, loj xhitis ni ditu niacnäj rebejn ni rililajx xtidxä, mase proobreni naräni ditu niacnäj." ⁴⁶ Dxejcti sij rebejnre lo yälrusacsí par tejpas, per rebejn ni nadolajx, ni agule Dios, sijreni lo xcälnabajn Dios par tejpas.

26

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpejn pacni:

² —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladzñaa reni gucuaa narä lo cruz.

³ Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejn Israel. Lo xle' Caifás, ni rnibee loj rebixhojz, bidojpreni. ⁴ Ro'c bachaagreni diidx xho guiniaazreni Jesús con yälrusguee, te ju'trenini. ⁵ Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiacni che rañ tiejxhni, ⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸ Che bahuii rexpejn pacni xhi cayujnni, bidxe'chreni, gusloj cayäjpreni:

—¿Xhicuent casälxlia'ni perfumga? ⁹ Perfumre niajc nido'ni, nirii xhidajl meel lojni te niacnäjni rebenproob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaare? Ni te coshueen najc dee nani bejnni loä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴ Dxejc lo retzubitio'p rexpejn_{pac} Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladzn_{aa}tu?

Dxejc badeedreni galbitz_{uu} melpla't lojni. ¹⁶ Dxjecli caguuil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpejn_{pac}ni loj Jesús, räjpreni lojni:

—¿Caro rlaizlu chozucheen_u te gaulu xchej xten lanipascw?

¹⁸ Dxejc räjpni lojreni:

—Colchäy lo guejdx roliz te dade', colye'tz lojni: “Si'c naj Dad mastr: Asiäddz_ungajxh xorni, ni'cni rolizlu gaunäjni rexpejn_{ni} xchej lanipascw.”

¹⁹ Bejnti rexpejn_{pac}ni si'cni gunibee Jesús gac, bazucheereni xchej xten pascw.

²⁰ Che biu' guxhij_n, sobga' Jesús lo mex con retzubitio'p xpejn_{pac}ni. ²¹ La_l ni cayajwreni räjpni lojreni:

—Rniliä lojtu, yu' tejt_u ni guto' narä.

²² Dxejc guc-huinuxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä ne_n tejtis pla't, laa ni'cni guto' narä. ²⁴ Xi'n Dios ni gujc Niguii sajc si'ctis ni caj loj guiitz xten Dios, per gunatiro bejn ni guto'ni. Huenru na'c niajl bejn_{ga}.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ La_l ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn_{pac}ni, räjpni:

—Coltajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn_{pac}ni, räjpni:

—Guiraatu colyá', ²⁸ sa'csi dee najc si'c xtienä; ni'cni riannä la'tu te didxcoob, luxh rejnre sixe'ni xcuent xhidajl bejn te guslaanireni nen dojl. ²⁹ Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiiil.” ³² Dxejc cheni guibañsacä lo rebengut, ganidä cha'ä región Galilee, dxejcti jiädnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgaii cuedxa', luxh luj alagulälazlu narä choñ huält.

³⁵ Räjp Pedr loj Jesús:

—Masque riäjł guetnäälu, dina cuälazälu.

Dxejc sigajcza gunii guiraa rexpejn pacni.

Gurejdx-gunab Jesús loj Dios nen Getsemani

(Mr. 14:32-42; Lc. 22:39-46)

³⁶ Dxejcti bidzujñ Jesús näjza rexpejn pacni te lajt ni laa Getsemani, räjpni lojreni:

—Colcuésijc ree lał ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. ³⁸ Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcnı, basanlaa tedcaj trabajwduxhre ni tedä, te na'c tedäni. Xhet si'c di ni rlazä gacni; si'c pacni rlazzlu gac, si'c gacni.

⁴⁰ Dxejcti gubi'ni cadre suga' guichon rexpejn pacni, che bidzujñni ro'c, nagayejsreni. Räjpni lo Pedr:

—¿La di niajcdi nutie'chtu bacal lojtu nicla tebor, ä?

⁴¹ Colguibajñ, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajc.

⁴² Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlazzlu gacni.

⁴³ Dxejc gubisacni, bidxälni rexpejn_npacni, nagayejsreni sa'csi yuduxh bacal_l lojreni. ⁴⁴ Basaannireni, dxejc säsaacni, gurejdx-gunabni lo Dios ni riojn huält, gunisacni lagajc rediidx ni guniini galoo. ⁴⁵ Dxejc huijni cadre suga' rexpejn_npacni, räjpni lojreni:

—iNaj sii, colguejs, colgusilajz! Abidzujn or ni gutedreni Xi'n Dios ni gujc Niguui ladz_naa rebe_ndojl. ⁴⁶ iColchastie, colcho', colhuii! Asiääd nani guted narä ladz_naa rebe_ndojl.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

⁴⁷ La_lni canii Jesús bidzujn Judas, nani najc tej retzubitio'p xpejn_npacni. Bidzun_näjni xhidalduxh bejn ni ca' espaad, ni ca' garo't, najcreni xpejn reni rnibee rebixhojz, näjza xpejn rebe_ngool xten rexpejn Israel. ⁴⁸ Judas, ni bato' Jesús, abad-edxgaani te seen lojreni räjpni:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajcaz guiniabä lo Xtadä, luxh laani suxhalgajcni gayonbitzubitio'p mil xanglni gacnäjä narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäj_l gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siäd_nä_tu spaad näjza garo't te guiniaaztu narä as-toocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn_npacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadre abidojp guiraa rebejn nani ruluii leii näjza rebe_ngool xten xpejn Israel. ⁵⁸ Dxejcti zit-zijt biäd_najl Pedr rebejnga, bidzujn_lireni lole' xten bixhojz

ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebengool con guiraa reni rajp yälrnibee gusloj caguilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jäälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—¡Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—¡Abiga'ni! Riäjil guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejnni; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgahi. ⁷⁵ Dxej cru banalajz Pedr rediidx ni gunii Jesús lojni che räjpni: “Che gajdli guidgahi cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebeṅgool xten rexpejñ Israel bia'nreni diidx xho gunreni ju'treni Jesús. ² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquireni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebeṅgool.

⁴ Räjpni:

—Banitduxhä lo Dios sa'csi bato'ä te bejñ ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejñni, gojñni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälñu meelre neñ caj gojñ sa'csi najcni xcuent xtiejn te bejñ.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenziñt. ⁸ Ni'cni najli rniireni yujga: “Yurejñ”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejñga. ¹⁰ Con meelga guziireni yuj lo bejñ ni runchee guejs, sigacni gunibee xadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunñajreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejñ Israel, ä?

Räjp Jesús lojni:

—Najcni si'cni najlu.

¹² Lañi cabe'c rebixhojz ni rnibee näjza rebeṅgool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagucuaqui-
reni luj, ä?

¹⁴ Per xhetliidi diidxd basejc Jesús, nicla xcuent tejsi diidx
ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38-19:16)

¹⁵ Neñ redxe lanij rajpreni costumbr ruslaa Pila't tej bejn ni
cue rebejn loj reni yu' neñ latzguiib. ¹⁶ Neñ redxejga guyu' te
bejn ni säáb xtiidxni ni laa Barrabás. ¹⁷ Cheni tre' guiraareni
ro'c, gunabdiidx Pila't lojreni:

—¿Chuni'c rlajztu guslaä, la suslaä Barrabás o Jesús ni laa
Crist?

¹⁸ Sa'csi najn Pila't rdxe'chlajzreni lo Jesús, ni'c batee-
drenini lojni.

¹⁹ Lal ni sobga' Pila't lo yajgxhiil cadro rujnni yälguxhtis,
baxhal cháalni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxu-
udx gunixcalä xcuentni.

²⁰ Niluxh rebixhojz ni rnibee näjza rebengool baquiilreni
rebejn te gunabreni laa Barrabás, näjza te guet Jesús. ²¹ Dxejcti
gunii gubernadoor stehuält, räjpni lojreni:

—¿Chu tej loj guiro'preni rlajztu guslaä?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn
te bielduxh, cua'ni nis, gudiibni ñaani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii
xho guntu. Xcuenttitu najcni.

²⁵ Dxejc guiraa rebejnnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudijnreni
Jesús dxejc bateednini ladzña rebejn te gucuaarenini lo
cruzj.

²⁷ Dxejc huinä resoldaad xten gubernadoor Jesús lo pre-
toor, yu' cadro rujnreni yälguxhtis, ro'c batojpreni guiraa
resa'reni. ²⁸ Dxejc gulääreni xhajbni, bashuajcwrenini te
lad xníaa. ²⁹ Dxejc bencheereni te coron guejch, basälrenini

yejcnĭ, basälrenĭ te yabixijl ñaani, xladbeeni, sas bazuxhi-jbrenĭ nez lojni guslogajc caguxhisnäjrenĭni, räjprenĭ:

—jCollä'p xpala'n reii xten rexpejn Israel!

³⁰ Sas batiobxhejnrenĭ lojni, cua'renĭ yabixijlga te ni'c batiäjrenĭ yejcnĭ. ³¹ Che gulujx baxhiznäjrenĭni, guläärenĭ lad xniaa ni najcwnĭ. Dxejc bashuacwsacrenĭni lagajc xhajbni, sanätirenĭni te xcajnĭ lo cruzj.

Bacuaarenĭ Jesús lo cruzj

(Mr. 15:21-32; Lc. 23:26-43; Jn. 19:17-27)

³² Chenĭ sariirenĭ, bidxaagrenĭ te bejn ni siääd guedx Cirene, laani Simón, basguurenĭ dade'ga xcruzj Jesús.

³³ Che bidzujnrenĭ te lajt ni laa Gólgota, nani säloj: dan Calabeer, ³⁴ ro'c badeedrenĭ bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵ Chenĭ abacuaarenĭ Jesús lo cruzj, gudzujt resoldaad yejc xhajbni, te si'c gudisrenĭ xhajb Jesús cua'renĭ, te si'c guzojb diidx xten te dade' ni gunii xtidx Dios. ³⁶ Gurejtirenĭ ro'c, gusloj canäjrenĭ Jesús. ³⁷ Yejc cruzjga bacuaarenĭ te guijt con letro. Lo guijtza rcaj xhini'c najc xtojĭ nani cayejt. Lo guijtza caj: “Dee najc Jesús reii xten rexpejn Israel.”

³⁸ Näjza tio'p gubaan cuaj lo stio'p cruzj con laani. Tejĭni cuaj lo te cruzj xladbee Jesús, steeni cuaj xladbäjgwnĭ. ³⁹ Luxh renani sadejd nejzga guniyajrenĭ Jesús, cagusniibrenĭ yejcrenĭ, ⁴⁰ cayäjprenĭ lojni:

—jJa'ä! Luj ni nutiexhlu guidoo, luxh chontis dxej niunchesacluni; palga gulii najclu Xi'n Dios, biäjt loj cruzjga.

⁴¹ Näjza rebixhojz ni rnibee, näj remastr xten leii, baxhiznäjrenĭni räjprenĭ loj sa'renĭ:

⁴² —Baslaani xhidajl bejn, xhoxh di gacdi guslaani lagajc laani. Palga najcnĭ reii xten rexpejn Israel, sujiäjtĭni lo cruzj nanaj te chalilajznu xtiidxni. ⁴³ Huinäljzni Dios, ñaj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruzj sigajcza guniyajrenĭ Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejctĭ bicäjy guideb guedxliuj läidxej hasta rcachon gudxej. ⁴⁶ Si'ctĭ rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' renĭ suga' ro'c, che biejn diajgrenĭ räjpni si'c, räjprenĭ:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagrga ro' Jesús. ⁴⁹ Dxejc reni tre' ro'c räjp:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpřitni. ⁵¹ Lagajc orga biräsyä' ladro ni zääb neñ guidoro, gujcnı tio'p la' jiaali hasta lo yuj. Gujc te xuro, sas gusuj bej reguiro. ⁵² Dxejc gubicaj reguij ni niäuu ro' rebaa, luxh gubañsac xhidajl xpejn Dios ni gujt aguc xchej. ⁵³ Dxejcti, che huäjs Jesús lo rebengut, biriireni neñ baa, baluilojreni lo xhidajl bejn ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnañl Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen, steeni najc Marii xnan Jacob näjza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujñ te benrajp ni siääd guedx Ari-matea; laani José. Näjza dade'ga najc tej reni birinañl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejb-nini neñ te bariadya, ⁶⁰ huitixhnini neñ xpaapacni. Nacoob baaga, gojnıi bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheereni lanij, bara yääl bidojp rebixhojz ni rnibee näjza rebejn ni laa refarisee, bidzujñreni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibañsacni loj rebengut.” ⁶⁴ Ni'c baxhañ chu chacanäj ro' baaga dxejli guisa' choñ dxej, te di chää rexpejn pacni chaläärenini tiejxhni, dxejc gäbreni loj rebejn: “Agubañsacni loj rebengut.” Yälrusgueega sajc cuentruru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutz'u'tz ro' baaga si'ctis ni sajc guntu.

⁶⁶ Dxejcti sääreni, basäutu'tzreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

28

Sibaṅsac Jesús loj rebeṅgut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c beṅgut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguilltu Jesús ni cuaj lo cruzj.

⁶ Rutini ree sa'csi agubaṅsacni sigajc ni najni. Coltahuii cadro gojtni. ⁷ Colguxun, colchaye'tz loj rexpejn pacni agubaṅsacni loj rebeṅgut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejn pac Jesús. ⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojnrenini. ¹⁰ Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ Laḷni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zareni con rebeṅgool te bia'nreni diidx gudeedreni xhiroob meel lo resoldaad, ¹³ räjpreni lojreni:

—Scree colye'tz lo rebejn: “Laḷ ni nagayesnu, canäjnu ro' baa, biääd rexpejn pac Jesús guläxhiga'tzreni tiejxhni.” ¹⁴ Palga jiendaajg gubernadoor dee, siohuiinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

Baxhal Jesús rexpejn pacni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejn̄pac Jesús lo región Galilee, lo dajn cadro bia'n Jesús diidx guidxaagnireni. ¹⁷ Cheni bahuiireni loj Jesús, bazuxhijbreni, gojn̄renini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räjpni:

—Arapä guiraa yäl̄rnibee xhaguibaa näjza lo guedxliuj. ¹⁹ Ni'cni, colchäj, guideb guedxliuj colchagajn bejn̄ gac xpeñä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. ²⁰ Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluii Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios. ² Si'cni bacuaa tolsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,
ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyunsä'c xnezyuj Dad,
colslüi rexnezyulajzni.”

⁴ Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajczeni, te jia xtojlneni.

⁵ Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojlneni lo Dios, rustiobnis Juanreni neñ gueu Jordán.

⁶ Xhajt Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäsergüijxh. ⁷ Caguluüini rebejn, räpgajcni:

—Detzä siääd tej nani sajcro loä, nani nicla di nungäjln surloä, cuää xcura'chni. ⁸ Narä abatiobnisä la'tu con nis, biädla laani guxhalni Sprit Dxan xten Dios te cuääzni neñ lastootu. Si'c gustiobnis nani jiaäd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcro batiobnis Juan Jesús neñ gueu Jordán. ¹⁰ Che birii Jesús neñ nis, bahuiüni bixal guibaa. siädyäjt Sprit Dxan xten Dios yejcti si'c te palom. ¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälü.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxan xten Dios Jesús lo reyubijdz.

¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcro biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan neṅ latzguiib. Dxejcti huij Jesús nez Galilee, huiluini xtidx Dios. ¹⁵ Dxejc räjp Jesús:

—Abidzujṅ dxej, luxh yälṛnibee xten Dios abidzujṅ gajxh. Colṣiejch lajztu, colchalilajz xtidx Dios.

Gurejdx Jesús tajp bejṅ ni rniaaz bājṅ

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón nājza loj Andrés bejtz Simón. Cazälreni xquijxhreni lo nis, sa'csi rniaazreni bājṅ. ¹⁷ Dxejc räjp Jesús lojreni:

—Coltanajl narä, te gunä cueddxtu bejṅ lacuaa ni guiniaaztu bājṅ.

¹⁸ Lagajc dxejc basa'nreni rexquijxhreni, sanätirenini.

¹⁹ Dxejc gusaj Jesús sche'n, sas bahuiini loj Jacoob nāj Juan, rexi'n Zebedeo. Cayunsa'creni xquijxhreni neṅ xcanuurenini.

²⁰ Guredxgajcni guiro'preni, dxejcti laareni basa'nreni xta-dreni Zebedeo neṅ canuu, nājza rexmosni, sanätirenini Jesús.

Te bejṅ nani guyu' beṅdxab neṅ lastooni

(Lc. 4:31-37)

²¹ Bidzujṅtirenini guedx Capernaum. Dxejcru sabd, dxej ni rusilajz rexpē Israel, biu' Jesús neṅ guidobāz xten rexpē Israel. Dxejcti baluii Jesús rebejṅ ni tre' ro'c. ²² Bidxelojṅni rebejṅ xtiidxni, sa'csi caguluinireni si'cpac te ni rnibee, xhet si'cdi remastr xten leiidi. ²³ Neṅ xquidobāzreni yu' te bejṅ yu' te beṅdxab neṅ lastooni. Beṅdxabga guredxa', räjpni:

²⁴ —Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beṅdxan ni siäd lo Dios.

²⁵ Dxejcti gudidxa' Jesús lo beṅdxabga, räjpni lojṅni:

—Basäuu ro'lu, birii neṅ lastoo niguiire.

²⁶ Sas beṅdxabga batienguig niguiiga, luxh cabedxa'ni biriini neṅ lastoo niguiiga. ²⁷ Bidxejbtu guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluini? Niguiire rnibeeni nāj rebeṅdxab, luxh ruzoobreni xtiidxni.

²⁸ Di niaclaa guchee rebejṅ guideb nez Galilee xhi rujṅ Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹ Che biriireni xquidobāz rexpejṅ Israel, huinä Jesús Jacoob nāj Juan roliz Simón nājza Andrés. ³⁰ Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

³¹ Dxejcti gubig Jesús lojṅni, gunaazni ṅaani, guläsni; lagajc dxejc biriini xliaa. Dxejc gusloj cayunireni.

Xhidajl beṇracxhuu basiajc Jesús che huääz gubijdx
(Mt. 8:16-17; Lc. 4:40-41)

³² Che huääz gubijdx, luxh abiu' guxhijn, biädnäreni guiraa rebenracxhuu loj Jesús, näjza renani yu' beṇdxab neṇ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälguijdx. Niluxh gulääzani xhidajl beṇdxab, niluxh dini nusaan ninii rebenṇdxabga, sa'csi najnreni chu najcni.

Baluu Jesús nez Galilee
(Lc. 4:42-44)

³⁵ Che bara yääl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús. ³⁷ Che bidxälrenini, räjpreni lojni:

—Guiraa rebejn caguiillu.

³⁸ Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neṇ reguidobäz xten rexpejn Israel. Gunibeezani birii rebenṇdxab neṇ lastoo xhidajl rebejn.

Basiajc Jesús te bejn ni raḷ tiejxhni
(Mt. 8:1-4; Lc. 5:12-16)

⁴⁰ Gubig te beṇracxhuu ni raḷ tiejxhni loj Jesús, bazuxhijbni. Dxejcti räjpni lojni:

—Narä nanä sajc gusajclu narä palga rlajzlu.

⁴¹ Balaslajz Jesús beṇracxhuuga, gunaazni ṇaani, räpgajcni:

—Rlazä jiajclu. Biajc naj.

⁴² Cheni guniini scree, biacgajc beṇracxhuuga. ⁴³ Dxejcti gulunejz Jesús bejn̄ga. Per räpxgaani lojni:

⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

⁴⁵ Dxejc sää bejn̄ga. Sas gusloj cayujyni diidx lo rebejn xcuent guiraa nani gujcn̄i. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

2

Basiajc Jesús te bejn ni di guniib
(Mt. 9:1-8; Lc. 5:17-26)

¹ Che agudejd balti dxej, biusac Jesús neṇ guedx Capernaum. Dxejcti biejn diajg rebejn arbäjzni. ² Bidopgajc xhidalduxh bejn. Gudxaj neṇ yu'. Nicla rolä' di niajḷ nisiujreni.

Dxejcti caguluii Jesús xtidx Dios lo rebejn. ³ Dxejcti bidzujn tajp bejn, nuureni te bejn ni digacti guiniib; siädnärenini lo Jesús. ⁴ Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujni. Dxejcru cadro baxhalreni basiäjtreni da' ni naga' beñracxhuuga lojni. ⁵ Che bahuii Jesús rililajzreni, dxejc räjpni loj beñrachxhuuga:

—Xi'nä, agubicaj rextojllu.

⁶ Sas gaii bejn ni ruluii leii ni sobga' ro'c bejnreni xhigab neñ lastooreni, naareni: ⁷ “¿Xhicuent rñii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!” ⁸ Dxejcti guchegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c neñ lastootu? ⁹ ¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj”? ¹⁰ Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, caniä loj beñracxhuure:

¹¹ —Lojlu rñiä, ¡Huistie, cua' xta'lu, huij rolijzlu!

¹² Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³ Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴ Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebeñdojl ni di chasanäj leii, näjza rexpejn pacni, lo mex. Xhidajlreni tre', luxh sanajlreni Jesús. ¹⁶ Dxejcru rebejn ni ruluii leii näj referisee, che bahuiireni cayaunäjni renani rusquijx näjza rebeñdojl, räjpreni loj rexpejn pac Jesús:

—¿Xhicuent rbenäj xmastrtu reni rusquijx näj rebeñdojl, luxh raunäjnireni, ränäjnireni?

¹⁷ Che biejn diajg Jesús xhi caniiireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebeñsa'c, biädtedxä rebeñdojl, te gusiech lajzreni.

*Gunabdiidxreni loj Jesús xcuent yälrucua'n**(Mt. 9:14-17; Lc. 5:33-39)*

¹⁸ Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn paclu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon chää cadro ru' yälruhnaa che meer suga' bi'n? Che meer suga' bi'n lojreni, direni gucua'n.

²⁰ Per sidzujn dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs.

²² Rutza rusäldi bin ni gajd guilaj neñ guidyux ni abigaa. Sa'csi bin ni gajd guilajga sutiäjsni guiidga che guilajni, luxh sinijt binga näjza guiidga. Ni'cni nanab gusälni bincoob neñ guidcoobza.

*Batojp rebejn ni rinajl Jesús triuu sabd**(Mt. 12:1-8; Lc. 6:1-5)*

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. ²⁴ Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn paclu dzuun ni di guchaag gunni neñ dxej ni rusilajznu, ä?

²⁵ Dxejcti räjp Jesús lojreni:

—¿La gajdtu goł nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶ Biu' David neñ xyu' Dios cheni guyu' toAbiatar loj Dios. Abiatar sajru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejn. ²⁸ Ni'cni narä, Xi'n Dios ni gujc Niguii, näjza sabd rnibeä.

3*Niguii ni nabijdz te ñaani**(Mt. 12:9-14; Lc. 6:6-11)*

¹ Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te ñaani. ² Niluxh ro'c cagula'tz rebejn Jesús don la susiajzni niguiiga sabd, dxej ni rusilajz rexpejn Israel, sa'csi rlajzreni cue'creni xquejni loj nani rnibee rexpejn Israel. ³ Dxejc räjp Jesús lo niguii nani nabijdz ñaani:

—Huistie, guzuj galäiire.

⁴ Dxejcti gunabdidxgajcni loj gaii rebejn̄ga, rājpn̄i:

—¿La laaca gunni dzunza'c, o la dzunguijdx, sabd, ä? ¿La suslaani yäl̄nabaj̄n, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc rāj̄p Jesús loj niguiiga:

—Baslii ñaalu.

Dxejcti basliini ñaani. Biajctini. ⁶ Dxejcru biunejz re-farisee. Guslogajczeni caguchaagreni diidx con reni nadxaag Herodes, te don xho ju'treni Jesús.

Xhidajl bejn̄ bire' ro' nis

⁷ Jesús näjza rexpejn̄pacni sääreni ro' nis, luxh xhidajl ben Galilee birinajlni. ⁸ Che gojnreni redzunro ni rujn Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zarenı birii nejz stelaad gueu Jordán, biriizarenı nez guedx Tiro, näj nez guedx Sidón, biädhuiireni loj Jesús. ⁹ Ni'cni rāj̄p Jesús loj rexpejn̄pacni quiilreni te canuu, te na'c gutää reben̄xhidaalgani. ¹⁰ Abasiajc Jesús xhidajl beñracxhuu, ni'cni guiraasi beñracxhuu caxa't lojni, te canrenini te jiajcreni. ¹¹ Niluxh che rhuii reben̄dxab lojni, ruzuxhijbreni lojni. Dxejcti rbedxa'reni rāj̄preni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreni chu najcni.

Gule Jesús tzubitiop bejn̄ loj reni rinajlni

(Mt. 10:1-4; Lc. 6:12-16)

¹³ Birii Jesús sääni lo te dajne' cadro gurejdxni renani rlanjzni cueni. Gubigtireni lojni. ¹⁴ Dxejcti guleni tzubitio'preni te sanäjreni laani, te guxhañnireni chaluiireni xtidx Dios; ¹⁵ te ga'preni yäl̄rnibee te gusiajcreni beñracxhuu, te cuääzarenı reben̄dxab. ¹⁶ Retzubitio'p bejn̄ ni gule Jesús najc: Simón, ni gulälajzani Pedr. ¹⁷ Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn̄ ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejb rñigajc, ¹⁹ näj Judas Iscariot, ni bato' Jesús loj reni rdxechlajz lojni. Sä'tireni rolijz te dade'.

Yäl̄rniyaj loj Sprit Dxañ xte Dios

(Mt. 12:22-32; Lc. 11:14-23; 12:10)

²⁰ Dxejc bidopsac reben̄xhidaalga; nicla niajc niaunäj Jesús rexpejn̄pacni. ²¹ Che biejn̄ diajg resa' Jesús dee, biädxhiirenini, sa'csi naareni, yejcnı cayajc.

²² Rebejn̄ ni ruluii leii ni birii guedx Jerusalén bidzuj̄nza lo Jesús, dxejc rāj̄preni:

—Beelzebú, nani rnibee reben_{dx}ab, yu' nen_n lastoo niguiire. Niluxh nani rnibee reben_{dx}ab rudeed yäl_{rn}ibee lo Jesús te cuääni ben_{dx}ab.

²³ Dxejc gurejdx Jesús rebejn_{ga}, bijyni te cuent ni rului lojreni, räjpni:

—¿Xho gurilaagw ben_{dx}ab lagajc saben_{dx}abni? ²⁴ Palga rebejn_n xten te yäl_{rn}ibee la'reni, luxh til_näj te cuaani ste cuaaga, di yäl_{rn}ibeega chu xchej. ²⁵ Palga te famil_l rdil_näj lagajc sa'ni, di familga chu xchej. ²⁶ Palga ben_{dx}ab nani rnibee til_näj lagajc laani, di xcäl_{rn}ibeeni chu xchej, sa'csi ni'c gun luuxni.

²⁷ 'Rut gacdi jiu' rolijz te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

²⁸ 'Rniliäpac lojtu guiraa dojl_näj za yäl_{rn}iyaj xten rebejn_n sajc jia. ²⁹ Nani guiniyaj Sprit Dxaan xten Dios, digacdi guibicaj rextoj_{ln}i, anuutisni xtoj_{ln}i par tejpas.

³⁰ Räjpni si'c sa'csi caniireni yu' ben_{dx}ab nen_n lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹ Dxejcru bidzuj_n xnan Jesús, näj rebetzhuinni. Direni niu', baxha_ltisreni chu huitejdxni. ³² Rebejn_n ni sobga' gabi Jesús räjpreni lojni:

—Xnanlu näj rebejtzlu suga' ro lä', caguiilreni luj.

³³ Dxejcti räjp Jesús lojreni:

—¿Chu reni'c najc xnanä näj rebetzä?

³⁴ Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä. ³⁵ Chutis ni rujn ni rlanjz Dios, ni'c najc betzä, bisianä, näjza xnanä.

4

Xcuent niguii ni sale'c binij

(Mt. 13:1-23; Lc. 8:4-15)

¹ Suga' Jesús ro' nis guslosac caguluiini xtidx Dios, luxh bidojp xhidajl bejn_n cadre suga'ni. Xhidalduxh najcreni, ni'cni biu' Jesús nen_n te canuu ni suga' ro' nisga. Dxejcti gurejni nen_{ga}, biääd guiraa bejn_n bia'ntireni ro' nis. ² Dxejc balui-inireni guiraloj, ganax cuent ni rului guniini. Che caguluiini, räjpni lojreni:

³ —Gucua diajgtu dee. Guyu' te niguii. Biriini sale'cni binij.

⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga nen_n guij cadre xheti xhidajl yuj. Binijga gulengajcni, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubijdx, bigo_{ln}i, gubijdzitini. ⁷ Stee lajt biajb binijga nen_n yaguejch. Dxejcti biroob reyaguejchga, luxh bejnreni balaa loj binijga, ni'cni gujcn_i ganax bilii. ⁸ Per stee lajtga

biajb binij lo yusa'c. Gulejn reyäjlgā, guroobreni, gucsa'creni. Yu'reni cuaj galbitzūu xob, yu'reni cuaj gayojn xob, yu'zareni cuaj tegayuu xob.

⁹ Dxejc räjpni lojreni:

—Chutis ni rļajz guisieed, sucuadiajgni.

¹⁰ Che asii xhidajl bejn, rebejn nani suga' gajxh cadro suganāj Jesús guitzubitio'p xpejn pacni gunabdiidx lo Jesús xhi sāloj cuentre. ¹¹ Dxejc räjp Jesús:

—Dios abejn gacheetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹² te mase cahuiireni direni gumbee, te mase cayiejn diajgrenti, direni gachee. Scree gacni, te na'c gusiejch lajzreni, te na'c guibicaj xtojreni.

¹³ Rājzani lojreni:

—¿La ditu gachee cuentre? ¿Xhocha gacheetu xhidajlru cuent? ¹⁴ Niguiire nani sale'c binij najc si'c te nani ruluii xtidx Dios. ¹⁵ Yu' bejn ni najc si'c binij ni biajb cuä' nezyuj: riejn diajgrenti xtidx Dios nani ruluii bejn. Dxejc che jiejn diajgrenti xtidx Dios, riääd Satanás rbägajcni xtidx Dios ni yu' neñ lastooreni. ¹⁶ Yu'za rebejn ni najc si'c binij ni biajb neñ reguij, renani che jiejn diajgrenti xtidx Dios, rbaa lajzreni rca'reni diidxga. ¹⁷ Niluxh direni nisiudzu'tz, sa'csi guxii huilii lajzreni. Che rdejdreni trabajw o che rusacsí bejnreni xcuent xtidx Dios, rusaanreni xtidx Dios. ¹⁸ Yu'zareni najc si'c binij ni biajb neñ yaguejch, riejn diajgrenti xtidx Dios, ¹⁹ dxejc che ru'rurenī yärsia' xcuent recos guedxliujre, rsia' lajzreni ga'preni meel, rļajzreni ga'prurenī guiraloj recos, dxejc riu' redee neñ lastooreni, rusäuuni lo xtidx Dios, xlia'si biejn diajgrenti xtidx Dios. ²⁰ Yu'za bejn ni riejn diajgrenti xtidx Dios, rlii lajzreni diidxga, xhet xlia'ti biejn diajgrenti xtidx Dios. Najczeni si'c binij ni biajb loj yusa'c. Yu' rebejn ni najc si'c nani cuaj galbitzūu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹ Rājzā Jesús lojreni:

—¿La riädñātu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä? ²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rļajz guisieed, sucuadiajgni.

²⁴ Rājzā Jesús lojreni:

—Colyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc

ni xca'tu. ²⁵ Renani rajp che'n yäl_najn, lojreni sudeedru Dios yäl_najn. Luxh renani xhetru rusäl_di loj xhigabreni, sudzucaj Dios yäl_najn nani rajpreni.

Xcuent binij ni roob

²⁶ Guniiza Jesús lojreni:

—Yäl_rnibee xten Dios najc si'c rsiajc te niguii che rbe'cni binij lo yuj, ²⁷ dxejc yääl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdz'e neñ dojga. ²⁹ Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpnj.

Xcuent bedz muxhtas

(Mt. 13:31-32; Lc. 13:18-19)

³⁰ Räj_pza Jesús:

—¿Xhini'c najc si'c najc xcäl_rnibee Dios? ¿Xhi te cuent guiniinu te guiluiinuni? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz baze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpałaani.

Si'c baluii Jesús ganax con cuent

(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racheereni. ³⁴ Con recuent ni ruluiitis gunii Jesús lojreni. Niluxh lo rexpejn_pacni basule'ni guiraa recuentre.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵ Lagajc gudxejga räjpni loj rexpejn_pacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini. ⁴⁰ Räj_p Jesús loj rexpejn_pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

5

Nigui Gadara ni yu' beṇdxab neṇ lastooni
(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara. ² Si'ctis ni birii Jesús neṇ canuu, biädgajc te niguii lojni ni birii neṇ rebiliää cadro rga'tz bengut. Yu' beṇdxab neṇ lastoo niguiiga. ³ Rbäjzni neṇ rebiliääga luxh rut rajcdi rucuaduuni, nicla con cadenguiib. ⁴ Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni neṇ redajn, neṇ rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxuṇni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, beṇdxab, birii neṇ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

¹⁰ Sanuutis canabni lo Jesús na'c guxhaṇni rebeṇdxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab rebeṇdxabga loj Jesús, räjpreni:

—Baxhaṇ nuure loj recuchre te jiu'nu neṇ lastooreni.

¹³ Dxejcti basaan Jesúsreni. Biriiti rebeṇdxabga neṇ niguiiga, dxejc biu'reni neṇ lastoo recuchga. Yu' si'cti tiop miṇ cuch ro'c. Baxuṇ recuchga, dxejc biroṇreni ro' guilaj, bitejbreni neṇ nis, gujtireni neṇ nisga.

¹⁴ Renani cayajp recuchga baxuṇreni, huiyeiireni diidxga neṇ guejdx, näjza loniaa. Dxejc biääd bejṇ biädhuui nani gujc ro'c. ¹⁵ Che bidzujnreni cadro suga' Jesús, bahuiireni loj niguii nani guyu' rebeṇdxabga neṇ lastooni. Sobga'ni ro'c, najcwni xhajbni luxh nasa'c yejčni. Niguiire najc nani guyu' beṇdxab ni laa Legión neṇ lastooni. Bidxejbti rebejṇ nani bahuii lojni. ¹⁶ Dxejcru rebejṇ ni bahuii xhi gujc ro', huiyeiireni diidx xho guzajc niguiire nani guyu' beṇdxab neṇni galoo, näjza nani guzajc recuch. ¹⁷ Dxejc gusloj canabreni loj Jesús jiunejzni.

¹⁸ Che biu' Jesús neṇ canuu, niguii nani guyu' beṇdxab neṇ lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyei diidx lojreni xho bennäjä Dadlu, näjza xho balaslajzni luj.

²⁰ Sä'ti niguiiga, gusloj cayujyni diidx neṅ reguejdx xten Decápolis xho bennäj Jesúsni. Guiraa rebejn bidxeloj.

Xindxa'p Jairo nájza gunaa ni bahual xhajn Jesús
(Mt. 9:18-26; Lc. 8:40-56)

²¹ Che bidzunsac Jesús stelaad ro' nisga neṅ canuu, bidzujñ xhidalduxh bejn cadre suga'ni. Bia'nti Jesús ro' nisga. ²² Dxej cru biáad te niguii nani laa Jairo, ni rnibee neṅ xquidobáz rexpén Israel. Che bahuiini loj Jesús, bazuxhijbni lojni. ²³ Canabpacni lojni, rájpn:

—Xindxapá'á acayejt. Gudaa, guzujlu naalu yejcn, te jiajcn, te guibajñni.

²⁴ Sanäti Jesús bejn ga. Xhidajl bejn sanajlni, luxh cagutäärenini. ²⁵ Loj rebenxhidaalga yu' te gunaa ni agujc tzubitio'p ijz racxhuuni yälguidxbäii. ²⁶ Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. ²⁷ Sa'csi biejn diajgn xhini'c canii rebejn xcuent Jesús, gubig gunaaga nez dejt Jesús, guideb neṅ rebejn, bahualni xhajn Jesús. ²⁸ Cayujñni xhigab, naani: “Palga narä falä xhajbtisni, siacä.” ²⁹ Lagajc dxejc guläz caxe' xtiejñni, gucbeeza tiejxhni abirii xcälracxhuuni. ³⁰ Gucbegajc Jesús yu' chu abasiajcn. Gubiregajcn neṅ rebenxhidaalga, rájpn:

—¿Chuni'c bahual xhabä?

³¹ Dxej cru rájpn rexpejn pacni lojni:

—Rhuiilu benxhidaal cagutääl, luxh naalu: “¿Chuni'c bahual xhabä?”

³² Sas cahuii Jesús nez ree, nez rec, te fini loj nani bahualni. ³³ Dxejc bidxejb gunaare, racejsni, sa'csi gucbeeni xhini'c gujcn. Dxejc biáadni, bazuxhijbni loj Jesús, räbliini loj Jesús guira'ti ni bejñni. ³⁴ Dxejc rájpn Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajcxälracxhuulu.

³⁵ Canisijc Jesús si'c che bidzujñ renani birii rolijz dade' ni rnibee neṅ xquidobáz rexpén Israel. Rájpreni:

—Agujt xinxape'lu. ¿Xhicuent rusieedrulu Dad mastr?

³⁶ Dxejc che biejn diajg Jesús nani caniireni, rájpn lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pedrtis näj Jacoob näjza Juan bejtni. ³⁸ Che bidzujñni rolijz dade'ga, bahuii Jesús biey ni cayujñ rebejn ni rbedxa' roon. ³⁹ Biu'tini rájpn:

—¿Xhicuent rujntu si'c? Gajd dxape're guet. Nagayejsini.

⁴⁰ Alga baxhiznäjrenini. Dxejc gunibee Jesús birii guiraa rebejn ga. Dxejcti huinäni xcuzejñ dxape'ga con renani sanäni.

Biu'reni cadro naga' dxape're. ⁴¹ Gunaazni naa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gu-nibegajcni gudeedreni xhi gauu dxape'ga.

6

Che guyu' Jesús Nazare't
(Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanäzani rex-pejn pacni. ² Che bidzujn sabd, dxej nani rusilajz rexpejn Israel, gusloj caguluini neñ xquidobäz rexpejn Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yäl'najnre cua'ni ni'c rajc rujnni rextzunduxh Dios con naani? ³ ¿La xhet laadi carpinteer, xi'n Marii, bejtz Jacobo, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴ Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

⁵ Luxh di niajcdi niujn Jesús xhidajl milaagwr ro'c. Tiop-chontis beñracxhuu basiajcn, bazujni naani yejcreni. ⁶ Bidxelo Jesús sa'csi di lajzreni nilii. Caguluuitini neñ guiraa reguejdx' ni ria'n gajxh nejzga.

Baxhal Jesús tzubitio'p bejn ni rinajlni chaluiireni xtidx Dios
(Mt. 10:5-15; Lc. 9:1-6)

⁷ Dxejcru gurejdxni guitzubitio'p xpejn pacni. Gusloj caguxhalni tiopgajreni; badeedzani yäl'rnibee lojreni te guinibeereni loj rebeñdxab. ⁸ Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel neñ dobdäjł. ⁹ Nungäjłza xcaj gura'ch ni'reni, nägajc ga'preni tejtis gamangw, xhet tio'pdini. ¹⁰ Dxejcti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹ Palga yu' te guejdx cadro direni gusaan jiu'tu luxh di rlaizreni cuadiajgreni diidx ni sanätu, colrii guejdxga, colcuijb guxhuj ni'tu si'c te seen te gacheereni xhet laadi bejnreni. Rniliäpac lojtu, guxiiru trabajw ted rebeñ Sodoma näj rebeñ Gomorra quela rebejn ni yu' guejdx cadro direni gusaan jiu'tu.

¹² Dxejc biriireni, sääreni. Cayäbgajcreni nanabpac gusiejch lajz rebejn. ¹³ Gulääzareneni xhidajl beṅdxab dxejcti gudääbreni se't yejc xhidajl beṅracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebeṅgut, ni'c rajc rujnni remilagwre.

¹⁵ Sgaili bejn räjp:

—Laa Elías ni gunii xtidx Diosni.

Sgailireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcti, luxh naj agubaṅsacni loj rebeṅgut.

¹⁷ Sa'csi lagajc Herodes gunibee biga' Juan, dxejc bacuadurenini con cadēguuib neṅ latzguuib, xcälṅnasa'c Herodías. Herodías gujc chääḷ Lib, bejtz Herodes, dxejc cua' Herodes gunaaga si'c chääḷni. ¹⁸ Räjp Juan loj Herodes:

—Xhet laadi rbäznäjlu chääḷ bejtzlu.

¹⁹ Ni'cni rdxechlajz Herodías loj Juan, luxh rġajzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni beṅsa'c, beṅdxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuaadiagsa'cni xtiidxni. ²¹ Niluxh guyu' xmood Herodías. Che gojl laj Herodes, bayaanni rexpejnni ni rnibee, näjza rebejn nani sajz nez región Galilee. ²² Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes näjza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rġajztislu loä, narä sunidxäni.

²³ Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini neṅ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Neṅ te pla't baniidx yejcti.

²⁶ Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo

xmexni, ni'c dipac rlaizni nudxojnni nani gunab gunaaga lojni. ²⁷ Baxhalgajc reii te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen latzguuib, biädñätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejn_{pac} Juan si'c, biädläsreni togoolga. Dxejcti bacua'tzrenini nen te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni näjza ni baluiireni. ³¹ Dxejc räjp Jesús lojreni:

—Col_{taa}, xtebnu cho_{nu} cadro rut rbäjzdi, guisilaaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni. ³² Dxejcti sääreni nen te canuu cadro rut rbäjzdi.

³³ Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujnreni loj Jesús näjza rexpejn_{pac}ni, dxejcti bidojpreni lojni. ³⁴ Birii Jesús nen canuu, bahuiini loj be_nxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl gudxej, gubig rexpejn_{pac}ni lojni, räjpreni:

—Rut rbäjzdi ree, luxh agudxej naj. ³⁶ Baxhal rebejn te chääreni lo reguejdx, näjza re_nench, te chasiireni yätxtiil gauureni sa'csi xheti xhi gauureni ree.

³⁷ Dxejc räjp Jesús lojreni:

—La'tu col_{deed} xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebe_nxhidajlre?

³⁸ Dxejcti räjp Jesús lojreni:

—¿Bal yätxtiil rajptu? Col_{chahuii}.

Che gojnreni balni dxejc räjpreni:

—Gaii yätxtiil, näjza tiop bäjł.

³⁹ Dxejcru gunibee Jesús räjpreni loj guiraa rebejn:

—Col_{cuej} xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga näjza guiro'p bäjłga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bäjł, badeednini loj rexpejn_{pac}ni te badeedrenini loj guiraa rebe_nxhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm_{guidxadoo} yätxtiil näjza bäjł ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis
(Mt. 14:22-27; Jn. 6:16-21)

⁴⁵ Gunibee Jesús jiu' rexpejn_{pacni} ne_n canuu, chägajcreni Betsaida, ni tre' dejt_z nis stelaad, la_{ni} cagusadiid_{xni} rebejn. ⁴⁶ Che gulujx basadiid_{xniren}i, sääni ne_n redane', sanabni lo Dios. ⁴⁷ Cheni acayu' guxhij_n, yu' rexpejn_{pacni} ne_n canuu galäi_i nis la_l ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejt_{zreni} stehuält. Dxejcru che acara yääl, gusaj Jesús loj nis, huijni cadro sasajreni, r_{lajz}ni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te be_nmalni, ni'c guredxa'reni. ⁵⁰ Guiraareni bahuiireni lojni, bidxebduxh_{reni}. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús ne_n canuu cadro yu'reni. Lagajc dxejc biacdx_i bej, luxh laareni bidxeloduxh_{reni}, ⁵² sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

Basiajc Jesús reben_{racxhuu} ne_n guedx Genesare't
(Mt. 14:34-36)

⁵³ Gudejdreni lo nis, bidzuj_nreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni ne_n canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni be_nracxhuu loj Jesús, naga' reben_{racxhuuga} lo da'. Cadrotis riejn diajgreni yu' Jesús riädnäreni reben_{racxhuu}. ⁵⁶ Niluxh cadrotis rij Jesús, ne_n reguedxbäz, ne_n reguedxro, näjza loj re_{rench}, rguixh_{reni} reben_{racxhuu} cadro rajc guii. Dxejcti rniabreni loj Jesús te gac caanreni xhajbni, niluxh biajc guirali_i renani gudaj_n xhajb Jesús.

7

Nani runijt lastoo bejn
(Mt. 15:1-20)

¹ Dxejcti refarisee, renani najc be_nguidoo loj guedx Israel, näjza gaii rebejn ni ruluii leii, renani birii Jerusalén, bidoj_{preni} loj Jesús. ² Bahuiireni cayajw gaii rexpejn_{pac} Jesús, luxh canii rebejn nacd_{xuudx} naareni (dee säloj direni quiib _{naareni} si'ctis ni rdiib _{naa} rebe_n lajdx_{reni}). Ni'cni guniyajreni rexpejn_{pac} Jesús. ³ (Guiraa rebejn xten Israel, näjza refarisee, sasanäj nani baluii rebe_ngool ni yu' guedx Israelreni. Direni gauu palga direni quiib _{naareni} balti huält. ⁴ Che rbi'reni rijreni lo guii, rguibsa'creni _{naareni}, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäj_{uren}i, luxh yu' mood rguibreni rextrastreni näjza rexplooreni,

nājza rextrastguiibreni, nājza rexloonreni.) ⁵ Dxejc gunabdiidx refarisee nājza rebejn ni ruluii leii loj Jesús, rājpreni:

—¿Xhicuent di rexpejnpaclu gun si'cni baluii rebeṅgool, niluxh rajwreni guideb nacdxuudx ṅaareni?

⁶ Dxejcti gunii Jesús lojreni rājpreni:

—iBeṅ guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni, niluxh lastooreni zitro suga' loä.

⁷ Xlia'si ruzuxhijbreni, sa'csi direni chanälajz narä.

Ruluiireni si'c xtiidxpac Dios nani rñii rebejn.

⁸ Rusa'ntu xleii Dios, sasanädu'tztu costumbr nani baluii rebeṅgool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹ Rājpreza Jesús lojreni:

—Rusa'ntu xtidx Dios te risanäjtu recostumbr xtentu.

¹⁰ Sa'csi rājpre Moisés: “Huinälajz xtadlu con xnanlu.” Rājprezani: “Sujut'pactu nani gudzubde yejc xtadni o yejc xnanni.”

¹¹ Niluxh la'tu rñiitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). ¹² La'tu ditu gusaan gunru bejn por xtadni nicla por xnanni. ¹³ Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc rājpreni loj guiraareni:

—Colcuadiajg, colyabee xtidxä. ¹⁵ Rexhicos yälrajw ni rajw bejn, dini gunijt bejṅga, rediidx ni rii neṅ lastoo bejn, nājza recos ni rujn bejn, ni'c runijt bejṅga. ¹⁶ Pal yu' chu rlajz guisieed, sucuadiajgni.

¹⁷ Dxejcti gula'reni loj rebeṅxhidaal, biu'reni neṅ yu'. Dxejc gunabdiidx rexpejnpacni loj Jesús xhi säloj cuent ni guniini.

¹⁸ Basejc Jesús diidx lojreni, rājpreni:

—¿La nājza la'tu xheti xcäriejntu? ¿La di'tu gacbee xhitis yälrajw nani riu' neṅ bejn digacdi gunijtñi lastoo bejn, ä?

¹⁹ Sa'csi dini jiu' neṅ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰ Dxejc rājpreni:

—Rediidx ni rii neṅ lastoo bejn, nājza recos ni rujn bejn, ni'c sii runijt lastoo bejn. ²¹ Sa'csi neṅ lastoo rebejn rii rexhigabguijdx, nājza yälresnäjä chääl sa'ni, yälresnäjä ni xhet najcdi chäälñi, yälrugut sa'ni, ²² yälgubaan, yälrlajzñi ga'pni xhixhten bejn, yälłatsiaj, yälrusgueeni, yäl xheti xtuyj lojni, yälrdxechlajz, yälrudzubde sa'ni, yälñayechlajzñi, yälguyalajz. ²³ Guiraa reyälłatsiajre neṅ lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús
(Mt. 15:21-28)

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni neṅ te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni. ²⁵ Biengajc diajg te gunaa ro'c yu' Jesús. Xindxape' gunaaga yu' beṅdxab neṅ lastooni. Bidzujṅ gunaaga, bazuxhijbni lo Jesús. ²⁶ Gunaaga rnii griegw, najcni beṅ Sirofenicia. Gunabni lojni guinibeeni guirii beṅdxabga neṅ lastoo xi'nni. ²⁷ Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Näjza rebäcua' ni suga' neṅ mex rajw nani rtejb ro' rebiuux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii beṅdxab neṅ lastoo xindxape'lu.

³⁰ Luxh che bidzujṅ gunaare rolijzni, a dxape' naga' lo da'. Guchegajc gunaaga abirii beṅdxab neṅ lastoo dxape'ga.

Basiajc Jesús te beṅgop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujṅtini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni ṅaani yejc niguiiga. ³³ Dxejcti badzucajnini loj rebejn. Baquitzgajcni rebicueṅaani neṅ diajgni, dxejcru batiobxhejnni, gudajntini lujdxni. ³⁴ Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

³⁵ Dxejcru bixalgajc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga. ³⁷ Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

8

Bayaan Jesús tajp mil bejn
(Mt. 15:32-39)

¹ Neṅ redxejga bidojp xhidalro bejn, luxh xheti xhigauureni. Dxejc gurejdx Jesús rexpejnṅpacni ni rinajlni, räjpni lojreni:

² —Rulazlazä rebejnre, sa'csi ṅaj rajc choṅ dxej tre'reni loä, luxh xhet yu'di gauureni. ³ Niluxh palga guxhaläreni

rolijzreni, xliajzreni, sidxajgreni lo nejz; sa'csi yu' renani zijtru siäädreni.

⁴ Dxejcru räjp rexpejn_{pacni} lojni:

—¿Caro chaca'nu yätxtiil te cha xque' rebejn_{re} ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdzisni.

⁶ Gunibee Jesús gurej reben_{xhidaalga} loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn_{pacni} te guteedrenini loj reben_{xhidaal}. Bateedtireni yätxtiilga lo reben_{xhidaalga}. ⁷ Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj reben_{xhidaalga}. ⁸ Dxejc gudajwreni, gudxaj xque'reni. Dxejc batojp rexpejn_{pac} Jesús gajdz dxijm_{reyätxtiil} näj rebäjl dxuc ni bia'n. ⁹ Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpejn_{pacni} nen_{canuu}, biäädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

¹² Dxejcti bazaa lajz Jesús nen_{lastooni}, räjpni:

—¿Xhicuent rlanj rebejn ni nabajn_{naj} fii gac resenro xten Dios? Rniliäpac lojtu, di rebejn ni nabajn_{naj} fii nicla tej sen xhaguibaali.

¹³ Dxejcti basa'nnireni ro'c, biusacni nen_{canuu}, sä'tini stelaad nisga.

Levaduur xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni nen_{canuu}. ¹⁵ Cagulijdx Jesús rexpejn_{pacni}, räjpni lojreni:

—Col_{susi}n, col_{nati} levaduur xten refarisee, col_{nati}za levaduur xten Herodes. (Nalajznu, xtiidxreni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La la_{tis} nacnajd lastootu? ¹⁸ ¿La yu' balojtu,

luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che gula'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

²⁰ —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²² Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³ Dxejc gunaazni naa lotiä'pga, guläänini neñ guejdx. Che batiobxhejni neñ rebalojni, basugajcni naani yejc balo lojiä'pga, gunabdidxgajc Jesús:

—¿La yu' xhi rhuiilu, ä?

²⁴ Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

²⁵ Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn. ²⁶ Dxejcti baxhal Jesúsni rolijzni, räjpni:

—Basquejn, huijga rolijzlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷ Birinäj Jesús rexpejn pacni lo reguejdx ni ria'n nez Cesarea xten Filipino. Lañi sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zarenii rnii najclu Elías, yu'zarenii rnii najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejn pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebeñgool ni najc guxhtis neñ guedx

Israel narä, näjza renani rnibee loj rebixhojz, näjza rebejn̄ ni ruluii leii: sugu'treni narä, luxh ni riojn̄ dxej guibaṅsacä lo rebeṅgut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejn̄pacni. Dxejc gudiln̄äjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn̄ rebejntis rujnlu.

³⁴ Dxejc gurejdxni rebeṅxhidaal con reni najc xpejn̄pacni, räjpni lojreni:

—Palga yu' chu rlaiz gac xpenäpac, sucuääz gunni ni rsia' laizni gunni, sutedni trabajw si'c tej ni caj lo cruzj, su-jiädnaļni narä. ³⁵ Sa'csi nani rlaiz guslaa xcäl̄nabaj̄nni, sunijtni xcäl̄nabaj̄nni. Luxh nani runijt xcäl̄nabaj̄nni xcäl̄nasa'c narä, xcäl̄nasa'c xtidxä, siliaapac xcäl̄nabaj̄nni. ³⁶ Xlia' ga'p bejn̄ guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn̄ te guibaṅn̄äjni Dios. ³⁸ Nani guituinäj narä con rextidxä naj, cheni najc rebejn̄ beṅdoļ, narä, Xi'n Dios nani gujc Niguii, situinäzani che jiädnaä reangl xten Dios che jiälää lo xcäl̄rdimbicha' Xtaä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl̄rnibee Dios.

Gubixhlo Jesús garenca
(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexbajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Naj jiennu choṅ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacheeni xhini'c guiniini, sa'csi cadxebduxhreni. ⁷ Dxejc biääd te za bejn̄ balaa yejcreni. Nen̄ zaga biejn̄ xse' te ni räjp:

—Dee najc xi'nä nani sanälazä, coļcuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibaṅxgaasi Xi'n Dios nani gujc Niguii

lo rebengut. ¹⁰ Basälcheerēni rediidxre neñ lastooreni. Dxejru canabdiidx lo sa'reni xhicha säloj guibansacni lo rebengut. ¹¹ Sas gunabdiidxreni lojni, räjpreni:

—¿Xhicuent rñii remastr xten leii naquinpac jiädxgaa Elías?

¹² Dxejcti bazejctni diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtzc xcuent Xi'n Dios ni gujc Niguii, sidejctni trabajwduxh, rutza jiidini? ¹³ Luxh narä rniä lojtu, abiääd Elías, luxh bennäjrenini si'ctis ni rlajzreni, si'cpac ni caj loj guijtzc ni rusule' xcuentni.

Basiajc Jesús te biuux ni guy'u' bendxab neñ lastooni
(Mt. 17:14-21; Lc. 9:37-43)

¹⁴ Che asiäädreni cadro tre' sgaii rexpejn̄pac Jesús, bahuiireni loj xhidalro bejn̄ ni tre' lojreni, luxh cayeinäj rebejn̄ ni ruluii leiireni. ¹⁵ Che bahuii guiraa rebejn̄ loj Jesús, bidxeloduxhreni, baxun̄reni, huiye'tzreni xchan lojni. ¹⁶ Dxejcgunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beñxhidaalga, räjpni:

—Dad, ree siädñää xi'nä lojlu, yu' bendxab neñ lastooni, nani rujn najcni gop. ¹⁸ Cheni rniaaznini, rutienta'ni xi'nä, luxh riduxh bitzun̄ ro'ni, näjza rauya'ni ro'ni, luxh cabijdzni. Aräpä loj rexpejn̄pacu cuääreni bendxabga, niluxh di niajcti nibäärenini.

¹⁹ Dxejcti gunii Jesús lojreni, räjpni:

—La'tu, bejn̄ ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¿Coltanäni loä!

²⁰ Dxejcg biädñäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh carii bitzun̄ ro'ni. ²¹ Gunabdiidx Jesús loj xtadni:

—¿Gucli rajcni si'c?

Dxejcg räjp dade'ga:

—Che gujclini biuxbäz. ²² Balti huält rusälñini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacñälu? Xhitis sajc gac par nani rililajz.

²⁴ Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuii Jesús bixa't xhidajl bejn̄ lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii neñ lastoo bi'nga. Na'cru chulu neñ lastooni.

26 Dxej cru guredxa' beṇḁxabga, luxh basnibzejsni bi'nga, dxej cru biriini neṇ lastooni. Astoo te beṇḁgut bia'n bi'nga ro'c. Xhidajl rebejṇ räjp:

—Agujtni.

27 Dxej c gunaaz Jesús naa bi'nga guläsnini. Guzuliiti bi'nga.

28 Dxejcti che abiu' Jesús neṇ yu', gunabdiidx rexpejṇpacni lojni:

—¿Xhicuent di niajcdi nibäänu beṇḁxabga?

29 Dxej c räjp Jesús lojreni:

—Di gacdi cuäätu sa' beṇḁxabre palga ditu cuedx-guinab lo Dios, palga ditu gucuaṇxgaa.

Gunisac Jesús xho guetni

(Mt. 17:22-23; Lc. 9:43-45)

30 Dxej c biriireni ro'c, gudejdreni Galilee. Luxh di rlaiz Jesús niacbee rebejṇ sadejdreni nejzga, 31 sa'csi caguluiini rexpejṇpacni. Cayäjpni lojreni: “Xi'n Dios ni gujc Niguui sidej dñi ladzṇaa rebejṇ, niluxh sugu'trenini. Che guiza' choṇ dxej gujtni, sibajṇni stehuält.” 32 Niluxh laareni direni niacbee xhini'c guniini, bidxej bzareni niniabdiidxreni lojni.

¿Chuni'c saj cru?

(Mt. 18:1-5; Lc. 9:46-48)

33 Bidzujṇtirenini Capernaum. Che biu'ni neṇ yu' räjpni lojreni:

—¿Xhini'c cagusiejytu lo nejz?

34 Dxej c xhet guniitirenini, sa'csi laareni cagusieinäj sa'reni lo nejz don chuni'c saj cru lojreni. 35 Sas gurej Jesús, dxej c gurejdxni guitzubitio'p xpejṇpacni, räjpni lojreni:

—Palga yu' chu rlaiz gasaj cru lojtu, sugacxgaani si'c te nani xhet sajcti, sugunzani xtzuun chutis.

36 Dxejcti cua'ni tej biuxbäz, huinänini galäiireni. Dxej c gudääzni biuxbäzga, räjpni lojreni:

37 —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhaḁ narä racnäjni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

38 Dxejcti gunii Juan räjpni lojni:

—Bahuiinu lo te bejṇ ni rbää beṇḁxab con xcälṛnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

39 Dxej c räjp Jesús lojni:

—Na'c gudxojtntu gunni si'c sa'csi bejṇ nani rujn milagwr con xcälṛnibee laä digacdi guiniyagajcni narä. 40 Nani di guidxagdijḁ nuunu, xladnu yu'ni. 41 Rniliäpac lojtu, chutis

ni guniidx te bas nis lojtu sa'csi najctu xpejn̄pac Crist, siguijx Diosni xcuent nani bejn̄ni.

Nani rujn̄ jiajb bejn̄ lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä neñ dojl, sugal te guimolin yejnni dxejcti gucuaarenini lo nisdoo. ⁴³ Palga tej ñaalu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ñaalu gusälreni luj gabijl, loj bajl ni di jiuüi, ⁴⁴ cadre diza xpisiujgreni guet, diza bajl jiuüi. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadre yu' Dios quela sojb guiro'p ni'lu luxh chäälü gabijl, lo bajl ni di jiuüi, ⁴⁶ cadre di xpisiujgreni guet, diza bajl jiuüi. ⁴⁷ Luxh palga tej balojlu gun gunlu dojl, gulääni: hueenru chäälü cadre rnibee Dios natiä'p lojlu quela sojb guiro'p balojlu chäälü gabijl, ⁴⁸ cadre di xpisiujgreni guet, diza bajl jiuüi.

⁴⁹ 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn̄ lo Dios. ⁵⁰ Hueen najc sejd, luxh palga agudejd yälnadzij yejcni, ¿xho guntu te gacsacni nadzij? Colyajc nadzij la'tu, colguibaññäsa'c sa'tu.

10

Balüi Jesús xcuent rälrurō'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn̄ lojni stehuält, sas guslosacni caguluinireni si'ctis ni ruluinireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälüni, ä?

³ Dxejc laani bazejcn̄ diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitz gusaan chäälüni che gurō'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej beñ guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznäjni chäälüni. ⁸ Niluxh renani gujc tiop bejn̄ sajreni si'c tejsi bejn̄”, diruren̄ gac tiop bejn̄, si'c tejsi bejn̄ gacreni. ⁹ Na'c gudzucaj bejn̄ lo sa bejn̄ni nani abachaag Dios lo sa'ni.

¹⁰ Che biu'reni nen̄ yu' gunabdidxsac rexpejn̄pacni lojni xcuent rediidxre. ¹¹ Dxejc räjpni lojreni:

—Chutis niguii ni gusaan chäälni, sas guchñaani ste'cani, ru-jnni dojl. ¹² Niluxh palga gunaa guro'n chäälni sas guchñaani ste'ca niguii, rujnzani dojl.

Gunab Jesús gunle' Dios yejc rebiuxbáz

(Mt. 19:13-15; Lc. 18:15-17)

¹³ Biädñäza rebejn̄ biuxbáz lojni te gutzuub Jesús ñaani yejcreni, sas gudidxa' rexpejn̄pacni lojreni. ¹⁴ Che bahuii Jesús xhi cayujn̄ rexpejn̄pacni, bidxe'chni räjpni lojreni:

—Cołsaan jääd rebiuxbáz loä. Na'c gudxojtoreni, sa'csi xcäl̄rnibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlanj jiu' lo xcäl̄rnibee Dios nanab guzobdiajgreni xtidx Dios si'c ruzobdiajg rebiuxe' xtidx xtdreni. Palga dini gun si'c, dini jiu' lo xcäl̄rnibee Dios.

¹⁶ Dxejcti gudääz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús

(Mt. 19:16-30; Lc. 18:18-30)

¹⁷ Che birii Jesús loj xnejzni, ruxuñ te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beñsa'c, ¿xhini'c gunä te xca'a yäl̄nabajn̄ par tejpas?

¹⁸ Sas räjp Jesús lojni:

—¿Xhicuent rniilu loä beñsa'c? Tejtisni najc beñsa'c; Diostis najc beñsa'c. ¹⁹ Najnlu xhini'c gunibee Dios gunni: “Na'c guesnäjlü chääł sa'lu, na'c ju'tlu, na'c cuanlu, na'c gus-gueelu chutis, na'c cuäälü yejc xhixten sa'lu, huinälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn̄ nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn̄ diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rex-pejn̄pacni:

—Naganduxh jiu' rebejn̄ nani yu'duxh xhixtenni lo xcäl̄rnibee Dios.

²⁴ Dxejc bidxelo rexpejn̄pacni che biejn̄ diajgreni rextiidxni. Dxejc räjp Jesús lojreni stehuält:

—ǰAaitu xi'nä!, lacti naganduxh gusaan renani sanälajz xhix-
tenni guinibee Diosreni. ²⁵ Guyasiru ted te cameii ni' te guux
quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxhreni, räjpreni lojni:

—ǰChuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi guslaa sabejn̄ni, Diostis rajc ruslaa bejn lo
dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajl̄nu luj.

²⁹ Dxejc räjp Jesús:

—Rniliäpac lojtu, chutis nani cuälaz rolijzni, rebejtzni,
rebisiajn̄ni, xtadni, xnanni, chääl̄ni, rexi'n̄ni, rexyujni,
xcäl̄nasa'c narä, näjza xcäl̄nasa'c xtidx Dios, ³⁰ sica'ni lo
guedxliujre te gayuu huält xhidajlru. Sica'ni rolijzni,
rebejtzni, rebisiajn̄ni, xnanni, rexi'n̄ni, rexyujni.
Sisiunajlrenini naj, dxejc xhaguibaa sica'ni yäl̄nabaj̄n par
tejpas. ³¹ Xhidajl rebejn̄ nani sajc lo guedxliujre xhet
sajcdireni xhaguibaa; niluxh rebejn̄ nani xhet sajcdi lo
guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejn̄pacni sääreni
Jerusalén, luxh cadxelojreni. Cadxejbza rebejn̄ nani
sanajlreni. Dxejcti guläsac Jesús rexpejn̄pacni lo rebejn̄, gusloj
cayäjpni lojreni guira'ti nani sacni. ³³ Räjp Jesús:

—Sionnu Jerusalén, luxh narä, Xi'n Dios nani gujc Niguii,
sidedä ladz̄naa rebixhojz nani rnibee näjza rebejn̄ ni ruluii
leii. Luxh sinibereeni guetä. Suteedreni narä lo reben̄zijt nani
digac xpejn̄ Israel. ³⁴ Suxhisnäjreni narä, siguijnreni narä,
sutiobxhejn̄zaren̄ni loä, dxejcru sugu'treni narä. Che riojn̄
dxej sibaṅsacä.

Gunab Jacob näjza Juan te yäl̄nasa'c

(Mt. 20:20-28)

³⁵ Dxejcti gubig Jacob näjza Juan, rexi'n Zebedeo, räjpreni
lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—ǰXhini'c rlaiztu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbäjpgw che
acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajc yātu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yātu nani yä'ä, luxh guirobnistu si'cni guirobnisä narä. ⁴⁰ Te cue tejtü ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacobo näjza loj Juan. ⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxagljaz gasajcrueni lo rebejn. Luxh rebejn ni sajc rnibeduxhreni lo rebejn. ⁴³ Xhet si'cni guntu la'tu. Chutis nani rlaz gasajcru lojtu, riäjġ gacni mos lojtu. ⁴⁴ Luxh chutis la'tu nani rlaz gasajcru, riäjġ gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcäl nabajni te laa xhidajġ bejn lo dojl.

Basajc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpeljnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlaz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlaz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusuli, luj cabejdxni.

⁵⁰ Sas rolca xhablazni gudixhni, huisuliini, biäädtni lo Jesús. ⁵¹ Dxejc räjp Jesús lojni:

—Naja', ¿xhini'c rlazzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujñreni gajxh Jerusalén, gudejdreni neñ reguedx Betfagé nájza neñ guedx Betania nez cuä' dajne' ni laa dan Oliib. Baxhal Jesús tiop xpejñpacni, ² räjpni lojreni:

—Colçhäj guedx' ni ria'n nez lojtu. Che guidzujñtu ro' guejdxga, sidxäلتu te bure' ni caduu. Gajd bejñ cuibni. Colçhecni, coltanägajcni. ³ Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴ Säätireni ro'c. Dxejcro ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejñ ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejñga si'cni räjp Jesús lojreni gäbreni. Basangajc rebejñga sanäreni bure'ga. ⁷ Dxejcro biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga. ⁸ Xhidajlza bejñ gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejñ ni nijd lojni náj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹ Dxejcti biu' Jesús neñ guedx Jerusalén. Biu'zani neñ guidoro. Che bahuii Jesús guira'ti ni cayajc neñga, sanäni guitzubitio'p xpejñpacni, sääreni Betania sa'csi agudxej.

Batzubde Jesús yejc te yagiügw ni xhet cajdi lojni
(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejñpacni.

Gulää Jesús renani ruto' náj renani rsii neñ guidoo
(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujñreni guedx Jerusalén. Biu' Jesús neñ guidoro. Gusloj cabääni renani ruto' náj renani rsii neñ guidooga. Niluxh batiejxhni rexmex renani ruchaa meel, nájza reyagxhil xten renani ruto' paloom. ¹⁶ Diruni nusaan nidednäjreni xhicos nez neñ guidooga. ¹⁷ Dxejc cagului-ireni, räpgajcni lojreni:

—¿La et screedi caj loj guiitz? “Xyu'ä sirilaj yu' cadre rninab guiraa rebenꝑuedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbre ni Jesús, sa'csi guiraa rebejn rdxelox rextidx Jesús. ¹⁹ Che biu' guxhijn, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini.

²⁴ Ni'cni rniä lojtu, xhitis nani guiniabtu lo Dios che rninajtuni, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu. ²⁶ Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

Yälrnibee xten Jesús

(Mt. 21:23-27; Lc. 20:1-8)

²⁷ Sas bidzunsacreni guedx Jerusalén. Laḷ ni sasaj Jesús nen guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. ²⁸ Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. ³⁰ ¿Chu baxhaḷ Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?” ³² Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

12

Te xcuent reben_guijdx ni rbäzlaa
(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazaani, dxejcro gudäänni te lajt cadro jiä't uubga. Dxejcti bejn ni te yu' jiaa, te ro'c cue nani ga'p lo xyujni.

² Badedlaatinini loj gaii bejn, sä'tini zijt. ³ Che bidzujn xpäii uub, baxhal_l baxhuaan uubga te xmosni loj rebejn ni rbäzlaa ro'c, te xca'ni uub nani riäjl_l xca' bejnga. ⁴ Dxejcro baxhal_l baxhuaanga stee mos lojreni. Niluxh laareni bacuaareni guijni, gudil_guijdxreni yejc mosga, xho rniajni gubi'ni. ⁵ Dxejcro baxhal_l bejnga stee mos, dxejcro bagu'treni. Baxhal_lni xhidajlrureni. Gaii gudil_guijdxreni, sgaiini bagu'treni.

⁶ 'Yu'za tejtis xi'nni, luxh sanälajznini. Por lult näjza xi'nni baxhal_lni, naani: “Siucareni xi'nä.” ⁷ Dxejcro rebejn nani rbäzlaa ro'c räjp loj sa'reni: “Dee najc laa ni jiannäj ree. Col_ltaa, guigu'tnuni, te xca'nu yujre.” ⁸ Sas gunaazreni, bagu'treni. Guläätirenini lo yujga.

⁹ ¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdtu gol_l guijtz ni rnii scree?

Guij nani guläcaj renani runchee yu', ni'c agujc mastr ni guzuj galoo.

¹¹ Dad xtenu bejn scree, cos sacduxhni nezlojnu.

¹² Dxejcro rlanj rexuxtis nani bacuadiajg cuentre niniaaz Jesús, sa'csi gubeereni laareni cacuaa Jesús diidxre. Sa'csi bidxejbreni reben_xhidaal, ni'c basa'nreni, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhal_lreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. ¹⁴ Dxejcti biädreni, räjpreni lojni:

—Dad, nadonnu luj najclu te bejn ni rnii. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlanj Dios gun bejn. ¿La laaca quiix bejn reimpuest lo xcubeer César o la xhet laadi? ¿La guidiixnu o la dinu guidiix?

¹⁵ Dxejcti laani gubegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Col_ltanä te meelga loä, te fiä lojni.

16 Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

17 Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

Yälmiabdiidx xcuent yälrbansacni lo rebengut

(Mt. 22:23-33; Lc. 20:27-40)

18 Sas biädhuui resaducee loj Jesús. Resaducee najc rebejn̄ nani rni di rebengut guibaṅsac. Dxejc gunabdiidxreni lojni, räjpreni:

19 —Dad, xleii Moisés rului loonu, palga guet te nigui luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. ²⁰ Guyu' gajdz nigui, bejtz najczeni. Sas cua' niguigalooga chäälni. Che gujtni ruti xi'nni. ²¹ Dxejcti cua' ni rojppa gunaaga. Che gujtni, rut gajc di xi'nni. Si'cza gusajc ni riojnga. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtzna gunaaga. ²³ Guigajdzreni guläznäjreni gunaare. Cheni guibaṅsaceni lo rebengut, ¿chu chäälni gacni?

24 Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa renigui lo guijtz, dizatu gumbee yälrnibee xten Dios. ²⁵ Che guibaṅsaceni loj rebengut, direni guchṅaa, rutza gudeedtireni te guchṅaareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbaṅsac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni neṅ bajl, räjpni: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejn̄re, direni gac beṅgut, nabaṅnäjreni Dios. Et laadi najc xhigabtu.

Yälrnibee ni sajcr̄u

(Mt. 22:34-40)

28 Dxejcr̄u bidzujṅ tej rebejn̄ ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcr̄u lo guiraareni?

29 Dxejc räjp Jesús lojni:

—Mandamient nani sajcr̄u loj guiraareni najc dee: “Bacua-diajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, naj xaimlu, naj guideb xcäriejnlu, najza guideb xcäl̄nadiplajzlu.” ³¹ Sigajcza najc mandamient ni rojppa: “Huinalajz sabejn̄lu si'ctis sanälajzlu

lagajc luj.” Redee najc remandamient nani sajcru loj guiraareni.

³² Dxejcti räjp bejn̄ga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn̄ Dios guideb las-tooni, näj xcäriejn̄ni, näjza xaimni, näj guideb xcäl̄nadiplajzni, luxh chanälajzni resabejn̄ni sigajc laani. Redee sajcru loj ni rujn̄ bejn̄ che rudeedreni gojn lo Dios.

³⁴ Che bahuii Jesús laaca guniini, räjpni lojni:

—Guxii cayäädx te jiu'lu loj xcäl̄rnibee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús nen̄ guidoro, räjpni:

—¿Xho mood rnii rebejn̄ ni najn leii Crist najc xi'n David?

³⁶ Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Reben̄xhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lałni caguseedni rebejn̄, räjpni lojreni:

—Col̄susin̄, na'c gu'chtu loj rebejn̄ ni ruluii leii. Laareni rlaiz sanäj reladsiool xtenreni. Rdxaglaizreni rnii bejn̄ lojreni nez lo reguii. ³⁹ Rlaizzeneni cuereni cadre rbej renani sajcru nen̄ reguidoo näjza cadre ru' relanij. ⁴⁰ Rudzucajzareneni xhixten rebiuud, rniizareneni xhidalduxh diidx che rol̄reni le', te rusäuureni loj rebejn̄. Castigwroru gac redee.

Gojn xten te biud prob

(Lc. 21:1-4)

⁴¹ Dxejcti gurej Jesús cuä' caj cadre rusäl̄ bejn̄ gojn. Cahuiini cagusäl̄ rebejn̄ meel nen̄ cajga. Xhidajl reni rajp cagusäl̄ xhidajl meel nen̄ga. ⁴² Che biääd te biud prob, basäl̄ni tiop melbäz ni sajc si'cti tej centaab. ⁴³ Dxejcru gurejdx Jesús rexpejn̄pacni, räjpni lojreni:

—Rniliäpac lojtu, biud probbre basäl̄ xhidajlru lo guiraa renani basäl̄ nen̄ cajre, ⁴⁴ sa'csi guiraareni abasäl̄ che'nsi xhixtenreni. Luxh gunaare basäl̄ guiraa nani rajpni. Ni'ctis najc nani gaunäjni.

13

*Gunii Jesús sibijl guidoo**(Mt. 24:1-2; Lc. 21:5-6)*

1 Cheni sariireni neṅ guidoro, räjp tej rexpejnṅpacni lojni:

—Dad, bahuii lacti reguij, lacti reyu'.

2 Dxejcti räjp Jesús lojni:

—¿La rhuiilu loj reyu're? Nicla tej guij dijia'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj**(Mt. 24:3-28; Lc. 21:7-24; 17:22-24)*

3 Dxejc sobga' Jesús yejc dalje' ni laa dan Olib, cahuiini nez ro' guidooga. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

4 —Gunii loonu, ¿guc gac dee? ¿Xhi guihuiinu te gacheenu asiäddzũṅgajxh soob guiraa rediidxre?

5 Dxejcti gusloj gunii Jesús lojreni, räjpni:

—Colḥuii, te rut gusgueedi la'tu, 6 sa'csi xhidalduxh bejn jiaäd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

7 'Che jiejn diajgtu yu' guer näj yälnadxeb xten guer, na'c guidxejbtu. Nanabpac gacni; et dxejcdi nitloj guedxliuj. 8 Säjs nación yejc sanacionni, näj yälrnibee yejc sayälrnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

9 'Dxejc la'tu colṣusiṅ sa'csi suteedreni la'tu ladzṅaa reguxhtis, siguijnzareni la'tu neṅ reguidoo. Sacrejdxtu lo regubieer näjza loj reṅeii xcälṅnasa'c narä, te si'c gac guiniitu xtidxä lojreni. 10 Nanabpac guirechxgaa xtidx Dios loj guiraa rebeṅ guedxliuj. 11 Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Colṅii nani jäjtis yejcti dxejc, sa'csi xhet la'ditu ni guinii, Sprit Dxan xten Dios ni guinii. 12 Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga. 13 Sidxechlajz guiraa rebejn lojtu sa'csi najctu xpeṅä; nani ted guiraa retrabajwre, ni'c gudeed Dios xcälṅnabajnni.

14 'Che fiitu loj nani najc yälr dxechlajz, nani najc yälrunitloj, nani gunii Daniel ni gunii xtidx Dios. Che fiitu nani suga' cadre di nunyäjḷ suuni, dxejcti suguxun renani yu' nez Judea chääreni nez neṅ redajn. (Nani goḷ guijtzre sugacheenini.) 15 Bejn nani suga' yejc yu' na'c jäjtmi jiu'ni neṅ te yu' xca'ni gaii xhixtenni. 16 Nani yu' loj ṅiaa, di gal jäjt te xca'ni xhablajzni. 17 ¡Ai! Xhiza nasas chu regunaa ni nuu báz, luxh renani rusiä' xi'nni, neṅ redxejga. 18 Colṅab loj Dios na'c sactu scree neṅ

rebäinajl. ¹⁹ Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnñi nani aguleni.

²¹ 'Dxejc palga yu' chu naa lojtu: "Colhunii, aree Crist", o "Colhuiire, ani suga' rec", na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerenei, te palga sajcni, rlanjzeni gusgueelireni renani agule Dios. ²³ Ni'cni la'tu colsusin; agunixgää lojtu guira'ti ni gac.

*Xho gac che jiaäd Xi'n Dios ni gujc Niguui
(Mt. 24:29-35, 42-44; Lc. 21:25-36)*

²⁴ 'Neñ redxejga, cheni luux retrabajwduxhga, sicäy lo gubijdx, luxh diru bäii gusanij. ²⁵ Sitejb rebaļxhaguibaa, sinibsejs recos nani nasnäy rebaļxhaguibaa. ²⁶ Dxejcti suhuiu rebejn loä, Xi'n Dios nani gujc Niguui, siälä neñ reza guideb yälrnibeduxh xtenä, näjza xcäldimbicha'ä. ²⁷ Dxejcti guxhalgacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

²⁸ 'Colguiseed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguuj asadzunğajxh. ²⁹ Sigajcza, che fiitu acayajc recosre, sacbeetu asiädgaxhä, ameer guidzunä. ³⁰ Rniliäpac lojtu, rebejn ni nabajn dxejc, direni nitloj, fixgaareni gac recosga. ³¹ Sinitloj guibaa näjza guedxliuj, rextidxä di nitloj.

³² 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³ 'Colhunii, colsusin, colnab loj Dios, sa'csi ditu gan guc guidzujñ redxejga. ³⁴ Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. ³⁵ Si'cza colsusin, sa'csi ditu gan guc jiaäd baxhwaan yu'ga, la jiaädni gudxej, o la jiaädni garol yääl, o la cäy, o la jiaädni rsil. ³⁶ Colsusin, te di guiga'tu nagayejstu che guidzujñni. ³⁷ Rediidx nani rniä lojtu, loj guiraa rebejn rniäni: colsusin.

14

*Ruchaagreni diidx te guiniaazreni Jesús
(Mt. 26:1-5; Lc. 22:1-2; Jn. 11:45-53)*

¹ Riäädx tiop dxej guidzujñ lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rlanjzeni niniaazreni Jesús con yälrusguee, te nugu'trenini. ² Dxejcti räjpreni lo sa'reni:

—Na'c jiennu scree neṅ redxelaniṅ, te na'c gun benguejdx bieṅ.

Te gunaa ni basäl se't yejc Jesús Betania
(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard neṅni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent baniṅtṅni setnejxhga? ⁵ Paru nido' se'tga, nijni si'cti choṅ gayuu denar, te nica' meelga rebeṅ ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxojntu nani cayujn gunaare? Cos sacduxh dee bennäṅni narä. ⁷ Guideb ni guibajntu, su' rebeṅ nani xhet rajpdi lojtu, luxh che rlanjzta sajz gacnäjtoreni. Narä et xchejdi chu'ä lojtu. ⁸ Gunaare abejnni nani gujctis bejnni. Abaslanexhxgaani tiexhä, te chää tiexhä neṅ baa. ⁹ Rniliäpac lojtu, cadrotis guidzujṅ xtidx Dios, guideb lo guedxliuj, sini-izareni xcuent nani bejn gunaare, te guinaj lajzreni gunaare.

Rlanj Judas guto' Jesús
(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejṅpac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

Gudauxchej Dad con rexpejṅpacni
(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladzṅaa reEgipto. Räjp rexpejṅpacni loj Jesús:

—¿Caro rlanjzlu chosucheenu te gauulu nadxej, dxelaniṅ?

¹³ Dxejc baxhalni tiop rexpejṅpacni, räjpni lojreni:

—Colchäj neṅ guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäṅni rexpejṅpacni nadxej, dxelaniṅ?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexгаа neṅni. Colyujn xhi guidaunu ro'c.

¹⁶ Sas huij rexpejṅpacni, bidzujṅreni neṅ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelaniṅ.

17 Che huääz gubijdx, bidzunnäj Jesús guitzubitio'p xpejn̄pacni. 18 Lałni sobga'reni lo mex cayajwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

19 Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

20 Dxejcti guniini, räjpni lojreni:

—La tej retzubitio'p, tej ni cayajw loj xp̄la'tä. 21 Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

22 Lałni cayajwreni, cua' Jesús yätxtiil, badeedzani xquixhtiooz loj Dios dxejc guł'a'nini, badeednini lojreni. Dxejcti räjpni:

—Cołca' yätxtiilre. Dee najc si'c tiexhä.

23 Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga. 24 Dxejcti räjp Jesús lojreni:

—Dee najc si'c xtienä ni ruluu diidx ni biä'nnu, nani guixe' xcuent xhidajl rebejn̄. 25 Rniliäpac lojtu, diruna yä'ä bin nani rii yejc uub, dxejli yä'äni stehuält loj xcäl̄rnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn. 13:36-38)

26 Che guluix bil̄reni te dij xten Dios, biriireni, sääreni nez dajne' ni laa dan Olib. 27 Dxejcru räjp Jesús lojreni:

—Guiraatu sibälaztu narä naguxhijn̄, sa'csi si'c cajni lo guijt̄: “Sugu'tä baxhtoor luxh suxuñ rexiil.” 28 Che guibañsacä loj rebengut, ganidä cha'a Galilee, dxejcti jiääd̄tu.

29 Dxejc räjp Pedr loj Jesús:

—Palga guiraareni cuälazlu, narä dina cuälazälu.

30 Dxejc räjp Jesús lojni:

—Rniliäpac lojlu, lagajc guxhijn̄re, nicla gajd guidgaii cuedxa' tiop huält, luj aguiniilu choñ huält dilu gumbee narä.

31 Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn̄pacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

32 Dxejcti bidzujn̄reni te lajt cadre laa Getsemaní. Dxejc räjpni loj rexpejn̄pacni:

—Cołcuej ree lałni chanabä lo Dios.

³³ Dxej cru sanäni Pedr näj Jacoob näjza Juan. Dxej c gusloj cayac-huinduxh lajz ni, luxh cayu'ni yälrsiaduxh. ³⁴ Dxej räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxej c. ³⁶ Räjpni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlazädi narä, bejn si'cni rlazlu luj.

³⁷ Dxej c biäädni gunaaznireni nagayejsreni. Dxej c räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? ³⁸ Coltie'ch bacal, colnab lo Dios, te na'c guntu dojl. Lastootu rlaz gutie'chtu bacal, luxh tiejxhtu abadxaj.

³⁹ Huij Jesús stehuält, binabni loj Dios, guniini lagajc redidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biäädni, dxej c räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. ⁴² Colchastie, colcho'. Asiäddzungejxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejnpacni, siädnäni xhidajl bejn. Ca'reni spaad, ca'reni yajc biriireni lo rebixhojz nani rnibee, näjza rebejn ni ruluui lei, näjza rebengool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxej cru gunaazreni Jesús ro'c.

⁴⁷ Dxej c tej reni suga' ro'c, gulää xspaadni, gudilgujdxni xmos bixhojz nani saj cru, batiu'ni diajgni. ⁴⁸ Dxej c räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu nejn guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxej cru rexpejnpacni gulälazrenini, baxuntireni.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵² Dxejcti baxuñni, libasa'nni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädinäreni Jesús loj bixhojz ni sajcru. Bidojpb rebixhojz nani rnibee, näj rebengool ni najc guxhtis, näjza rebejn ni ruluii leii. ⁵⁴ Luxh Pedr zijt zijt sanajlni Jesús. Che bidzujntini lo xle' bixhojz ni sajcru, gurenäjni rebejn nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebengool ni najc guxhtis, caguilreni xhi tej xquej Jesús nidxälreni, te nugu'treni Jesús, xhet bidxäldireni. ⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh chontis dxej guncheä steeni, ni nac-chee et con ñaadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuuutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguui, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biäd te xcriaad bixhojz ni sajcru. ⁶⁷ Luxh bahuiini cagucha' lajz Pedr, cadx-elojni lojni. Dxejcti räjpni:

—Nä j luj nadxaaglu Jesús ni siäd Nazare't.

68 Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii.

69 Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

70 Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beḅ Galileelu, luxh guyasi riejn rniilu si'c rnii rebeḅ Galilee.

71 Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

72 Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla choḅ huält aräjplu dilu gumbee narä.”

Dxejc guslojni cayoonna.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

1 Che bara yääl bidxaag sa' rebixhojz ni rnibee, näj rebeḅgool ni najc guxhtis, näjza rebeḅni ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't.

2 Dxejc gunabdiidx Pila't loj Jesús räjpni:

—¿La luj ni najc reii xten rexpejḅ Israel, ä?

Räjp Jesús lojni:

—Si'cni guniilu, si'c najcni.

3 Dxejc gusloj rebixhojz nani rnibee cabe'c rexquej Jesús.

4 Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

5 Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

6 Dxelaniipac ruslaa Pila't tej rebeḅni ni yu' latzguiib. Ruslaani chutis te ni rniab rebeḅni. 7 Lo rebeḅni ni yu' latzguiib nadxaag te niguii ni laa Barrabás. Bagu'tni te beḅni che nu'chni lo te cuaa beḅni ni gudilnäj gubieer. 8 Dxejc bidojz xhidajl beḅni loj Pila't, gunabreni lojni gunni si'ctis rujnni casob lanij.

9 Dxejc gunabdiidx Pila't lojreni, räjpni:

—¿La rlanjtu guslaä reii xten rexpejḅ Israel, ä?

10 Sa'csi guchegajcni rdxechlajz rebixhojz loj Jesús, ni'c bateedrenini lojni. 11 Ni'cni baquuilza rebixhojz ni rnibee rebeḅhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

12 Dxejc räjp Pila't lojreni stehuält:

—¿Xhini'c rlaiztu gunnäã nani rniitu reii xten rexpejn Israel?

13 Dxejcru guredxa'reni:

—¡Bacuaani lo cruz!

14 Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruz!

15 Baslaati Pila't Barrabás, sa'csi rlaizni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruz.

16 Dxejc huinä rexsoldaadni Jesús nen Pretoor, yu' cadre rujnreni yälguxhtis, ro'c batojpreni guiraa resa'reni. 17 Dxejcti bashuajcwreni Jesús te lad moraad, bencheereni te coron guejch basälreni yejcn. 18 Guslogajc caguxhi näjrenini, canireni lojni:

—¡Colguiliä'p xpala'n reii xten rexpejn Israel!

19 Batiäjlreni te yabixhijl yejcn, batiobxhejnreni lojni, luxh guzuxhijbreni te rajnrenini. 20 Che gulujx basacsäreni Jesús, gulääreni lad moraad ni najcwni, sas bashuajcwrenini xhajibpacni. Gulägajceni Jesús te cuaarenini lo cruz.

Bacuaareni Jesús loj cruz

(Mt. 27:32-44; Lc. 23:26-43; Jn. 19:17-27)

21 Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruz Jesús.

22 Dxejcti huinäreni Jesús cadre laa Gólgota, nani säloj: dan Calabeer. 23 Ro'c badeedreni lo Jesús bin nani nu'ch mir lojni, dxejc laani naaddini niä'ni binga. 24 Che gulujxti bacuaareni Jesús loj cruz, gudzujtreni yejc rexhajnbi, te don xhini'c xca'tejgareni.

25 Agujc choñ or gulejn gubijdx che bacuaareni Jesús lo cruz. 26 Letreer cadre bacuaareni xtojlni scree bejnrenini: “Reii xten rexpejn Israel.” 27 Bacuaazareni lo stiop cruz tiop gubaan, tejni xladbee Jesús, xtee xladbäjgwini. 28 Dxejc guzojb diidx ni caj loj guiitz nani rni: “Loj rebenquijdx bigabni.”

29 Luxh renani sadejd nejzga guniyajreni Jesús, cagusni-ibreni yejcreni, räjpreni lojni:

—¡Jaa! Luj nutiejxhlu guidoo luxh choñtis dxej niunchesacluni. 30 Naj baslaa lagajc luj, biäjt loj cruzzga.

31 Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani.
³² Naj sujiäjt Cristre, reii xten rexpejn Israel, lo cruzj te guihuinu, te chalilaaznu.

Näj regubaan ni caj lo cruzj guniyajzareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojl läidxej, bicäy si'cti choñ or. ³⁴ Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuinu don la siädläjd Elíasni loj cruzj.

³⁷ Dxejcru guredxaduxh Jesús, gujttini. ³⁸ Dxejc lajd ni najl neñ guidoro biräjsni, gujcn i tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädñajl Jesús che biädni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biäd José ni siäd Arimatea, najcni te rebejn ni sajc loj reguxhtis. Näjza laani cabäjzni xcälrnibee Dios. Guideb yälñabajñ gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús.

⁴⁵ Che räjp capitánga lojni agujt Jesús, dxejc badeed Pila't tiexh Jesús loj José. ⁴⁶ Agusii José te bariaad, luxh che gulätñi Jesús lo cruzj, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxejcru batzugni te guiro ro' biliääga. ⁴⁷ Bahuii Marii Magdalen näj Marii xnan José cadre biga'tz Jesús.

16

Huäjz Jesús loj rebeñgut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israel, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiexh Jesús. ² Che biu' xmaan, rsildooru, che calejn gubijdx, biäädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaj guijga, luxh najcni te guiroduxh. ⁵ Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladnol ni najc siool. Dxejc bidxejb regunaaga. ⁶ Dxejcti räjp bi'nga lojreni:

—Na'c guidxejbtu. Caguultu Jesús ni siäd Nazare't, nani cuaj lo cruiz. Rutiruni ree. Agubajnni lo rebeḅgut, coltahuii cadro gudixhreni tiejxhni. ⁷ Colchäj, colchaye'tz lo rexpejn pacni, loj Pedr, ganidla Jesús guidzujn Galilee, dxejcti guidzujntu. Ro'c fiitu lojni, si'cni guniini lojtu.

⁸ Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

Baluiloj Jesús loj Marii Magdalen (Jn. 20:11-18)

⁹ Gubajn Jesús loj rebeḅgut rsildooru che biu' xmaan. Baluilojni galoo loj Marii Magdalen, nani agacgulääni gajdz beḅdxab nen lastooni. ¹⁰ Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebeḅgut, luxh Marii abahuii lojni, di lajzreni nilii.

Baluiloj Jesús loj tiop xpejn pacni (Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

Baxhal Jesús repost (Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeḅgut. ¹⁵ Räjp Jesús lojreni:

—Colchäj guideb lo guedxliuj, colnii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtne lo dojl. ¹⁷ Niluxh remilagwre jiannäj renani chalilajz: sibääreni beḅdxab xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdireni; susujreni naareni yejc rebeḅracxhuu luxh siajc rebeḅracxhuu.

*Huä'p Jesús xhaguibaa**(Lc. 24:50-53)*

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te guchee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guijtzcxcuent guiraa redzuun ni gujc nez loonu te cuäxnejzreni redzuunga ² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laj ni cayujn Zacarías dzuun nen guidoro si'c bixhojz nez loj Dios, ⁹ dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Laļ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xti-idxlu, luxh su' te xi'n chäálu, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios nen lastooni cheni gaallini. ¹⁶ Sujnni gusiechljaz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpni lagajc yälnibee ni gojp profe't Elías, te che jiejn diajgreni xtiidxni susiechljaz redad, susiäjlzareneni diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

18 Gunabdiidx Zacarí loj anglga, räjpni:

—¿Xho mood gacheä guliilu? Sa'csi anacä beᅅgol, sigajcza chälä.

19 Dxejcti räjp anglga lojni:

—Narä nacä Gabriel, runä dzuun lo Dios. Laani baxhaᅅni narä te guininää luj, jiädnaä didxhueenre lojlu. ²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujᅅ dxej che riäjᅅ gacni.

²¹ Laᅅni cayajc dee, cadxeloj rebejᅅ ni suga' nez ro' yudxan cabäjzreni guiri Zacarí sa'csi cayaclaani neᅅ yudxan. ²² Che birii Zacarí, di niajcdiru niniini loj rebejᅅ; dxejc gucheereni yu' xhi cosro bahuiini neᅅ yudxan xten guidoo. Dxejc con seen guninäjni rebejᅅga, sa'csi xheti xse'ni te niniini.

²³ Che gulujx bejᅅni dzuun neᅅ guidoro, gubi'ni rolizni. ²⁴ Che gudejd redxej dxejcti bazeᅅ nuu Elisabe't, chäälᅅni, báz, gaii bäii diruni niiri rolizni. Bejᅅni xhigab, räjpni: ²⁵ “Si'c bejᅅ Dad Dios narä naj, gucnäjni narä te diru bejᅅ cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxhaᅅ Dios xanglᅅni Gabriel lo te guedx Galilee ni laa Nazare't, ²⁷ te chahuini te dxapxteeb ni laa Marii. Agojt xtiidxni te guchᅅnaani te dade' ni laa José. Dade're najc xagdoo torei David. ²⁸ Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlᅅ. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidxni, rujᅅni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxejblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalᅅni guirilajni Jesús. ³² Laani sajᅅni te bejᅅ ni sacduxh. Sirilajzani Xi'n Gueb Dios ni yu' xhaguibaro. Gueb Dios sujᅅn gacni rei sigajc ni gujᅅ toxtadgoldooni David, ³³ te tejpas guinibeeni loj rexi'n Israel, luxh dipac xcälᅅrnibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:

—Sprit Dxaᅅn xten Dios siäd lojlu, xcälᅅrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajᅅni te beᅅdxan, sibälaj bejᅅni Xi'n Dios. ³⁶ Näjza sa'lu Elisabe't su' te xi'ni luxh anajᅅni te beᅅgool; ni'cni gunaa

nani najreni digacdi chu xi'nni agujc xho'p bäii nuuni bäz.
 37 Xheti te cos ni naganduxhrej nez loj Dios —räjp Xangl Dios.

38 Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

39 Nen redxejga, basquejn Marii sääni lo te guejdx ni tre' nen redajn xten Judea. 40 Biu'ni rolijz Zacaríi, guniini xtidxbee loj Elisabe't.

41 Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't. 42 Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. 43 ¿Chu narä te siädhuui xnan Xtioozä narä? 44 Biejntis diagä xtiidxlu, bibalazgajc xi'nä, biniibni xque'ä. 45 Sibaa lajzlu, luj ni huililajz sisiojbpac nani gunii Xtadnu Dios.

46 Dxejc räjp Marii:

Xaimä rliä'p xpala'n Xtadnu Dios.

47 Rbalazduxhza lastoä xcuent Dios ni ruslaa narä lo dojl.

48 Sa'csi agule Dios narä,

nacä te mos gunaa ni xhet sajcdi,

luxh najli sinii rebejn näjza reni churu chu lo guedxliuj,

chicbaani loj guiraa regunaa.

49 Sa'csi Gueb Dios ni rajp guiraa yälrnibee abejn xhidajl cosro loä,

dxanduxh najc lajni.

50 Dini cuääz gulaslajzni guiraa rebejn ni riu xtiidxni, reni rajjni.

51 Xhidajl cosnagajn abejnni con lagajc naani,

abatie'chni renani rustioob lastooreni rliä'p lagajc xpala'nreni.

52 Abasajbni reni rnibee,

per rebennadolajz bejnni gacreni benro.

53 Bachajni xque' reni calaan,

badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

54 Gucnäjni nación xten xpejn Israel, ni najc xmos Dios.

Di lajzni niäl nulaslajznireni

55 sa'csi si'c bia'nni diidx con retoxtadgoldoonu,

sinuu gulazlajzni toAbram näjza rexagdooni par tejpas.

56 Dxejc bia'n Marii rolijz Elisabe't si'cti choñ bäii, dxejc gubisacni rolijzni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te báz nigu-
iini. ⁵⁸ Dxejc bidzujñ rexpisiñni näjza resa'ni biädhuiireni
guiro'preni che gucbeereni lacti hueen gujc Dios con laani.
Bibalaznäjrenini. ⁵⁹ Che gudejd xhujñ dxej, huinäreni bāze'ga
chuni bee. Rlajz rebejñ nirilaj bāze'ga si'c laa xtadni, Zacaríi.
⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamilu ni laa si'c.

⁶² Dxejcti gunabdiidxreni con seen lo xtad bāze'ga te
gacbeereni xho rlajzni guirilaj bāze'ga. ⁶³ Xtadni gunab te la'
guijtz, dxejc bacuaani: “Lajni najc Juan.” Dxejc guiraareni
bidxelojreni. ⁶⁴ Luxh lagajc dxejc gujc gunii Zacaríi stehuält,
dxejc guslojni calä'pni xpala'n Dios. ⁶⁵ Bidxeloduxh rex-
pisiñreni xhini'c gujc ro'c. Luxh bire'ch diidx xcuent recosre
guideb neñ redajn xten Judea. ⁶⁶ Guiraa reni biejn diajg
rediidxga gusloj cayujñreni xhigab, dxejc gunabdiidxreni loj
sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacaríi

⁶⁷ Dxejcti biääd Sprit Dxañ xten Dios neñ lastoo xtadni
Zacaríi, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejñ Israel,
sa'csi abiädhuiini loonu, ni najcnu rexpejñni,
te siädguslaani nuurnu neñ dojl.

⁶⁹ Abaxhalni loonu te bejñ ni rajp yälrusladuxh bejñ neñ dojl.
Najcni te rexagdo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni
lo guijtz galoo:

⁷¹ Suslaani nuurnu loj reni rdxe'ch loonu,
näjza ladzñaa rebejñ ni gulälaz nurnu.

⁷² Te gulaslajzni retoxtadgoldoonu,
te soob diidx ni bia'nni con rebejñga.

⁷³ Scree bia'nni diidx con toxtadgoldoonu, Abram:

⁷⁴ Suslaani nuurnu ladzñaa rebejñ ni rdxe'ch loonu,
te na'c guidxeebnu chunu lojni gusoobnu xtiidxni,

⁷⁵ con yäl'nabansa'c näjza yäl'guxhtis guiraa redxej ni guibajñnu.

⁷⁶ Luxh luj, bāze', sirilajlu dade' nani rnii xtidx Gueb Dios ni
yu' xhaguibaa,

sa'csi sinijdlu lo Dad te gusucheelu rexnezyulajzni,

⁷⁷ te gunlu gacbee rexpejñni xho gac laani lo dojl,

te gac guibicaj xtojñreni.

⁷⁸ Sa'csi Dios sanälajz bejñ,

näjza rulaslajzni bejn ni'cni xhaguibaali suxhalni xi'nni te
jiädnäni te dxecoob,

⁷⁹ te gusanijni lo rebejn ni nabajn lo yälxcäy xten dojl,
näjza rebejn ni nabajn lo xpalaa yälgujt,
te guluini xho sánu lo xnez yälrbecdxilajz.

⁸⁰ Dxejc gunís biuxe'ga, guyuduxh xcäriejnni xcuent recos
xten Dios. Gubajnni nez loj reyubijdz cheni bidzujnli dxej che
baluilojni loj rexpejn Israel, che gusloj cagusule'ni xtidx Dios.

2

Che gojl Jesús

(Mt. 1:18-25)

¹ Neñ redxejga, gunibee Augusto César xcaj laj rebejn
guideb guedxliuj lo xquijtni. ² Ni'c nacobgujc yälbigabre
cheni najc Cirenio gobernador xten Siria. ³ Guiraa rebejn
nanab chääreni lagajc lajdxreni te ro'c guigabreni. ⁴ Ni'cni
birii José guedx Nazare't Galilee, te huijni Judea, lo guedx
Belén, cadre gojl toDavid, sa'csi najc José xagdo toDavid.
⁵ Huinäni Marii, nani guchñaani, huijreni guedx Belén te ro'c
guigabreni. Luxh nuu Marii báz. ⁶ Lalsi yu'reni guedx
Belén, bidzujn dxej ni gaal xi'n Marii. ⁷ Ro'c gojl xi'n galooni,
dxejc batejbnini te xzuudni. Dxejc gudixhnini cadre rusälreni
guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸ Gajxh guejdxga guyu' gaii baxtoor cayajpreni xhiilreni lo
niaa guxhijn. ⁹ Chela baluiloj te xangl Dios, luxh bianij guideb
gabireni con yälrdimbicha' xten Dios, dxejc bidxebduxhreni.
¹⁰ Sas anglga räjp lojreni:

—Na'c guidxejbtu, narä siädnaä lojtu te didxsa'c ni sus-
palajz guiraa beñ guedxliuj. ¹¹ Nadxej gojl neñ guejdx xten
toDavid, tej ni guslaa bejn neñ dojl, laani najc Crist ni najc
Dad. ¹² Dee najc te seen lojtu, sidxältu baze'ga nadejbni neñ
te xzuudni, naga'ni cadre rusälreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl
Dios, gulä'preni xpala'n Dios, räjpreni:

¹⁴ Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii
loj sa'reni:

—Colcho' guedx Belén colchohuii ni guzajc ro'c ni gunii
Xtadnu Dios loonu.

¹⁶ Rusquenduxhreni sääreni, dxejc bidxälreni Marii näjza
José näjza baze' ni naga' neñ cadre rusälreni guijxh rajw
reguidxaa. ¹⁷ Cheni bahuiireni loj rebejn ga, bijreni diidx xhi
räjp rexangl Dios lojreni xcuent baze'ga. ¹⁸ Niluxh guiraa reni

biejn diajg rediidxre bidxeloduxhrenei xtidx rebaxtoorga. ¹⁹ Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. ²⁰ Dxejcti rebaxtoorga gubisacreni cayolreni, calá'pzareni xpala'n Dios xcuent guiraa rediidx ni biejn diajgreni nájza ni bahuiireni sa'csi guiraani gujc si'cni rájpreni lojreni.

Cheni huinäreni Jesús chuni bee

²¹ Che gudejd xhujñ dxej, huinäreni bāze'ga chuni bee, dxejc gulälajrenini Jesús, lagajc laj ni rájñ xangl Dios loj Marii guirilajni galooli guuni bāzga.

²² Che basa' redxej ni gac naya te nan si'cni gunibee to-Moisés loj xquijtzni, huinäjreni bāze'ga guedx Jerusalén, neñ guidoro gunabreni gacnāj Diosni par tejpas. ²³ Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunā”, rájñ Dios. ²⁴ Bidzujñreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombāz.”

²⁵ Neñ redxejga, neñ guedx Jerusalén rbājz te dade' ni laa Simeón. Najcni te beñsacduxh, randuxhni Dios, cabājzni jiāād te bejn ni guslaa rexpejn Israel. Rbājz Sprit Dxañ xten Dios neñ lastoo Simeón. ²⁶ Sprit Dxañ abejñ gacbeeni dini guet ansde fiini loj Crist ni guxhal Dios. ²⁷ Dxejcti rájñ Sprit Dxañ xten Dios lojni chāāni guidoro. Lañni yu'ni neñ guidoo, bidzujñ José con Marii, biādnäreni bāz Jesús, te gunnājreni Jesús nani rnibee xtidx Dios gunreni. ²⁸ Dxejc gudāāz Simeón bāze'ga, gusloj calá'pni xpala'n Dios, rájñni:

²⁹ Dad, asajc gusaanlu guetā con yälrbedxilajz,

sa'csi abasooblu nani bia'n diidx gunnājlu xmoslu.

³⁰ Sa'csi abahuiloā nani siādguslaa nuurnu neñ dojl,

³¹ ni abasujlu nez loj guiraa rebeñ guedxliuj.

³² Laani najc bianij ni susanij loj rebejn ni di gac xpejn Israel, nájza nani gac xpala'n rexpejnlu guedx Israel, lajdxlu.

³³ Bidxeloj José nájza xnan Jesús rediidx ni canii Simeón xcuent bāze'ga. ³⁴ Dxejc benle' Simeón yejcreni, dxejc rájñni lo Marii xnan Jesús:

—Bahuii gan; bāze're biāād te loj rexpejn Israel chu reni sibālaz xtiidxni, te chuza reni sililajz xtiidxni. Laani gacni te seen nani sibālaz bejn, ³⁵ te si'c jienloj xhi xhigab rujñ cade tej rexpejn Israel neñ lastooreni. Dxejcti par luj sajñni asdoo chāāz te spaad lastoolu, sa'csi gac-huinduxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famiñ xten Aser. Anajcni beñgolduxh. Bachñaani che najcni dxaphuin, luxh gajdztis ijz gulāznājñi chāālñi che bia'nni biuud. ³⁷ Najcni

te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios. ³⁸ Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

Che gubi'reni guedx Nazare't

³⁹ Che gulujx bejn xcuzajnni guiraa recos ni caj lo xquitz Dios gunreni, gubisacreni Galilee, lo guedx Nazare't, lajdxreni. ⁴⁰ Gunís biuxe'ga, guc nadaanni, guc nasiñruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexuczajn Jesús guedx Jerusalén te rinäreni te gojn xten lanij pascw. ⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. ⁴⁴ Bejnreni xhigab pet siädsanäjni rebeñsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni, ⁴⁵ direni nidxälni. Dxejc gubisacreni guedx Jerusalén te huitiilrenini ro'c.

⁴⁶ Choñ dxej gudiilrenini dxejc bidxälrenini neñ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni. ⁴⁷ Luxh guiraareni cacuadiajg xtiidxni, cadxeloduxhreni yälñajñ xtenni, näjza rediidx ni cagudzu'ni lojreni. ⁴⁸ Che bahuii rexuczajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtadlu cayunduxhnu xhigab caguilnu luj nezree, nezre'c.

⁴⁹ Dxejcti räjp Jesús lojreni:

—¿Xhicuent caguilntu narä? ¿La ditu gan riäjñ gunä xtzun Xtadä, ä?

⁵⁰ Luxh laareni direni niacbee rediidx ni guniini lojreni.

⁵¹ Dxejcti gubinäjñireni guedx Nazare't, sanuuni rusobni xtiidxreni. Luxh Marii guluchetisni guiraa recosre neñ lastooni. ⁵² Duurtis gunís Jesús, caroobruza xcälñajnni. Sanälajz Diosni, sanälajzza guiraa rebejnñi.

3

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

¹ Neñ redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc

gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia. ² Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zacaríi cheni rbäjzni nez lo reyubijdz. ³ Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljajz, yälrobnis ni nanab gunreni te gudzucaj Dios xtojłreni. ⁴ Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsac' xnezyuj Dad, colılii rexnezyulajzni.”

⁵ Guiraa cadre sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, sacsa'creni.

⁶ Dxejcti guiralii bejn suhuii loj nani guxhal Dios.

⁷ Che bahuii Juan siääd xhidalduxh bejn te guirobnisreni, räjpni lojreni:

—ıLa'tu beñguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? ⁸ Colguchaa xmoodtu te si'c fii bejn guliini abasiechljajztu. Na'c cuentis rniitu lagajc neñ lastootu “Abram najc xtadnu”, sa'csi narä rniä lojtu, sajx xca' Dios reguijre te con laareni guncheeni bejn gac rexagdoo toAbram. ⁹ Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

¹² Näjza gaii bejn nani rusquijx xcuent reimpuet bidzujn lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjł quiixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

¹⁵ Cadxeloj rebejn, cayujnreni xhigabduxh, naareni, “pet Juan najc Crist ni jiaäd.” ¹⁶ Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälrnibee loä. ¹⁷ Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenti, dxejcti reguixhtriuga suze'cnini lo bajl ni rejc par tejpas.

¹⁸ Rediidxre näjza xhidajl yälrulijdx gunii Juan te basule'ni redidxcoob loj rebejn. ¹⁹ Näjza lo Herodes ni najc gubernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini. ²⁰ Di Herodes niu xtidx Juan, alga bejnini stee dojl, basälni Juan neñ latzguuib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa, ²² dxejc biäjt Sprit Dxan xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzoo iiz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón

gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj beṇdxab loj Jesús

(Mt. 4:1-11; Mr. 1:12-13)

¹ Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz.

² Ro'c bia'nni tiuu gubijdx, tiuu guxhijṇ. Ro'c bidzujṇ beṇdxab ni rnibee te rlazjni gunni gusoob Jesús xtiidxni. Luxh calaan Jesús, sa'csi gajdni gau guiraa neṇ redxejga. ³ Dxejc räjp beṇdxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajṇ bejṇ, näjza guiraa diidx nani rni Dios sujn guibajṇ bejṇ.”

⁵ Dxejcti huinä beṇdxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. ⁶ Dxejc räjp beṇdxab lojni:

—Narä sunidxä guiraa yälṛnibee näjza reyälṛnasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä. ⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

⁹ Dxejcti huinä beṇdxabni lo guedx Jerusalén, huinänini jiaa yejc xques guidoro. Dxejc räjp beṇdxab lojni:

—Palga guliilu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhaḷ Dios rexanglni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux ben_{dx}ab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujn stee dxej te gusacsíruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpnı yäl_rnıbee xten Sprit D_xan. Bire'ch diid_x xcuentni guiraa ne_n reguejdx ni tre' nejzga. ¹⁵ Ruluuini ne_n reguidobäz luxh guiraa rebejn rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni ne_n guidobäz sigajc ni rujnpacni, dxejc huisuliini te bil_{ni} ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxäl_{ni} cadro rniı scree:

¹⁸ Sprit D_xan xten Dios suganäj narä, sa'csi agule Dios narä te gusule'ä xtidxcoobni lo reben_nprob. Baxhal_{ni} narä te gusiäcä lastoo renani di lastooreni cuedxi, te gusule'ä yäl_rusläa lo rebejn ni yu' lo dojl, te gusiäcä baloj reben_n lotiä'p, te gusläa reben_n ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnäj ne_n guidooga, dxejc gurejni. Sa'csi guiraa rebejn ni sobga' ne_n guidooga cahuidzu'tzreni lojni, ²¹ gusloj guniini, räjpnı lojreni:

—Lagajc nadxej guzojb rediidx ni caj lo reguijtzre nez loj guiraatu.

²² Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpnı:

—¿La et xi'ndi José dade're, ä?

²³ Dxejc räjpnı Jesús lojreni:

—Siniipactu rediidxre loä: “Doctoör, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

²⁴ Dxejc huinuu xtiidxni, räjpnı lojreni:

—Rniliäpac lojtu, nicla tej redade' ni rniı xtidx Dios, di reben_n lajdxreni jiu xtiidxni. ²⁵ Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niajb cho_n ijz garol, dxejc guyu' yäl_rlianduxh guideb guejdxga. ²⁶ Luxh di Dios nuxhal Elías rolijz nicla tej regunabiuud ni guläjz guedx Israel, alga baxhal_{ni}nini lo ben_zijz, rolijz

te gunabiuud ni rbäjz Sarepta, gajxh guedx Sidón. ²⁷ Sigajcza che gubajñ Eliseo lo guedxliuj, guyu' xhidajl beñ racxhuu ni ral tiejxhrene guedx Israel, luxh dini nusiajc nicla tejrene, alga basiajčni dade' ni laa Naamán, ni siäd te guedxzijt ni laa Siria.

²⁸ Che biejn diajg reni sobga' neñ guidoo rextidx Jesús, bidxechduxhrene, ²⁹ huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjrene nustejbrenini. ³⁰ Dxejc Jesús sigaj gudejdni galäiireni, sä'tini ste'ca lajt.

Gulää Jesús beñdxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel. ³² Bidxeloduxhrene xtiidxni sa'csi rusule'ni si'c te beñnajñ, si'c te ni rnibee.

³³ Neñ guideoga suga' te dade' ni rbäjz te beñdxab neñ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siäd Nasare't? ¿La siädlu te gunitlojlu nuurnu, ä? Narä numbeälu, nanä najclu Xin Dxañ Dios.

³⁵ Gudidxa' Jesús lo beñdxabga, räjpni lojni:

—Basäu ro'lu, birii lastoo niguiire.

Dxejcti beñdxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. ³⁶ Bidxeloduxh rebejnğa, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're re-beñdxab con yälrnibee, luxh rusoob rebeñdxab xtiidxni, riireni lastoo bejn.

³⁷ Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni roliiz Simón. Dxejc naga' xnan sueerg Simón, cayacxhuuni, yu'ni xliaduxh. Sas gun-abduxhrene lojni te gusiajcnini. ³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huist-ieajčni, gusloj cayujñni mandaad, cahuiinireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰ Lal ni cayäaz gubijdx, guiraa reni rajp beñracxhuu ni rajc garen garen yälracxhuu biädnäreni rebejnğa lo Jesús.

Dxejc laani batzuubni naani yejc tejpgareni, dxejc biajc rebenracxhuuga. ⁴¹ Loj rebenracxhuuga, yu'reni birii rebenḏxab neḅ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilnäjni rebenḏxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadre rut rbäjzdi. Niluxh gudiil rebejn̄ni, dxejc bidzujn̄reni cadre suga'ni. Rla-jzreni nuscuääzrenini te di nuini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcäl̄rnibee Dios xhidajlruga guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neḅ guiraa reguidobäz neḅ reguejdx xten Galilee.

5

Che gunaazreni xhidajl bäj

(Mt. 4:18-22; Mr. 1:16-20)

¹ Cheni suga' Jesús ro' nis ni laa Genesare't, gubig xhidajl bejn̄ lojni te jiejn diajgareni xtidx Dios. ² Dxejc bahuii Jesús tio'p barcw ni suga' ro' nisga, rud yu'di neḅreni sa'csi rebejn̄ ni rniaaz bäj abiriireni neḅ rebarcw te caguiibre ni xquijxhrene ro' nisga. ³ Dxejc biu' Jesús neḅ te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús neḅ barcwga, ro'cli guslojni caguluini rebejn̄. ⁴ Che gulujx xtiidxni, räjpni loj Simón:

—Huinä barcw cadre jät̄ru, colcuaa xquijxhtu lo nis te guiniaaztu bäj.

⁵ Räjp Simón lojni:

—Mastr, guideb yääl biennu dzuun, luxh dinu niniaaz nicla tej bäj, niluxh naj agunibeelu gusal̄sacnu guijxh lo nis.

⁶ Cheni basäl̄reni xquijxhrene lo nis, gunaazreni xhidalduxh bäj, dxejc guslojli caräjs xquijxhrene. ⁷ Dxejc bejn̄reni seen loj resa'reni ni yu' neḅ stee barcwga te jäd̄yacnäjrene. Bidzujntireni, bachajrene guiro'p barcw. Gudxaduxh rebarcw, ameer niääzrene neḅ nis. ⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te beḅdojl.

⁹ Si'c gunii Simón sa'csi bidxejb laani näjza guiraa rebejn̄ ni yunäjni sa'csi gunaazreni xhidalduxh bäj. ¹⁰ Näjza Jacoob näjza Juan, rexi'n Zebedeo, ni runnäj Simón dzuun, näjzaren i bidxejbreni. Per Jesús räjp lo Simón:

—Na'c guidxejblu, najli guisloj cuedxlu bejn̄ lacuaa ni guiniaazlu bäj.

¹¹ Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

Basiajc Jesús te bejn ni ral tiejxhni

(Mt. 8:1-4; Mr. 1:40-45)

¹² Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³ Dxejc batzuub Jesús naani yejcnı räjpni lojni:

—Rlazä jiajclu. Susiacälu.

Che guniini rediidxre, biacgajc bejn racxhuuga. ¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojppza xhidalduxh bejn te gucua-diajgreni xtidx Jesús näjza te gusiajcnı yälracxhuu xtenreni.

¹⁶ Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷ Te dxej lalni caguluini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluiloj suganäj xcälrnibee Dios Jesús te rajc russiajcnı rebenracxhuu. ¹⁸ Dxejc bidzujn gaii dade' nuureni lo te lonbäz te bejn ni di gacdi guiniib, rlajzreni gusu'renini nen yu' te quixhrenini nez loj Jesús.

¹⁹ Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon benracxhuuga yejcli yu'ga te gujc bidzujnı nez loj Jesús. ²⁰ Che bahuii Jesús yälrlilajz xtenreni, räjpni loj benracxhuuga:

—Dade', agubica jxtojllu.

²¹ Dxejc rebejn ni ruluii leii näjza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojł rebejn, Diostis rudzucaj dojl.”

²² Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen lastootu? ²³ ¿Xhini'c najc guyasiru guiniini: “Agubica jxtojllu”, o guiniini: “Huistie, guzaj”, ä? ²⁴ Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälnadip lo guedxliujre te gudzucajni xtojł rebejn.

Dxejc räjpni lo bejn̄ga ni digacdi guiniib:

—Lojlu rniä, jhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn̄ ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhrenei recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn̄ nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn̄ ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn̄ Leví te lanij rolijzni par Jesús. Biääd xhidajl bejn̄ ni rusquijx xcuent impuest näjza sgaii bejn̄; sobganäjnireni lo mex. ³⁰ Dxejcti refarisee näjza rebejn̄ ni ruluii leiü guslojreni cayeinäjreni rexpejn̄pac Jesús, räjpreni:

—¿Xhicuent raunäjtu, ränäjtu rebejn̄ ni rusquijx impuest näjza rebejdojl, ä?

³¹ Dxejc badzu' Jesús diidxre, räjpni lojreni:

—Rebejn̄ ni nadaan di guiquiin te doctoor, ganaxtis rebejn̄ nani racxhuu rquiinreni te doctoor. ³² Dina niädtedxä rebejsa'c, narä biädtedxä rebejdojl te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejn̄ga loj Jesús, räjpreni:

—¿Xhicuent lacti rucua'n rexpejn̄ Juan näjza rexpen̄ refarisee, lacti rbedx-rniabreni loj Dios; niluxh rexpejn̄pacu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajc gucua'n rebejn̄ ni yu' lo te sa' lałni yunäjreni bi'n, ä? ³⁵ Niluxh sidzujn̄ dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusalni bincoob neñ te guidbiejw sa'csi bincoobga sutiasya'ni guidbiejwga dxejc sixe' binga, sixijn̄za guidbiejwga. ³⁸ Ni'cni nanab gusalni bincoob neñ guidcoob si'c sigucheeza guiro'preni. ³⁹ Luxh nicla tej bejn̄ ni agu' bin ni yu' agujc

xchej rlanj yä bincoob, sa'csi säjbn: "Bin ni yu' agujc xchej najc huenru."

6

Rutie' rexpejn Jesús triuu dxej nani rusilajzreni
(Mt. 12:1-8; Mr. 2:23-28)

¹ Te dxej ni rusilajz rexpejn Israel sasaj Jesús näjza rexpejn pacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini. ² Dxejc gunabdiidx gaii refarisee ni najc beḡguidoo, räjpreni lojreni:

—¿Xhicuent rujntu dzuun ni di nungäjl guntu che rajl dxej ni rusilajznu?

³ Dxejc räjp Jesús lojreni:

—¿La gajdtu gojl loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni neḡ xquidoo Dios, gudajwni yätxtiil nani di nungäjl gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguui, rnibeä dxej ni rusilajztu.

Niguui ni nabijdz ḡaani
(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni neḡ te guidobäz, dxejc guslojni caguluiini rebejn. Lagajc ro'c sobga' te dade' ni nabijdz ḡaani ladbee. ⁷ Dxejc remastr xten leii näjza refarisee cagula'tzreni te don la susiajčni bejḡga dxej ni rusilajzreni, sa'csi caguuilreni xho gucuaquijreni Jesús. ⁸ Niluxh laani najnni xhi xhigab cayujnreni, dxejc guniini lo dade' ni nabijdz ḡaani, räjpni:

—¡Huisulii! ¡Gudaa nez galäiire!

Dxejc huisulii bejḡga, gubigni lojni. ⁹ Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl nabajḡni o la gudzucajnu yäl nabajḡni, ä?

¹⁰ Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz ḡaani:

—¡Baslii ḡaalu!

Dxejc bejn si'c, luxh biacgajc ḡaani. ¹¹ Dxejc bidxechd uxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexpejn pacni
(Mt. 10:1-4; Mr. 3:13-19)

¹² Neñ redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios. ¹³ Che bianij lo yuj, gurejdxni rexpejn̄ni. Ro'c guleni tzubitio'preni te gacreni xpejn̄pacni. Gulälajni reapost. ¹⁴ Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé; ¹⁵ Mateo; Tomás; Jacoob xi'n Alfeo; Simón ni nagab loj rexp̄n cananista; ¹⁶ Judas, bejtz Jacoob; najza Judas Iscariote ni guto' Jesús loj rebixhojz.

Rului Jesús xhidajl bejn̄

(Mt. 4:23-25)

¹⁷ Che biätñaj Jesúsreni yejc dajnga, guzudxireni yejc te danbáz sa'csi suga' xhidajl bejn̄ ro'c. Siädreni guiraa nez reguedx Judea, najza guedx Jerusalén najza reguejdx ni tre' gajxh nisdoo Tiro con Sidón. Rebejn̄ga bidzuj̄reni te gucuadiajgreni xtidx Jesús, te gusiajczanireni xcäl̄racxhuureni. ¹⁸ Guiraa ni rdejdza trabajw yu' beñdxab neñ lastooreni najza reni'c bjaic. ¹⁹ Guiraa rebejn̄ rlajz caan Jesús, sa'csi rusiajcn̄i guiraareni con xcäl̄rnibeeni.

Balijdx Jesús rebejn̄

(Mt. 5:1-12)

²⁰ Dxejc bahuii Jesús loj rexpejn̄pacni räjpni lojreni:

—Chicbaatu, bejn̄ nani xheti xhixtentu, sa'csi xtentu najc cadro rnibee Dios xhaguibaa.

²¹ Chicbaatu, bejn̄ nani calaan ñaj, sa'csi suniidx Dios lojtu nani rniabtu.

'Chicbaatu, bejn̄ nani roon ñaj sa'csi susiäj̄l Dios lajztu dxejcru suxhijztu.

²² Chicbaatu, bejn̄ nani rdxechlajz bejn̄ lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii. ²³ Colguibalajz neñ redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtadgoldooreni rebejn̄ nani gunii xtidx Dios galoo.

²⁴ 'Probe'zatu, la'tu beñrajp, sa'csi agojptu xcäl̄nasa'ctu, xcäl̄rbalajztu lo guedxliujre.

²⁵ 'Probe'tu nani rajp guiraloj xhixtentu ñaj, sa'csi sidejdtu yäl̄rliaan.

'Proobzatu ni ruxhijztu ñaj, sa'csi sonduxhtu sidejdtu yäl̄huinduxh, yäl̄nalas.

²⁶ 'Probe'tu palga rliä'p rebejn̄ xpala'ntu ñaj, sa'csi si'c bejn̄ retoxtadgoldooreni rebejn̄ ni gunii didx-xhii lacuaa niniireni xtiidxpac Dios.

Chanälajzni rebejn̄ nani rdxe'ch lojni

(Mt. 5:38-48; 7:12)

27 Rāj̄pzani:

—La'tu ni cacuadiajgtu rextidxä rniä diidxre lojtu: colchanälajz rebejn̄ ni rdxe'ch lojtu, colyujn dzunsa'c loj rebejn̄ ni rdxechlajz lojtu. ²⁸ Benle' yejc rebejn̄ ni rgube la'tu. Gunab lo Dios xcuent rebejn̄ ni rcuaquij la'tu. ²⁹ Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹ Sigajc ni rlajzlu gunnäj bejn̄ la'tu, si'cza la'tu colyennäj bejn̄.

³² 'Palga la'tu sanälajztistu rebejn̄ nani sanälajz la'tu, xlia'sini, sa'csi sigajcza rujn rebendoj̄l. ³³ Palga guntu hueen lojtis rebejn̄ ni rujn hueen lojtu, xhet laadi cayujntu, sa'csi sigajcza rujn rebejn̄ ni nabajn̄ nen̄ dojl. ³⁴ Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendoj̄l rudedlaazareni loj rebejn̄ ni najnreni siguixsac ni nasääbreni. ³⁵ La'tu, nanab chanälajztu rebejn̄ ni rdxe'ch lojtu, guntu hueen lojreni, gudedlaatu loj rebejn̄, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn̄ xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendoj̄l. ³⁶ Colgulaslajz resa'tu si'c rulaslajz Xtadnu Dios guiraa rebejn̄.

Colgulaslajz sa'tu

(Mt. 7:1-5)

37 Rāj̄pzani:

—Na'c guntu yälguxhtis nani rujn bejn̄, naatu xhet laadi ru-jjni; te na'cza gun Dios yälguxhtis rextoj̄l. Na'c gucuaquijtu bejn̄ te sigajcza di Dios gucuaquij la'tu. Colgusiäj̄l-lajz dojl̄ ni rujn sa'tu, te si'cza gusiäj̄l-lajz Dios rextoj̄l. ³⁸ Colgudeed loj bejn̄ ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibatijp ni yu' nen̄ni, cupe'tlini gusalreni nen̄ xpolstu. Dios suniidx lojtu lagajc con mediid ni rudeedtu loj rebejn̄.

³⁹ Guniiza Jesús stee cuent rāj̄pni:

—¿La sajc guluii te bejn̄ lotiä'p nez yuj lo stee bejn̄ lotiä'p, ä? ¿La di guiro'preni guitejb̄ nen̄ te gueed, ä? ⁴⁰ Te bejn̄ ni casieed di gacdi guisieedruni loj ni najn xmastrni. Te bejn̄, che agulujx bisieedni, sajcn̄ si'cni najc mastr xtenni.

⁴¹ '¿Xhicuent cahuiilu guixhe' ni yu' baloj bejtzlu, luxh dilu fi yagro ni yu' balojlu? ⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Ben̄guijdx! Guläxgaa yagro ni yu' balojlu, dxajc sajc fisa'clu te cuäalu guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg
(Mt. 7:17-20; 12:34-35)

⁴³ Räj pzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. ⁴⁴ Sa'csi tebgaj reyajg ruseñlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ. ⁴⁵ Rebeñsa'c rnii didxsa'c, sa'csi xhigabsa'c yu' neñ lastooni. Niluxh rebeñgijdx rnii ganax didxgijdx sa'csi xhigabgijdx yu' neñ lastooni, sa'csi ro'ni rnii nani yu' neñ lastooni.

Tio'p bejn ni benchee tio'p yu'
(Mt. 7:24-27)

⁴⁶ Räj pzani:

—¿Xhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. ⁴⁸ Najcni si'c te bejn ni benchee rolijzni, ganid gudäänni jäät, dxejcti bejnñi cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹ Niluxh reni rcua diajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujñ cimient xten yu'ga. Dxejcti biäjt nisro, bidijnñi cuä' yu'ga, dxejc li gurebä'n yu'ga, gunitlojtini.

7

Basiajc Jesús xmos te beñ roman ni rnibee
(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajnreni Jesús jäädni te gusiajcn xmos dade'ga. ⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjļ gacnäjluni ⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siäddzungenajxhreni royu', baxhal capitán gaai xamiigwni, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälñribeduxh niluxh narä rut nacädi. Ni'cni gunibeetis jäajc xmosä, luxh laani siacajcni. ⁸ Sa'csi narä nacä xmos rebejn ni rnibee, luxh

rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcni.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnaĵni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspañsac Jesús xi'n te gunabiuud

¹¹ Neñ redxejga, huij Jesús te guejdx ni laa Naín. Huinäni rexpejn pacni näjza xhidajl bejn ni sanajni. ¹² Che bidzujñni gajxh ro' guejdxga, bahuiini sacua'tzreni te beñgut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³ Che bahuii Jesús loj gunabiuudga, biani nane'ga, räjpni lojni:

—jNa'c roonlu!

¹⁴ Dxejc gubig Jesús lo rebejn ni sanä beñgutga, dxejc guzudxi reni nuu beñgutga. Dxejc räjp Jesús loj beñgutga:

—jBi'n!, narä rniä lojlu; jHuistie!

¹⁵ Dxejc huistie beñgutga, sobga'ni guslojni caniini. Dxejc badeed Jesúsni lo xnanni. ¹⁶ Che bahuiireni xhini'c gujc, bidxebreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujñ nez loonu.

Caniizareni:

—Lagajc Guejb Dios abiädhuui rexpejñni.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús

(Mt. 11:2-19)

¹⁸ Rexpejn pac Juan ni rutiobnis bij rediidxga lojni che yu'ni latzguiib. ¹⁹ Dxejc baxhaĵni gaiireni lo Jesús te sanabdiidxreni: “¿La guliipac najclu Crist ni jiääd o sibäjznu chu stee bejn, ä?” ²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhaĵ nuurnu te guiniabdiidxnu lojlu: “¿La luj najc Crist ni jiääd o la sibäjznu chu stee bejn?”

²¹ Lagajc dxejc che bidzujñreni, basiajc Jesús xhidajl bejn ni rajc garen-garen yälguijdx, ni yu'za rebenđxab lastooreni, basiajczani baloj ni di fii. ²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni raĵ guejdx tiejxhni, abiajc tiejxhni; rediagcua't rien-sac diajgreni; rebeñgut, agubañsacreni; luxh loj rebenproob

nani cabäjz xcälracnäjä Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabaṅsa'c, rolijz rereii yu'reni. ²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. ²⁷ Juan najc niguii ni ruzä't rexquijtz Dios cadre caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexingaan regunaa, nicla tejni gajd guiricaj ni najc te beṅsacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jääd, sajcruni loj Juan.

²⁹ Che biejn diajg rebejn näjza reni rusquijx impuest rextidxn xcuent Juan, gucbeereni rujn Dios yälguxhtissa'c, sa'csi abatiobnis Juanreni. ³⁰ Niluxh refarisee näjza rebejn ni ruluii leiü gulälazreni nani niujn Dios par laareni, sa'csi direni nicäjb nutiobnis Juanreni. ³¹ Räjpa Jesús lojreni:

—¿Xhocha guiniä najc rebejn nani tre' naj? ³² Najcreni si'c rebixbäz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biäd Juan, dini niauxha't, dizani niä' bin, luxh räjpntu: “Yu' beṅdxab lastooni.” ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjpntu: “Bahuilaa, dade're rauxha't, rä'zani, najcni xamiigw rebendojl näjza rebejn ni rusquijx reimpuest xten gubier.” ³⁵ Ni'cni xcälnajn Dios huenliisi rienloj loj dzuun ni rujn rebejn ni najn.

Jesús huij roliz Simón ni najc farisee

³⁶ Dxejc tej refarisee gunii loj Jesús, räjpni:

—Jiädldu rolizä te guidaunu.

Dxejc huij Jesús rolizni, ro'c gurejni lo mex. ³⁷ Rbäjz te gunagubejxh lo guejdxga. Che biejn diajgni satajw Jesús roliz fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzujñni lo ni' Jesús, guslojni cayoوني. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolizni, recosre, bejnii xhigab: “Palga gulii najc niguiire Xi'n Dios, sacbeeni chu najc näjza xho najc

gunaare ni cagajn ni'ni, sacbeezani najcni te gunadoj_lduxh."

⁴⁰ Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad maestr.

⁴¹ Dxejc räjp Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. ⁴² Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc räjpni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcní. ⁴⁵ Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶ Dilu nusäl se't yecä, niluxh laani basäl_{ni} se't ni rlianexhduxh ni'ä. ⁴⁷ Ni'cni rniä lojlu, dojl_l xten gunaare, luxh xhidalduxh najcreni, abadzucaj Dios redojl_lga sa'csi huenliisi sanälajzni Dios. Luxh rebejn ni rudzucaj Dios guxii xtoj_lreni, guxiiza sanälajzreni Dios.

⁴⁸ Dxejcti räjpni loj gunaaga:

—Agubicaj rextoj_lllu.

⁴⁹ Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtoj_l bejn, ä?

⁵⁰ Räjp Jesús loj gunaaga:

—Agul_laalu lo xtoj_lllu sa'csi ahuililajzlu; huij naj, bascuexdi lajzlu.

8

Regunaa ni gucnäj Jesús

¹ Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcäl_lrnibee Dios loj rebejn. Sanäni rexpejn_lpacni ² näjza gaii gunaa ni abasiajcní, agulääni rebendxab lastooreni, näjza basiajcní xcäl_lguijdxreni. Tej_lni laa Marii ni laaza Magdalen_l, ni gulää Jesús gajdz bendxab nejn lastooni. ³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan_l.

Guyu'za sgaai gunaa. Guiraa reni'c rudeed lagajc xhixtenreni te rio' recos ni rquineni.

Xcuent bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni rului, räjpni:

⁵ —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini. ⁶ Yu'za lajt bitejb binijga neñ reguij cadro xheti xhidajl yuj. Che gulejn binijga, gubidzgjajcni sa'csi xheti xcojp ro'c. ⁷ Yu'za lajt bitejbni nez neñ reyaguejch. Che gulejnni, di reyaguejch nusaan niroob gäjga. ⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejsa binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn pacni lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yälñajn te gacbeetu reyälxhiga'tz xten xcälñibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpszani:

—Scree säloj cuentre, rebini najc si'c xtidx Dios. ¹² Binij ni biajb lo nezyuj najc si'c rebejn ni rucuadiajg xtidx Dios. Dxejc riääd beñdxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³ Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴ Binij ni biajb neñ reyaguejch najc si'c rebejn ni rucuadiajg xtidx Dios, per lañ ni sanuureni xnejzreni, rijia'nreni lo recos guedxliuj, lo yälñasa'c ni ruhui-ireni, näjza rujnreni si'ctis ni rñajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios,

dxejc rudeedreni te yäl'nasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas

(Mr. 4:21-25)

¹⁶ Räjzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. ¹⁷ Xhet yu'di ni yuchetzu'tzdi ni di guidzujñ dxej guiluini; xhet yu'diza ni naga'tz naj ni di guidzujñ dxej gacbee bejnñi.

¹⁸ 'Ni'cni colcuadiagsa'c diidx; sa'csi guiraa rebejn ni rajp yäl'racbee, sajprureni yäl'najn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najñni.

Xnan Jesús con rebejzni

(Mt. 12:46-50; Mr. 3:31-35)

¹⁹ Dxejc bidzujñ xnan Jesús näjza rebejzni cadre suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰ Dxejcti huisa'n te bejn diidx loj Jesús, räjñni:

—Xnan guejblu näjza rebejtz guejblu suga' rolä', luxh rla-jzreni fiireni lo guejblu.

²¹ Badzu' Jesús diidxre lojreni, räjñni:

—Xnanä näjza rebetzä najc rebejn ni rucuadiajg, ni ru-zoobza xtidx Dios.

Basiacdxí Jesús te beduxh

(Mt. 8:23-27; Mr. 4:35-41)

²² Te dxej biu' Jesús näjza rexpejñpacni neñ te barcw. Dxejc räjñni lojreni:

—Colcho' stelaad ro' nisre.

Basyu'reni barcw lo nis, sä'tireni. ²³ Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jäáz barcwga lo nis. ²⁴ Dxejcti huicuäänreni Jesús, räjñreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga näjza lo nis ni cayäsjaa. Dxejc guläjz bejga, guredxiza nisga. ²⁵ Dxejc räjñni lojreni:

—¿Con xcäl'rililajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej näjza nis, luxh rusob-diajg bej näjza nis xtiidxni?

Te beñ Gadara ni guyu' rexsprit beñdxab lastooni
(Mt. 8:28-34; Mr. 5:1-20)

²⁶ Bidzujñtireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te beñ ni siääd guejdxga lojni. Agujc xchej yu' rebeñdxab neñ lastooni. Dini gacw xhajnbi, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebeñdxabga neñ lastoo bejnre. Agujc xchero cazob rniaaz rebeñdxabga bejnga ruliib rebejn ni'ni, naani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebeñdxabga rinärenini nez lo reyubijdz. ³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni. ³¹ Dxejc gunabduxhrene loj Jesús na'c guxhalsacnireni cadro biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjb Jesús, ³³ birii rebeñdxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo rebeñguejdxga näjza lo rebeñ rench. ³⁵ Dxejc biädhuii rebejn xhini'c gujc ro'c. Che bidzujñreni cadro suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajnbi, luxh xhetru rajcdi yejcn; dxejc bidxebduxh rebejnga. ³⁶ Sas reni bahuiloj xho gujcn, bijreni diidx xho basiajc Jesús bejn ni guyu' rebeñdxabre lastooni. ³⁷ Dxejc guiraa rebeñ Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrene. Ni'cni biu' Jesús neñ barcw te gubisacni nejz cadro siäädni. ³⁸ Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajn xhajn Jesús
(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni. ⁴¹ Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. La'si sää Jesús rolijzni, birinajl xhidalduxh bejn, catäälirenini.

⁴³ Loj rebejnga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. ⁴⁴ Gubig gunaaga dejtz Jesús te gudajnni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Räjpjac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷ Che gucbee gunaaga anajn Jesús gudajnni xhajbni, bidxejbni, racejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ La'ni canii Jesús si'c bidzujn te bejn ni siääd rolijz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuum Dad Mastr.

⁵⁰ Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹ Che bidzujnreni rolijzni, xtebtis Pedr, Jacoob, Juan näjza xcuzajn dxape'ga biunäjni nen yu'ga. Peta rebejn ni siädnajlni bia'nreni rolä'. ⁵² Cayonduxh guiraa rebejn ni sobga' nen yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjrenini, sa'csi anajnreni agujt dxape'ga.

⁵⁴ Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

⁵⁵ Dxejc guban_sac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejn'pacni
(Mt. 10:5-15; Mr. 6:7-13)

¹ Batie' Jesús guitzubitio'p rexpejn'pacni te badeedni yälrnibee lojreni te cuääreni reben_{nd}xab lastoo rebejn, näjza te gusiajcreni reben_{rac}xhuu. ² Baxhalnireni te gusule'reni diidx xcuent xcälrnibee Dios näjza te gusiajcreni reben_{rac}xhuu.

³ Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolijz bejn cadro guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolijzreni, che jiunejztu lo guejdxga, col_{cuij}b guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni reben_{rac}xhuu cadrotis rdzujnreni.

Xho gujt Juan ni rutiobnis
(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni aguba_{ns}sac lo reben_{gut}. ⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni aguba_{ns}sac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

Bayaan Jesús gaii mil bejn
(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejn'pacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida. ¹¹ Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹² Che gusloj cayääz gubijdx, gubig rexpejn'pacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadro tedreni guxhijn lo rerench, nen reguedxbäz, sa'csi ree xhet yu'di.

¹³ Dxejcti räjp Jesús loj rexpejn'pacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bājł. Ni'ctis yu' palga dinu chasiiru xhi gau reben xhidajłre.

¹⁴ Luxh najc rebejnğa si'cti gaii mił niguii. Dxejc rājł Jesús loj rexpejn pacni:

—Colyejtz lojreni cuereni xcua-xcuaareni, si'cti tiuubitzu-gajreni te cuaa.

¹⁵ Si'c bejnrenini, sas gurej guiraa rebejnğa si'c. ¹⁶ Dxejc cua' Jesús gaii yätxtiilğa näjza tio'p bājłğa, gulāsni lojni xh-aguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilğa näjza rebājłğa, dxejc sanuutis badeednini loj rexpejn pacni te gudisrenini loj rebejnğa. ¹⁷ Guiraa reben xhidaalğa gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

Gunii Pedr Jesús najc Crist
(Mt. 16:13-19; Mr. 8:27-29)

¹⁸ Te dxej lałni cabedx-canab Jesús lo Dios, xtebni näjza rexpejn pacni, gunabdiidxni lojreni, rājłni:

—¿Chuni'c rnii rebejn nacä?

¹⁹ Dxejc rājłpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni aguban sac.

²⁰ Dxejc gunabdiidxni lojreni, rājłni:

—¿La'tu a? ¿Chuni'c rniitu nacä?

Dxejc rājł Pedr lojni:

—Luj najclu Crist Xi'n Dios ni cabääznu.

Jesús rnixгаа xho guetni
(Mt. 16:20-28; Mr. 8:30-9:1)

²¹ Dxejc gunibee Jesús lojreni, rājłni:

—Na'c gäbtu si'c lo rebejn.

²² Rājłzani lojreni:

—Nanab ted Xi'n Niguii trabajwduxh; reben gool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh siban sacä ni riojn dxej.

²³ Dxejc rājłni loj guiraareni:

—Palga chu tejtı rłajz guirinajł narä, nanab jıällajzni xhix-tenni, te guixe-guixee guntisni nani gudedä gunni. ²⁴ Sa'csi nani rłajz guiniazdzu'tzni xcäl nabajłni, sunijtni yäl nabajł lo Dios; luxh nani runijł xcäl nabajłni xcuent xtidxä, sica'ni yäl nabajł par tejpas. ²⁵ Sa'csi ¿xhi gaan gun te bejn palga xca'ni guideb guedxliuj, luxh gunijtni xcäl nabajłni lo Dios?

²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäázani cheni jiälä si'c reii guideb yälrdimbicha' xten Xtradä näjza rexanglni. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcälrnibee Dios.

Bachaa xho rluijoj Jesús

(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dxejcru huinä Jesús Pedr näjza Jacoob näjza Juan, huijreni jiaa yejc te dajn te guredx-gunabni loj Dios. ²⁹ Lañi cabedx-canab Jesús lo Dios, bidxaa xho ruluu lojni; dxejc xhajbni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc toMoisés näjza Elías. ³¹ Rdimbicha'za redade'ga. Caninäjreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lañi caniini si'c, bire' te za gusloj cayajt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuiireni ro'c.

Basiajc Jesús te biuux ni guyu' beñdxab lastooni

(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäjz Jesús. ³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. ³⁹ Luxh beñdxab rniaazni, sas ruscuedxa'nini, rajcni si'c yälguidxbej, rbääni bitzuñ ro'ni, rusacsíduxhnini, luxh dini gusaanni. ⁴⁰ Agunabä loj rexpejnpaclu nibääreni beñdxabga, luxh di niajcdini.

⁴¹ Dxejc badzu' Jesús diidxre, räjpni:

—¡Bejn ni di chalilajz, beñguijdx! ¿Gucli chunäätu, gucli gunä huant la'tu? ¡Gudanä xi'nlu ree!

⁴² Dxejc che cabig biuuxga lojni, basälta' beñdxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beñdxabga, basiacgajcni biuuxga, dxejc badeednini lo xtradni. ⁴³ Guiraa rebejn bidxeloduxh yälrnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lałni cadxeloj rebejn lo recos ni bejn Jesús, räjpnı loj rexpejn pacni:

⁴⁴ — Colcuadiajgsa'c rediidxre, na'cza jiällajztureni, sa'csi sute-dreni narä Xi'n Dios ni gujc Niguii ladzınaa rebejn.

⁴⁵ Niluxh di rexpejn pacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejzbareni niniabdiidxreni loj Jesús xhi säloj rediidxga.

Chuni'c sajcrı

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcrı loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäs, bazujnini cuä'ni, ⁴⁸ räjpnı lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhalı narä. Ni najc maazru nadolajz lojtu, ni'c najc ni sajcrı.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpıdxab neı lastoo bejn con xcälrıabee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacoob näjza Juan

⁵¹ Che siäddzujı redxej ni chää Jesús xhaguibaa, bejnıi xhigab chääpacni guedx Jerusalén. ⁵² Baxhalı gaii bejn gu-nıjd lojni chääreni te guejdx xten Samaria te satılreni cadro jia'nreni ro'c. ⁵³ Luxh rebejn samaritanı di rlajzreni guded-laarenı te lajt cadro jia'nreni, sa'csi najnreni chääreni guedx Jerusalén. ⁵⁴ Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebınguejdxga si'cni bejn Elías?

⁵⁵ Dxejc bahuii Jesús lojreni, gudidxa'ni lojreni, räjpnı:

—Ditu gaan chuni'c rıabee lastootu. ⁵⁶ Sa'csi narä Xi'n Dios ni gujc Niguii dina niälä te gudzucaä xcälı nabajı rebejn. Narä biälä te gıslaärenı lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷ La_lni sääreni lo nezyuj, biääd te bejn gunii loj Jesús, räjpni:
—Dad, narä rlazä jädnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguii, dina gapä nicla te lajt cadre guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaä xtadä, dxejcru jädnalä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl_rnibee Dios.

⁶¹ Dxejc räjp steeni lojni:

—Dad, rlazä jädnalälu, niluxh basanxgaä chasadidxä resa'ä ni tre' rolizä.

⁶² Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl_rnibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadre nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie'xcose'chni. ³ Colchäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlazjreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. ⁵ Cheni jiu'tu rolijz te bejn, ganiddoo colye'tz: “Sucuedxilajz reni rbäjz ree.” ⁶ Palga najcni te bejn ni rdxaglaiz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu. ⁷ Coljia'n lagajc rolijz bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj_l xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. ⁹ Colgusajc rebenracxhuu ni yu' ro'c, colye'tz lojreni: “Abidzujngajxh xcäl_rnibee Dios.” ¹⁰ Palga jiu'tu te guejdx cadre di rlazjreni gcuadiajgreni xtiidxtu, colrii lo nezyuj, ro'c colye'tz lojreni: ¹¹ “Guxhuj xten lajdxtu ni

rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzungajxh xcälrnibee Dios lojtu.”
 12 Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

13 Räjzani:

—iProbe'tu ben guedx Corazín! iProbe'zatu ben guedx Bet-saida! Paru nuhuii rebenzajt ni gubajn guedx Tiro näjza Sidón remilaagwr ni benä nez lojtu, pet gucli nusiechlajzreni, nia-jcwreni ladnagas, nibejzaren lo cobdäj si'c te seen abasiech-lajzreni. 14 Che gun Dios fis rextojl rebejn guedxliuj, guxiiru gac xfis Dios lo rebenzajt ni gubajn guedx Tiro näjza Sidón. Fisroru gun Dios reguedx Corazín näjza Betsaida. 15 Luxh luj guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

16 Räjzani lo rexpejnpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

Rbi' regayonbitzuu

17 Che gubi' regayonbitzuu bejn nani baxhal Jesús, rbaduxh lajzreni, räjpreni:

—Dad, näjza rebenxab rusobdiajg xtiidxnu che rusä'tnu lajlu.

18 Räjz Jesús lojreni:

—O'n. Ni'cni narä bahuiä che gunijt xcälrnibee benxab, bitejbni xhaguibaa si'c bianij xten guzii. 19 Colgacbee. Narä runidxä yälrnibee lojtu te guläjtu yejc bäl näjza yejc naxejb; runidxäza yälrnibee te guntu gaan lo xcälrnibee benxab. Xhetliidi gun daan la'tu. 20 Na'c guibalajztistu sa'csi rusobdiajg rebenxab xtiidxtu; colguibalajzru sa'csi acuaj lajtu lo xquijt Dios xhaguibaa.

Bibalajz Jesús

(Mt. 11:25-27; 13:16-17)

21 Lagajc dxejc bibalaznäj Jesús Sprit Dxa xten Dios, dxejc räjpni lo Dios:

—Rliä'pä xpala'nlu Xtaä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtaä, sa'csi si'c rlajzlu gunlu.

22'Guiraa recosre abaniidxlu loä Xtaä. Dadtis najn chuni'c najc Xi'nni, rutru najndi chu najcni. Rutza najndi chuni'c najc

Guejblu Xtadä, xtebtis narä ni najc Xi'nlu, con rebejn ni rlazä gumbee luj.

²³ Dxejc bahuii Jesús loj rexpejn pacni, räjpni lojtisreni:

—Chicbaa la'tu näjza renani ruhuii guiraa nani cahuilojtu.

²⁴ Sa'csi rniliä lojtu, balti redade' ni gunii xtidx Dios galoo, baltiza rereii rlazj nuhuiireni guiraa ni cahuilojtu, niluxh direni nuhuiini. Rlazjreni niejn diajgreni rediidxre ni cayejn diajgtu, luxh di diajgreni niejnni.

Xcuent te benhuen ni siääd Samaria

²⁵ Dxejc huisulii te maestr xten leii, huininäjni Jesús, rlazjni nuxhiidni Jesús lo xtidxni, gunabdiidxni lojni:

—Dad, Mastr, ¿xhini'c nanab gunä te guibanää Dios par tejjpas?

²⁶ Sas räjp Jesús lojni:

—¿Xhini'c caj lo guijtz xten leii? ¿Xho rollumi?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälajzza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl nabajre.

²⁹ Per maestr xten leii, rlazjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

³⁰ Dxejc räjp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajjreni guiraa xhix-tenni, näjli xhajbni ni najcwni. Sas gudijjrenini, basa'nrenini ro'c, guxii cayäädx nugu'trenini. ³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. ³² Gudejdza te levita, bejn ni rujnza dzuun neñ guidoo. Che bidzujjñi cadro naga' bejnga, gudejdni stelaad, sä'tini. ³³ Dxejcti te beñ Samaria, lañi sääni biaj, gudejdni nezyujga, bidzujjñi cadro naga' bejnga. Che bahuiini lojni, balaslajznini. ³⁴ Gubigni loj bejnga, basälñi se't näjza bin loj bejn ni nadxälguijdx, dxejc batejbnini te la' lajd. Dxejc bascuijbnini dejtz lagajc xmanni, huinänini cadro rud-edlaareni yu', ro'c cuanäjñini. ³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejñre; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo maestr xten leii:

—¿Chu tej lo guidxon rebejnga najc si'c sa' xten dade' ni biajb ladzñaa gubaan?

37 Dxejc räjpni loj Jesús:
 —Ni balaslajz bejn̄ga.
 Dxejc räjp Jesús lojni:
 —Huij te sigajcza chayejnlu.

Bidzujn Jesús rolizj Mart näjza Marii

38 Laḷni huinuu xnezyujni, bidzujn̄ni te guejdx. Ro'c bidx-aagni te gunaa ni laa Mart ni huin̄nini rolizjni. 39 Yu' te bājḷ Mart ni laa Marii, luxh laani gurejni cuä' ni' Jesús te cacuadiajgni xtiidxni. 40 Mart cagusquejn̄ni cayujn̄ni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¡Gojs lojni gacn̄jni narä!

41 Dxejc räjp Jesús lojni:

—Mart, Mart, cayuduxhlu yärsia', riulu xhidajḷ cos, 42 luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

1 Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejn̄pacni lojni, räjpni:

—Dad, baluii nuru xho cuedx-guiniabnu lo Dios, si'c baluii Juan ni batiobnis rexpejn̄pacni.

2 Dxejc räjp Jesús lojreni:

—Che cuedx-guiniabtu lo Dios, scree col̄nii:

Xtadnu ni yu' xhaguibaa,

suchä'p xpala'nlu, sujiääd xcäl̄rnibeelu.

Sugac si'ctisni rlajzlu gac lo guedxliuj si'cpac rajcni xhaguibaa.

3 Guira dxej baniidx xcu'nnu si'ctis ni rquiinnuni.

4 Basiäjḷ lajzlu redojl̄ xtenu si'cni riäjḷ lajznu redojl̄ ni rujn rebejn̄ loonu.

Na'c gusaanlu jiajbnu lo xcäl̄rnibee beḅdxab.

Basḷaa nuurnu lo dojl̄.

5 Dxejc räjpza Jesús lojreni:

—Paru tejt̄u yu' te xamiigwni, luxh guidzujn̄ni rolizjni garol yääl, gäbni: “Xamigwä, banidxlaa chon̄ yätxtiil, 6 sa'csi bidzujn̄ te xamigwä rolizä ni bazaj biaj, luxh xhet ra'pädi te gudedä xhi gauni.” 7 Xhixh sinii ni naga' neḅ xyu'ni, gäbni: “Na'c riädte'chlu bacal̄ loä. Niäu rolä' luxh rexi'nä naga' cuä'ä, digacdi chästie' te gunidxä xhi gunidxä lojlu.” 8 Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacal̄ni. 9 Sigajcza rniä lojtu, palga guiniabtu xhi guiniabtu,

sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguil xhi cos, rdxälhini; nani rusejz rolä', suxhalzarenini lojni.

¹¹ 'Paru tejtü ni najc dad, jiäd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäl, ¿la sudeedtu te bäl, ä? ¹² O palga guiniabni te tzutbejt, ¿la sudeedtu te naxejb, ä? ¹³ Palga la'tu, ni najc bendojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxi xtenni loj renani rniabni lojni.

Rucuaquijreni Jesús, rniireni rajpni yälrnibee xten bendxab (Mt. 12:22-30; Mr. 3:19-27)

¹⁴ Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxelo-duxh reben xhidaalga. ¹⁵ Dxejc yu' reni räjp:

—Niguiire rbää rebenxab con yälrnibee xten Beelzebú ni rnibee loj rebenxab.

¹⁶ Sgaiireni rlajz guquiilrenini, ni'c canabreni gunni te seen ni siäd xhaguibaali. ¹⁷ Niluxh laani gucbeen xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaclaa sinijt gubierra lo guedxliuj. Palga te famil rdilnä j lagajc sa'ni, di gaclaa sinitloj familga. ¹⁸ Palga guiliä' sa' rebenxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebenxab con lagajc yälrnibee xten Beelzebú. ¹⁹ Palga si'c najcni, ¿chuni'c rudeed yälrnibee loj rexpejntu te rbääreni bendxab? Lagajc laareni rului xhet laadi rujntu xhigab. ²⁰ Palga narä rbää rebenxab con xcälrnibee Dios, ni'cni rului loj abidzujn xcälrnibee Dios lojtu.

²¹ 'Cheni suga' te bendaan, ca'ni guib, canäjni rolizni, rutli-idi ruhualdi rexhixtenni. ²² Niluxh che jiäd stee ni nadipru lo bendaanga, rudxagdijlnini, rujnni gaanni, dxejc rudzucajni xquibni ni badeed yälbendaan lojni, dxejc sajc chanäni guiraa rexhixtenni. ²³ Reni xhet yu'di xladä, rdxe'chreni loä. Ni di gutopnä j narä, rutie'chni.

²⁴ Räjpzani:

—Cheni rii te bendxab nen lastoo te bejn, ricansajni nez lo reyubijdz, caguilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.” ²⁵ Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. ²⁶ Dxejcti rixiini sgajdz bendxab ni rujnru latsiaj lojni. Dxejc riu'reni nen lastoo bejnga, dxejc nalasru ria'n bejnga loj ni gujcn galoo.

Chicbaa renani riu xtidx Dios

²⁷ La_l ni canii Jesús rediidxre, te nane' ni yu' lo reben xhidaalga dipli guniini, räjpni:

—¡Chicbaa nan ni biädna_lu guedxliuj! Chicbaaza nani bas_laa luj.

²⁸ Luxh laani räjpni:

—Xhet si'c_di najcni; chicbaaru rebejn ni rucuadiajg xtidx Dios, ni ruzoobza xtiidxni.

Rebenquijdx rniab te milagwr si'c te seen

(Mt. 12:38-42; Mr. 8:12)

²⁹ Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj ben_guidxduxh_reni, rniabzareni te mi-laagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujc Jonás te seen loj rebejn guedx Nínive, si'c_za narä, Xi'n Dios ni gujc Niguui, gacä te seen lo rebejn ni nabajn naj.

³¹ Cheni guidzujn dxej ni gac fis sistie te nane' ni gujc rein lo reyuj ni tre' ladbä_jgw, sucuaquijni rebejn ni tre' guedxliuj naj sa'csi laani biriini zitduxh te bacuadiajgpacni yäl_najn xten Salomón. Ree suga' galäiitu tej ni sacduxhru lo Salomón,

³² luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj neñ redxej ni gac fis. Dxejc sucuaquijreni rebejn ni nabajn naj sa'csi laareni, che huinäli Jonás xtidx Dios lojreni, basiechlajzreni, basa'nreni xtoj_lreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³ Räjzani:

—Rut rucuaguijdi te bajl, te gusujnini te lat xhiga'tz, niclaza neñ te caj. Susujni bajlga jiaa te rajc ruhuisa'c chutis ni riu' neñ yu'. ³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacä_jy. ³⁵ Gunatiro te di gac xpianijlu yäl_nacä_jy. ³⁶ Palga guideb xcäriejnlu yu' bianijtis, xheti te lajt nacä_jy, saj_c fisa'clu guira'ti, si'c najc che rusanij te bajl neñ yu'.

Rucuaquij Jesús refarisee näjza rebejn ni najn lei

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajn te farisee Jesús chääni rolizjni te chatajwni. Sä'tireni. Che biu' Jesús, gurejni lo mex. ³⁸ Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. ³⁹ Dxejcti räjp Jesús lojni:

—La'tu ni najc refarisee, rguibtu nez dejtz te bas nájza te pla't, niluxh la'tu guidxa lastootu yálgubaaan nájza yállatsiaj.
⁴⁰ ¡Ben nadduxh! ¿La ditu gacbee? Nani benchee dejtzni, bencheeza nen̄ni. ⁴¹ Co'lyajc nadolajz, co'lyacnáj rebejn̄ con ni rniitu, dxejc guiraa recos sajc naya par la'tu.

⁴² ¡Probe'zatu, ben̄ farisee! Rudeedtu lo Dios tej lo tejga tzuu ni rajptu: rudeedtu bedzxtiil nájza ruud, náj guiraa recuane' ni rajptu lo le', niluxh ditu jiu xcálguxhtis Dios nájza xcálrinálajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ ¡Proobza la'tu reben̄ farisee! Rchagljajztu rbejtu lo reyagx-hil xten rebejn̄ ni sajc nen̄ reguidobáz; rchagljajztu saru rnii rebejn̄ “xchan Dad” lojtu che rijtu lo guii.

⁴⁴ ¡Probe'zatu! La'tu najctu si'c rebaa ni di guzen̄, rsiaj rebejn̄ jejc cadre naga'reni luxh direni gan.

⁴⁵ Dxejcti badzu' tej rebejn̄ ni ruluii leii diidxre lojni, rájpn̄i: —Dad mastr̄, che rniilu rediidxre, rniyajlu nuurnu.

⁴⁶ Dxejc rájpn̄ Jesús lojreni:

—¡Probe'za la'tu rebejn̄ ni ruluii leii! Sa'csi rnibeetu gun rebejn̄ recos naganduxh ni najc si'c te cargw naduxh ni di gacdi guu bejn̄. Luxh la'tu di rljajztu fal̄tuni nicla con te bicuen̄abáztu.

⁴⁷ ¡Proobzatu! Sa'csi runcheetu xpaá redade' ni gunii xtidx Dios galoo, luxh najctu rexajg renani bagu't redade'ga.

⁴⁸ Ni'cni najnpactu xhi gusajcreni, rchagljajzzatu redzuun ni bejn̄ retoxtadgoldootu; si'cza gunnájtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ Ni'cni gunii Dios, sa'csi yuduxh xcálnajnni, rájpn̄i: “Sux-halä reniguii ni guinii xtidxä nájza reapost, luxh sugu'treni gaiireni, susacsízareni sgaiireni.” ⁵⁰ Loj rebejn̄ ni nabajn̄ naj siniab Dios gudeedreni cuent xcuent xtiejn̄ guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹ Guislojni xtiejn̄ toAbel, nájza xtiejn̄li Zacarías ni bagu'treni galäi nez lodxan nen̄ guidoro. Ni'cni rniä lojtu, siniab Dios cuent xten xcálgujt guiraareni loj rebejn̄ ni nabajn̄ naj.

⁵² ¡Probe'za la'tu, rebejn̄ ni ruluii leii! Sa'csi rniitu la'tistu rajptu yálnajn̄, luxh di rljajztu chalilajztu xtidx Dios, dizatu gusaan chalilajz rebejn̄ ni rljajz chalilajz xtidx Dios.

⁵³ Cheni rájpn̄ Jesús rediidxre, bidxe'ch rebejn̄ ni ruluii leii nájza refarisee lojni. Dxejc guslojreni canabdiidxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ La_l ni caniini, bidojp xhidajl mi_l bejn ro'c, calaro'li sa'reni. Dxejc gusloj canixгаа Jesús loj rexpejn_npacni, räjpni lojreni:

—Col_nati levaduur xten refarisee, rusgueereni rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu ne_n reyu' ni niäudzu'tz, sixedxa'renini rediidxгаа yejcli reyu'.

Chuni'c nanab guidxejbtu

(Mt. 10:28-31)

⁴ Räjpszani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Col_guidxejb nani che abadzucajni yäl_nabajn_n rajpni yäl_nribee gusal_ni la'tu gabijl lo bajl ni cayejc par tejpas. Ni'csii col_guidxejb.

⁶ 'Anajntu sajc jio' gaii mane' tio'p melbäz, luxh di Dios jiäl_lajz nicla tej remane'ga. ⁷ Rexquidxejcti abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjpszani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguüi sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjl_lajz Dios laani. Niluxh chutis ni guiniyaj Sprit Dxaan xten Dios, di Dios gusiäjl_lajz xtoj_lni.

¹¹ 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzuj_n or ni guiniitu, Sprit Dxaan xten Dios suluini xhini'c guiniitu.

Reyäl_nasa'c rusajb bejn ne_n dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yäl_guxhtis o gacä abogaad lojlu, ä?

¹⁵ Dxejc räjp_sac Jesús lojreni:

—Col_natiro, col_gantzu' te di r_lajztistu ga'ptu yäl_nasa'ctis sa'csi xcäl_nabajn_n bejn dini gac yäl_rajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te beñ rapduxh. Racduxh cose'ch lo rexcäjlni. ¹⁷ Dxejcti gusloj bejnni xhigab: “¿Xhocha gunä? Dina gapä cadre cucheä recose'ch.” ¹⁸ Sas bejnni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” ¹⁹ Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” ²⁰ Dxejcräjp Dios lojni: “¡Beñ najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?” ²¹ Si'c sisiajcc guiraa rebejn ni rguiltis xcälñasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²² Che gojl stera't, räjp Jesús loj rexpejnñpacni:

—Ni'cni rniä lojtu, na'c rujntu xhigab xcuent xho guibajñtu o xhini'c gautu te guibajñtu, niclaza xcuent lajd ni gacwtu. ²³ Yälñabajñ sajcruni lo yälñrajw; tiejxhni sajcruni lo lajd ni rajcw bejn. ²⁴ ¡Colñhiii rebaloo! Direni cue'c binij, dizareni gutojpc cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? ²⁵ Luxh ¿Chu tejtü palga runduxhni xhigab sajc tiobrui sgarol metr? ²⁶ Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷ ¡Colñhiii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcälñasa'cni, dini nisiuchee si'c rsiuchee reguiiga. ²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejçni lo däj, aticaxh Dios suniidx xhi gacw la'tu, ¡bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. ³⁰ Si'ctis rujñ rebenguedxliuj guideb xtijpreni rguilreni rehxicosre. Niluxh xtadtü ni yu' xhaguibaa anajñni xhini'c rquiintu. ³¹ La'tu colñquiiltis xcälñnibee Dios, dxejcti laani suniidxzani guiraa recos ni rquiintu.

Yälñasa'c ni yu' xhaguibaa

(Mt. 6:19-21)

³² Räjppzani:

—La'tu ni najc rexilä'ä, na'c guidxejbtu, sa'csi rbaali lajd Dios, aguleni la'tu te la'tu guntu yälñguxhtis lo xcälñnibeeni. ³³ Colñguto' xhixtentu, colñgudeedni loj rebejn ni caquinduxhni, te si'c guntu te bols ni di jiuixh, te chu yälñasa'c neñni xhaguibaa cadre di gubaan jiu' niclaza xcabäj rehxicos. ³⁴ Sa'csi cadre rajptü xcälñasa'ctu, ro'cza yu' lastootu.

Nanab susintu

35 Rāj̄pzani:

—ǰCol̄susin̄! ǰCol̄hualguij rebajl! 36 Col̄yujn si'c remos ni cabājz guibi' xlam̄reni ni s̄aa te sa', te cheni guibi'ni guxhal-gajcreni rolā'. 37 Chicbaa remos ni susin̄ che guibi' xlam̄reni. Rniliāpac lojtu, lagajc xlam̄reni sajcwni xhajbni sibe'cni rexmosni lo mex, dxejc lagajc laani sudeedni xhi gaureni. 38 Mase guidzuj̄nni garol yāäl, mase guidzuj̄nni cājyru, palga guidxäl̄ni arexmosni susin̄, ǰchicbaa remosga! 39 Col̄yacbeepac, paru gacbee baxhuaan xten yu' xhi or̄ guidzuj̄n gubaan roli-jzni, dini gusaan guxhalreni rolizni te cuanreni xhixtēni. 40 Nājza la'tu col̄susin̄, sa'csi or̄ ni ditu gun xhigab j̄iād̄ni, sidzuj̄n Xi'n Dios ni gujc Niguui.

Te mos guijdx

(Mt. 24:45-51)

41 Dxejc gunabdiidx Pedr lojni, rāj̄pni:

—Dad, ¿la lootisnu rujylu cuentre o la najcni par guiraa rebejn?

42 Dxejc rāj̄p Jesús lojreni:

—¿Chuni'c najc mos hueen, mos nasin̄, ni rusannāj xlam̄ni guiraa rexmosni te gudeedni xhi gaureni che gal̄ oor, ä? 43 Chicbaa mosga palga laaca cayuj̄nni che guibi' xlam̄ni. 44 Rniliāpac lojtu, lam̄ga sudeed guiraa rexhixtēni te xcanāj mosgani. 45 Per palga gun mosga xhigab nen̄ lastooni: “Saclaa guibi' xlam̄ä”, sas guislojni gusacsíni resamosni, gunaa sigajc niguii, dxejc guisloj gauni, yāni, soozni; 46 sibi' xlam̄ni te dxej ni xhet cabājzdinini, or̄ ni dini gun xhigab guidzuj̄nni. Dxejc sii sudeedni te castigwro lojni, sutiāj̄lni te duu dejtzni dxejc sinibeeni j̄iini, guidxaagni rebejn ni di gusobdiajg diidx.

47 'Mosga ni najn xhini'c rlanj xlam̄ni gac, luxh dini susin̄, dizani guzoob xtiidxni, sutiälduxhrene duu dejtzni. 48 Niluxh mos ni di gan xhi rlanj xlam̄ni gac, ni'c ruj̄nni redzuun ni di xlam̄ni guidxaglajz gac, guxiiru castiigw gacni. Reni rca' xhidajl, xhidajlza riāj̄l̄ gudeedreni; loj reni rca' yäl̄rnibeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

49 Rāj̄pza Jesús:

—Narä biälä te gucuaguiä guedxliujre; ǰmalaii alagusloj cayejcni! 50 Niluxh nanab tedä te yäl̄robnis ni säloj te traba-jwduxh, ni'c cayuduxhä yärsia' cheni chale'lini. 51 ¿La rujntu xhigab biälä te j̄iäd̄nää yäl̄rbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. 52 Silia' sa' te famil̄; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. 53 Silia' sa'reni; sidxe'ch

dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴ Caniiza Jesús lo reben̄ xhidajlga, räjpni:

—Cheni rhuiitu räjs reza nez lad jäät, rniitu: “Siajb nisguij.” Luxh riabjñi. ⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni. ⁵⁶ ¡Bejn̄ ni rusguee! La'tu racbeetu xhi säloj reseen ni rien̄ lo guedxliuj näjza xhaguibaa, ¿xhicuent ditu gan xhi säloj retiemp ni dxunnu naj, ä?

Basiäj̄l diidx con rebejn̄ ni rdxe'ch lojlu

(Mt. 5:25-26)

⁵⁷ Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, lañi sanäni luj ro jusgaad, basiäj̄l diidx con laani lo nejz, te na'c chanäni luj lo reguxhtis, sa'csi dxejc reguxhtis sutedreni luj lo reguixhajg te gusaureni luj neñ latzguiib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaii reni huisa'nreni diidx loj Jesús xcuent gaii ben̄ Galilee ni bagu't Pila't neñ guidoo, bagu'chni xtiejnreni con xtiejn reman ni siädnäreni si'c gojn lo Dios. ² Sas räjp Jesús lojreni:

—¿La rujntu xhigab si'c gusajc reben̄ Galileega sa'csi najcrueni ben̄doj̄l lo rebejn̄ lajdxreni? ³ Narä rniä, dini gac si'c. Palga di'tu gusiechlajz sigajcza sejt guiragajctu. ⁴ O xcuent guitzumbichon̄ rebejn̄ nani gujt che gubixh te or ni laa Siloé yejceni, ¿La rujntu xhigab najcrueni ben̄ doj̄l lo rebejn̄ ni rbäjz guedx Jerusalén, ä? ⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuini don la caj ninejxh lojni. Luxh xhet ninejxhdi bidxälni. ⁷ Dxejc räjpni loj bejn̄ ni canäj xyujni, agujc chon̄ ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! ⁸ Luxh xmosni räjp lojni: “Dad, basaanni steb ijz, guslaä

yuj ni'ni, gusälä abonni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

¹⁰ Te dxej ni rusilajz rexpejn Israel caguluii Jesús nen te guidobäz. ¹¹ Ro'c suga' te nane' ni agujc tzunbichon ijz racxhuuni. Benxab caguscoodni, niluxh di gacdi suliini. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

¹³ Che basujni naani yejcn, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴ Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; nen redxejga sajc jiäädte te jiajct, per na'c jiäädte dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—¡Ben rusguee! ¿La di chutis tejt guxhec xconni o xpurni te chanänini yäni nis, mase najcni dxej ni rusilajz bejn, ä?

¹⁶ Luxh nane're najc te xagdo toAbram, nani numbee Dios, ni agujc tzunbichon ijz baliib benxabni, ¿la digacdi guixecni lo xcälguijdxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸ Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? ¹⁹ Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiäazni loj rexhajcwni.

Xcuent cojb ni rusaguij

(Mt. 13:33)

²⁰ Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹ Najcni si'c levaduur ni rugu'ch te gunaa lo chon mediid arin, luxh rusaguijni guiraa cojbga.

Dää rolä' cadro jiu'ni xhaguibaa

(Mt. 7:13-14, 21-23)

²² Huinuu Jesús xnejzni sääni guedx Jerusalén. Lalni sadejdn reguejdx näjza rerench caguluiini rebejn. ²³ Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojlreni, ä?

Dxejc räjpni lojreni:

24 —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlazj jiu'reni ro'c, niluxh direni gun gaan. 25 Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä'”, dxejc laani sudzu'ni diidx, siniini: “Dina ganä caro siäädту.” 26 Dxejc guislojtu guiniitu: “Bidxunnäanu, bidaunäanu, bidunnäanu luj, baseedlu nuurnu lo xnezyunu.” 27 Dxejc siniini lojtu: “Rniliä lojtu, dipacnä gumbeä la'tu. Colijj guiraatu, beñlatsiaj.” 28 Dxejcti sonduxhtu, chubejli läjyту che fiitu abiu' toAbram, con toIsaac, con toJacooob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. 29 Dxejga sidzujñ xhidajl beñzijt ni siääd ladjiaa, ladjiat, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. 30 Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent guedx Jerusalén
(Mt. 23:37-39)*

31 Lagajc dxejga, bidzujñ gaii refarisee, räjpreni lojni:

—Huij, biunejz ree, sa'csi Herodes rlazj ju'tlu.

32 Dxejc laani badzu'ni diidxre lojreni, räjpni:

—Gojz lo bäjzga, beñ rusguee: “¡Bahuii! cabää rebendxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.” 33 Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxitis Jerusalén sajc guetni.

34 ¡Probe'tu, la'tu beñ Jerusalén! Rugu'ttu redade' ni riädniit xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. 35 Bahuii xho bianxteb xquidootu. Ni'cni arnixgää lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”

14

Rusiajc Jesús te bejn ni guidxa guij

1 Che gojl te dxej ni rusilajz rexpejn Israel, huitajw Jesús rolizj tej ni rnibee loj refarisee. Cagula'tz gaii refarisee, guidon xhini'c gun Jesús, 2 sa'csi nez loj Jesús suga' te dade' ni guidxa guij tiejxhni. 3 Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusiajcnite beñracxhuu dxej ni rusilajz bejn o la di gacdini?

⁴ Per laareni dxitis suga'reni, niäutis ro'reni. Dxejc cua' Jesús beñracxhuuga, basiajcni, gunibeezani biunejzni.

⁵ Dxejc räjpni loj refarisee:

—Chu la'tu ni räjp te bur o te gon, palga jiajbni neñ te bisie, ğla ditu chalägajcni mase najcni dxej ni rusilajz bejn, ä?

⁶ Dxejc di niajcni nudzu'reni diidx lojni.

Reni bidon chää sa'

⁷ Cheni bahuii Jesús xho rchagljaz rebejn rbereni latsa'c te cuereni cuä' rebejnro, bijni te cuent ni rului lojreni, räjpni:

⁸ —Cheni guidontu chäätu te sa', na'c guntu te cuetu cuä' rebejnro, te di guidzujñ te beñroru lojlu, ⁹ dxejc jiääd bejn ni cayujñ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. ¹⁰ Maazru hueen, cheni guidonlu chäälu te sa', huicue lo mex ni zuj lo le' te che guidzujñ bejn ni cayujñ lanij, naani lojlu: “Xamigwä, gudaa cuelu neñ yu' cadre rbej rebejnro.” Si'c sä'p xpala'nlu nez loj guiraa rebejn ni sobganäjlu lo mex. ¹¹ Sa'csi ni rlanj chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räjpzani loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cuedxtislu reexamigwlu con rebejtzlu, con resa'lu, niclaza rexpisijnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. ¹³ Che gunlu te lanij, alga gurejdx rebenproob, rebencoj, näjza rebenlotiä'p, ¹⁴ dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibañsac rebejn loj rebeñgut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadre rnibee Dios.

¹⁶ Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiädtaunäjreni. ¹⁷ Che bidzujñ or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” ¹⁸ Dxejc guiragajczeni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹ Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰ Steeni räjp: “Entis bachñaä ni'cni di gacdi jiälä.” ²¹ Che gubi' mosga, badeedni diidx lo xlamni xhi räjp rebejnnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj,

rebenlotiä'p, rebennatiujnc.” ²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³ Dxejc räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. ²⁴ Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵ Laļ sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jääd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnni, nägajcza xcälñabajnni, di gacdi gacni te rexpenä. ²⁷ Palga yu' chutis tej ni di rļajz tedni trabajw te jäädñajlni narä, di gacdi gacni te rexpenäpac. ²⁸ Chu tejtū ni rļajz gun te yuro, ni di gunxgaa xhigab lacti meel chanä yu'ga, te guidon la sajc guluuxnini. ²⁹ Didi cheni abejnni recimient, di gacdi guluuxnini, dxejc guiraa reni fii lojni suxhiznäjreneni, ³⁰ säjpreni: “iBahuilaa! Bejnre gusloj bencheeni te yu' per di niajcdi nuluuxnini.” ³¹ ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu miļ soldaad loj stee reii ni siääd con gajļ miļ soldaad, ä? ³² Palga di gacdi gucuanäjnini, che gacbeeni zijtli siääd stee reiiga, suxhalni te xpejnñi chanab yälrbedxi lojni. ³³ Ni'cni palga chutis tejtū di gusaan rexhixtēni te jäädñajlni narä, di gacdi gacni te rexpenäpac.

Che diru sejd gac nadzujy

(Mt. 5:13; Mr. 9:50)

³⁴ Rājpzani:

—Huen najc sejd. Per cheni diruni gac nadzujy, ¿xho gacru gac nadzujyni? ³⁵ Xhetru sajcdini, nicla te chääni loj yuj, niclaza te chääni lo abon. Gusältis bejn sejdga. Reni rļajz gucuađajg xtidxä, sucuađagsa'creni.

15

Xcuent xiil ni gunijt

(Mt. 18:10-14)

¹ Guiraa reni rusquijx impuest näjza rebendojļ cabigreni loj Jesús, te cuadiajgreni rextiidxni. ² Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig rebendojļ lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejtū ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? ⁵ Luxh che guidxällinini

sibaduxh lajzni, dxejc sutzuubnini ro xhajcwni. ⁶ Che guidzujñni rolijzni sutojpní rexamiigwni nájza rexpisiñni te gäbni lojreni: “Colguibalaznäj narä sa'csi abidxälä xile' ni gunijt.” ⁷ Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquiin gusiechlazreni xtojlni.

Xcuent meel ni gunijt

⁸ Räjpzani:

—Sigajcza te gunaa ni rajp tzuu meel, palga chasälñi tejni, çla dini gusanij te bajl te guloobni neñ yu' hasta guidxälñini, ä? ⁹ Luxh che guidxälñini, sutojpní rexamiigwni nájza rexpisiñni, säjpní lojreni: “Colguibalaznäj narä sa'csi abidxälä meel ni gunijt.” ¹⁰ Rniäza lojtu, sigajcza sibalajz rexangl Dios xhaguibaa xcuent te beñdojl ni rusiechljazni.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejc xi'nni ni najc huinruga, räjpni lo xtadni: “Dad, baniidx yälñasa'c nani nungäjñl xca'a.” Sas badeed xtadni xerensni. ¹³ Di niacñaa, balsi dxej gudejd, chela bato' xinhuinni guiraa xhixtenni, dxejc sääni, bidzujñni te guedxzijt. Ro'c banijtni guiraa xmeelni lo recosguijdx. ¹⁴ Che abanijtni guiraa xhixtenni, biääd te gubinduxh guedxzijtga cadro yu'ni. Sas guslojzani calaanni. ¹⁵ Dxejc huitiilni dzuun lo te beñguejdxga. Baxhal bejngani te huigajpní cuch lo xyuj dade'ga. ¹⁶ Luxh calanduxhni bejnñi xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi niajwni. ¹⁷ Lañl ni cadejdní trabajwga, bianij xcäriejñni bejnñi xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. ¹⁸ Guibi'älis ladxä, rolijz xtadä, gäpä lojni, Dad, banitä lo Dios nájza lojlu. ¹⁹ Diru nungäjñl guirilaä xi'nlu. Cua' narä si'c te xmoslu.” ²⁰ Dxejc gunazgajcni nejz te gubi'ni rolijz xtadni.

'Cheni zijtru siäädni, bahuii xtadni lojni. Dxejc balaslajzníni, ruxunñlini, huichaglojñini, sas gudääzníni, bachagro'ni lojni. ²¹ Dxejc räjp xi'nni lojni: “Dad, abanitä lo Dios nájza lojlu. Diru nungäjñl guirilaä xi'nlu.” ²² Per räjp xtadni loj rexmosni: “Coltanä te ladsa'c, colshuajcwníni xi'nä, colgusäl te niil bicuenaani, xcajza te gura'ch ni'ni. ²³ Coltanä te biser ni guro' colgu'tni. ¡Colsquejn te guidaunu, jiennu te lanij! ²⁴ Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

²⁵ Lañl ni cayajç dee, xingangalooni cayujñ dzuun lo niaa. Che gubi'ni, siäddzunğajxhni rolijzni, che biejn diajñni cayel

rolijzni, caguya'zareni. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc räjp mosga lojni: "Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni." ²⁸ Dxejc bidxe'ch xingan-galooni. Naadtini jiu'ni rolijzni. Che gucbee xtadni naadtini jiu'ni, bihuii xtadnini te gunabni jiu'gani. ²⁹ Dxejc räjpni lo xtadni: "¡Bahuilaaare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con rexamigwä. ³⁰ Luxh naj ni abidzujñ xi'nlure, ni banijt xmeellu con regunadxab, xhoxh bagu'tlu te biser guro' te cayujnlu xlanijni." ³¹ Dxejc räjp xtadni lojni: "Xi'nä, sugagajclu loä, luxh guiraa ni rapä najc xtenlu. ³² Niluxh naj riäjpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni."

16

Xcuent te ni rnibee loj remos

¹ Dxejc cayujyza Jesús stee cuent loj rexpejn pacni, räjpni:

—Guyu' te benrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: "Bejn ni rnibee loj rexmoslu xhetlaadi cayujnni cagunijtni rehxix-tenlu." ² Dxejcti gurejdx xlamnini, räjpni lojni: "¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä." ³ Dxejc bejn ga bejn xhigab: "¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. ⁴ Ananä xhini'c gunä te che dirunä ga'pä dzuun, sibejdx rexamigwä narä rolijzreni." ⁵ Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzuxgaa: "¿Lac nazääblu lo xlamä?" ⁶ Dxejc räjpni: "Nazäbä si'c te gayuu baril se't." Dxejc räjpni lojni: "Basquejn, cua' guijtze, bacuaa tiubitzuutis baril nazääblu lojni." ⁷ Dxejc gunabdiidxni loj steeni, räjpni: "¿Luj a'? ¿Lac nazääblu lo xlamä?" Dxejc räjpni lojni: "Te gayuu dximro triuu." Dxejc räjpzani: "Aree xquijtzlu; bacuaa tajtis dximro." ⁸ Bidxeloj xlamni, gulä'pni xpala'n beñgüjdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzurenini lo rextzuunrenini con sa'reni loj rebejn ni arumbee xtidx Dios.

⁹ Rniä lojtu, colquuil rexamiigwtu con reyäl'nasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' rolijztu par tejpas.

¹⁰ Renani runsa'c dzuun lo te dzunbäz, sajczä gunsa'cni dzuun lo te dzunro, luxh reni di gacdi gunsa'c dzuun lo te

dzunbáz, di gacdiza gunsa'creni dzuun lo te dzunro. ¹¹ Ni'cni palga xhetlaadi cuarálnäjtu reyálnasa'c xten guedxliuj, jxho guniidx Dios reyálnasa'c xtenni lojtu! ¹² Palga xhetlaadi cuarálnäjtu xhixten bejn, ¿chu guniidx lojtu ni gac xtenpactu, ä?

¹³ 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios laj ni sanälajztisni xcálnasa'cni.

¹⁴ Mbaj naj, refarisee, sa'csi rchaglazduxhrenei meel, cacua-diagdzu'tzreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctu bejn ni ruhiii rebejn lojtu, naareni ben_sacduxhtu, niluxh acanajn Dios xhi xhigab rujntu nen lastootu. Sa'csi guiraa ni rchalojtu najc yálnasacduxh, guiraa ni'c rbixhlajz Diosni.

Xleii Moisés con xcäl_rnibee Dios

¹⁶ Räj_pzani:

—Dxejli ni biäd Juan ni rutiobnis, guyu' xleii Moisés, nájza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcäl_rnibee Dios, ni'cni xhidajl bejn cagusutijp lajzni te jiu'reni loj yäl_rnibeega.

¹⁷ 'Per guyasiru nitloj xhaguibaa nájza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Ruluii Jesús xcuent ru_r'o'n sa' bejn

(Mt. 19:1-12; Mr. 10:1-12)

¹⁸ Räj_pzani:

—Palga gu_r'o'n te bejn chääl_ni, dxejc guch_n_aani stee gunaa, rujnni dojl, luxh nani ruch_n_aa te gunaa ni abar_o'n chääl_nini, niguiiga rujnzani dojl.

Te be_nrajp nájza Lá_zaro

¹⁹ Räj_pzani:

—Guyu' te be_nrajp ni rchaglaz rajcwni ganax reladsacduxh, luxh guixe-guixee rujnni laniro. ²⁰ Guyu'za te be_nproob ni laa Lá_zaro ni rniab gojn, ricueni ro xlä' be_nrajp_ga, yu' guejdx ni rgaadz tiejxhni. ²¹ Rlajzni maläii xho gunni gauni nani rtejb loj xmex be_nrajp_ga, luxh direni gusaan. Dxejc rebä'cw siäd rilejp loj reguejdx ni rgaadz ni guidxa tiejxhni. ²² Guyu'ti te dxej gujt be_nproobga, biädläs rexangl Dios xaimni, huinärenini cadro yu' Abram xhaguibaa. Dxejcti nájza be_nrajp_ga gujt, huicua'tztirenini. ²³ Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuüini zitduxh cadro suganäj Abram

Lázaro. ²⁴ Dxejcti guredxaduxh benrajpğa, räjpni lo Abram: “iXtadä Abram! Balazlajz narä, baxhał Lázaro guhuajdxni yejc bicuenaani nis te gusiälyujni ludxä, sa'csi ree cadedä trabajwduxh lo guiboo.” ²⁵ Luxh räjp Abram lojni: “Xi'nä, basaa lajzlu che gubajnlı lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdılu trabajwduxh. ²⁶ Luxh di gacdi jiaäd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacđini. Di gacđiza ted reni yu' ro'c te jiaädreni loonu.” ²⁷ Dxejcti räjp benrajpğa lojni: “Rniabduxhä lojlu, xtadä, baxhallaa Lázaro cháäni roliz xtadä, ²⁸ sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jiaädreni ree cadro rdejđ bejn trabajwduxh.” ²⁹ Dxejc räjp Abram lojni: “Arajpreni guijtz cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.” ³⁰ Luxh benrajpğa badzu' diidxre, räjpni lojni: “Gulii dad Abram, per palga chäs te bejn loj rebeğut, chanii lojreni, dxejc sii pet susiechlajzreni.” ³¹ Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibañsac loj rebeğut.”

17

Riesgw jiajbni lo dojl

(Mt. 18:6-7, 21-22; Mr. 9:42)

¹ Räjp Jesús loj rexpejnpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. ² Maaz guliibni te guij xten molin guejnni, gusal bejnıni lo nisdoo cadro jiatro quela gunni jiajb rexi'nä ni ahuililajz xtidxä. ³ iColısusınl!

'Palga gun bejtzlu dojl lojlu, baliıdxni. Palga gusiechlajzni, basiäjı diidx con laani. ⁴ Masque gajdz huält nenı teb dxej gunni dojl lojlu, palga jiađniini lojlu gajdz huält, naani: “Xhet laadi benä, basiäjı lajzlu”, basiäjı lajz con laani.

Bastioob xcälırililaaznu

⁵ Gunii rexpejnpacni lo Jesús, räjpreni:

—Dad, baniıdxru yälırililajz loonu.

⁶ Dxejc räjp Jesús lojreni:

—Palga rajptu yälırililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajgga xtiıdxtu.

Ni riäjı gun te mos

⁷ Räj pzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? ⁸ Dini gäb si'c. Niluxh säjpnj lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.” ⁹ Dini gudeed xquixtios lo mosga sa'csi rujnni recos ni gunibeeni sa'csi si'c riäjļ gunni. ¹⁰ Sigajcza la'tu, che luux guntu guiraa redzuun ni guniä guntu, riäjļ guiniitu lo Dios: “Najcnu mos ni xhet sajcđi, nani riäjļ jiennu, ni'ttis biennu.”

Basiajc Jesús tzuu bejn ni raļ tiejxhrene

¹¹ Laļ ni sasaj Jesús nez guedx Jerusalén, gudejdni loj región Samaria näjza región Galilee. ¹² Che biu'ni tej reguejdxga, huichagloj Jesús tzuu bejn ni rajc te yälguijdx ni raļ tiejxhrene, niluxh zijtru guzujrene. ¹³ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuii Jesús lojreni, räjpni lojreni:

—Colchäj, te fii rebixhojz abiajctu.

Laļ ni sääreni, bia tiejxhrene. ¹⁵ Dxejc tejreni, che bahuiini abiajčni, gubiguxunni, cabedxa'ni calä'pni xpala'n Dios. ¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te beņzijt, te beņ Samaria. ¹⁷ Dxejcti räjp Jesús lojni:

—¿La et tzuudi najc reni biajc, ä? ¿Con sgaareni? ¹⁸ ¿La rutru gubi'di loä te guiliä'preni xpala'n Dios, xtebtis beņzijt, ä?

¹⁹ Dxejc räjp Jesús loj bejnre:

—iHuisulii, huij! Abiajclu sa'csi huililajzlu.

Xho guidzujņ xcälrnibee Dios

(Mt. 24:23-28, 36-41)

²⁰ Dxejc, sa'csi agunabdiidx refarisee loj Jesús guc guidzujņ xcälrnibee Dios, badzu'ni diidxre, räjpni lojreni:

—Di xcälrnibee Dios guidzujņ con seen ni sajc fiitu. ²¹ Diza bejn naa: “Bahuii, aniree”, o “Anirec”, sa'csi abidzujņ xcälrnibee Dios lojtu.

²² Dxejc räjp Jesús lo rexpejnpacni:

—Sidzujņ dxej rļajzgatü fiitu te dxej sa' ni chu che jädśac Xi'n Dios ni gujc Niguii, luxh ditü fiini. ²³ Luxh siniireni lojtu: “Aniree”, o “Anirec”, per na'c chäätü, na'cza chanajltu reni rihuii. ²⁴ Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jälä narä, Xi'n Dios ni gujc Niguii, che gaļ dxej guibi'ä. ²⁵ Luxh ganiddoo sidedä trabajwduxh, sa'csi sibälaz reben guedxliuj ni tre' naj narä. ²⁶ Si'cni gujc neņ redxej cheni gubajņ toNoé, si'cza gac neņ redxej che jälä narä, Xi'n

Dios ni gujc Niguii. ²⁷ Nen redxej ni gubajñ toNoé gudajwreni, gu'reni, bachnaareni, badeedzareni xindxa'preni guchnaa bejn, bidzujñli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis. ²⁸ Sigajcza gujc neñ redxej ni gubajñ toLo't: gudajwreni, gu'reni, gusiireni, bato'reni, gule'creni binij, bencheezareni rolijzreni. ²⁹ Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni. ³⁰ Sigajcza gac neñ redxej cheni jialä narä, Xi'n Dios ni gujc Niguii.

³¹ 'Dxejga, palga yu' chu niä'p yejc yu', diru gal'di jiajtni te chalääni rehxixtenni ni yuchee neñ yu'; palga yu' chu suga' nezjiät, di gal'diruni guibi'ni rolijzni. ³² Colgusnaj lajztu xhi gujc chää'l toLo't. ³³ Ni rlaiz ga'p xcäl'nabajñni lo guedxliujre, sunijtnini, nani gunijt xcäl'nabajñni lo guedxliujre xcuent rextidä, xcäl'nabajñni rajpni xhaguibaa.

³⁴ 'Rniä lojtu, guxhiñga ni jialä lo tio'p reni naga' lo te da', chää tejni, steeni jia'n. ³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

18

Xcuent te gunabiuud con te juejz

¹ Bijza Jesús te cuent ni ruluu lojreni, te guisieedreni xho ri-ajl cuedx-guiniabreni lo Dios lacuaa gac-huin lajzreni, ² räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. ³ Lagajc guejdxga guyu' te gunabiuud. Guixeguxee rijni lo juejz, rniabni lojni gunni yäl'guxhtis lo bejn ni rdxe'ch lojni. ⁴ Balti dxej naadt juejzga gun yäl'guxhtisga. Dxejcti bejñni xhigab, naani: “Mase dina guidxebä Dios, dizana jiuä rebejn, ⁵ sa'csi gunabiuudre sanuutisni siäädni loä, abasiedliini narä, gunälis yäl'guxhtis xten gunaaga, te di chanuutis riädgusieedni narä.”

⁶ Dxejc räjp Jesús lojreni:

—Riejn diajgtu xtidx juejzguijdxga, ⁷ Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxejyää'l? Di gaclaa gunni yäl'guxhtis xcuent reni aguleni. ⁸ Ni'cni rniä lojtu, sungajcni yäl'guxhtis par laareni. Luxh che guibi'

Xi'n Dios ni gujc Niguui, ¿la sidxälni bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni ruluii loj rebejn ni rluisi najc beñsa'c, ni rchalo xhet sajcdi resabejnreni. Räjpnj:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega la_l ni canabni lo Dios, räjpnj: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc beñdoj_l, dizana gacä si'c najc bejnre ni rusquijx impuest. ¹² Rucua'nä tio'p huält nen_{te} te xmaan, luxh rudedä te tzuu lo te beex loj guiraa ni runä gaan.” ¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälñaatisni lastooni, caniini lo Dios, räjpnj: “Dad, Dios, ¡balaslajz narä, nacä te beñdoj_l!” ¹⁴ Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextoj_lni, niluxh di Dios nudzucaj rextoj_l beñ farisee. Sa'csi guiraa rebejn ni rlajz guiliä'p lagajc xpala'nni, susanxtiujy Diosreni, dxejc reni di rlajz guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbäz

(Mt. 19:13-15; Mr. 10:13-16)

¹⁵ Yu'reni siädnä rexpiauxbäzreni loj Jesús te guzujni ñaani yejcreni. Che bahuii rexpejn_{pacni} si'c, gusloj cadil_{diidxreni} con rebejn te na'c jäädnäreni rebiuxe'. ¹⁶ Dxejc gurejdx Jesúsreni, räjpnj lojreni:

—Colgusaan jääd rebiuxe' loä, na'c gudxo_{jntureni}, sa'csi xcäl_{rnibee} Dios najc xten reni najc nadolajz si'c rebiuxbäze're. ¹⁷ Rniliäpac lojtu, chutis ni rlajz jiu' lo xcäl_{rnibee} Dios nanab gusobdiajg_{reni} xtidx Dios si'c rusobdiajg rebiuxe' xtidx xta-dreni. Palga dini gun si'c, dini jiu' lo xcäl_{rnibee} Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpnj:

—Dad, mastrsa'c, ¿xhini'c nanab gunä te xca'ä yäl _{nabaj_n} par tejpas?

¹⁹ Dxejc räjpnj Jesús lojni:

—¿Xhicuent rniilu narä: “Mastrsa'c”? Rutru najcdi beñsa'c, xtebtis Dios. ²⁰ Anajnl_u xho najc remandamient ni caj lo xleii Moisés: “Na'c guesnäjl_u gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xta_dlu, xnanlu, bahuiizarenj.”

²¹ Dxejc räjpnj bi'nga lojni:

—Guiraa remandamientre rusobä cheni gucäli biuux.

²² Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rehxixtenlu, gudisni loj rebejn ni xhet rajpdi dxejc sajplu xcäl'nasa'clu xhaguibaa. Dxejc gudanajl narä.

²³ Che biejn diajg bi'nga rediidxre, guc-huinuxh lajzni, sa'csi najcni te bejn ni rapduxh. ²⁴ Dxejc rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcäl'rnibee Dios. ²⁵ Guyasiru ted te cameii ni' te guux lo ni jiu' rebenrajp lo xcäl'rnibee Dios.

²⁶ Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

²⁷ Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxejc räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

²⁹ Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajjni, rebejtzni, chääl'ni, xi'nni xcuent xcäl'rnibee Dios, ³⁰ sica'ni xhiroobru lo guedxliujre, luxh sica'ni yäl'nabajn par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹ Gurejdx Jesús rexpejn'pacni te laad, te räjpni lojreni:

—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii. ³² Sutedrenini ladz'naa rebenzijt, suxhiznäjrenini, susacsírenini, sutiobxhejnlireni lojni, ³³ luxh che luux quiinrenini, dxejc sugu'trenini, luxh ni riojn dxej sibansacni loj reben'gut.

³⁴ Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gachebereni.

Rusiajc Jesús te beñ lotiä'p

(Mt. 20:29-34; Mr. 10:46-52)

³⁵ Cheni sadzujn Jesús te guejdx ni laa Jericó, sobga' te beñ lotiä'p ro' nezyuj, canabni gojn. ³⁶ Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc. ³⁷ Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—¡Jesús, xi'n toDavid, balaslajz narä!

³⁹ Rebejn ni nijd lojreni gudil'näjreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jiädnäreni bejn_{ga} lojni. Che bidzuj_{ni} lojni, gunabdiidx Jesús lojni, räjpni:

⁴¹ —¿Xhini'c rlajzlu gunnä_ä luj?

Badzu' be_n lotiä'pga diidxre, räjpni:

—Dad, rlazä jien_n löä.

⁴² Dxejc räjp Jesús lojni:

—¡Sujien_n balojlu! Abiajclu sa'csi huililajzlu.

⁴³ Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn_n ni bahuii xhi guzajcni, gulä'pzareni xpala'n Dios.

19

Huij Jesús rolijz te bejn ni laa Zaqueo

¹ Dxejc biu' Jesús guedx Jericó, sadejdzani guejdxga. ² Ro'c rbäjz te be_nrapduxh, ni laa Zaqueo, ni rnibee lo reni rusquiix xcuent impuest. ³ Rlajz Zaqueo fiini loj Jesús te gumbeenini, per digacdi fiini lojni sa'csi najcni te be_nxhate', luxh xhidajl bejn_n siädsaj guideb gabi Jesús. ⁴ Ni'c baxun_{ni} gunijdni lojreni, huä'pni lo te yajgro ni suga' gajxh nez cadro ted Jesús te si'c saj_c fiini loj Jesús. ⁵ Che gudejd Jesús nejzga, guläsni lojni jiaa, bahuiini cadro sobga' bejn_{re}. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

⁶ Dxejcti biätguxun_n Zaqueo lo yajgga, rbalazduxhni huinäni Jesús rolijzni. ⁷ Che bahuii guiraa rebejn_n xhi gujc, gusloj camojmreni, direni jiulajz, räjpreni:

—Jesús sajia'n rolijz te be_ndojl.

⁸ Dxejcti huisulii Zaqueo, räjpni loj Jesús:

—Bahuiilaare, Dad, gala' xhixtenä gudedä loj reben_nproob; luxh palga yu' chu loj cua'ä xhixtenni con yäl_nrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojllu näjza xtoj_n reni rbäjz rolijzlu, sa'csi guliipac najclu te xagdo_n toAbram. ¹⁰ Pues Xi'n Dios ni gujc Niguüi biädtiil rebendoj_n te guslaani rebejn_{ga} ni gunij_n nen dojl.

Xcuent tzuu meel

¹¹ La_n ni cagucuadiajgreni xtidx Jesús, bijzani te cuent ni ruluii, sa'csi asiäddzuj_ngajxh_nreni guedx Jerusalén, luxh laareni rujnreni xhigab sisloj guinibee Jesús si'ctisni guidzuj_nni guejdxga. ¹² Dxejc räjpni lojreni:

—Guyu' te bejn, be_nrajpni, huijni te guejdx zijtro te gacni rei_n, dxejc guibisacni. ¹³ Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Coluj_n dzuun con meelre che guibisacäli.”

Sä'tini. ¹⁴ Per reben lajdxni dipacreni guichaglajz bejnga, ni'c baxhalreni gaii bejn te saye'tzreni: "Di rlaizdinu gacni xreinu." ¹⁵ Luxh empac gujcnı reii, dxejc gubisacni lajdxni. Che bidzujnı gurejdxni rexmosni ni badeedni meel cua'reni, te gacbeeni lac bejn tejpgareni gaan. ¹⁶ Ni bidzujnı ganid räjpni lojni: "Dad, xmeellu bejn gaan stzuu meel." ¹⁷ Dxejc räjp reii lojni: "Hueenca, luj najclu te mossac, sa'csi laaca bejnlu dzuun lo te dzunbáz, naj sunidxä guinibeelu loj tzuu guejdx." ¹⁸ Bidzujnı stee mos lojni, räjpni: "Dad, xmeellu bejn gaan gaii meel." ¹⁹ Dxejcti räjpni lojni: "Luj guinibeelu loj gaii guejdx." ²⁰ Bidzujnti stee mos lojni, räjpni: "Dad, aree xmeellu, guluchedzu'tzáni neñ te baıı ²¹ sa'csi bidxebä guejblu, sa'csi najc guejblu te beñ nadiplajz, rutojp guejblu cadro di guejblu nuzuj, luxh rliäs guejblu cose'ch cadro di guejblu nibe'c." ²² Dxejcti räjp reii lojni: "ıMosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, ²³ çxhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?" ²⁴ Dxejc räjpni loj reni suga' ro'c: "Colgudzucaj meelga lojni, colgudeedni loj ni rajp tzuu meel." ²⁵ Laareni räjpreni: "Dad, per laani arajpni tzuu meel." ²⁶ Dxejc badzu' reii diidxre lojreni, räjpni: "Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbáz ni rajpreni. ²⁷ Luxh xcuent reni rdxe'ch loä, ni di rlaiz niacä reii lojreni, coltanäreni ree, colgugu'treni nez loä."

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén. ²⁹ Che asadzungajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejnıpacni, ³⁰ räjpni lojreni:

—Colchäj lo guejdx' ni suga' lad rec. Che guidzujntu, guidxältu caduu te bur huiñ ni gajd bejn cuib. Colguxhecni, coltanäni ree. ³¹ Palga yu' chu guiniabdiidx lojtu: "çXhicuent caguxhectuni?" colye'tz lojni: "Dad caquiinnini."

³² Sä'ti rexpejnıpacni nani baxhalni, bidxälreni manga sigajctisni räjp Jesús. ³³ Cheni caguxhecreni bure'ga, rexpaxhuaan bure'ga räjp lojreni:

—çXhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtznı, te gubijb Jesúsni. ³⁶ Guideb cadro gudejd Jesús gudixhreni xhajbreni lo nezyuj cadro tedni. ³⁷ Cheni ameer

guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnñi. ³⁸ Räjpreni:

Chicbaa rei ni siääd xcuent Xtadnu Dios te guinibeeni loonu. Sucuedxilajz guiraa reni yu' guibaa, chä'p xpala'n Dios xh-
aguibaali.

³⁹ Dxejc gaii refarisee ni suga' galäii rebejn, räjpreni loj Jesús: —Mastr, gudidxa' lo rebejn ni siädñajllu te na'cru guiniireni si'c.

⁴⁰ Dxejc Jesús räjpre lojreni:

—Rniliä lojtu, palga redee gusäu ro'reni, sibedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga, ⁴² räjpreni:

—¡Maläii gacheelu, masque neñ redxejre, xhini'c sajc gu-niidx yälrbexilajz lojlu! Per naj naga'tzni, luxh digacdi fiilu lojni. ⁴³ Sidzujñ dxejga lojlu, cheni jääd reni rdxe'ch lojlu sujñreni si'c te guralyuj guideb gabilu, nez lojlu sigajc nez dejtzu sisiujreni. ⁴⁴ Susäl'ta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuilu.

Rusia Jesús neñ guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús neñ guidoro, guslojni cabääni rebejn ni caguto' näjza reni casii. ⁴⁶ Dxejc räjpreni lojreni:

—Loj rexquijtz Dios caj rediidxre: “Rolizä sajc te yu' cadre jädnabtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguluii Jesús neñ guidoro, luxh reni rnibee loj rebixhojz näjza rebejn ni ruluii leii, näjza re-bengool xte guejdxga caguuilreni mood te ju'trenini, ⁴⁸ luxh direni nidxäj l xho niujñrenini sa'csi guiraa rebejn cacuadi-gdzu'tzreni xtiidxni.

20

Xcälrnibee Jesús

(Mt. 21:23-27; Mr. 11:27-33)

¹ Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojñreni, che bidzujñ reni rnibee loj rebixhojz näjza rebejn ni ruluii leii näjza re-bengool, ² räjpreni lojni:

—¿Xhi yälrnibee rujñlu recosre? ¿Chu baniidx yälrnibee ga lojlu?

³ Dxejcti räjpre Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, ⁴ ¿chuni'c baxhal Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” ⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

⁸ Dxejc räjp Jesús lojreni:

—Dizana guiniä xhi yälrnibee rapä te runä recosre.

Xcuent remosguijdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c.

¹⁰ Che bidzujn dxej ni guidojp cose'ch, baxhalni te xmosni sanab cose'ch ni riäj xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. ¹¹ Dxejcti baxhalni stee mos lojreni. Dxejc sigajcza gudiñäjrenini, gudijnrenini, luxh xhetza badeeddireni lojni, ganaxni gubi'ni lo xlamni. ¹² Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³ Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” ¹⁴ Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu.” ¹⁵ Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guijdxre, ä?

¹⁶ Sidzujn, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

¹⁷ Bahuii Jesús lojreni, dxejc räjpni:

—¿Xhixhni'c caj lo guiitz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu', ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcni siujpacni, li däj gacni.

*Xcuent reimpuest**(Mt. 21:45-46; 22:15-22; Mr. 12:12-17)*

¹⁹ Reni rnibee loj rebixhojz, nájza reni ruluu leii rlaizreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰ Dxejc cagula'tztisrenini, baxhalreni gatii bejn te gunsireni si'c ni najcreni bendxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälğuxhtis, yälrnibee xte gubernadoor. ²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluu guejblu, luxh di guejblu fixгаа la yu' chu najc bejn, ruluusa'c guejblu xnez lo Dios. ²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälğunabdiidxga, dxejc räjpni lojreni:

—¿Xhicuent runnäjtu narä scree? ²⁴ Baluu loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelajtisreni lo rextiidxni, biäuti ro'reni, guzudxireni.

*Rniabdiidxreni xcuent yälrbansac lo rebengut**(Mt. 22:23-33; Mr. 12:18-27)*

²⁷ Dxejc huij gatii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, ²⁸ räjpreni:

—Dad, Mastr, basa'n Moisés guiitz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.”

²⁹ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. ³⁰ Dxejcti cua' ni rojpga gunaaga. Che gujtni, rutiza xi'nni. ³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti näj gunaaga gujt. ³³ Guigajdzreni guläsnäjreni gunaare, ni'cni, che guibansacreni lo rebengut, ¿chu chäälgacni, ä?

³⁴ Dxejc räjp Jesús lojreni:

—Lo guedxliujre ruchnaa rebejn, rudeedzarenii xindxa'preni ruchnaa. ³⁵ Niluxh rebejn ni agule Dios te chääreni xhaguibaa, nájza te guibansacreni loj rebengut,

di reni'c guch_naa, dizareni gudeed xindxa'preni guch_naa,
³⁶ sa'csi diru gac guetreni, anajcreni si'c najc rexangl
 Dios. Laareni najc xi'n Dios sa'csi abaspa_nsac Diosreni.
³⁷ Moisésli basule' xcuent ni rba_nsac rebe_n loj rebe_ngut che
 bacuaani diidx xcuent yajg ni gurebajl. Ro'c gurejdxni Dios
 räjpni: “Xtios Abram, Xtios Isaac, näjza Xtios Jacob”, ni'cni
 nabaj_npacreni lo Dios. ³⁸ Sa'csi di Dios gac Xtios rebe_ngut;
 najcni Xtios rebej_n ni nabaj_n par tejpas, sa'csi par laani
 guiraa rebej_n nabaj_n.

³⁹ Dxejc gaii reni ruluii leii badzu'reni diidxre, räjpreni lojni:
 —Mastr, laaca guniilu.

⁴⁰ Sa'csi dirureni niajx niniabdiidxruren lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood rniireni Crist najc xi'n toDavid, ä? ⁴² Ni lagajc
 toDavid bacuaa lo reguijtz ni laa reSalmo:

Dad Dios räjp lo Xtadä:

⁴³ “Gurej xladbeä cheni guidzuj_nli dxej ni gudzugä guiraa ni
 rdxe'ch lojlu te gacheereni luj rnibeelu guira'ti.”

⁴⁴ ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebej_n cagucuadiajg che räjp Jesús loj rex-
 pej_npacni:

⁴⁶ —Co_lyajp cuidaad reni ruluii leii, sa'csi rdxag_lajzreni
 rajcwreni lajd siool, r_lajzreni saru guinii guiraa rebej_n
 “xchan” lojreni, r_lajzreni jiu bej_nreni nez loguii, r_lajzreni
 cuereni lo reyagxhilsa'c ne_n reguidobäz, näjza cadre rajc
 lanij. ⁴⁷ Rudzucajzaren rehxixten regunabiuud, dxejc ro_lreni
 rele' siolduxh che rniabreni lo Dios te fii rebej_n, te naa bej_n
 najcreni be_ndxan, luxh lojreni suxha_l Dios te castigwroru.

21

Gojn xten te gunabiuud

(Mr. 12:41-44)

¹ Ne_n guidoro bahuii Jesús cagusä_l rebe_nrajp gojn ne_n te
 gui_n cadre rdojp gojn. ² Bahuiizani lo te gunabiuud, lacti
 proobni. Basä_lni xcojnni ne_n gui_nnga, tio'ptis melbäz basä_lni.

³ Dxejc räjp Jesús:

—Rniliäpac lojtu, gunabiuud proobga basä_lr_uni loj guiraa
 reni casä_l gojn, ⁴ sa'csi guiraa redec ni cagusä_l xcojnni
 casä_lreni tudxe'nsi xmeelreni, niluxh gunaare loj xcä_lproobni,
 basä_lni guiragajc ni rajpni te jio' xhi gauni.

*Räjp Jesús sibijl guidoro**(Mt. 24:1-2; Mr. 13:1-2)*⁵ Yu' reni cayujy diidx xcuent guidoro, räjpreni:

—Lacti sacruduxh rienn̄i sa'csi guisa'c naccheeni, suchenäjzani xhidajl recossa'c ni badeed bejn̄ si'c gojn̄.

Dxejc gunii Jesús lojreni, räjpni:

⁶ —Sidzujn̄ dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.*Reseen ni chu che nitloj guedxliuj**(Mt. 24:3-28; Mr. 13:3-23)*⁷ Dxejc gunabdiidx rexpejn̄pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesús lojreni:—¡Col̄susin̄ te na'c gusgueer̄eni la'tu! Sa'csi xhidajl reni jiäd̄d sinii: “Narä nacä Crist”, o “Asiädgajxh redxej che jiäd̄dni”, per na'c chalilajztu xtiidxreni, na'cza chanajltureni. ⁹ Luxh che jiejn̄ diajgtu cayajc guer̄ cadil̄näj sa' bejn̄, na'c guidxejbtu, sa'csi ganid recosga gac, luxh gad gal̄di nitloj guedxliuj.¹⁰ Dxejc sanuu cayäjpni lojreni:—Säjs te nación, sucuanäj stee nación, näjza te ladx bejn̄ sucuanäj stee lajdx bejn̄. ¹¹ Sajcza xuro, su' gubijn̄, su'za yäl̄gujdx nez ree nez rec. Luxh xhaguibaali sien̄ guiraloj ni ruchejb näjza seenro.¹² 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susäl̄zaren̄i la'tu neñ̄ latzguiib, sinäzaren̄i la'tu nez loj̄ reii näjza gubernadoor sa'csi rinälajztu xtidxä. ¹³ Luxh guiraa dee sajctu te gac gusule'tu xtidxä lojreni. ¹⁴ Na'c gunxgaatu xhigab neñ̄ lastootu xhini'c guiniitu lojreni, ¹⁵ sa'csi narä sunidxä diidx guiniitu, sunidxäza yäl̄najn̄ lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶ Näjza rex cuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷ Guiraa rebejn̄ guedxliuj sibälaz la'tu sa'csi rinälajztu xtidxä. ¹⁸ Niluxh ni'cla tej xquidxejctu di nitloj. ¹⁹ Luxh palga sutijptis lajztu, sajptu yäl̄nabajn̄ par tejpas.²⁰ 'Che fiitu tre' xhidajl soldaad guideb gabi guedx Jerusalén colyabee abidzujn̄ dxej ni guibijl̄ni. ²¹ Dxejc reni yu' guedx Judea, nanab guxun̄reni chacuatzlojreni neñ̄ redajn̄; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²² sa'csi neñ̄ redxejga sujn̄ Dios fis lo guejdxga te soob rediidx ni caj lo reguijtz xten Dios. ²³ Probe'za regunaa ni nuu báz neñ̄ redxejga, näjza regunaa ni ca' báz, sa'csi su' yäl̄huinduxh lo guedxliuj, näjza fis ni gun Dios loj rebejn̄ga. ²⁴ Yu'reni guet lo guer̄, yu'zaren̄i chää pres,

sijreni balti guedxzijt. Dxejc rebenzjijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

Cheni jiääd Xi'n Niguii

(Mt. 24:29-35, 42-44; Mr. 13:24-37)

²⁵ Räjzani:

—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, säsduxh nis ni räjs lo nisdoo. ²⁶ Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs. ²⁷ Dxejcti suhuiireni lo Xi'n Dios ni gujc Niguii, siäädni lo te za guideb xcälrnibeeni, näjza yälrdimbichaduxh. ²⁸ Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

²⁹ Guniizani stee cuent lojreni, räjpni:

—iColhuiu lo yagiigw näjza lo guiraa reyajg! ³⁰ Che fitu acabääni be'n, colyacbee lagajc la'tu, abidzungajxh bäii nis-guij. ³¹ Sigajcza che fitu agusloj cayajc recosre, colyacbee asiäddzujn xcälrnibee Dios.

³² Rniliäpac lojtu, guiraa recosre sajc ansde guet rebejn ni yu' naj. ³³ Guibaa näjza guedxliuj sinitloj, rextidxä dini nitloj.

³⁴ iColsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujn dxejga. ³⁵ Sa'csi si'c sidzujn dxejga loj guiraa reben guedxliuj. ³⁶ Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

³⁷ Rdxee ruluii Jesús nen guidoro dxejc guxhijn sajia'nni yejc dan Oliib. ³⁸ Rsilru ristie rebejn te rdzujnreni lo Jesús nen guidoro casob rsil, te gucuadiajgreni rextiidxni.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Siäddzungajxh dxe lanij che rajwreni yätxtiil ni di säguij, laaza lanijga pascw. ² Dxejc reni rnibee loj rebixhojz näjza rebejn ni ruluii leii caguuilreni xho gunreni te ju'treni Jesús, sa'csi rdxebreni rebenguejdx.

³ Dxejc biu' bendxab lastoo Judas ni laaza Iscariote, ni najc tej retzubitio'p xpejnpacni. ⁴ Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladznaareni. ⁵ Dxejc bibalajzreni, bia'nreni diidx gudeedreni meel lojni. ⁶ Cuäbjti

Judas, dxejcnı guslojni caguiilni xho gunni gutedni Jesús ladz̄naareni che rut bejn̄di suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzuj̄n dxe lanij che rajwreni yätxtiil ni di säguıj, che rugu'tzareni te xiil si'c ni caj lo xleii toMoisés. ⁸ Dxejc baxhał Jesús Pedr nájza Juan, räjpnı lojreni:

—Colchayejn xchej xten pascw te guidaununi.

⁹ Dxejc laareni gunabdiidxreni lojni, räjpnı:

—¿Caro rlajzlu choyennuni?

¹⁰ Räjpnı Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlnı, coljiu' rolijz bejn̄ cadre jiu'ni laani. ¹¹ Dxejc colye'tz lo bejn̄ ni najc rolijzni ro'c: “Si'c naj Dad Mastr: ¿Con yu' cadre sajc gauxchenää rexpənä naj pascw?” ¹² Dxejc guluiini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn xhi guidaunu.

¹³ Sä'tireni. Si'ctis ni räjpnı Jesús lojreni, si'cpac bidxälreni. Dxejc bejn̄reni xchej xte lanij pascw gaureni.

¹⁴ Che bidzuj̄n or, gurenäj Jesús rexpelj̄pacni lo mex.

¹⁵ Dxejc räjpnı lojreni:

—Guyuduxhä gaan gaunääpactu xchej xten pascw ansde tedä trabajwduxh. ¹⁶ Sa'csi rniä lojtu, diruna gaunää la'tu pascw cheni guidzuj̄nli dxej ni gacni lo xcäl̄rnıbee Dios.

¹⁷ Dxejc cua'ni te co'p, badeedni xquixtios lo Dios, räjpnı:

—Colyá' dee, colgudeedni lo sa'tu. ¹⁸ Sa'csi rniä lojtu, diruna yä'ä nis ni rii yejc uub stehuält cheni guidzuj̄nli xcäl̄rnıbee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpnı:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx gudajwreni, räjpnı lojreni:

—Ni yu' nen̄ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn̄ ni aguleni.

²¹ Per bahuilaare, bejn̄ ni guto' narä sobganäj narä lo mexre. ²² Guliipacni, Xi'n Dios ni gujc Niguii sinuu tedni loj nezyuj ni abaluii Dios lojni. Luxh proobza bejn̄ ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guıbee gac beñro lojreni.

²⁵ Dxejcti räjpnı Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rnii lacti hueen najc rereiga. ²⁶ Per la'tu na'c gactu si'c. Nani najc bengoolru lojtu, ni'c riäjł gacni si'c najc ni huinru lojtu. Luxh nani rnibee riäjł gacni si'c mos. ²⁷ ¿Chuni'c saj cru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ La'tu najctu ni gusunäj narä guideb ni gudedä retrabajw ni gudedä. ²⁹ Ni'cni narä runidxä yälrnibee lojtu sigajc ni baniidx xtad yälrnibee loä, ³⁰ te gautu, yätu lo xmexä xhaguibaa, te cuezatu lo yagxhil cadre guntu yälğuxhtis loj rexpejn guitzubitio'p rexagdo Israel.

Räpxgaa Jesús di Pedr guicäj p numbeeni
(Mt. 26:31-35; Mr. 14:27-31; Jn. 13:36-38)

³¹ Räj p Jesús loj Simón:

—Simón, Simón, agunab bejdxab ni laa Satanás luj te gusiibni luj si'c rusniib bejn xob te jiani. ³² Narä agunabä lo Dios xcuentlu te na'c jiäädxcälrililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räj p Simón lojni:

—Dad, narä sirinalälu; mase gusäureni luj latzguiib, näjza narä siäunäälü; mase ju'treni luj, näjza narä setnäälü.

³⁴ Dxejcti räj p Jesús loj Simón:

—Pedr, rniä lojlu, nicla gajd guidgail cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räj pni:

—Che ganaxtu baxhalä la'tu, xhet bolsdi sanätu, nicla carterdi, niclaza stee gura'chdi, ¿la yu' xhi biquiintu, xhi biäädxc lojtu, ä?

Dxejc räj pni:

—Xheti.

³⁶ Dxejc räj pni lojreni:

—Luxh naj rniä lojtu, ni rajp bols, suchanänini; sigajcza carter. Luxh ni di ga'p espad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räj pni lojni:

—Dad, aree tio'p espad.

Dxejc räj pni lojreni:

—Sajl reni'c.

*Rbedx-rniab Jesús loj Dios**(Mt. 26:36-46; Mr. 14:32-42)*

³⁹ Dxejcti birii Jesús, si'cni rujnpacni, sääni nez dajn ni laa Olib. Dxejc sanajl rexpejn̄pacni. ⁴⁰ Che bidzuj̄nreni ro'c, räjpni lojreni:

—Colcuedx, colnab lo Dios te na'c jiajbtu lo dojl̄.

⁴¹ Dxejc gubicaj Jesús lojreni, huijni te lajt zite' cadro suga'reni, si'cti cadro rdzuj̄n te guij che rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlaizlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlaizlu gunlu.

⁴³ Dxejc biricaj te xangl Dios lojni te badeedni yälrutiplajzni.

⁴⁴ Lał̄ni cadejdni trabajwduxh, cayac-huinduxh lajzni, cabedx-canabrui lo Dios. Guzunisl̄ini gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadro suga' rexpejn̄pacni. Ro'c bidxäl̄nireni nagayejs guiraareni sa'csi cayac-huin lajzreni. ⁴⁶ Dxejc räjpni lojreni:

—¿Xhicuent nagajejstu? ¡Colchastie! ¡Colnab lo Dios te na'c jiajbtu lo dojl̄!

*Che gunaazreni Jesús**(Mt. 26:47-56; Mr. 14:43-50; Jn. 18:2-11)*

⁴⁷ Lał̄ ni canii Jesús lojreni, bidzuj̄n xhidajl bejn. Tej rexpejn̄pacni ni laa Judas, nijdni nez loj rebejn̄ga. Dxejcti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yäl̄ruchagro' ruteedlu Xi'n Dios ni gujc Niguui ladz̄naa rebejn̄re, ä?

⁴⁹ Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn̄ Jesús gudil̄näj te mos xten ni rnibee loj rebixhojz, batiu'ni diajgni ladbee. ⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. ⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebeñgool, guiraa reni siädxiinini, räjpni:

—¿La siädñātu spaad näjza garo't, astoocanu siädxiitu te gubaan, ä? ⁵³ Cheni suga'a lojtu guixe-guixee nen̄ guidoo, ditu nuhual̄ narä. Per dee najc xortu, luxh arnibee yäl̄nacäj la'tu.

*Di Pedr guicäjp numbeeni Jesús**(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädñäl̄ Pedrni zit-zijt. ⁵⁵ Che

bidzujnreni gule'creni guiboo galäi lole' xten bixhojzga, gure-
reni guideb gabi, te bidxa' lajzreni. Näj Pedr nadxaag lojreni
gurej ro'c. ⁵⁶ Dxejc te gunaa ni rujn dzuun ro'c, che bahuiini
sobga' Pedr ro'c, rdxelajtisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpejnni.

Per Pedr räjp lojni:

—Gurniälojlu, Dad, dina gacä xpejnni.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te
ben Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgäi, ⁶¹ luxh
gubiréza Jesús, bahuidzu'tzni lo Pedr, dxejc banalajz Pedr
nani gunii Jesús lojni, räjpni: “Che gajd guidgäi cuedxa',
abazuni'lu choñ huält, räjpļu dilu gumbee najrä.” ⁶² Dxejcti
guc-huin lajz Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj caguxhisnäjrenini, caguijn-
zarenini. ⁶⁴ Dxejc basäureni lojni, gudajpreni lojni, räjpreni
lojni:

—iGunii chuni'c gudijnlu!

⁶⁵ Luxh guiraloj cayäjbreni lojni, caniyaduxhrenini.

Bidzunäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni
rnibee loj rebixhojz, näjza rebejn ni ruluii leii, huinäreni Jesús
te suuni nez lojreni nen yu' cadro rujnreni yälguxhtis. Dxejcti
räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te
yälgunabdiidx lojtu xcuent Crist, ditu gudzu' diidxga loä. ⁶⁹ Per
najli sibej Xi'n Dios ni gujc Niguii xladbee Gueb Dios ni yu'
xhaguibaa.

⁷⁰ Dxejc gunabdiidx guiraareni lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rļajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huināreni Jesús nez loj Pila't. ² Ro'c guslojreni cabe'creni xquejni, rājpreni:

—Bidxālhu bejnre cayujnni bieju lo rexpejn̄nu. Rājpzani xhet nanabdi quixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, rājpreni:

—¿La luj ni najc reii xten rexpejn̄ Israel, ä?

Sas badzu' Jesús diidxre rājpreni:

—Najcni lagajc si'c ni guniilu.

⁴ Dxejc rājpreni Pila't loj reni rnibee loj rebixhojz nājza loj guiraa rebejn̄:

—Dina guidxälā nicla tej dojl̄ xten bejn̄re.

⁵ Niluxh laareni sanuutis caniireni, dipru caniireni, rājpreni:

—Guiraa reben̄ Judea cayu' yārsia' xcuent xcäl̄ruluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siäd bejn̄ga?” ⁷ Cheni rājpreni ro'c siädni, baxhal̄nini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén. ⁸ Che bahuii Herodes loj Jesús, bibalajzni sa'csi agujc xchej rļajzni fini lojni, sa'csi abiejn diagni diidx xcuent ni cayujnni. Luxh rļajzni fini gunni te milaagwr. ⁹ Xhidajl̄ yäl̄gunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz nājza rebejn̄ ni ruluii leii, cabecduxhruireni xquejni. ¹¹ Dxejc gulälaz Herodes nāj rexsoldaadni Jesús, baxhiznājrenini, ni'c bashuajcwrenini te ladsa'c sa' ni rajcw reii, dxejcti baxhal̄sacrenini loj Pila't. ¹² Lagajc dxejga, Pila't nājza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdx Pila't reni rnibee loj bixhojz, nājza reben̄gool ni najc guxhtis, nājza reben̄guejdx. ¹⁴ Dxejc rājpreni lojreni:

—La'tu biädnätu bejnre loä, najtu caguquılni rebejn gunreni bieje, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni. ¹⁵ Niclaza Herodes di nidxäl nicla tej dojl, ni'cni baxhalsacnini loonu, luxh abahuiitu xhet dojldi bejnri te guetni. ¹⁶ Ni'cni quinäni, dxjecti guslääni.

¹⁷ Najc costumbr rusläa Pila't te bejn ni yu' nen latzguiib casob rajc lanijre. ¹⁸ Per guiraareni guredxa'reni si'c tejsi bejn, räjpreni:

—ıBagu't bejnre, basläa Barrabás!

¹⁹ Barrabás najc ni basläreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰ Rlajzpac Pila't gusläani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—ıBacuaani lo cruzj, bacuaani lo cruzj!

²² Riojn gunisac Pila't lojreni, räjpni:

—ıXhi dolduxh bejnri? Xhetlidi dojl rdxälä bejnri te guetni. Ni'cni siguinäni dxejc suslääni.

²³ Luxh laareni sanuutis guredxa'reni, gunabreni xcajni lo cruzj. Luxh sa'csi guredxa'tisreni, bejntireni gaan gujc si'c ni rlazjreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc basläani bejn ni yu' latzguiib sa'csi bejnri bieje, bagu'tzani bejn, dxejc badeedni Jesús lojreni te gunnäjrenini si'ctis ni rlazjreni.

Che cuaj Jesús lo cruzj

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo cruzj, gunaazreni te bejn ni laa Simón ni siäd guedx Cirene; basaj bejnğa lo niaa. Dxejc basguurenini cruzj, siädnajltini dejtz Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejcnu”, säjbzarenini loj relom: “Colgucua'tz nu-urnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenini tio'p beņgujdx xcajzarenini loj recruzj, guetnäjreni Jesús. ³³ Che bidzujnreni te lajt ni laa Calabeer, ro'c bacuaarenini Jesús lo te cruzj, bacuaazarenini guiro'p rebeņgujdxga lo stio'p cruzj, tejni xladbee, steeni xladbäjgwni. ³⁴ Cheni cagucuaa rebejn reni lo cruzj, gunii Jesús, räjpni:

—Xtadä, badzucaj xtoj_l rebejn_{re}, sa'csi direni gan xhini'c cayujn_{reni}.

Dxejc gudzujt resoldaad daad yejc xhajbni, te gudisreni xhajbni cua'renini. ³⁵ Suga' rebejn ro'c cadxelojtisreni. Näjza reguxhtis caguxhisnäjn_{reni} laani, cayäjn_{reni}:

—Balti bejn bas_{la}ani, naj sugus_{la}ani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badee-dreni bin-nii yäni. ³⁷ Dxejc räjp_{reni} lojni:

—Palga gulii najclu rei_i xten rexpejn Israel, bas_{la}aa lagajc luj.

³⁸ Luxh bacuaareni gaii diidx loj te baräjd ni cuaj yejc cruzj. Con didx griegw, con didx lat_{in}, näjza didx hebreo, bacuaareni scree: “Dee najc Reii xten rexpe_n Israel.”

³⁹ Te reben guijdx ni najl lo te cruzj ni caj cuä'ni caniyajni Jesús, räjp_{ni} lojni:

—Palga luj najclu Crist, bas_{la}aa lagajc luj nägajcza nuurnu.

⁴⁰ Per be_nguijdx ni najl lo cruzj stelaadga gudidxa'ni loj stee be_nguijdx ni caniyaj Crist, räjp_{ni}:

—¿La dilu guidxejb Dios? ¿Ni cayajczalu tejsi castiigw! ⁴¹ Per nuurnu cayajcnu castiigw ni riäj_l gacnu te guidiixnu redojl_i ni biennu. Luxh laani xhet dojl_{di} bejn_{ni}.

⁴² Dxejc räjp_{ni} loj Jesús:

—Bazalajzlu narä che guidzujn_{lu} lo xcäl_{rn}ibeelu.

⁴³ Dxejc badzu' Jesús diidxre, räjp_{ni} lojni:

—Rniliäpac lojlu, lagajc nadxej chunäjlu narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäy guideb guedxliuj, si'c bianxcäy si'cti rcachont_i. ⁴⁵ Bicäy lo gubijdx, luxh ladró ni najl nen yudxanro xten guidoro, biräjsni gucni tio'p la'.

⁴⁶ Dxejcti guredxa' Jesús, räjp_{ni}:

—Xtadä, ladz_naalu rutedä xaimä.

Che guniini si'c, gujttini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjp_{ni}:

—Guliipacni, xhet dojl_{di} bejn bejn_{re}.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayääzreni lagajc lastooreni. ⁴⁹ Luxh guiraa reni rumbee Jesús, näjza regunaa ni biädnajl_{ni} che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujnni guira'ti. Siäädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. ⁵¹ Cabäjzza José jiääd yälrnibee xten Dios, ni'cni dini nidxagljaz nani bejn resa'ni. ⁵² Dxejcti huijni lo Pila't, gunabni tiejxh Jesús. ⁵³ Che gulätnini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa. ⁵⁶ Che gubi'reni rolizjreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareniretogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubansac Jesús lo reben_{gut}
(Mt. 28:1-10; Mr. 16:1-8; Jn. 20:1-10)

¹ Dxej ni gusloj xmaanga, rsildooru huiinä regunaaga robaa recuaan ni rlianejxh ni bencheereni. ² Che bidzujnreni, bahuiireni agubicaj guij ni rusäu ro' baa. ³ Dxejc che biu'reni neñ baaga, direni nidxäl tiejxh Jesús. ⁴ La_l ni cadxelojreni, di jieñ xhi gunreni, biricaj tio'p dade' gusuj cuä'reni. Rdimbichaduxh xhajbreni. ⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajn lo reben_{gut}, ä?
⁶ Rutini ree. Agubansacni. Colgusnaj lajztu rediidx ni guniini cheni guyusijcni Galilee, ⁷ che najni lojtu: “Riälj jiajb Xi'n Dios ni gujc Niguii ladz_{naa} reben_{dojl}, xcajzani lo cruzj, dxejc ni riojn dxejga sibansacni loj reben_{gut}.”

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni diidx lo retzubiteeb rexpejn_{pacni} näjza loj rebejn ni yunäjreni. ¹⁰ Reni huisa'n diidx loj rexpejn_{pac} Jesús najc redee: Marii Magdalen, näjza Xuan, näjza Marii xnan Jacob, näjza sga_{ii} gunaa. ¹¹ Niluxh rexpejn_{pacni} bejn xhigab didxnayääl_{ni}, direni nililajz xtidx regunaaga.

¹² Dxejc huisu Pedr, ruxun_{lini} huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolizjni, rdxelojtisni xcuent ni gujc.

Ni guzajc lo nezyuj ni sii guedx Emaús
(Mr. 16:12-13)

¹³ Lagajc dxejga, tio'p rexpejn_{pacni} sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén.

¹⁴ La_l ni sasajreni lo nezyujga, cayujyreni diidx xcuent reni gujc ro'c. ¹⁵ La_l ni caniireni gubig Jesús lojreni, gusloj sasanäjnireni. ¹⁶ Luxh mase cahuiireni lojni, yu' xhi badxojn niembeerenini. ¹⁷ Dxejc gunabdiidx Jesús lojreni, räjpni:

—¿Xhini'c rujytu la_l ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. ²⁰ Näjza xho bejn reni rnibee loj rebixhojz näjza rexcuxhtisnu, bateedrenini ladz_naa reni gunibee guetni, dx-
ejc bacuaarenini lo cruzj. ²¹ Niluxh nuurnu cabääznu laani gacni nani nus_laa rexpejn Israel ladz_naa rebenzajt. Naj agujc choñ dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xteni, ²³ direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut. ²⁴ Dxejcti huihuii gaii sa'nu robaa, bahui-
izarení najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist. ²⁶ ¿La di nungäj_l tedxga Crist retrabajwduxhre dxejcti jiu'ni lo xcälrdimbicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujnreni guejdx cadre sääreni, bejn Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxvej, agojl jiu' guxhijn.

Dxejcti biu' Jesús te jiannäjnireni. ³⁰ Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojp xpejn_{pac} Jesús näjza sgaii bejn. ³⁴ Dxejcti bijreni diidx loj guiro'preni bidzujn, räjpreni:

—Guliipac guban_{sac} Jesucrist, luxh baluilojni loj Simón.

³⁵ Dxejc guiro'p reni bidzujn bijzaren diidx ni gusajcreni lo nezyuj, näj xho biembeezaren Jesús che gula'ni yätxtiil.

Baluiloj Jesús loj rexpejn_{pacni}

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Col_{cuecdxi} lajztu!

³⁷ Per laaren rdxelojreni bidxejbreni, naaren cahuiireni lo te sprit. ³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu?

³⁹ ¡Col_{huui} reñaä, näjza reni'ä! Lagajc naräni. Col_{cajn} narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

⁴⁰ Che guniini rediidxga, baluigajcni reñaani näjza reni'ni.

⁴¹ La_l ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäj_l soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeerreni xhi säloj rediidx ni caj lo rexquijtz Dios xcuentni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guiban_{sacni} loj rebengut. ⁴⁷ Sire'chza diidx xcuent xho ruš_{laa} Crist rebejn neñ dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhalä Sprit Dxan xten Dios lojtu, ni'c col_{jia'n} guedx Jerusalén cheni jääd_{lajz}lini neñ lastootu, guniidxni yäl_{rnibee} ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huiñä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejcreni. ⁵¹ Lal ni cayujnni si'c, gubicajni lojreni, huäjsni xhaguibaa. ⁵² Peta laareni gulujx gojnrenini, dxejc cabalazduhxreni gubi'reni guedx Jerusalén. ⁵³ Ro'c guixe-guixee guyu'reni nen guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguii

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gaccheeli guedxliuj, yunäjni Dios. ³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojp yäl_nabaj_n. Yäl_nabaj_nga najc bianij xten rebejn. ⁵ Luxh bianijga rdimbicha' nez lo yäl_cäy_j, niluxh yäl_cäy_jga di niajcdi nusuiinini.

⁶ Guyu' te niguii birilaj Juan, ni baxha_l Dios. ⁷ Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusanij lastoo guiraa rebejn, luxh naj abiädni lo guedxliujre.

¹⁰ Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni najcni. ¹¹ Biädni loj rexpen Israel, niluxh rexpejn_n di-reni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl_rnibee gacreni xi'n Dios. ¹³ Laa reni'c ni di gac si'c xi'n ben guedxliuj, ni gojl sa'csi r_lajz te biniet chu xi'nni, dee najcpacreni Xi'n Dios sa'csi sudeedni yäl_nabaj_n par tejpas lojreni.

¹⁴ Diidxga gujc te ben guedxliuj. Guläjzni lo guedxliujre, bahuilojzanu xcäl_rdimbicha'ni, si'c yäl_rdimbicha' xten xingan xteb xtadni, laani najcpacni nani sanälajz nuurnu, nani rni didxlii loonu. ¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabaj_nni loä.

¹⁶ Sa'csi guiraanu cua'nu xcäl_nasacduxhni, yäl_rracnä_j detz yäl_rracnä_j. ¹⁷ Leii xten Dios biädniä toMoisés, niluxh yäl_rracnä_j näjza redidxlii biädniä Jesucrist. ¹⁸ Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxha_l rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jääd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabääznu jääd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhaļ nure. ¿Xhi rniilu, chuxhni'c najclu?

²³ Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴ Rebejn ni baxhaļ redee najc reni rniireni “farisee”.

²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jääd niclaza Elías niclaza stee niguii ni rnii xtidx Dios ni cabääznu jääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. ²⁷ Laa dee ni siääd detzä niluxh di nungäjl nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojļ reben guedxliuj. ³⁰ Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajñni.” ³¹ Luxh dina niembeäni, per biädttiobnisä con nis te guluiä lo rexpejn Israel chu najcni.

³² Guniiza Juan stee diidx xcuentni, räjpni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcní. ³³ Dina niembeäni, per nani baxhaļ narä gutiobnisä con nis, laani najni loä: “Cheni filu jäjt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.” ³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejn̄ni. ³⁶ Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

³⁷ Biejn diajg guiro'p rexpejnpac Juan diidxga, dxejc sana-jlreni Jesús. ³⁸ Che gubiré Jesús bahuiini siädnajlreni, dxejc räjpni:

—¿Xhi caguuiltu?

Räjp rebejn̄ga:

—Mastr, ¿caro rbäjzlu?

³⁹ Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxey.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesús. ⁴¹ Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabääznu jiäd.

⁴² Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rlaiz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

⁴⁴ Felipe siäd guedx Betsaida, guedxro ni najcza lajdx Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejn̄ nani bacuaa to Moisés xcuentni lo reguijtz xten leii agujc xchey, nani bazä'tza reniguii ni gunii xtidx Dios, Jesús xi'n José ni siäd Nazare't.

⁴⁶ Räjp Natanael:

—¿La sajc guirii te beñsa'c guedx Nazare't, ä?

Räjp Felipe lojni:

—Gudaa, te fiilu.

⁴⁷ Che bahuii Jesús siäd Natanael nez lojni, räjpni:

—Colhuii te beñ Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen̄ Israel.

⁵⁰ Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililaj-zlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa'ni guyu' guedx Caná xten Galilee

¹ Che gudejd choṇ dxej, guyu' te sa' guedx Caná xten Galilee. Ro'c guyu' xnan Jesús. ² Huija Jesús näjza rexpejṇpacni, sa'csi bidonreni chääreni lo sa'ga. ³ Gubijdz bin. Dxejc räjp xnan Jesús lojni:

—Dirureni ga'p bin.

⁴ Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujṇ.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejṇ Israel te racnayareni te si'c guisa' xleii toMoisés. Neṇ tejga guesguijga ru' si'cti te gayuu litr nis. ⁷ Räjp Jesús loj remos:

—Colguchaj reguesguijre nis.

Dxejcti bachadoo rebejṇgani. ⁸ Dxejcti räjp Jesús lojreni:

—Colca' che'nni ṇaj te colchanäni lo nani cahuii cayajc sa're.

Dxejc huinä remosga che'n bin lojni. ⁹ Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:

—Guiraa rebejṇ rudeedreni binsa'c räxgaa rebejṇ, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre ṇajli.

¹¹ Seenre najc ganiddoo ni gusloj bejn Jesús; bejnnini neṇ guedx Caná xten Galilee. Seenga bazäbdiidx yälṇnibee xtenni luxh ni'cni huililajz rexpejṇpacni xtiidxni.

¹² Che gudejd sa'ga, huijni guedx Capernaum con xnanni, rebejzni näjza rexpejṇpacni. Ro'c bia'nreni tio'p-choṇ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzṇgajxh lanij pascw xten rexpejṇ Israel cheni rnalajzreni guxhijṇ ni gudejd guixhaj xten yälgujt neṇ Egipto, ni'c sää Jesús guedx Jerusalén. ¹⁴ Neṇ guidoro bidxälṇi xhidajl bejṇ nani ruto' gon, xiil, palom näjza reni sobga' caguchaa melzijt. ¹⁵ Dxejc bejnni te chico't con gaii duu, gulääni regon con rexiil neṇ guidoo. Batie'chni xcoobr rebejṇ nani ruchaa melzijt, barexh-xhätni rexmexreni. ¹⁶ Räjpzani loj reni caguto' repalom:

—Colcuää redee, na'c rujntu rolijz xtaä si'c te guii cadro rdo' guiraloj.

¹⁷ Dxejcti banajlajz rexpejn_{pacni} xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolijzlu.”

¹⁸ Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te fiinu arajplu yäl_rnibee te abejnlu recosre?

¹⁹ Badzu' Jesús diidxre räjpni:

—Colgutzujl guidoore, luxh narä neñ chontis dxej sunch-esacäni.

²⁰ Räjp rexpejn Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni neñ chontis dxej, ä?

²¹ Niluxh laani caniini xcuent guidoo ni najc lagajc tiejxhni.

²² Ni'cni cheni gubañsacni loj rebengut, banajlajz rexpejn_{pacni} rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

Numbee Jesús guiraa rebejn

²³ Cheni guyu' Jesús guedx Jerusalén cadro cayajc lanij pascw, la_l ni cayajc lanijga, xhidajl rebejn huililajz xtiidxni, bahuiizareni remilagwr ni bejn_{ni}. ²⁴ Luxh di Jesús nililajz xtidx rebejn_{ga}, sa'csi arumbeeni xho najc rebejn. ²⁵ Niluxh dini niquiñ chu gäb lojni xho najc bejn, sa'csi lagajc laani anancheeni xho najc lastoo tejga bejn.

3

Jesús con Nicodem

¹ Guyu' te niguii lo rexpejn refarisee ni laa Nicodem, n_{acni} te beñroru loj reni rnibee rexpejn Israel. ² Te guxhijn biädxhiga'tzni nez loj Jesús, räjpni lojni:

—Mastr, nadonnu lo Dios siääd_{lu} si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliäpac lojlu, nani di gaal stehuält, di gacdi fini xcäl_rnibee Dios xhaguibaa.

⁴ Dxejcti räjp Nicodem lojni:

—¿Xho gac gaal te bejn stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

⁵ Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit D_{xan} xten Dios, di gacdi jiu'ni lo xcäl_rnibee Dios xhaguibaa. ⁶ Nani rajl xi'n beñ guedxliujre, ni'c najctisni bejn guedxliuj, luxh nani rajl por Sprit D_{xan} xten Dios, Spritza najcni. ⁷ Na'c rdxelojlu sa'csi rniä: “Nanabpac gaallu stehuält.” ⁸ Rbi' bej

cadrotis rĵajzni; riejn diajglu rubejni niluxh dilu gan caro siädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxa xten Dios.

⁹ Badzu' Nicodem diidxe, räjpni:

—¿Xho mood sajc gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä? ¹¹ Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

¹³ 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. ¹⁴ Lagajc si'cni guläsjaia to Moisés bäl guiib lo yajg neñ reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yälñabajn par tejpas.

Xho huinälajz Dios rebejn guedxliuj

¹⁶ 'Sa'csi huinälazduxh Dios rebejn guedxliuj, ni'cni badeedni biäd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yälñabajn par tejpas. ¹⁷ Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn neñ xtojreni xcuentni.

¹⁸ 'Nani chalilajz xtiidxni näjza chalilajz najcni chu nani najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. ¹⁹ Ni'cni dee najc yälñajtga: abiäd bianijga loj guedxliuj, biädnä Xi'n Diosni, niluxh rebejn guedxliuj bidxaglazruren i yälñacäy cadro tre'reni, gulälazreni bianijga sa'csi xhet laadi najc xtzuunreni. ²⁰ Guiraa reni rujn dzunguijdx, rbälaz bianijga, dizaren i guibig loj bianijga, didi guluiloj bianijga rextzunguijdxreni. ²¹ Luxh reni rusoob didxlii, rbigreni loj bianijga, te bianijga ruluiloj najc rextzuunreni redzunsac xten Dios.

Rnisac Juan ni rutiobnis xcuent Jesús

²² Dxejcti biäd Jesús näjza rexpejn pacni nez lo reyuj xten Judea. Ro'c guyunäjniren i, batiobnisza rexpejn pacni rebejn. ²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijn nis. Ro'c säa rebejn lojni te cagutiobnisniren i. ²⁴ Dxejc gajdreni gusaü Juan neñ latzguiib.

²⁵ Dxejcti gusloj rexpejn Juan cayujy diidx con gaii xpejn Israel xcuent yälrdiib ñaaren i ni najc xcostumbr rexpejn Israel.

²⁶ Dxejc biädreni lo Juan, räjpreni:

—Mastr, dade' nani gyunäjl stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni. ²⁸ Lagajc la'tu nancheetu guniliä: “Dina gacä Crist ni cabäjztu jääd.” Guniäza: “Narä nacä nani biädnijd lojni.” ²⁹ Che rajc sa', nani sobganäj dxa'p, ni'c najc bi'n ni gac chäälhi, luxh xamigw bi'n nani suga' ro'c, riejn diajni rniini, rbalazduxhni sa'csi riejn diajni xse' bi'n. Sigajcza abibaduxh lazä xcuentni. ³⁰ Nanab gacni laani beñroru, beñsajcru, biädla narä riajl gacä beñhuinru, ni guxiiru sajc lojni.

Nani siääd Xhaguibaa

³¹ 'Nani siääd jiaali, ni'c rnibee guirali, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guirali. ³² Nani bahuiini, nani biejn diajni, ni'c rusule'ni niluxh guxi rililajzreni xtiidxni. ³³ Nani rililajz diidx ni rusule'ni, bejnga ruluiloj guliipac najc xtidx Dios. ³⁴ Nani baxhał Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. ³⁵ Dad Dios sanälajzni xingaanni, abadeedzani guiraliiti chu ladznaani. ³⁶ Nani rililajz xtidx xingaanni arajp yäl nabajñ par tejpas, luxh ni di chalilajz xtidx xi'nni, dini fi yäl nabajñ, siääd xcärdxe'ch Dios yejcn, sujn Dios castiigwni.

4

Rdxaag Jesús te gunaa Samaria

¹ Che gucbee Jesús abiejn diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpejñni ni catiobnis), dxejc ³ biriini Judea gubisacni nez Galilee.

⁴ Lał ni sasajni, nanab tedni nez Samaria. ⁵ Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. ⁶ Ro'c sojb te bisie ni rniireni “xpisie Jacob”. Sa'csi abadxajg Jesús siädsajni, gurejni ro bisiega. Agojl läidxej. ⁷ Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

⁸ Sa'csi rexpejñpacni asääreni guejdxga asiireni xhi gaureni.

⁹ Räjpti guna samaritaᅇa lo Jesús:

—¿Xho mood rniablu nis löä, luj ni najc te beñ Israel luxh narä nacä gunaa samaritaᅇ?

(Sa'csi di rexpejñ Israel chanä sa'reni rebejn Samaria.)

¹⁰ Räjñ Jesús lojni:

—Paru najnlu xhini'c najc yäl'rulaslajz xten Dios, paru num-beelu chuni'c canab nis lojlu, luj siniablu lojni te laani guni-idxni nisnabajn lojlu.

¹¹ Räjpti gunaaga lojni:

—Dad, xhet ca'dilu te guiliä'plu nis, luxh bisiere najc jätduxh. ¿Caxh chaca'lu nisnabajnga, ä? ¹² ¿La benrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

¹³ Badzu' Jesús diidxre lojni, räjpti:

—Guiraa reni rä' nis bisiere, sioj'reni stehuält. ¹⁴ Luxh nani yä nis nani gudedä, diruni jiojl, sa'csi nis nani gudedä neñ lastooni saj'ni si'c te bisie nani rdatis nisni te gudeedni yäl'nabajn par tejpas.

¹⁵ Dxejcti räjpti gunaaga lojni:

—Dad, baniidx nisga yä'ä, te na'cru jiojä, te na'cruza guibi'ä jiadlä'pä nis ree.

¹⁶ Räjpti Jesús:

—Huij, huitejdx chäälü gudanäni ree.

¹⁷ Räjpti gunaa loj Jesús:

—Ruti chälä.

Räjpti Jesús lojni:

—Laaca guniilu, ¹⁸ sa'csi aguyu' gaiili chäällu. Luxh nani rbäznäjlu naj dini gac chäällu; guliica najlu.

¹⁹ Che biejn diajg gunaaga si'c, räjpti:

—Dad, rchaloä najclu te niguii ni rnii xtidx Dios. ²⁰ Retoxtadgoldoonu goj'reni Dios lo dajnre, luxh la'tu rniitu guedx Jerusalén najc cadro nanab ganni Dios.

²¹ Räjpti Jesús lojni:

—Gunaa, huililajz xtidxä, sidzujn or cheni nicla lo dajnre, niclaza guedx Jerusalén ditu chagajn Dad Dios. ²² La'tu rajntu Dios nani ditu gumbée, nuunu rajnnu Dios nani rum-beenu; sa'csi yäl'ruslaa bejn lo dojl siädä xcuent rexpejn Israel. ²³ Niluxh sidzujn or, luxh alabidzujn, che reni guliipac rajn Dad, reni'c neñ lastooreni, lo xcäriejnreni saj'reni Dios. Sa'csi sa' bejnre rguuil Dad Dios te gan'renini. ²⁴ Dios najc te Sprit. Reni rajn Dios nanab gan'renini neñ lastooreni, lo xcäriejnreni, guideb xtijpreni sa'csi rumbeerenini.

²⁵ Räjpti gunaa lojni:

—Ananä siädä Mesías ni laaza Crist. Cheni jiadni, laani susule'ni guiraliiti loonu.

²⁶ Räjpti Jesús lojni:

—Narä ni caniä lojlu, nacä laani.

²⁷ Dxejcti bidzujn rexpejn'pacni, bidxeloj'reni sa'csi gunii Jesús lo gunaaga, niluxh rut gunabdiidxdi xhi rlanjni, niclaza rut

gunabdiidxdi xhini'c caninäjni gunaaga. ²⁸ Dxejcti basa'n gunaaga xtie'ni, sä'tini guedxroga. Dxejcti räjpni loj rebejn:

²⁹ —Colṭaa, fiitu te niguii ni gunii loä guira'ti nani abenä. ¿La et laadi dee Crist ni cabääznu jiääd, ä?

³⁰ Dxejc birii rebejn_{guejdxga}, bidzujntireni lojni. ³¹ Reni najc rexpejn_{pacni} canabduxhrenei gau Jesús, räjpreni:

—Mastr, gudajw.

³² Laani räjpni:

—Narä rapä xhi gauä nani ditu gumbee.

³³ Dxejcti räjp rexpejn_{pacni} lo sa'reni:

—¿Xhaa yu' chu abiädnä xhi gudajwnei, ä?

³⁴ Räjp Jesús:

—Yälrajw xtenä najc gunä si'cni rlanj nani baxhal narä, näj guluxä xtzuunni. ³⁵ La'tu rniitu riäädx tajp bäii te guire' cose'ch. Narä rniä colguiliäs lojtu, colfisa'c loniaa, abiquijt regäjł, agojł guire' cose'ch. ³⁶ Nani rujn dzuun rutie' cose'ch rca'ni xcuentni, luxh ni caca'ni najc par yäl_{nabajn} par tejpas, te tejsi guibalaznä j nani gule'c binij nä j nani batie' cose'ch. ³⁷ Sa'csi gulii najc diidx nani rnii bejn, rniireni: “Tejni rbe'c binij, ste'cane rutie'ni.” ³⁸ Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹ Xhidajł reben Samaria huililajz xtidx Jesús xcuent redidix ni räjp gunaaga lojreni che räjpni: “Guniini loä guiralii nani abenä.” ⁴⁰ Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. ⁴¹ Dxejc xhidajłruren huililajz xtiidxn ni guniini lojpacreni. ⁴² Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxn, ni'c nancheenu dee najcpac ni rusłaa rebejn guedxliuj loj dojł. Laani najc Crist ni cabääznu jiääd.

Basiajc Jesús xi'n te bejn ni rujn xtzuun gubier

⁴³ Che gudejd tio'p dxej, biriini guedx Samaria, huinuuni xnezyujni nez Galilee. ⁴⁴ Sa'csi lagajc Jesús gunii, räjpni: Te bejn nani rnii xtidx Dios di reben lajdxpacni chanälajz xtiidxn. ⁴⁵ Che bidzujnni rexyuj Galilee, reben Galilee huichaglojrenini sa'csi nä j laareni huijreni lanij pascw guedx Jerusalén, ro'c bahuiireni guiraa redzuun nani bejn.

⁴⁶ Gubisacni, bidzujnni guedx Caná xten Galilee cadre bejn bidxaa nis gujcn bin. Dxejcti guyu' te dade' nani rujn xtzuun rei. Guedx Capernaum naga' te xi'nni cayacxhuu. ⁴⁷ Che biejn diajg dade'ga abirii Jesús Judea, abidzujnni nez Galilee, huijni lo Jesús, gunabduxhni lojni chääni te gusiajcn

xi'nni nani naga' cuentro, ameerli guetni. ⁴⁸ Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

⁴⁹ Dade' ni rujn xtzuun reii, gunii lojni, räjpni:

—Do'o Dad, te di guet xi'nä.

⁵⁰ Räjp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolijzni, birii rexmosni, huichaglojni, badeedreni diidx nabajñ xi'nni.

⁵² Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³ Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäjzreni jiaäd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejn Israel, dxejc huij Jesús guedx Jerusalén. ² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga ⁴ sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcní lo xhitis yälguijdx ni rajcni. ⁵ Ro'c guyu' te beñ racxhuu nani agujc galbitzubixhujñ ijz cayacxhuuni. ⁶ Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlajzlu jiajclu?

⁷ —Dad —räjp beñ racxhuuga lojni—, dina gapä chu gusäl narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huistie, guläs xta'lu, guzaj, huij.

⁹ Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, ¹⁰ ni'c räjp rexpejn Israel lo bejn ni biajcga:

—Nadxej najc dxej ni rusilajz bejn. Di gacdi guulu xta'lu.

¹¹ Laani räjpni:

—Nani basiajc narä, laani naj loä: “Guläs xta'lu, gusaj.”

12 Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

13 Dxejcti beñ racxhuu ni biajcgā dini gaan, sa'csi gunitloj Jesús, biriini ro'c lañ ni tre' xhidajñ beñ lajtga. 14 Che bidxaagni Jesús stehuält neñ guidoro, räjp Jesús lojni:

—Ahuui, ñaj ni abiajclu, na'c gunlu dojl stehuält, didi sajclu xhi stee ni najc cuentruru.

15 Sä'ti beñga, huiye'tzni loj rexpejñ Israel laa Jesús ni basiajčni. 16 Ni'cni gusloj rexpejñ Israel carinajñreni Jesús, rlaizreni guiga'ni te ju'trenini, sa'csi rujñni redzuunga dxej ni rusilajzreni. 17 Luxh räjp Jesús lojreni:

—Xtadā Dios ñajli cayujñni dzuun, ni'cni nājza narā cayunā dzuun.

18 Ni'cni rlaizru rexpejñ Israel ju'tni, xhet ganaxdi sa'csi rujñni dzuun dxej ni rusilajzreni, per nājza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

19 Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujñ Xtadni dzuunga, sa'csi guira'tis dzuun ni rujñ Xtadni, dzuunga rujñza Xi'nni sigajc rujñ Xtadni. 20 Sa'csi rinälajz Dad xi'nni, ruluiini lo xi'nni guiraa redzuun nani rujñni, luxh dzunroruza suluiini lojni gunni, te guidxelojtu. 21 Sigajc ni rliäs Dios rebengut, rudeedni yälñabajñ lojreni, sigajcza sudeed xi'nni yälñabajñ lo renani rlaiztisni. 22 Nicla Dad di gun yälguxhtis, alga badeedni guiralii yälguxhtis gun Xi'nni, 23 te guiraa beñ guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhalñi biädni.

24 Rniliä, rniliäpac lojtu, nani rucudiajg xtidxä, ni chalilajzani nani baxhalñ narä, ni'c rajpni yälñabajñ par tejpas; niluxh dini ted lo yälguxhtis, alga abiriini lo yälgujt, agudejdni lo yälñabajñ. 25 Rniliä, rniliäpac, sidzujñ or, luxh alabidzujñni, cheni siejñ diajg rebengut xse' Xi'n Dios, luxh reni rieññ diajgñi diidxga sibansacreni lo rebengut. 26 Si'cni rajp Dad Dios yälñabajñ lagajcsi laani, sigajcza badeedni lo Xi'nni ga'pni yälñabajñ lagajcsi laazani. 27 Badeedzani lojni yälrnibee te gunni yälguxhtis, sa'csi najcni Xi'n Dios ni gujc Niguii. 28 Na'c rdxelojtu rediidxre, sa'csi sidzujñ or cheni guiraa reni yu' neñ baa siejñ diajgñeni xse'ni 29 siriizareni neñ baa. Reni beññ dzunsa'c siriireni te guibansacreni loj yälñabansa'c, niluxh reni beññ dzunguijdx, siriireni te guibansacreni te tedreni lo xcälguhtis Dios.

Nani rului loj yälrnibee ni rajp Jesús

³⁰ 'Xhet rajcdi runä lagajcsi narä. Sigajc ni riejn diagä, sigajcza runä yäl̄guxhtis. Luxh yäl̄guxhtis ni runä laaca najcni sa'csi dina quilä gunä nani rlazätis, rguilätis gunä si'c ni rlanj Dad nani baxhaḷ narä. ³¹ Palga narätis rniä diidx lagajc xcuentä, xhet sajcdi diidxga. ³² Yu' stee nani rnili diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhaḷtu chu huij loj Juan, huinabdiidxreni lojni "chu najc bejn̄ga", niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rnii rebejn̄ xcuentä luxh canisacä rediidxre te laatu lo xtojltu. ³⁵ Juan gujc si'c te bajl ni ralguij, basani-jzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtadä gunä, lagajc redzuun ni runä, huenliisi ruluilojreni Xtadä Dios baxhaḷ narä. ³⁷ Xtadä ni baxhaḷ narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni neḷ lastootu, sa'csi di lajztu chalii xtiidx nani baxhaḷ narä. ³⁹ La'tu roḷduxhtu reguijtz xten Dios sa'csi rchalotu si'c sidxäḷtu yäl̄nabajn̄ par tejpas, luxh lagajc reguijtzga rusule' chu narä. ⁴⁰ Naadditu jiäädu loä te ga'ptu yäl̄nabajn̄ par tejpas. ⁴¹ 'Narä dina quilä chu bejn̄ guiliä'p xpala'nä nez loä. ⁴² Luxh narä anumbeätu, ananä ditu chanälajz Dios neḷ lastootu. ⁴³ Narä biälä xcuent Xtadä, luxh ditu gucua diajg xtidxä; paru jiääd chu stee bejn̄ xcuentcani, ni'c sii sucua diajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtadä. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nililajzpcactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, ¿xho chalilajztu rediidx nani caniä lojtu, ä?

6

Bayaan Jesús gaii miḷ niguii

(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ² Sanajl xhidajl bejn̄ni sa'csi rhuiireni remilagwr ni rujnni lo reben̄racxhuu. ³ Dxejcti huä'p Jesús yejc te dajn, ro'c gurenäjni rexpejn̄pacni. ⁴ Niluxh ameer gac lanij pascw xten rexpejn̄ Israel, cheni rudeedreni xquixhtios lo Dios xcuent dxej ni biriireni Egipto. ⁵ Cheni guläs Jesús lojni, bahuiini siääd xhidalduxh bejn̄, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

⁶ Dxejc räjpzani si'c te don xhi xhigab gun Felipe, luxh laani anajnni xho gunni. ⁷ Räjp Felipe lojni:

—Di tio'p gayuu beex yätxtiil gal te gaureni tlagaj.

⁸ Tej rexpejnpacni ni laa Andrés, bejtz Simón Pedr, räjp lojni:

⁹ —Ree suga' te biuux ca' gaii yätxtiil con tio'p bäjl, ¿xhixh sajl ni'c gau reben xhidajlre?

¹⁰ Dxejcti räjp Jesús:

—Colyejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaii miñ najc reniguii. ¹¹ Dxejcti cua' Jesús yätxtiilga, badeedni xquixtios lo Dios, gudisni yätxtiilga lo rexpejnpacni. Dxejcti rexpejnpacni gudisrenini loj rebejn nani sobga'. Sigajcza gudisreni rebäjl si'ctisni rlanjreni gaureni. ¹² Che gulujx gudajwreni, gudxaj xque'reni, dxejcti räjp Jesús loj rexpejnpacni:

—Colgutie' guiraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' gudajwreni.

¹⁴ Che bahuii rebejnnga resean, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rniit xtidx Dios nani cabääznu jiääd lo guedxliuj.

¹⁵ Sas che guchee Jesús cayujnreni xhigab jiädnaazrenini te niujnreni gacni rei te guinibeeni lojreni, biriini ro'c, xtebni gubisacni neñ dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojl guxhiñ, bidzujñ rexpejnpacni lo nisdoo.

¹⁷ Biu'reni neñ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcuent te beduxh nani cabi'.

¹⁹ Ni'cni che gusajreni si'cti gaii o xho'p kilómetro, bahuiireni siäddzujgajx Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni neñ barcw. Dxejcti bidzujgajczeni stelaad lo yuj cadre sääreni.

Caguiil rebejn Jesús

²² Che bara yääl, rebejn nani bia'n stelaad ro' nisdoo, bahuiireni asanä rexpejnpacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzujgajc sgaii barcw nani birii guedx Tiberias, te lajt ni tre' gajxh cadre gudajwreni yätxtiil che gulujx badeed Jesús xquixtios lo Dad. ²⁴ Che

bahuii rebejn ruti Jesús ro'c, niclaza rexpeljni, biu'reni nen rebarcw, sääreni guedx Capernaum satiilreni Jesús.

Jesús najc yätxtiil xten yäl̄nabaj̄n

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzuj̄nlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguuiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä.

²⁷ Na'c guntu dzuun ganax par yäl̄rajw nani rnitloj. Col̄yejn dzuun par yäl̄rajw nani di nitloj, ni runiidx yäl̄nabaj̄n par tejpas. Yäl̄rajwre suniidx Xi'n Niguii, sa'csi loj rebejn baluii Xtdadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlazj Dios?

²⁹ Räjp Jesús lojreni:

—Dee najc ni rlazj Dios guntu: chalilajztu xtidx narä, nani baxhaḷni.

³⁰ Räjpreni lojni:

—¿Xhi seen gunlu te guihuiinu xcäl̄rnibeelu te cholilajznu xtiidxlu? ¿Xhi dzuun rujnlu? ³¹ Retoxtdadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtdä ni suniidx yätxtiil nani siäädpac xhaguibaa. ³³ Sa'csi yätxtiil xten Dios najc bejn ni siääd xhaguibaa, niluxh laani rudeedni yäl̄nabaj̄n par tejpas loj reben guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yäl̄nabaj̄n nani riäj̄l jiaäd; chutis ni jiaäd loä diruni guiliaan, niluxh chutis ni rililajz xtidxä diruni jioj̄l par tejpas. ³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtdä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rlazj Xtdä, xhet si'cdi ni rlazädi. ³⁹ Dee najc ni rlazj Xtdä nani baxhaḷ narä: na'c nit nicla tej renani baniidxni loä, te guspaḷnacä guiragajcreni che gaḷ dxej lult ni riäj̄l jiaäd. ⁴⁰ Scree rlazj nani baxhaḷ narä: guiraa renani fi lo Xi'n Dios, näj chalilajzreni xtiidxni, xca'reni yäl̄nabaj̄n par tejpas niluxh narä suspaḷnacä'reni che gaḷ dxej lult ni riäj̄l jiaäd.

⁴¹ Rediidxre bejn gusloj casiey rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.” ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtñi?

⁴³ Dxejc räjp Jesús lojreni:

—Na'c rusieinäj sa'tu. ⁴⁴ Rut rajcdi riääd loä palga di Xtaďä ni baxhaļ narä jiädñäni loä, te guspansacäni che gaļ dxej lult ni riäjl jiääd. ⁴⁵ Loj reguijtz ni bacuaa redade' ni gunii xtidx Dios caj scree: “Sului Dios guiraareni.” Ni'cni guiraa reni rucuađiajg xtidx Xtaďä, reni rsieed lojni, reni'c ni jiääd loä.

⁴⁶ Dinä guiniä yu' chu abahuii lo Dios; tejtis ni abahuii lojni: nani baxhaļ Dios, ni'ctis abahuii lojni. ⁴⁷ Rniliä lojtu che rniä: nani chalilajz xtidxä, ni'c rajp yälñabajn par tejpas. ⁴⁸ Narä nacä yätxtiil nani rudeed yälñabajn. ⁴⁹ Retoxtadtu gudajw mana ni bastejb Dios lo reyubijdz, dxejcti gujtzareni. ⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹ Narä nacä yätxtiil bajn ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' rebeñ guedxliuj yälñabajn najc lagajc bältiehxä.

⁵² Dxejcti gusloj casiey rexpejn Israel räjpreni:

—¿Xho gac guniidx dee bältiehxhni guidaunu, ä?

⁵³ Räjp Jesús:

—Rniliä, rniliäpac lojtu, palga ditu gau bältiehxh Xi'n Dios ni gujc Niguii, palga dizatu yä xtiejñni, digacdi ga'ptu yälñabajn. ⁵⁴ Nani gau bältiehxä, nani yäza xtienä, ni'c rajp yälñabajn par tejpas, niluxh suspansacäni che gaļ redxej lult. ⁵⁵ Sa'csi bältiehxä najc te yälrausa'cpac, xtienä najcza te yälräsa'cpac. ⁵⁶ Nani gau bältiehxä, nani yäza xtienä, ni'c yu'pac con narä, luxh narä yu'äza con laani. ⁵⁷ Xtaďä ni baxhaļ narä rajp yälñabajn par tejpas. Narä nabañä xcuent laani. Sigajcza nani rajw narä, sibajñzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

⁵⁹ Recosre baluii Jesús nen te guidobäz laļ ni guyu'ni guedx Capernaum.

Diidx xten yälñabajn par tejpas

⁶⁰ Che biejn diajgreni si'c, xhidajl rexpejñpacni räjp:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusiejyreni xcuent rediidxga, dx-
ejc gunabdiidxni räjpni:

—¿La rusieed rediidxre la'tu, ä? ⁶² ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? ⁶³ Sprit xten Dios najc ni rudeed yälñabajn; bältiehxhni xhet rujndini

gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl_nabaj_n par tejpas. ⁶⁴ Luxh la_{tis} yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladz_naa rebe_n dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtaä jääd_näni loä.

⁶⁶ Lagajc dxejc gusloj cabicaj xhidajl rebej_n ni agujc xchej gusanäj Jesús, dirureni nisianäj Jesús. ⁶⁷ Dxejcti räjp Jesús loj guidzubitio'p rexpej_npacni:

—¿La nägajcza la'tu r_lajz_tu j_iitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yäl_nabaj_n par tejpas. ⁶⁹ Nuure abiolilaa_nznu, anaj_nnu najclu Crist Xi'n Dios nani nabaj_n.

⁷⁰ Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejt_tu najc be_nd_xab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpej_npac Jesús.

7

Di rebejtz Jesús chalilajz

¹ Che gujcti recosre, cansaj Jesús nez reyuj xten Galilee, di r_lajz_ni jia'nni nez reguedx Judea sa'csi r_lajz rebe_n ro'c ju'tni.

² Luxh ameer ga_l lanij xten cose'ch xten guidoguijd, te relanij xten rexpej_n Israel. ³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpej_npac_lu fi redzunro nani ruj_nlu. ⁴ Sa'csi rut ruj_ndi xtzuunni xhiga'tz palga r_lajz_ni gacbee bej_n xhi dzuun ruj_nni, te gumbee bej_nni. Palga ruj_npac_lu redzuunre, baluiini lo guiraa rebe_n guedxliuj.

⁵ Guniireni si'c lojni sa'csi nicla rebejtzni di chalilajz xti-idxni. ⁶ Dxejcti räjp Jesús lojreni:

—Gajd xhorä guidzuj_n, niluxh par la'tu xhitis or najc hueen. ⁷ Di gacdi guidxe'ch rebe_n guedxliuj lojtu, luxh rdxe'chreni loä sa'csi narä r_niliä xcuentreni: dzunguijdx najc xtzuunreni. ⁸ La'tu colchäj lanij; narä dina cha'a lanijga sa'csi gajd xhorä ga_l.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. ¹¹ Dxejcti caguuil rexpejn Israelni lo lanijga, räjpreni:

—¿Concha niguiiga?

¹² Lo rebejn xhidaalga yu' xhidajl bejn ni cagusiejyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni rebeñguejdx.”

¹³ Nicla tejreni xhet casäbdiidxdireni xhini'c caniireni. Direni guinii dip sa'csi rdxejbreni rexpejn Israel nani rnibee.

¹⁴ Agurojl lanij, che biu' Jesús neñ guidoro. Dxejcti gusloj caguluiini. ¹⁵ Dxejcti rdxeloy rexpejn Israel nani rnibee, räjpreni:

—¿Xho najn dee guiraloy, niluxh dini nisieed xleii toMoisés?

¹⁶ Badzu' Jesús diidxre, räjpni:

—Yälrlulii nani caluiyá et xtenädini, xten nani baxhal naräni. ¹⁷ Palga yu' chu rlanj gun nani rlanj Dios, sacbeeni la xten Dios najc reyälrlulii xtenä, o la lagajcsi narä rbää diidx ni caguluiä. ¹⁸ Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nni, luxh nani rguuil chä'p xpala'n nani baxhalni, ni'c ni rni didxlii, xheti yälrusguee neñ lastooni. ¹⁹ ¿La di toMoises nuniidx leii lojtu, ä? Niluxh nicla tejtü di gusoob xtidx leiiga. ¿Xhicuent rlanjtu ju'ttu narä, pes?

²⁰ Badzu' rebeñ xhidajlga diidxre, räjpreni:

—¿Xpriet beñdxab yu' lastoolul! ¿Chuni'c rlanj ju'tlu?

²¹ Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. ²² Ni'cni baniidx toMoisés lojtu yälru'tu bee, luxh etlaadini guläxctiejnini, agac guläxctiej retoxtadgoldootuni. La'tu rusälto bee rebiuux mase najcni dxej nani rusilajztu. ²³ Mbaj pes, palga rajc rusälto bee bejn te dxej nani rusilajztu didi nit xleii Moisés, ¿xhicuent rdxe'chtu loä sa'csi basiacäpac te bejn te dxej nani rusilajztu, ä? ²⁴ Na'c rujntu yälguxhtis si'ttis ni rlanjtu. Colyejn yälguxhtis con yälguxhtis xten Dios.

Rusule' Jesús casiädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguuilreni te ju'trenini, ä? ²⁶ Ani asuga', caniini nez loj guiraa rebeñguejdx, niluxh rut rudxojdini. ¿Xhaa ahuililajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siäd niguiire, niluxh che jiaäd Crist, rut gacbeedi caro siädni.

²⁸ Caguluii Jesús neñ guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajñni, luxh la'tu ditu gumbeeni. ²⁹ Luxh narä numbeäni, sa'csi lojni biriä, laani baxhalzani narä.

³⁰ Dxejc rlajzreni niniaazrenini, niluxh rut gunaazdini, sa'csi gajd xhorñi gal. ³¹ Xhidajl bejn lo rebeñ xhidajlga huililajz xtiidxni, dxejcti räjpreni:

—Cheni jiääd Crist, ¿xhixh sujnruni milagwr loj nani rujn dee, ä?

Ruxhal refarisee guixhajg guiniaaz Jesús te jiäuni

³² Che biejn diajg refarisee xhi canii rebeñ xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiäuuni. ³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. ³⁴ Siguiiltu narä, niluxh ditu guidxäl narä, sa'csi cadro cha'ä digacdi jiäädту.

³⁵ Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxälñuni? ¿Xhaa sijni loj rexpejn Israel nani nare'ch nez lajdx regriegos te guluiini regriegos? ³⁶ ¿Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiäädту”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiäädni loä te yäni. ³⁸ Nani chalilajz xtidxä si'cni caj lo rexquijtz Dios neñ lastoolini siliejn nisnabajn.

³⁹ Rediidxre guniini xcuent Sprit Dxan nani churu jiädläjz neñ lastoo reni rililajz xtiidxni, sa'csi gajd Sprit Dxan jiääd, sa'csi gajd Jesús guibañsac lo rebeñgut.

Gucgala' rebejn

⁴⁰ Lo rebeñ xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹ Yu'zareni räjp:

—Dade're najc Crist ni cabäöznu.

Yu'za sgaii ni räjp:

—Gurniälojtu jiääd Crist nez Galilee. ⁴² Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadro siääd torei David.

43 Dxejcti gucgala' rebejn xcuent Jesús. 44 Yu'reni rlajz chááni pres luxh rut biajxdi gunaazni.

Di reguxhtis chalilajz biääd Crist

45 Gubi' reguixhajg xten guidoo loj rebixhojzro näjza re-
farisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

46 Badzu' reguixhajg diidxre, räjpreni:

—¡Gajdpac te bejn guinii si'cni rnii bejnğa!

47 Dxejc räjp refarisee:

—¿La näj la'tu abasgueeni, ä? 48 ¿Xhixh loj regubier o
loj refarisee yu' chu tej ni ahuililajz xtiidxni, ä? 49 Reben
xhidajlre ni di gan xleii toMoisés, reni'c agunijtpac.

50 Nicodem, nani huij lojni te guxhijn, najc te refarisee.
Laani räjpni lojreni:

51 —Lo xleiiu caj: digacdi guntu yälguxhtis te bejn palga
gajdte gucuadiagxga xtiidxni, te don xhi bejnii.

52 Badzu'reni diidxre räjpreni lojni:

—¿La näjza luj siäädlu Galilee, ä? Bilsa'c xhi caj lo xquijtz
Dios, suhuiilu nicla tej niguii nani rnii xtidx Dios di jiääd nez
Galilee.

Gunaa nani biga' carälguijxh con te niguii

53 Dxejc cade tejreni sii rolijzreni.

8

1 Dxejcti huij Jesús nez dan Oliib. 2 Rsilru gubi'ni, bui'ni nen
guidoo. Luxh sanuutis siääd guiraa rebenquejdx lojni. Dxejc
ro'c gurejni, gusloj caguluiinireni. 3 Dxejcti biääd refarisee
näjza rebejn najn, biädnäreni te gunaa nani biga' carälguijxh
con te niguii. Basujrenini galäii reni suga' ro'c. 4 Räjpreni loj
Jesús:

—Mastr, gunaare biganäj te niguii carälguijxhreni, niluxh
yu' cháälni. 5 Loj leii xten Moisés caj guicuaanu guij yejc sa'
gunaaga te guetni. Luj ¿xhicha naalu?

6 Si'c räjpreni lojni te gaxäjsi gunijtni te diidx te gac cue'creni
xquejni. Niluxh Jesús basajbtisni lojni lo yuj, gusloj cagu-
cuaani lo yuj con bicueñaani. 7 Dxejc sanuutisreni canabdi-
idxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugu-
cuaani guij yejc gunaare.

8 Basabsac lojni lo yuj sanuutis cagucuaani con bicueñaani
lo yuj. 9 Luxh laareni che biejn diajgreni diidxga, sa'csi yu'
xtojlni, gusloj biriireni tebgajreni, ganid ni najc benjolru,
dxejcti ni najc huinru. Dxejcti bianxteb Jesús näjza gunaa ni
suga' galäiireni. 10 Dxejc gusulii Jesús, luxh sa'csi rutru lojdi
bahuiini, xtebtis gunaaga, räjpni lojni:

—Gunaá, ¿con reni cabe'c xquejlu? ¿La rut bacuaquijdiru luj, ä?

¹¹ Räj̄p Gunaaga:

—Nicla tejreni, Dad.

Dxejcti räj̄p Jesús lojni:

—Niclaza narä dina gucuaquiäru luj. Huij, na'cru gunlu dojl̄.

Jesús najc bianij xten guedxliuj

¹² Gunii Jesús lo rebejn̄ stehuält, räj̄pni lojreni:

—Narä nacä bianij xten guedxliuj; nani jiädnajl̄ narä dini sa lo yäl̄nacäy, sica'ni bianij ni rudeedpac yäl̄nabajn̄.

¹³ Dxejcti räj̄p refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räj̄pni lojreni:

—Masque lagajc narä rniä diidx xcuentä, sajc xtidxä, guli-pacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵ La'tu rujntu yäl̄guxhtis si'c najctis rexhigab xten beñ guedxliuj. Narä rut lojdi runä yäl̄guxhtis. ¹⁶ Palga gunä yäl̄guxhtis, yäl̄guxhtis xtenä laaca najcni, sa'csi et xtebädi runä yäl̄guxhtis, sa'csi narä näj Xtaďä ni baxhał narä rien̄nuni. ¹⁷ Luxh lo xleiitu caj diidxre: “Che rni ti'o'p beñ tejsi diidx, didxliini, cołchalilajzni.” ¹⁸ Narä rniliäpac diidx lagajc xcuentä, dxejcti Xtaďä nani baxhał narä rniliizani diidx xcuentä.

¹⁹ Räj̄preni loj Jesús:

—¿Caro yu' xtadlu?

Räj̄p Jesús lojreni:

—Ditu gumbee nicla narä, niclaza Xtaďä; paru niembeetu narä, niembeezatu Xtaďä.

²⁰ Rediidxre gunii Jesús cadro re' gojn, lał ni caguluiini neñ guidoro niluxh rut gunaazdini sa'csi gajd xhorni guidzuj̄n.

Cadro cha'ä, la'tu digacdi jiääd̄tu

²¹ Gunisac Jesús lojreni, räj̄pni:

—Narä sia'ä, luxh la'tu siguiiltu narä, niluxh loj xtojltu sejt̄tu. Cadro cha'ä di gacdi jiääd̄tu.

²² Räj̄p rexpejn̄ Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³ Räj̄p Jesús lojreni:

—La'tu najctu beñ lo yuj. Narä nacä beñ ni siääd̄ jiaa. La'tu najctu beñ guedxliujre. Luxh narä dina gacätis beñ guedxliujre. ²⁴ Ni'cni guniä lojtu, sejt̄tu lo xtojltu sa'csi palga ditu chalilajz nacä chu nacä, sejt̄pactu lo xtojltu.

²⁵ Dxejcti räj̄preni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhaḷ narä najc beḅ guliipac; nani biejn diagä guniini, rediidxga rniä loj rebeḅ guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguui jiaa, dxejc sacbeetu laa narä ni baxhaḷni, luxh xhetliidi runä lagajcsi xcuentä. Si'cni baluii Dad narä, si'ctis rniä. ²⁹ Nani baxhaḷ narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ Laḷ ni caniini si'c, xhidajlreni huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejḅ Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpeḅä. ³² Sumbeezatu nani najc didxguli, niluxh didx guliiga susḷaa la'tu lo xtojḷtu.

³³ Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siḷiaatu”?

³⁴ Räjp Jesús:

—Riniliä, rniliäpac lojtu, chutis ni rujn dojl najc mos xten dojl. ³⁵ Nani najc mos, dini jia'n rolijz xlamni guideb guibajḅni, niluxh nani najc xi'n lamga, ni'c sii sia'n rolijz xtdadni guideb guibajḅni. ³⁶ Ni'cni, palga rusḷaa xi'nni la'tu lo dojl, dxejcsii apac guḷaatu. ³⁷ Ananä najctu xagdoo toAbraham, luxh la'tu rrajztu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

³⁹ Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. ⁴⁰ Luxh naj rrajztu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c! ⁴¹ La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejḅdi; nuure tejtis xtadnu yu', laani najc Dios.

⁴² Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhaḷ narä. ⁴³ ¿Xhicuent ditu gacbee rediidx ni rniä lojtu? Sa'csi di rrajztu gucua diajgtu rextidxä. ⁴⁴ Xtadtu najc beḅdxab. La'tu

najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neṅ lastooni. Che rniini didx-xhii, si'c rniini sa'csi si'cpac najcni, sa'csi najcni beṅ didx-xhii, najczani xtad didx-xhii. ⁴⁵ Niluxh narä rniä didxlii, ni'c ditu chalilajz xtidxä. ⁴⁶ ¿Chu tejtü sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä? ⁴⁷ Nani najc xpejṅ Dios, ni'c rucua diajg xtidx Dios. Sa'csi la'tu ditu gac xpejṅ Dios, ni'cni ditu gucua diajg xtidxä.

Ansde to Abraham, agac nabajṅ Crist

⁴⁸ Dxejcti badzu' rexpejṅ Israel diidxre, räjpreni lojni:

—Laaca rniinu luj najclu te bejṅ ni siääd Samaria, beṅdxab yu' lastoolu.

⁴⁹ Räjp Jesús lojreni:

—Xhet beṅdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä. ⁵⁰ Luxh narä dina quilä chu guiliä'p xpala'nä, yu' chu rguuil guiliä'p bejṅ xpala'nä, niluxh laani rujnni yalguxhtis. ⁵¹ Rniliäpac lojtu, nani riu, nani rusob xtidxä, dipacni guet.

⁵² Dxejcti räjp rexpejṅ Israel lojni:

—Naj agucbeepacnu yu' beṅdxab lastoolu. To Abraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzob xtidxä, dipacni guet.” ⁵³ ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioštu. ⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te beṅ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. ⁵⁶ To Abraham toxtadgoldootu, bibalajzni sa'csi nuhuiini dxej nani jiälä, niluxh bahuiini dxej bibalazduxhni.

⁵⁷ Dxejcti räjp rexpejṅ Israel lojni:

—Nicla gajdlu chu tiubitzuu ijz, ¿xho naalu abahuiilu lo to Abraham?

⁵⁸ Räjp Jesús lojreni:

—Rniliäpac lojtu, che gajdli guibajṅ to Abraham, agac nabaṅä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini neṅ guidoro, gudejdni galäireni. Sä'tini.

9

Basiajc Jesús te bejṅ ni natiä'p balojni che gojllini

¹ Che cadejd Jesús te lajt, bahuiini sobga' te bejn ni che gojlli bejn̄ga agajc natiä'p balojni. ² Dxejc gunabdiidx rexpejn̄pacni lojni, räjpreni:

—Mastr, ¿chuni'c bejn dojl, la bejn̄re o la xcuzejni, ni'c natiä'p balojni che gojlni, ä?

³ Räjp Jesús:

—Nicla laani, niclaza xcuzejni di niujn dojl. Si'c gojlni te xcuent ni sajc bejn̄re suhuii bejn̄ xho najc xtzuum Dios. ⁴ Nanab gunä xtzuum nani baxhal̄ narä naj ni najc rdxee, sa'csi cheni guidzujn guxhijn̄ rut gacdi gun dzuun. ⁵ Lañi yu'ä lo rebejn̄ guedxliuj, nacä xpianij guedxliuj.

⁶ Che gulujx guniini si'c, batiobxhejni lo yuj, bejn̄ni bajn̄ con xhejni, gudääbnini con bicueñaani lo rebaloj lotiä'pga.

⁷ Dxejcti räjpni:

—Huij, huitiib lojlu nen̄ nis ni laa Siloé. Laj nisga sälojza “baxhal̄ni”.

Dxejcti huijni. Huitiibni lojni. Che gubi'ni, aruhuiini.

⁸ Dxejcti rexpisin̄ lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arien̄ balojlu?

¹¹ Dxejcti räjp dade'ga nani gujc lotiä'p:

—Dade' ni laa Jesús bejn̄ bajn̄, gudääbnini baloä, dxejcti najni: “Huitiib lojlu nen̄ te nis ni laa Siloé”, dxejcti che huitibä loä, lagajc dxejc bien̄ loä.

¹² Dxejcti räjpreni lojni:

—¿Con dade'ga naj?

Räjp̄ti bejn̄ga:

—Dina ganä.

Reben̄ farisee bejn̄ yäl̄gunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee. ¹⁴ Luxh sa'csi najcni dxej ni rusilajzreni che bejn̄ Jesús bajn̄ ni gudääbnini loj lotiä'pga te biajc balojni, ¹⁵ gunabdiidxsac re-farisee loj dade' nani biajc balojni, xho mood arien̄ balojni naj.

Laani räjpni lojreni:

—Bajn̄ gudääbnini loä, dxejc gudibä loä, naj aruhuiä.

¹⁶ Dxej yu' refarisee ni räjp:

—Di dade' ni bejn dee gac xpejn̄ Dios, sa'csi dini jiu dxej ni rusilajz xpejn̄ Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'. ¹⁷ Dxejcti gunabdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn̄ nani rnii xtidx Dios.

¹⁸ Luxh rexpejn̄ Israel naaddireni chalii lajzreni gujcpacni te lotiä'p ni abien̄ balojni, dxejcti gurejdxreni xcuzajn̄ dade' ni gujc lotiä'pga. ¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien̄ lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni.

²¹ Niluxh dinu guidon naj xho mood arien̄ lojni, dizanu guidon chu basiajc balojni. Colguiniabdiidx lojni, anajcni beñgool, lagajc laani sajc guiniini xhi gusajcni.

²² Si'c gunii xcuzajnni sa'csi rdxejbreni rexpejn̄ Israel, sa'csi agac bia'nreni diidx sibääreni, dirureni gusaan jiu' neñ guidoo chutis te bejn̄ ni naa Jesús najc Crist nani abiääd.

²³ Ni'cni räjp rexcuzajnni:

—Anajcni bi'n ni ayu' xcäriejn̄ni. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu beñ dojl̄ najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni beñ dojl̄ o la dini gac. Tejtis nanä: gucä lotiä'p, luxh naj arien̄ balaö.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejn̄ni basiajcni balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlaiztu guinisacäni? ¿Xhixh näj la'tu rlaiztu gactu xpejn̄pacni, ä?

²⁸ Dxejc gudilnäjrenini, räjpreni:

—Luj najclu xpejn̄ni, per nuure najcnu xpejn̄ toMoisés.

²⁹ Anadonnu guninäj Dios toMoisés, niluxh dade're dinu guidon casiäädni.

³⁰ Dxejcti räjp dade' lojreni:

—Dee najc te cos ni guidxeloj bejn̄: la'tu ditu gan casiäädni, jniluxh laani basiajcni balaö! ³¹ Nadoncheenu di Dios cuadiajg xtidx rebeñ dojl̄; palga yu' chu rajn̄ Dios, ni rusoobza xtiidxni, rucuaiajg Dios xtidx sa' bejn̄ga. ³² Che guslojli guedxliuj gajd

diajgnu jiejn xcuent te bejn nani rusiajc baloj te bejn lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluiilu nuure?

Dxejcti guläärenini nejn guidoro, barilaagwrenini.

³⁵ Biejn diajg Jesús guläärenini nejn guidoro, che bidxälhini, räjpni lojni:

—¿La rililajzlu xtidx ni najc Xi'n Dios ni gujc Niguü, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuiilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojnnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

⁴⁰ Refarisee nani suganäjreni, che biejn diajgreni diidxre, räjpreni:

—¿Xhixh najczanu bejn lotiä'p, ä?

⁴¹ Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien lojtu, sicaquijtu rextojltu.

10

Jesús najc te baxtorsa'c

¹ 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan.

² Nani riu' nez ro' gurajl xten rexiil, laani najc xpaxtoorreni.

³ Che guidzujn baxtoor, ruxhal nani rcanäj ro lä', te jiu'ni.

Rexiilga numbeereni xse' baxtoor, dxejctiru laani rbejdxni

rexiiilga, tebgaj xiilga yu' lajni, rinäzanireni cadro naga' guix-

asa'c. ⁴ Che rii rexiilga nejn gurajl, sanä baxtoorgareni, luxh

numbee rexiilga xse'ni, ni'c rsianäjreni baxtoorga. ⁵ Luxh

dipacreni chanä te baxtoor nani direni gumbee, ruxunreni

lojni sa'csi direni gumbee xse' garenca bejn.

⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil.

⁸ Guiraa reni abiääd galoo, najcreni ganax gubaan luxh di

rexiiil nuquadiajg xse'ni. ⁹ Narä nacä si'c rolä' xten gurajl,

nani jiu' nejzga, silaani loj xtojlni, siu'ni, siriini te guidxälni guixasa'c gauni.

¹⁰ 'Ni najc gubaan riääd̄tisni te cuanni, te ju'tni, te guxhin̄zani, niluxh narä siälä te ga'ptu yäl̄nabaṅsa'c, yäl̄nabaj̄n par tejpas. ¹¹ Narä nacä baxtorsa'c; luxh baxtorsa'c sudeed lagajc xcäl̄nabaj̄n̄ni xcuent rexiilni. ¹² Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxun̄ni, li rbälazni rexiil. Dxejc rniaaz cuyo't rexiil, rutie'chzani rexiil. ¹³ Mosga ruxun̄ sa'csi najcni mostis, luxh dini jiu xhi rsiajc rexiil.

¹⁴ 'Narä nacä baxtorsa'c; numbeä reni najcpac rexilä; rexilä numbeezareni narä ¹⁵ sigajc numbee Xtadä narä, sigajc numbeäza Xtadä; luxh sudedä xcäl̄nabaṅä xcuent rexiilga. ¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷ 'Narä siguixäza xcäl̄nabaṅä, guetä, te dxejcru siliässacä xcäl̄nabaṅä, guibaṅsacä, ni'cni sanälajz Xtadä narä. ¹⁸ Rut sajcdi ju't narä, lagajc narä gudedä xcäl̄nabaṅä, guetä. Rapä yäl̄rnibee te gudedä xcäl̄nabaṅä, guetä, rapäza yäl̄rnibee te xcasacä xcäl̄nabaṅä te guibaṅsacä, sa'csi dee najc yäl̄rnibee ni baniid̄x Xtadä löä.

¹⁹ Xcuent rediid̄xre gula' sa' rexpej̄n Israel, gujcreni tio'p gala'. ²⁰ Xhidajlreni canii:

—¿Xhicuent riutuni? ¿La ditu gan te beṅdxab yu' lastooni? Yejcni rajc. Xhigac rcuadiajgtu xtiid̄xni.

²¹ Dxejc ste cuaareni:

—Dini gac. Di rediid̄xre gac xtidx te beṅdxab. ¿Xhixh sajc rusiajc beṅdxab baloj relotiä'p, ä?

Rdxe'ch rebej̄n loj Jesucrist

²² Lagajc neṅ redxejga gujc lanij xten xquidoo rexpej̄n Israel guedx Jerusalén. ²³ Najcni bäi najl. Biu' Jesús guidoro, sasajni nez neṅ cordoor ni laa xten Salomón. ²⁴ Gubig rexpej̄n Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

²⁵ Dxejc badzu' Jesús diid̄xre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl̄rnibee Xtadä, huenliisi ruluilojreni chuni'c nacä. ²⁶ La'tu ditu chalilajz sa'csi ditu gac rexilä. ²⁷ Rexilä numbee xse'ä, luxh narä numbeäzareni, riäd̄najlzareni narä. ²⁸ Narä rudedä yäl̄nabaj̄n par tejpas loj rexilä, luxh direni nitloj par tejpas. Rutza laadi nani sajc gudzucajreni ladzṅä. ²⁹ Xtadä baniid̄xreni löä, laani najcni guroobru, nadipru loj

guiraareni. Rut laadi nani sajc gudzucajreni ladz_naa Xtadä.
³⁰ Narä näjza Xtadä najcnu tejsi.

³¹ Dxejc gulässac rexpejn Israel guij, te nucuaareni yejc Jesús. ³² Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn gucuaatu guij yecä?

³³ Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Be_n guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”? ³⁵ Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc ³⁶ naj ¿xhicient guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxha_nni narä lo guedxliujre. ³⁷ Palga dina gunä redzuun xten Xtadä, na'c chalilajztu rextidxä. ³⁸ Luxh palga runnäni, mascä ditu chalilajz xtidxä, colchalilajz ni ruluii reyälmilagwr nani runä, te gacheetu par tejpas, Xtadä yunäj narä, narä yunääza laani.

³⁹ Che rlanjzreni niniaazrenini stehuält, laani biriini ladz_naaareni.

⁴⁰ Dxejcti sääni, gubisacni nez stelaad gueu Jordán, nezga huijia'nni, cadre gosloj batiobnis Juan. ⁴¹ Xhidajl bejn bidzuj_n lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhreni huililajz xtiidxni ro'c.

11

Gujt Larz

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajn_ni Marii näjza Mart. ² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxej_ni. ³ Ni'cni baxha_n guiro'p bäj_nre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcäl_nnibee Dios. Te guluilojza yälracxhuure xcäl_nnibee Xi'n Dios.

⁵ Sanälajz Jesús Mart, bäj_nni, näjza Larz, ⁶ che räjpreni lojni cayacxhuu Larz, bia'nni stio'p dxej cadre yu'ni. ⁷ Dxejcti räjpni loj rexpejn_npacni:

—Colcho', chonnu stehuält región Judea.

⁸ Räjp rexpejn_ni lojni:

—Mastr, gajd gac xchej rlaiz rexpejn Israel ni rnibee nu-cuaa guij yejclu te nugu'treni luj, luxh naj rlaizlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejn pacni lojni:

—Dad, palga agudiesni, pet siajcti.

¹³ Jesús canii lojreni agujt Larz, niluxh rexpejn pacni bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz. ¹⁵ Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶ Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

Jesús najc yälrbansac lo yälgujt

¹⁷ Che bidzujn Jesús lo guejdxga, agujc tajp dxej biga'tz Larz.

¹⁸ Guedx Betania tre' gajxh lo guedx Jerusalén, si'cti tio'p garol kilómetro. ¹⁹ Xhidajl rexpejn Israel abidzujn, siädhuiireni Mart, näjza Marii, te di gac-huin lajzreni sa'csi gujt bisiajnreni.

²⁰ Che gucbee Mart abidzujn Jesús, biriini huichaglojnini; niluxh Marii bia'n rolizreni. ²¹ Dxejcti räjp Mart lo Jesús:

—Dad, paru suga'lu ree, di bisianä niejt. ²² Narä nanä suniidx Dios guiraa nani guiniablu lojni.

²³ Jesús räjpni lojni:

—Sibansac bisiajnlu.

²⁴ Räjp Mart lojni:

—Acananä sibansacni che guidzujn dxej ni guibansac bejn loj rebengut dxej lult che gun Dios yälguhxhtis.

²⁵ Dxejc räjp Jesús lojni:

—Narä nacä yälruspansac bejn loj rebengut, näjza yäl nabajn par tejpas. Nani rililajz rextidxä, masä agujt ni, sibansacni.

²⁶ Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

²⁷ Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

Biin Jesús cuä' xpaä Larz

²⁸ Che guluux gunii Mart, huitejdxni bäjlni Marii, xhiga'tz räjpni lojni:

—Abidzujn Mastr. Cabejdxzani luj.

29 Che biejn diajg Marii rediidxga, huisugajcni, sahuuini Jesús. 30 Gajd Jesús jiu' guejdxga, laltis suga'ni cadro bidxaagni Mart. 31 Rexpejn Israel nani biäd cuenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

32 Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

33 Che bahuii Jesús cayoon Marii, näjza rexpejn Israel ni siäd najl Marii, guc-huin lastooni, biääd te rsliajz lastooni.

34 Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

35 Dxejcti biin Jesús. 36 Ni'cni cayäjp rexpejn Israel:

—Colhuui, lacti sanälajznini.

37 Yu'zareni räjp:

—Dade're basiajc beñ lotiä'p. ¿Xha di niajcdi nusiajcn i bejnre te di niejtni, ä?

Gubansac Larz

38 Guc-huinduxh lastoo Jesús, gubigni lo baa. Baaga najc si'c te biliäa, suga' te guiro ni rusäuureni ro'ni. 39 Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

40 Dxejc räjp Jesús lojni:

—¿Et rniä lojlu, palga rililajztu, suhuuilu xcälrnibee Dios, ä?

41 Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä.

42 Narä nanä guliica rucua diajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

43 Che gulujx guniini rediidxga, guredxa'ni räjpni:

—¡Larz! ¡Gudaa ree!

44 Dxejc birii bengutga nen biliäa. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

45 Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. 46 Yu' reni huihuii loj rexpejn Israel ni laa farisee, bijreni diidx xhi

bejn Jesús. ⁴⁷ Dxejcti refariseega, nájza rebixhojz ni rnibee, bire'reni bidxagsa'reni lo Junt Suprem, rájzpareni:

—¿Xho jiennu? Niguiire cayujn xhidajl milagwr. ⁴⁸ Palga guisaannuni si'c, guiralií bejn sililajz xtiidxni, sinajlrenini. Dxejcti jiáad reben roman ni rnibee, gudzucajreni xcälrnibeenu, sudzujlarenini lajdxnu.

⁴⁹ Dxejc Caifás, bixhojzro ni riájl gunibeeni lo rebixhojz ijzga, rájpní lojreni:

—La'tu xhetliidi najnditu. ⁵⁰ Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. ⁵² Luxh xhet ganaxtis xcuent nacionga, nájza te guire' guiraa rexpejn Dios nani nare'ch loj guideb guedxliujre. ⁵³ Ni'cni dx-ejlíga bachaag rebejnnga diidx te don xho gunreni gugu'treni Jesús.

⁵⁴ Ni'cni diru Jesús nisíaj nez loj rexpejn Israel. Biriini región Judea, huijni te lajt gajxh nez lo reyubíjdz, lo te guejdx ni laa Efraín. Ro'c biannájni rexpejn pacni.

⁵⁵ Guxii dxej cayáádx guidzujn lanij ni laa pascw ni rujn rexpejn Israel. Xhidalduxh reben guejdx huij guedx Jerusalén te gusiareni lastooreni, te gac gunreni lanij xten pascw. ⁵⁶ Cansajreni caguilreni Jesús; che yu'zarení nen guidoro, canabdiidx lo sa'reni, rájpreni:

—¿Xhi najtu? ¿La siáádni lanijre o laa dini jiáad, ä?

⁵⁷ Refarisee nájza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudääb te gunaa se't ni' Jesús

(Mt. 26:6-13; Mr. 14:3-9)

¹ Che riáádx xho'p dxej gal lanij pascw, huij Jesús guedx Betania cadre rbájz Larz nani baspan sac Jesús loj reben gut. ² Ro'c bejnreni te xchej te gau Jesús. Mart bateed xchejga, nájza Larz sobganáj Jesús nájza rexpejn pacni lo mex. ³ Dxejcti bidzunáj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcní. Guideb nen yu'ga gulanejxh se'tga. ⁴ Dxejcti ráj Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, rájpní:

⁵ —¿Xhicuent di se'tre nido' choñ gayuu denar te nidis meelga loj rebenproob? (Choñ gayuuga najc si'cti ni xca' te niguii paru gunni dzuun tzubiteb báii.)

⁶ Guniini si'c, xhet sa'csi riadini reprob, per sa'csi laani najcni te gubaan, luxh laani ca'ni bols cadre ruche meel, luxh rbääni meel lojga te rca'nini. ⁷ Ni'cni räjp Jesús lojni:

—Na'c gudxojnluni; subasälxgaanini, che gajd guidzujñ dxej nani guiga'tzä. ⁸ Dxej-yääl yu' rebeñproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajl xpejn Israel yu' Jesús rolijz Larz ni gubañsac lo rebeñgut, bidzujñreni, xhet xcuentis Jesús. Biäädreni te fiizareni loj Larz nani baspañsacni lo rebeñgut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yääl, rebejn xhidajl ni bidzujñ lanij biejn diajgreni asiäddzujñ Jesús guedx Jerusalén, ¹³ dxejcti batiu'reni naa reyagzijñ, biriireni neñ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc reii lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión.

¡Colhuii! Reii xtentu asiääd, bijbni dejtz te burbäz.

¹⁶ Di rexpejñpacni niacbee recosga che gujcreni, niluxh che gubañsacni loj rebeñgut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzojb rediidxga.

¹⁷ Rebeñ xhidajl ni suganäjni che gurejdxni Larz te biriini neñ baa che baspañsacnini lo rebeñgut, bijzareni diidx xcuent guiraa ni bahuiireni. ¹⁸ Ni'cni biädchagloj rebeñ xhidajlgani, sa'csi abiejn diajgreni laani bejnni milagwrre. ¹⁹ Ni'cni räjp refarisee lo sa'reni:

—Aruhuiitu xhet sajcdi jieñnu. ¡Colhuii! Empac sanajl guideb guedxliujni.

Riädtil regriegw Jesús

²⁰ Yu' gaii beñriegw nadxaag lo rebejn ni biädted lanij guedx Jerusalén. ²¹ Rebejnre bidzujñ loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biääd Felipe, räjpni loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujñ or ni chä'p xpala'n Xi'n Dios ni gujc Niguii.

²⁴ Rniliäpac lojtu, palga di te xob binij jiajb lo yuj, neñ

xhurc cadre cueni, te rianxtebni, guetni, dini guiliejn. Luxh palga guetni, siliejnini, rajcza te nisro lojni, rajc xhidajl xob binij. ²⁵ Nani sanälajz xcäl'nabajn̄ni, sunijtnini, luxh nani rbälaz xcäl'nabajn̄ni lo guedxliujre, sica'ni yäl'nabajn̄ par tejpas. ²⁶ Palga yu' chu tej ni rlaz chu loä, sujiädnajlni xnezyuä, te cadre yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'n̄ni.

Rnixgaa Jesús guetni

²⁷ Räjpzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or̄ ni siääd? Ni te tedäpac or̄ga biälä lo guedxliujre. ²⁸ Xtadä, bejn si'cni riäjł gac te guiliä'p bejn xpala'n̄lu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn̄ ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zarenı räjp:

—Te xangł Dios ni gunii lojni.

³⁰ Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹ Naj abiääd xcälguxhtis Dios lo guedxliuj. Naj sibicaj xcäl'rnibee nani rnibee lo guedxliujre. ³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Räjpb rebejn̄ lojni:

—Nuure biejn diajgnu bilreni lo leii, Crist ni jiääd sibajn̄ par tejpas. ¿Xho mood rniilu, nanab chäs Xi'n Dios ni gujc Niguui jiaa lo guedxliuj? ¿Chuxhni'c najc Xi'n Dios ni gujc Niguui ni ruzä'tlu?

³⁵ Dxejcti räjp Jesús lojreni:

—Stera'tsi yu' bianij lojtu. Col̄saj lał ni rajptu bianijga, te di guiniaaz yäl'xcäy la'tu, sa'csi ni rsiaj loj nacäy, dini gan caro chääni. ³⁶ Lał ni rajptu bianij, col̄chalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuat-zlojni.

Xhicuent di rexpejn̄ Israel nililajz xtidx Jesús

³⁷ Xhidajł remilagwr bejn Jesús nez loj rexpejn̄ Israel, niluxh direni nililajz xtiidxni, gulälazreni nani baxhal̄ Dios lojreni. ³⁸ Ni'cni guzobj diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcäl̄rnibeduxhlu, ä?

³⁹ Ni'cni di niajcdi nililajzreni, sa'csi guniiza Isaías, räjpni:

⁴⁰ Abascäjyni lojreni,
abennajdni lastooreni,
te di rebalojreni fii,
te di lastooreni gacbee,
te di gusiejch lajzreni,
te di gusiäcäreni.

⁴¹ Rediidxre gunii Isaías, sa'csi bahuiini xcäl̄rdimbicha' Jesús xhaguibaa, dxejc guniini xcuentni.

⁴² Dxejcti gaii rebejn̄ ni rnibee huililajz xtiidxni che räjpni abaxhaḷ Diosni, niluxh bidxejbreni rebejn̄ farisee, ni'c direni nicäj̄p ahuililajzreni, te di gurilaagwreni laareni, gudxojnreni jiu'reni nen̄ guidoo. ⁴³ Sa'csi rdxaglaizruren̄ guiliä'p rebejn̄ xpala'nreni luxh guxiiru rlaizreni guiliä'p Dios xpala'nreni.

Xtidx Jesús sigubee rebejn̄

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtaďä nani baxhaḷ narä rililajzni. ⁴⁵ Nani ruhuii loä, ruhuiizani loj ni baxhaḷ narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, diruren̄ chu lo yäl̄cäjy. ⁴⁷ Nani riendiajg xtidxä, luxh dini gusoob rediidxga, dina gunä yäl̄guxhtis lojni, sa'csi dina niälä te gunä yäl̄guxhtis rebejn̄guedxliuj, biälä te guslaä rebejn̄ guedxliuj lo dojl̄. ⁴⁸ Nani rbälaz narä, ni di gusoob xtidxä, yu' chu gun yäl̄guxhtis xtojlni; lagajc rediidx nani guniä gun yäl̄guxhtis xtojlni che gaḷ lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhaḷ narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl̄nabajn̄ par tejpas. Ni'cni rediidx nani rniä, rniäreni si'cpacni gunii Xtaďäni loä.

13

Jesús gudiibni ni' rexpejn̄pacni

¹ Che gajd gaḷ dxe lanij ni laa pascw, najn Jesús asiäddzungajxh xorn̄ni, or̄ ni jiunejzni lo guedxliujre te chääni lo Xtaďni. Luxh sa'csi agajc sanälajzni rexpejn̄pacni nani yu' lo guedxliujre, sinälajznanireni par tejpas.

² Ni'cni laḷ ni cayauxchejreni biu' ben̄dxab nen̄ lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtaďni guira'ti ladzñaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudojbni te tuäii, batejbn̄ni xque'ni. ⁵ Dxejcti cua'ni nis nen̄ te chaa, guslojni gudiibni ni' rexpejn̄pacni, baspijdzni

ni'reni con tuäiiga. ⁶ Che bidzujñni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejc räjp Jesús lojni:

—Nani cayunä dilu gacbeeni ñaj, guixee-huijdx sacbeeluni.

⁸ Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹ Räjp Pedr lojni:

—Dad, na'c quiiblu ni'ätis näjza ñää näjza yecä gudiib.

¹⁰ Räjp Jesús lojni:

—Nani agojz di guiquiin gagsacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajñni chu guto'ni, ni'cni guniini: “Xhet guiraaditu naya.”

¹² Ni'cni che gulujx gudiibni ni' rexpejñni, gotsacni xhajnbi, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjł quiibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamñi; diza te ni rij xmandaad beñ gac beñroru loj nani baxhañi. ¹⁷ Palga najntu recosre, chicbaazatu palga si'c guntu.

¹⁸ 'Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzn. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhañä, riuzani xtidxä; luxh nani riu xtidxä, riuzani xtidx nani baxhañä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtı suto' narä.

²² Dxejc gusloj cadxeloj rexpejñni lo sa'reni, di jien chuchani'c cagusä'tni. ²³ Tej rexpejñni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini. ²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c. ²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcäl̄rnibee Xi'n Dios ni gujc Niguui, luxh lojni sienloj xcäl̄rnibee Dios. ³² Palga suluiloj Xi'n Dios ni gujc Niguui xcäl̄rnibee Dios, dxejc suluilojza Dios xcäl̄rnibee Xi'n Dios ni gujc Niguui, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jiäätu cadre cha'a. ³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa beñguedxliuj najcpectu rexpenä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujñ dxej jiäädlu ro'c.

³⁷ Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' choñ huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzta xtidxä. ² Yu' xhidalduxh yu' cadre rbäjz Xtadä. Palga xhet si'cni najcni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadre cuääztu, che guluxäni,

sibisacä, te chanäätu ro'c, te cadre yu'ä, ro'cza chutu. ⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

⁶ Räjp Jesús lojni:

—Narä nacä nezyuj. Narä nacä didxliipac, nacäza yäl nabajñ. Por narätis sajc chää bejn cadre rbäjz Xtradä. ⁷ Palga la'tu niembeetu chuni'c nacä, niembeezatu Xtradä. Luxh najli abiembeepactuni sa'csi acahuiitu lojni.

⁸ Räjp Felipe loj Jesús:

—Dad, basaan guihuiinu loj Xtradlu; ni'ctis rlaaznu.

⁹ Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtradä. ¿Xhicuent rniablu filu lo Xtradä, ä? ¹⁰ ¿La dilu chalilajz najrä yunää Xtradä, luxh Xtradä yunäjzani narä, ä? Rediidx nani rniä dina guiniäni lagajc xcuentä, sa'csi Xtradä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtradä, luxh Xtradä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliäpac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadre yu' Xtradä. ¹³ Luxh guiraa ni guiniablu lo Xtradä xcuentä, narä sunäni, te guluiloä xcälrnibee Xtradä. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dxan

¹⁵ Räjpszani:

—Palga sanälajztu narä, susoobtu xtidxä. ¹⁶ Dxejc siniabä lo Xtradä, te guniidxni stee nani gacnäjtu te chunäjni la'tu par tejpas. ¹⁷ Nalajznu, Xpriet Dxan xten Dios, ni rnili. Di gacdi xca' reben guedxliujni, sa'csi direni fii lojni, ni claza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu. ¹⁸ Dina gusanbisiäbä la'tu; sibisacä jädhuiä la'tu. ¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu. ²⁰ Nen redxejga, dxejc sacbeetu yunää Xtradä, la'tu yunäjtu narä, luxh narä yunääza la'tu. ²¹ Nani numbee Xtradä, nani rusoobza xtidxä, ni'c ruluiini sanälajzpacni narä. Luxh Xtradä sinälajzza nani sanälajz narä, najza narä chanälazä bejn ga, luxh suluiiloä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jiopläznäänuni guiro'pnu Xtradä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtradäni ni baxhal narä.

²⁵ 'Caniä guiraa rediidxre lojtu la_{ni} yu'ä lojtu, ²⁶ per Sprit Dxan xten Dios nani jiädycnäjtu, nani guxhal Xtradä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu. ²⁷ Yäl_rbecdxilajz rusa'nä lojtu, xcäl_rbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajzpacktu narä, sibalajztu xcuentä che guniä sia'ä lo Xtradä, sa'csi Xtradä najc be_nroru loä. ²⁹ Scree agunixgaäni lojtu, te che soobni, dxejcru chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäj_l gac recosre te gachee reben_u guedxliuj sanälazä Xtradä, rusobäza xtidx Xtradä, runä nani gunibeeni. Colchastie, colcho' jiunejznu ree.

15

Jesús najc si'c te yaguub

¹ Rāpzani:

—Narä nacä si'c te yaguub. Xtradä najc si'c nani rusuj yajgga. ² Rebejn najc si'c re_naa yajgga. Guiraa re_naa yajgga nani xhet cajdi lojni rutiuugnini. Luxh guiraa re_naa yajgga ni caj ninejxh lojni, rusianini te xcajru ninejxh lojreni. ³ La'tu anajctu be_nnaya xcuent rediidx nani aguniä lojtu. ⁴ Colguiba_nnäj narä, sigajc ni naba_nnää la'tu. Digacdi xcaj ninejxh lo te _naa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c re_naa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajcdi gunni. ⁶ Nani di chupac loä, sibicajni si'c re_naa yajg nani rdin sa'csi xhetru rcajdi lojni, dxejcti rbijdzni, rusäl_i bejn_{re}ni lo däj te checni.

⁷ 'Palga chupactu loä, palgaza chupac xtidxä lastootu, col_nab nani r_lajztistu, luxh narä sunidxäpacni. ⁸ Che gunpacktu xtzun Dios, dxejc fii bejn najcpacktu xpe_nä, siliä'p bejn xpala'n Xtradä, Dios. ⁹ Si'cpacni sanälajz Xtradä narä, sigajcza sanälazä la'tu. Colchanuu lo xcäl_rinälazä. ¹⁰ Palga jiu_tu rextidxä, sinuutu lo xcäl_rinälazä, sigajc ni abasobä xtidx Xtradä, luxh rinuä lo xcäl_rinälajz Xtradä.

¹¹ 'Rniä rediidxre lojtu te guibalaznäjtu narä, te si'c guibalazduxhpacktu. ¹² Dee najc diidx ni rnibeä guntu: colchanälajz sa'tu si'cni sanälazä_tu. ¹³ Xheti te yäl_sanälajz ni guroobru

lo yälšanälajzre, gudeed te bejn xcälñabajñni, guetni lacuaa resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ Diruna cuälää “mos” la'tu, sa'csi di remos gan xhi rujn xlamreni. Luxh narä agulälää la'tu “rexamigwä”, sa'csi guira'ti rediidx ni biejn diagä lo Xtäädä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtäädä, te na'cza nitloj dzuunga. Te guira'tiza nani guiniabtu lo Xtäädä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn guedxliuj Jesús näjza rexpejñni

¹⁸ 'Palga cuälaz reben guedxliuj la'tu, anajntu agulälazxgaareni narä. ¹⁹ Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtäädä, ni'cni rbälaz reben guedxliuj la'tu. ²⁰ Colšnjaj lajztu diidx nani guniä lojtu, 'di te mos gac beñroru lo xlamni'. Palga basacsireni narä, susacsízareni la'tu. Palga rusobreni xtidxä, susoobzareni xtiidxtu. ²¹ Guiraa recosre sunnäjreni la'tu xcentä sa'csi direni gumbee nani baxhal narä.

²² 'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni. ²³ Nani rbälaz narä, rbälazzani Xtäädä. ²⁴ Palga dina niunä nez lojreni remilagwrrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtäädä. ²⁵ Bejnreni si'c te guzojb diidx nani cuaj lo guiitz agujc xchero: “Gulälazreni narä, luxh xhetlidi benä.”

²⁶ 'Che jiääd nani gacnäj la'tu, laani sinii xcuentä, chu nacä. Laani najc Sprit ni yu' lo Xtäädä, siniini didxlii. Narä suxhaläni lojtu; lo Xtäädä guiriini jiäädni lojtu. ²⁷ Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

16

¹ Rediidxre rnixgaä lojtu, te didi yu' xhi gun jiajbtu te guniittu lo xtidxä. ² Sidzujñ dxej sibääreni la'tu dirureni gusaan jiu'tu neñ guidoro. Sidzujñ or chutis ju't tejtu, suchaloni cayacnäjni Dios. ³ Guiraa recosre sujñreni sa'csi direni gumbeepac Xtäädä, niclaza narä. ⁴ Agunixgaä rediidxre lojtu, te che guidzujñ orga sinaj lajztu xcuent rediidx ni guniä lojtu.

Redzuun ni rujn Sprit Dxan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu. ⁵ Naj agojl guibi'ä loj nani baxhal narä, luxh nicla tejtu di guiniabdiidx: “¿Caro chäälü?” ⁶ Dxejc sa'csi aguniä recosre lojtu, ni'c cayac-huin lastootu.

⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu. ⁸ Luxh laani, che jiäädni lo guedxliujre, susanijni xcäriejn rebejn te gacbeereni xcuent dojl, näjza xcuent xcäl'nabañnaya Dios, näjza xcuent yälguxhtis xten Dios. ⁹ Guluiizani xcuent dojl lojreni sa'csi direni chalilajz xtidxä. ¹⁰ Guluiini xcäl'nabañnaya Dios lojreni sa'csi sibisacä lo Xtaä, luxh dirutu fii loä. ¹¹ Guluiini xcuent yälguxhtis xten Dios lojreni sa'csi abejn Dios yälguxhtis loj beñdxab nani rnibee lo guedxliujre.

¹² 'Yu' xhidajlru diidx rlazä guiniä lojtu, niluxh digacdi gacbeetureni naj. ¹³ Che jiääd Sprit xten didxlii xten Dios, laani susanijni xcäriejntu te gacbeetu guiraa redidxguli, sa'csi dini guinii diidx xcuentcani, siniitisni ganax rediidx nani gudeed Dios lojni te guiniini. Siniizani xcuent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiniini lojtu. ¹⁵ Guiraa ni rajp Xtaä najc xtenä, ni'cni rniä suluini xhixtenä lojtu.

Xcälrac-huin lajztu sibixloj ni yälrbalajz

¹⁶ 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaä.

¹⁷ Dxejcti räjp rexpejn pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtaä.

¹⁸ Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

¹⁹ Guabee Jesús xhini'c rlazreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. ²⁰ Rniliäpac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. ²¹ Te gunaa che gaal xi'nni, rdejdn trabajw, dxejcti che aguyu' xi'nni, riäl lajzni gudejdn trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu naj, dxejcti che jädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ 'Nen redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtaä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ 'Aguniä guiraloj lojtu con cuent ni ruluii, niluxh sidzujñ dxej che diruna guiniä cuent ni ruluii lojtu. Siniä didxguyasi lojtu xcuent Xtadä. ²⁶ Neñ redxejga guiniabtu por laä. Luxh dizana guiniä siniabä narä loj Xtadä par la'tu, ²⁷ sa'csi laga- jca Xtadä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. ²⁸ Biriä lo Xtadä xhaguibaa, biälä lo guedxliujre, siunezäza lo guedxliujre, sibisacä lo Xtadä xhaguibaa.

²⁹ Räjñ rexpejñpacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii. ³⁰ Naj sii gucebeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjñ Jesús lojreni:

—¿La rililajzpacku naj, ä? ³² Asiäddzungajxh teb or luxh ala bidzujñ orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtadä suganäj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejpacku trabajw, colgusutijp lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejñpacni

¹ Che gulujx guniini loj rexpejñpacni rediidxga, guläsni lojni xhaguibaa, räjñni lo Dios:

—Xtadä, abidzujñ or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälñnibee loj guiraa reben guedxliuj, te gac gudeedni yälñnabajñ par tejpas lo guiraa renani badeedlu lojni. ³ Redee rajp yälñnabajñ par tejpas; numbeereni luj ni najc tejtis GuebDios, najza narä Jesucrist nani baxhallu lo guedxliujre.

⁴ 'Narä gulä'pä xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtadä, gulä'p xpala'nä con luj, con bala'n, con yälñrdimbicha' ni gopä galooli che gajdlı guirixtiej guedxliuj.

⁶ 'Loj rebejñ nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpacku najcreni, baniidxlureni loä, luxh rapdzu'tzreni xtiidxlu. ⁷ Naj agucebeereni guiraa rediidx ni guniä lojreni lojpacku siädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucebeepacreni lojlu biriä, ahuililajzreni lujpac baxhalı narä.

⁹ 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejñlu. ¹⁰ Guiralii ni najc xtenä, najczani

xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ 'Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtäädä ni najc Dxfanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab.

¹² Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³ 'Luxh naj sibusacä lojlu. Caniä rediidxre la_l ni yu'ä lo guedxliujre, sa'csi rlazä guibaa lajzreni si'c ni rbaa lazä. ¹⁴ Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵ Dina guiniabä cuäälureni lo guedxliujre, rniabä gudzucajlureni loj be_{nd}xab. ¹⁶ Direni gac bejn guedxliuj, sigajc ni dizana gacä narä bejn guedxliuj. ¹⁷ Basyareni con xtiidxlu, sa'csi xtiidxlu najc didxguliipac. ¹⁸ Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipaclu. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlazä gun guiraareni tejsi xhigab, sigajc ni rujnlu, Xtäädä, si'c runäza; te sigajc ni yu'äza con luj, sigajcza churenin con nuurnu, te gacbee rebejn guedxliuj luj baxhallu narä. ²² Yäl_rnibee ni baniidxlu loä, lagajc yäl_rnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzzalu narä.

²⁴ 'Xtäädä, guiraa renani baniidxlu loä, rlazäza churenin cadro chuä xhaguibaa, te fiireni xcäl_rnibeä nani baniidxlu, sa'csi huinälajzlu narä galooli che gajdli guirixtiej guedxliujre.

²⁵ Xtäädä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶ Aräpä lojreni chu najclu; säpäzaru lojreni te chu yäl_sanälajz sa' ni rajplu par narä nen_l lastooreni, te cuäzäza nen_l lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

¹ Che gulujx gunii Jesús rediidxga, huinäni rexpejn_pacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejn_pacni. ² Anajn Judas,

nani guto' Jesús, caro rij Jesús con rexpejn_{pacni} sa'csi si'csi-si'c rdxaag sa'reni ro'c. ³ Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶ Che gunii Jesús lojreni: “Laa naräni”, biäxhanreni, biajbreni lo yuj. ⁷ Dxejcti gunabdidxsac Jesús lojreni:

—¿Chu rguiltu?

Dxejc räjpzarenı stehuält:

—Jesús nani siääd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

⁹ Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” ¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹ Dxejcti räjp Jesús lo Pedr:

—Guluchee spaad xtenlu nen xpaguinni. ¿La dina tedä trabajwduxh nani agunibee Xtaädä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rnibee rexpejn Israel, gunaaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz. ¹⁴ Caifás najc nani balijdx rexpejn Israel nanab guet te niguii xcuent rebeñguejdxga.

Cadro gunii Pedr dini gumbee Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr näjza stee xpejn_{pacni} huinajł dejtž Jesús. Luxh numbee bixhojzro bejn_{ga}, biunäjzani Jesús lo xle' bixhojzro. ¹⁶ Bia'nti Pedr rolä'ga. Dxejc birii xpejn_{pac} Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷ Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn_{pac} Jesús, ä?

Räjp Pedr loj gunaaga:

—¡Xho gacäni!

18 Dxejcti sa'csi cayacnalduxh, caguse'creni boo te cagucha'lajzreni. Nájza Pedr suganäjreni, cagucha'lajzni ro guibooga.

Bixhojzro cayujn yälgunabdiidx lo Jesús
(Mt. 26:59-66; Mr. 14:55-64; Lc. 22:66-71)

19 Dxejcti gusloj cayujn bixhojzro yälgunabdiidx loj Jesús xcuent chuni'c najc rexpejn pacni nájza xcuent xhini'c ruluiini.

20 Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu nájza neñ guidoro cadro re' guiraa rexpejn Israel, nicla tej diidx dina ninixhiga'tzädi. ²¹ ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

22 Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

23 Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

24 Dxejcti guideb naliibni baxhal Anásni lo bixhojzro lo ni laa Caifás.

Gunisac Pedr dini gumbee Jesús
(Mt. 26:71-75; Mr. 14:69-72; Lc. 22:58-62)

25 Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn pac niguiiga, ä?

Badzu'ni diidxga räjpni:

—¡Xho gacäni!

26 Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

27 Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

Jesús nez loj Pila't
(Mt. 27:1-2, 11-14; Mr. 15:1-5; Lc. 23:1-5)

28 Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

30 Dxejcti räjpreni lojni:

—Paru di niguiire niajc te beṅ latsiaj, dinu niopnāni ladzṅaa guejblu.

³¹ Rājṅ Pila't lojreni:

—Colchanāni, colḥuui xho gunnājṅtuni yālguxhtis con lagajc xleiitu.

Dxejc rājṅ rexpejṅ Israel lojni:

—Di xleiitu gusaan ju'tnu te bejṅ.

³² Guniireni si'c te guzobj diidx nani gunii Jesús xcuent xho guetni.

³³ Ni'cni biusac Pila't neṅ Pretorio, gurejdxni Jesús rājṅni lojni:

—¿La luj najclu reii xten rexpejṅ Israel, ä?

³⁴ Dxejcti rājṅ Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

³⁵ Dxejcti rājṅ Pila't lojni:

—¿Xhixh näj narä nacä te xpejṅ Israel? Lagajc rebeṅ lajdxlu näjza rebixhojz bateedlu ladzṅaa. ¿Xhi bejṅlu?

³⁶ Dxejcti rājṅ Jesús lojni:

—Xcälṅnibeä dini gac yälṅnibee sa' ni yu' guedxliujre. Paru najc xcälṅnibeä te yälṅnibee sa' ni yu' guedxliujre, ala cagucuaa rexpenä te di tedä ladzṅaa rexpejṅ nani rnibee Israel. Naj di xcälṅnibeä gac yälṅnibee sa' ni yu' lo guedxliujre.

³⁷ Ni'cni rājṅ Pila't lojni:

—¿Reii najclu, ä?

Rājṅ Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najṅ didxlii, reni'c rucua diajgreni xtidxä.

³⁸ Rājṅ Pila't lojni:

—¿Xhini'c najc didxlii?

Che guniini si'c gunisacni loj rexpejṅ Israel:

—Dina guidxälä nicla tej xtojḷ bejṅre. ³⁹ Niluxh la'tu rajptu te costumbr, casob lani pascw, ruslaanu te bejṅ ni yu' neṅ latzguuib. ¿Xhi najtu? ¿La rlajztu guslaä ni najc reii xten rexpejṅ Israel, ä?

⁴⁰ Dxejcti guiragajcreni guredxa', rājṅpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguuib lojni. ² Bejṅ resoldaad te coronguejch, bazalrenini yej Jesús. Dxejcti bahuajcwrenini te ladmoraad. ³ Dxejcti gusloj gubigreni lojni, te rājṅpreni lojni:

—¡Gubajṅ par tejpas Reii xten rexpejṅ Israel!

Dxejc huääzreni lojni.

⁴ Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcní, nacwzani ladmoraadga. Dxejcti räjp Pila't lojreni:

—¡Colhuii! ¡Aree niguiire!

⁶ Ni'cni, che bahuii rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojlni.

⁷ Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

⁸ Che biejn diajg Pila't rediidxga, bidxejbruni, ⁹ biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰ Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

¹¹ Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhrueni, räjpreni:

—Palga luj guslaaluni, dilu gac xamiigw reii César, sa'csi chutis ni rnií najcni reii, najcni xcontraar César.

¹³ Che biejn diajg Pila't rediidxre, gulääni Jesús, dxejcti gurej Pila't lo yagxhiil cadre rujnni yälguختis, cadre laa Litóstroros con didx-griegw sälojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuii, aree xreiitu.

¹⁵ Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaä xreiitu lo cruzj, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiinu.

¹⁶ Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj**(Mt. 27:32-44; Mr. 15:21-32; Lc. 23:26-43)*

¹⁷ Dxejcti cua'reni Jesús, biriini ro'c guideb nuuni xcruzjzni, cheni bidzujnlireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo cruzj. Bacuaazareni tio'p niguii lo stio'p cruzj, tejpgani te laad cuä' Jesús. ¹⁹ Dxejc bacuaa Pila't diidx ni chää yejc xcruzjzni; rediidxga najc scree: "Jesús, beñ Nazare't, Reii xten rexpejn Israel." ²⁰ Xhidajl bejn bil diidx ni caj yejc xcruzjzni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw, näjza didx latin bacuaareni rediidxga.

²¹ Dxejcti räjp rebixhojzro xten rexpejn Israel loj Pila't:

—Na'c nucuaalu: "Reii xten rexpejn Israelni", laacaru nacuaalu: "Laani najni, najcni reii xten rexpejn Israel".

²² Dxejcti räjp Pila't lojreni:

—Nani abacuaä, abacuaä. Si'c jia'nni.

²³ Dxejcti resoldaad, che gulujx bacuaareni Jesús lo cruzj, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadijbni, guejnni hasta lo yuj guc-cheeni. ²⁴ Ni'cni räjpreni lo sa'reni:

—Na'c guitiäjnuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: "Batiäjsreni xhablojiaä; yejczä xhabä ni bia'n gudzujtreni daad."

Ni'cni bejn resoldaad recosre. ²⁵ Niluxh cuä' xcruzj Jesús suga' xnanni, con bäjl xnanni, ni laa Marii chää'l Cleofas, näjza Marii Magdalen. ²⁶ Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

²⁷ Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejn pacni xnan Jesús rolijz-pacni.

*Xho gujt Jesús**(Mt. 27:45-56; Mr. 15:33-41; Lc. 23:44-49)*

²⁸ Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹ Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. ³⁰ Che gulujx gu' Jesús vinagrga, räjpni:

—Agulujxni.

Dxejcti basajb yejcn, baslaani xaimni.

Xhi bejn te soldaad lo Jesús

³¹ Dxejga najc dxe vispr xte lani pascw, che ru' mandaad par lanijga. Rexpejn Israel di rlajzreni nia'n rebejnnga lo recrujz, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu qui'ch ni'reni te guetreni, te jiäjtreni loj recrujz. ³² Dxejcti bidzujn resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga. ³³ Che gubigreni lo Jesús, bahuiireni alagujtni, direni nigui'ch ni'ni. ³⁴ Tej soldaadga baqui'tzni te lans ro' xcustiini, dxejc bixe' rejn näjza nis. ³⁵ Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. ³⁶ Sa'csi si'c gujc guira'ti, te guzojb xtidx Dios cadro caj: "Nicla tej xtzujtñi di guech." ³⁷ Sigajcza lo stee guijtñi caj diidxre: "Sidxelojreni loj nani biguijtñi te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te beñ Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätñi Jesús lo cruju. Cuäjbza Pila't, dxejc biääd José gulätñi Jesús, sanätini togoolga. ³⁹ Näjza Nicodem biääd dxejc, nani galoo huininäj Jesús te guxhijn. Biädñani si'cti tiuu kil te dänejh ni najc si'c yaal ni laa mirra näjza áloes. ⁴⁰ Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. ⁴¹ Gajxh cadro cuaj Jesús lo cruju, yu' te huert, neñ huertga yu' te bacoob si'c te biliääd, cadro nicla tej bejn gajd guiga'tz. ⁴² Sa'csi abidzujn dxej vispr lani pascw xten rexpejn Israel, luxh gajxh suga' biliääga, nenga gudixhreni Jesús; si'c biga'tztni.

20*Gubansac Jesús loj rebenqut*

(Mt. 28:1-10; Mr. 16:1-8; Lc. 24:1-12)

¹ Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. ² Dxejcti ruxuñni gubi'ni te huiye'tzni lo Simón Pedr näjza lo stee xpejn pac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuñ Pedr näjza stee bejnnga, huijreni nez lo baa. ⁴ Ruxuñ guiro'preni. Niluxh stee bejnnga ruxuñduxhruni loj Pedr. Laani ganid bidzujñni lo baaga. ⁵ Dxejcti guretänni

te bahuiini neṅ ba-biliääga. Bahuiini te laad naga' relajdtis nani bidejb Jesús, luxh dini niu' neṅ baaga. ⁶ Dxejc bidzujungajc Pedr, biugajcni neṅ baaga, bahuiini naga' relajdga te laad. ⁷ Bahuiizani lajd ni guyu' yejcn, ni'c nie'tni saru, naga'ni te laad. ⁸ Dxejcti biu' stee bejn̄ga nani bidzuj̄n ganid. Che bahuiini neṅ baaga, huililajzn̄i gubaṅsac Jesús. ⁹ Sa'csi gajdreni gachee ni caj lo reguijtz, cadro caj nanab guibaṅsacni loj rebengut. ¹⁰ Dxejc gubisac guiro'p rexpejn̄pacni rolizreni.

Baluiloj Jesús loj Marii Magdalen

(Mr. 16:9-11)

¹¹ Laltis suga' Marii cuä' baaga, cayoouni. Ni'cni laḷ ni cayoouni, basajb lojni te bahuiini neṅ baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ¿xhicuent roonlu? ¿Chu rguiillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsäni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni neṅ xtidx hebreo:

—¡Raboni!

(Sáloj diidxga “Mastr”).

¹⁷ Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸ Dxejcti huij Marii Magdalen, bidzuj̄n̄ni loj rexpejn̄pacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejn̄pacni

(Mt. 28:16-20; Mr. 16:14-18; Lc. 24:36-49)

¹⁹ Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn̄pacni, sa'csi rdxejbreni rexpejn̄ Israel. Chela bidzuj̄n̄ Jesús, guzuj̄ni nez galäiireni, räjpni lojreni:

—Suchu yälrbedxi lastootu.

²⁰ Che guniini si'c, baluigajcni renaani lojreni näjza cuä' xcustiini. Ni'cni bibaduxhla_jz rexpej_npacni che bahuiireni lo Dad Jesús. ²¹ Dxej_c räjp Jesús lojreni stehuält:

—Suchu yäl_rbedxi lastootu. Si'c ni baxha_l Xtadä narä, si'cza ruxha_lä la'tu.

²² Che gulujx guniini rediidxga, balejbni yejcreni, räjpni, lojreni:

—Suguibaj_n Sprit Dxa_n xten Dios ne_n lastootu. ²³ Rextoj_l rebej_n nani siäl_lajz_tu, sibicajreni. Rextoj_l rebej_n nani ditu jiäl_lajz, siannäjreni redo_jlga.

Tomás bahuii lo Jesús ni gubansac

²⁴ Tomás, ni laaza Didimo, najcni te retzubitio'p xpej_npac Jesús. Rutini che biäd Jesús loj rexpej_npacni. ²⁵ Dxej_cti räjp rexpej_npacni lojni:

—Abihuiinu loj Jesús, agubansacni loj rebengut.

Dxej_cti laani räjpni lojreni:

—Palga dina fiä loj renaani cadre caj seen xten reclaab, palga dina guqui'tzä bicuenaä cadre guyu' claabga, guqui'tzäza naa cadre bixal cuä'ni, di lazä chalii gubansacni loj rebengut.

²⁶ Che gudejd xhuj_n dxej, tresac rexpej_npacni ne_n yu', nadxaagza Tomás lojreni. Niäudzu'tz yu'ga, luxh chela gucbeereni abidzuj_n Jesús, guzujni galäiireni, räjpni lojreni:

—Suchu yäl_rbedxi lastootu.

²⁷ Dxej_cti räjpni loj Tomás:

—Baqui'tz bicuenaalu ree loj patnaä, basälza naalu cuä'äre, na'c ractio'p lajzlu, huililajzpac gubansacä loj rebengut.

²⁸ Dxej_cti räjp Tomás lojni:

—iXtadä, Xtioozä!

²⁹ Dxej_cti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicient bacuaani reguijtzre

³⁰ Xhidalroduxhru dzuun bejn Jesús nez loj rexpej_npacni, nani di nicaj lo guijtz. ³¹ Redzuunre nani bejn Jesús nani cuaj lo guijtzre cuajni te chalilajz_tu diidxre: Jesús najc Crist, nani cabäjz rebej_n jiäd, Xi'n Dios. Luxh che chalilajz te bejn xtiidxni, saj_pni yäl_nabaj_n par tejpas.

21

Jesús baluilojni lo gajdz xpej_npacni

¹ Dxej_cti baluiloj Jesús loj rexpej_nni ro' nisdoo ni laa Tiberias. Scree baluilojni lojreni. ² Nadxaag sa' rebej_nre: Simón Pedr, Tomás ni laaza Didimo, näjza Natanael, nani

siääd Caná xten Galilee, rexi'n Zebedeo, näjza stio'p rex-pejnpacni. ³ Dxejcti räjp Simón Pedr loj resa'ni:

—Chanazä bäjł.

Räjpreni lojni:

—Näjza nuure chonnu.

Dxejcti sääreni, huä'preni neñ te barcw. Guideb guxhiñga xhet bäjłdi gunaazreni. ⁴ Che acayanij loj guedxliuj, suga' Jesús ro' nisdoo, di rexpejnni niembeeni. ⁵ Ni'cni räjp Jesús lojreni:

—Rexi'nä, ¿la xhet bäjłdi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaz-tuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäjł. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjł, dxejcti gutiäjsni lo nisdoo. ⁸ Sgaii rexpejnpacni biädnäreni rebarcwga sa'csi ameer guidzujñreni ro' nisdoo, si'cti tegayuu metrtis cayäädx. Siädnäzarenı guijxh guida rebäjł. ⁹ Che bidzujñreni ro' nisdoo, bahuiireni re' guiboo, ro'c dzuub te bäjł näjza yätxtiil cague'. ¹⁰ Dxejcti räjp Jesús lojreni:

—Coltanä gaii bäjł nani entis gunaaztu.

¹¹ Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bäjł neñ guijxhga, niluxh dini niräsyä' mase guyu' xhidalduxh bäjł neñni. ¹² Dxejcti räjp Jesús lojreni:

—Coltaa te gauxharejntu.

Nicla tej rexpejnpacni dini niabdiidx lojni: “¿Chu luj?” sa'csi anajnreni laa Jesúsni. ¹³ Dxejcti cua' Jesús yätxtiil, badeedni lojreni, sigajcza rebäjł.

¹⁴ Dee najc ni riojn huält baluilojni loj rexpejnpacni, che gubañsacni loj rebegut.

Jesús rninäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. ¹⁸ Rniliäpac lojlu, che gujclu bi'nru, la-gajc luj rajcwlu xhajblu, rijlu cadrotis rlajzlu. Che anajclu beñgool, susgaatistlu naalu te gushuajcw ste'ca bejn xhajblu, te chanäreni luj cadro di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejñni, nani sanälajzru Jesús, siädnajlni dejtzeni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?”

²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejnnga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejnnga najc narä, xpejn Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

²⁵ Yu'ru xhidalduxh dzuun ni bejn Jesús. Palga gucuaanu guiralii redzuun ni bejn Jesús, nicla lo guedxliujre di gal chu reguijtz cadro xcajni.

Redzuun Rexpejn Dios

Siääd Sprit Dxan xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejñpacni. Sprit Dxan xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejñpacni. Tiuu dxej baluilojni loj rexpejñpacni balti huält te gacbeereni agubansacni. Guniizani lojreni xcuent xcälrnibee Dios.

⁴ Che gudejd tiuu dxejga, batojp Jesucrist rexpejñpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpn:

—Dee abiejn diajgtu guniä lojtu. ⁵ Juan batiobnis con nis, luxh naj guxii dxej cayäädx dxejcru siääd Sprit Dxan xten Dios te cuääzni neñ lastootu. Si'c guirobnistu —räjpn.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexpejn Israel, ä?

⁷ Dxejcti räjp Jesucrist loj rexpejñpacni:

—Di riäjł gacbeetu xcuent redxej näjza retiemp nani abasobxgaa Dios con xcälrnibeeni. ⁸ La'tu sica'tu yälrnibee che abiääd Sprit Dxan xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räjpn.

⁹ Gulujxtis gunii Jesucrist rediidxga, luxh lałni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn nuhuii lojni. ¹⁰ Lałni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni. ¹¹ Dxejc räjp reangl loj rebejn:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni najc apostcoob

¹² Dxejc birii rebejn yejc dalje' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii saj sareni dxej ni rusilajzreni. ¹³ Che biu'reni

Jerusalén, bidzujnreni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob. ¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajl bejn. Dxejcti huisulii Pedr galäiireni, räjpni loj rebejn:

¹⁶ —Caniä lojtu, resa'ä, nanabpac soob xtidx Sprit Dxaan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni. ¹⁷ Gujc Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejn dzunguijdx ni bejn, badesacni meel lojreni. Gusiireni te la' yuj. Dxejcti lagajc Judas basäl duu guejn, guzäbnajl ni lo bej, gujtni. Gusaguijni, dxejcti biräjs xque'ni birii guiraa reziini. ¹⁹ Che biejn diajg rebejn Jerusalén si'c, gulälajreni yujre Acéldama, ni säloj yurejn. ²⁰ Nen guijtz ni laa Salmos abacuaa toDavid rediidxre:

Sujianxteb rolijzni;
na'c cuääzru bejn rolijzni;
näjza:

Suxca'za ste'ca niguii xtzuumni.

²¹ Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, ²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäy niguiire nuunu gusule'nu diidx gubanpac Jesucrist lo rebejgut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, ²⁵ te jiu'ni lo dzuun näjza lo yäl apost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäy Matías stzubiteeb reapost te gujcreni tzubitio'p apost.

2

Biääd Sprit Dxaan xten Dios

¹ Che bidzujn dxej ni rajc lanij xten Pentecostés, tre' guiraareni tejsi lajt nen te yu', ² chela gusloj cayubej xhaguibaa si'c te beroduxh, bachajni guideb nen yu' cadre

suga'reni. ³ Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴ Biu'ti Sprit Dyan xten Dios nen lastoo guiragajcreni. Dxejc gusloj caniireni garen-garen didxsaj si'ctisni badeed Sprit Dyan xten Dios guiniireni.

⁵ Nen redxejga, xhidajl rexpejn Israel ni sasanajpac xtidx Dios bidzujn guedx Jerusalén. Xhidajl lajt biriireni siädreni.

⁶ Che biejn diajgreni guyubej beduxhga, bidojp reben xhidaalga, bachaag sa'reni. Rdxeloduxh reben xhidaalga sa'csi cayejn diajgreni canii reapost xtidxsajpac cade tejreni.

⁷ Cadxelojreni räjpreni:

—¡Bahuilaa! ¿La et ben Galileedi renani canii, ä? ⁸ ¿Xhoxh riejn diajgnu caniireni xtiidxpacnu si'ctis ni rniinu laadxnu, ä? ⁹ Najcnu ben nación Partia, ben nación Media, ben región Elam, ben Mesopotamia, ben Judea, ben estad Capadocia, ben región Ponto, näjza ben Asia. ¹⁰ Najczanu ben distrit Frigia, ben estad Panfilia, ben nación Egipto, näjza bejn ni siäd stelaad Cirene, te estad nen Africa. Loj rebejn ni siäd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. ¹¹ Yu'za ben Creta. Yu'za ben nación Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

¹² Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejn ni baxhiznäjreni, räjpreni:

—Agusojz redee.

Gunii Pedr loj rebejn

¹⁴ Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa.

¹⁶ Dxejc scree gunii Joel che guniini xtidx Dios agujc xchero.

¹⁷ Räjp Dios:

Sidzujn dxej che guxhalä Xsprit Dyanä cuääzni nen lastoo guiraa rebejn.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluijoj bacal recos nani guluiä lojreni.

¹⁸ Guxhalä Xsprit Dyanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.
 20 Sicäy loj gubijdx, sajc bäii si'c rejn.

Sajc guiraa recosre,

dxej cru sidzujn dxeduxh che jiälsacä narä, Dios.

21 Dxejc guiraa rebejn nani cueedx guiniab gacnäy Diosreni,
 reni'c siliaa lo dojl.

22 Räjpedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseen nani bejni nez lojtu. Lagajc Dios badeed yälrnibee loj Jesucrist te bejni redzunroga. La'tu nancheetu dee. 23 Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznaa rebenquijdx te bacuaareni Jesucrist lo cruzj te bagu'trenini. 24 Baspañsac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. 25 Che gubañsac Jesucrist, guzobj diidx ni bacuaa David lo guijtz xcuent Jesucrist. Räjpedr David lo Dios: Guira dxej ruhuiä lojlu, Dios.

Suga'lu xladbeä cayacnäjlunä narä te di guidxejb lastoä.

26 Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

27 Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

28 Abaluiilu loä xho guibanä par tejpas.

Sibalazduxhä sa'csi guibanä luj,

si'c räjpedr David xcuent Jesucrist.

29 Räjpedr:

—Guyasi guiniä lojtu agujc xchero gujt David. Aguyutzut'zni neñ baa. Sajc guihuiinu baa cadre biga'tz David. 30 Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. 31 Sa'csi baluixgaa Dios recosre lo David, ni'c räjpedr David sibañsac Crist lo rebenqut sa'csi di Dios gusaan jia'n xaimni neñ baa, dizani gusaan gudx tiejxhni. 32 Guläs Dios Jesucrist lo rebenqut. Nuure bahuiloonuni, najcnu testiigw gubañsacni lo rebenqut. 33 Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujn guira'ti nani cahuiitu, nani cayejn diajgtu nadxej. 34 Di David nij xhaguibaa, sa'csi lagajc David räjpedr:

Gunii Dios lo Dad nani rnibee loä: “Gurej xladbeä

35 che guidzujñli dxej gudzugä guiraa reni rdxe'ch lojlu te gacheereni luj rnibeelu guira'ti.”

³⁶ 'Rniliäpac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpen Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruzj, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxa cuääz neñ lastootu. ³⁹ Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcru gunii Pedr xhidajlru diidx, balijdxni rebejn:

—Colguirii loj rebeñ latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ mił bejn. ⁴² Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

Xho gubajn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr. ⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni neñ guidoro xten Israel. Tejsi najc rexhigabreni. Gudaunäj sa'reni roliz cadetejreni, guiraareni bibalaznäduxh sa'reni. ⁴⁷ Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

3

Biajc niguii nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rca-choñ gudxej. ² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan neñ guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjpreni lojreni.

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Rāj̄p Pedr lojni:

—Xhetliidi meeldi rapā, nani rapātis sunidxā lojlu. Xcuent xcāl̄rnibee Jesucrist, beñ Nazare't, rniā lojlu: ¡Gusulii! ¡Gusaj! —rāj̄pni.

⁷ Dxejcti gunaaz Pedr ñaani, gulāsnini. Biligajc ni'ni, gusutijp ni'ni. ⁸ Huisuyāl̄ni, gusajni. Biunāj̄ni Pedr nāj̄za Juan neñ guidoro. Rsiajni, rtiāsni, calā'pni xpala'n Dios. ⁹ Bahuii xhidajl beñ lojni neñ guidoro, rsiajni, calā'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhrenei bahuiireni xhi gusajc niguii ni gucxhuu ni'ni.

Baluii Pedr xtidx Dios neñ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr nāj̄za Juan, naztzu'tz niguiiga ñaareni. Ruxuñ guiraa rebejñ bidzujñ neñ cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejñ rāj̄pni lojreni:

—¿Xhicuent rdxeloj guejbtu, rexpejñ Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcāl̄rnibee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, nāj̄za toxtadgoldoonu Jacob, lagajc Diosga abadeed yāl̄rnibee loj Xi'nni Jesús. Niluxh la'tu bateedtuni ladzñaa reguxhtis. Che rlajz Pila't ni rnibee nuslāa Jesucrist, ditu nicāj̄b niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxan xten Dios nani rujñ ganax dzunsa'c. Alga gunabtu birii te niguii nani bagu't bejñ. ¹⁵ Jesucrist rudeed yāl̄nabajñ, luxh la'tu gunabtu bacuaareni Jesucrist lo cruzj. Gulāssac Dios Jesucrist lo rebeñgut. Bahuiloonu nabajñ Jesucrist, najcnu testiigw gubansac Jesucrist lo rebeñgut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcāl̄rnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te najcni si'cni rhuiituni ñaj.

¹⁷ Rexpejñ Israel, narā nanā di'tu niacbee, diza rexcuxhtistu niacbee laa Xindxan xten Dios ni bacuaatu lo cruzj. ¹⁸ Scree gujc te guzobj xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni col̄siechljaztu, col̄guibi' loj Dios te guibicaj xtojltu. Dxejc susiālyuj Dios lastootu, sujñni gac nacoob guira'ti, si'cni bia'n diidx gacni. ²⁰ Lojtu suxhalza Dios Jesucrist nani rnibee, nani aguleni galooli. ²¹ Ñaj nungāj̄l jia'n Jesucrist xhaguibaa dxejli guscoob Dios guiralii recos

si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii toMoisés lo retoxtadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexpejn Dios.”

²⁴ Räjpza Pedr:

—Sigajcza agunii guiralii reniguii nani gunii xtidx Dios. Si'c agunixгаа toSamuel, näjza guiraa reniguii ni siädnajlai, xcuent recos ni cayajc neñ redxejre. ²⁵ La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl te xajglu ni guspalmazduxh reben guedxliuj, sa'csi suslaanireni lo dojl.” ²⁶ Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

4

Baluu Pedr näj Juan xtidx Dios loj reguxhtis

¹ La l ni caniireni lo rebejn, ro'c bidzujñ rebixhojz xten Israel näjza nani rnibee lo resoldaad xten guidoro näjza re-saduceos. ² Bidxe'chduxhrenei sa'csi cagulijdxrenei rebejn, cayäjpreni:

—Sibañsac rebejn lo rebengut sa'csi gubañsac Jesucrist lo rebengut.

³ Gunaaz reguxhtisrenei, biäureni sa'csi agudxej luxh abiäu jusgaad. Neñ latzguuib barareni yääl. ⁴ Xhidajl renei biejn diajg xtiidxrenei huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii lei, ⁶ näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebix-hozro ni rnibee. ⁷ Gunibeerenei biääd Pedr näjza Juan gusuj galäiireni te gunabdiidxrenei lojreni:

—¿Chu xcälrnibee rajptu? ¿Chu laj basä'ttu te basiajctu nigu-iire?

⁸ Dxejcti sa'csi cayu Pedr diidx ni canii Sprit Dxan xten Dios neñ lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel, ⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajctnu niguiiga, ¹⁰ gusule'nu xcuent dee te gacheetu te gacheeza guiraa rexpejn Israel. Xtidx Jesucrist najc yälrnibeduxh. Diidxga abasiajct ni' niguiire, xhet rajcdini suga'ni nez lojtu. La'tu abacuaatu

Jesucrist lo cruzj, niluxh Dios guläsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcäjtü che runcheetu te yu'. Per Dios abejn najc Jesucrist si'c guij nani maazru nacsäc, nani guyu' squiin xte yu'. ¹² Xtebtis Jesucrist rusläa bejn lo dojl, ruti stee bejn lo guedxliuj nani baxhal Dios te gusläani bejn lo dojl —si'c räjp Pedr.

¹³ Che biejn diajgreni xtidx Pedr, bidxeløjreni sa'csi di Pedr näjza Juan guidxejb, dizareni guituj. Dxejcti räjp rebixhojz ni sajcro lo sa'reni:

—Direni ganduxh guijt, bejntisreni.

Dxejcti gucheereni gusanäj redee Jesucrist, lojni bisieedreni. ¹⁴ Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶ Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaz-nuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcro guicuaadiaagnu? ¿Xtiidx la'tu, o xtiidx Dios? ²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc basläa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajcreni xcuent yälmilagwr agudejdn tiuu ijz.

Guredx-gunab rexpejn Jesucrist lo Dios

²³ Che basläa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza rebengool lojreni. ²⁴ Che biejn diaj rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, nenreni, ²⁵ nani bejn basoob toDavid xtidx Sprit Dxa te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj nájza reguxhtis xten reguejdx te gudxojnreni xtzun Dios nájza xten Dad Crist nani baxhal Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes nájza Poncio Pila't nájza rexpejn Israel nájza rebenzijt nani di gac xpejn Israel. Bidxechnájnreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuii xho cagusacsíreni nuure, gucnáj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. ³⁰ Baniidx xcälrnibeelu loonu te guisiajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biääd Sprit Dxan xten Dios basutijpruni lastooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rexhixtenreni te xca' guiraareni nani rquiinreni. ³³ Gucnáj Dios reapost, gusutzu'tzreni bijreni diidx bahuilorenjreni loj Jesucrist che gubansacni lo rebengut. Gucnáj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojp xyujni, rolijzni, bato'renini, dxejcti biäädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías náj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo reben dxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

⁷ Pet agujc choṅ or gujtni chela bidzujṅ chääl Ananías. Dini gan agujt chäälni. ⁸ Räjṅ Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjṅ Safira lojni:

—O'n, si'c huijni.

⁹ Dxejcti räjṅ Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlaiztu gusgueetu Sprit Dxan xten Dios? Ro lä' siäd renani huicua'tz chäällu. Naj näjza luj chacua'tzreni nen baa.

¹⁰ Si'ctis biajb Safira, gutgajczani. Dxejcti bidzujṅ rebi'n, bahuiireni agujtni. Dxejcti guläsrenini, biriireni huicuatzgajrenini cuä' baa cadre biga'tz chäälni. ¹¹ Bidxebduxh guiraa rexpejn Jesucrist, näjza guiraa rebejn nani biejn diajgni rescosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebeṅguejdx. Nadxaag sa' rexpejn Jesucrist, caguchaagreni diidx nen cordoor ni laa Salomón. ¹³ Guyu' xhidajl bejn ni di nuchaag lo rexpejn Jesucrist sa'csi bidxebbreni guchaa-greni lojreni. Rebeṅguejdxga guläpduxhrene xpala'n rexpejn Jesucrist. ¹⁴ Nen redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujṅ xhidajl rebejn ni siäd ste'ca guejdx. Biädnäreni rebejn ni cayacxhuu näjza balti bejn ni yu' benṅxab nen lastooreni. Con xcälrnibee Jesucrist basiajc reapost rebeṅ racxhuu, gulääzarenini rebeṅxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebeṅguejdx xpala'n reapost sa'csi basiajcreni rebeṅ racxhuu. ¹⁸ Gunaazreni reapost. Basäurenini nen latzguiib. ¹⁹ Niluxh yälga, biäd te angl xten Dios, baxhalni ro' latzguiibga. Dxejcti gulääni reapost nen latzguiib. Räjṅni lojreni:

²⁰ —Colchäj guidoro. Ro'c colguinii lo rebejn xho gac guibaṅnäjreni Dios par tejpas.

²¹ Che biejn diajgreni si'c, rsildooru biu'reni nen guidoro, ro'c baluiireni xtidx Dios lo rebejn.

Dxejc bixhojz nani rnibee, nájza rebengool, bachagsa'reni gurejdxreni guiraa reguxhtis xten guidoo, nájza guiraa reguxhtis xten rexpejn Israel. Dxejcti gunibeereni jádnä reguixhajg reapost nani biäu nen ladtguiib. ²² Che bidzujn reguixhajg latzguiib, bahuü reguixhajg nen latzguiibga, niluxh rut yu'di nen latzguiib. Che gubi'reni biädnäreni diidx, räjpreni loj reguxhtis:

²³ —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

²⁴ Che biejn diajg bixhojz ni rnibee, nájza capitán nani rnibee resoldaad xten guidoro, nájza rebixhojz, ben tio'p lajzreni, räjp lo sa'reni:

—¿Xhini'c gujc? ¿Xhoni gac naj? —räjpreni.

²⁵ Dxejcti bidzujn te niguii, räjpni lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —räjpni.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejceni. ²⁷ Che bidzunäjreni reapost, räjpreni suureni nez loj reguxhtis xten Israel, sas gunii bixhojz ni rnibee, ²⁸ räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlanjtu cuaquijtu nuure bagu'tnu Jesucrist.

²⁹ Dxejc räjp Pedr nájza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. ³⁰ Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsní lo rebengut. ³¹ Naj agule'c Diosni xladbeeni cadro rnibeeni, abadeedza Dios yälrnibee loj Jesucrist te gusläani nuure, te si'c rlanjni guibicaj xtojł guiraa rexpejn Israel nani gusiechlajzreni. ³² Bahuüloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

³³ Che biejn diajg reguxhtis rediidxga, bidxechduxhreni, rlanjreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe'tdade'ga. Gunibee Gamaliel guirii reapost nen yu'ga.

³⁵ Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguiire. ³⁶ Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu

bejn̄ni. Che bagu'trenini, bire'ch guiraa rexpejn̄ni, xhetru bejndireni. ³⁷ Neñ ijz ni guyu' cens, biriiza Judas ni siäd Galilee. Dxejc gurejdxni xhidajl bejn̄ ni huinajlni. Bagu'tza bejn̄ni, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguiire, rexpejn̄ Jesús. Palga guejbcareni cayujnreni dzuunre, xtebcani sinitlojni. ³⁹ Palga xtzuum Dios ni cayujnreni, digacdi guscuääznu dzuunga, sa'csi guidilnu guidxe'ch Gueb Dios loonu.

⁴⁰ Bichaglajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴² Guixe-guixee lahtis baluiireni xtidx Jesucrist neñ guidoro näjza rolijz bejn̄. Cagusule'reni diidx lo rexpeñ Israel:

—Jesús najc Crist nani cabääztu jiaäd.

6

Gulereni reniguii ni gudeed yätxtiil lo rexpejn̄ Jesucrist

¹ Neñ redxejga, xhidallo gujc rexpejn̄ Jesucrist. Niluxh gusloj camojm̄ rexpejn̄ Jesucrist nani rnii didx griegw. Räjpreni:

—Xhet laadi cayujn rebejn̄ ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn̄ Jesucrist, räjpreni lo guiraarenini:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni. ⁴ Te si'c sajc chanuutis guiniabnu lo Dios, guiluiizanu xtidx Dios lo rebejn̄.

⁵ Guiralii rebejn̄ga bidxaglajzreni diidxga. Dxejcti gulereni Esteban, te niguii ni rilajzpac xtidx Dios, rbäjzza Sprit Dxan xten Dios neñ lastooni. Gulezarenini Felipe, Prócoro, Nicanor, Timón, Parmenas; gulezarenini Nicolás nani siäd guedx Antioquia. Nicolás najc te proselite, nalajznu, dini gac xpejn̄ Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexpejn̄ Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaarenini yejc reniguiiga si'c te seen abiu'reni lo xtzuumreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazrenini Esteban sanärenini lo rebixhojz nani rnibee

⁸ Gucnäduxh Dios Esteban, bejn ni redzunro, remilagwr nez lo rebejn. ⁹ Dxejc reben guidoo ni laa Libertados gusloj cadilnäj Esteban. Lojreni nadxaag ben Cirene, näjza ben Alejandría, näjza gaii ben Cilicia, näjza sgaii bejn ni siäd reguedx Asia. ¹⁰ Reniguiire di niajcdi nuzejreni diidx lo Esteban, sa'csi nasinduxhni, luxh cayacnäj Sprit Dxaan xten Diosni. ¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban to Moisés näjza Dios.

¹² Scree gujc bache'chreni rebejn näjza rebejn ni ruluii leii näjza reben_gool. Dxejcti bachagsa'reni, gunaazreni Esteban. Huinäreni lo reguxhtis xten Israel. ¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten to Moisés näjza guidodxaanre.

¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx to Moisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojreni:

—Colgucuaadijg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán.

³ Räjp Dios loj to Abram: “Birii lajdxtu, basa'n guiraa resa'lu. Huij cadrotis guluiä lojlu” ⁴ —räjp Esteban—. Dxejcti birii to Abram lajdx reCaldeos. Huiläjzni guedx Harán. Che gujt xtadni, biädnä Dios to Abram nez ree, cadre rbääznu naj. ⁵ Di Dios nuzalajz nicla tla' yuj cadre suu te ni' to Abram. Niluxh räjp Dios sudeedni yujga lo rexajg to Abram, jiannäjreni yujga che guet to Abram. Niluxh nicla gajd xi'n to Abram chu dxejc.

⁶ Stee huält räjp Dios lo to Abram: “Rexi'nlu, rexagdoolu, siläjzreni si'c benzajt. Ladxbejn gacreni mos, ro'c susaci bejnreni si'cti tajp gayuu ijz.” ⁷ Räjp Dios: “Narä sunä castiigw rebejn ni gusacsireni che najceni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios

⁸ —räjpza Esteban—. Dxejcti si'c bia'n Dios diidx con to Abram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n to Abram, ni laa Isaac. Che guyu'ni xhujn dxej, basälza to Abram beegani si'c te seenza. Sigajcza bennäj Isaac xi'nni

Jacoob. Sigajcza bennäj Jacoob guitzubitio'p rexi'nni nani najc rexpengoldoo xpen Israel.

⁹ Räj p Esteban:

—Guitzubiteb rexi'n Jacoob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. ¹⁰ Che gudejd José trabajwduxh, gucnäj Diosni. Badeed Dios yäl nasin duxh lojni. Bejn Dios bichagljaz reii Faraón José. Badeed reii Faraón gujcn gubernadoor xten Egipto. Gunibeeza José guira'ti xhixten reiiga.

¹¹ Räj pza Esteban:

—Che bidzujñ dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. ¹² Che biejn diajg xtadgoldoonu Jacoob yu' xhi gaureni neñ reguejdx xten Egipto, ro'c baxhałni rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxhał José diidx jääd xtadni Jacoob, näjza guiraa resa'ni, cuääzreni Egipto. Najc rebejnğa si'cti gayonbitzubigaii bejn. ¹⁵ Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu. ¹⁶ Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

¹⁷ Räj p Esteban:

—Che bidzujgajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. ¹⁸ Dxejcti guyu' te xreii Egipto ni di gan guiraa redzunsac nani bejn toxtadgoldoonu José. ¹⁹ Reiiga basgueeni rexpengoldoonu, basacsinireni, trabajwduxh bateedni rexpengoldoonu. Gunibee reiiga basälreni guiraa rebäz niguii te di laareni, te guetreni. ²⁰ Neñ redxejga, gojl Moisés. Che gujc Moisés báz, te báz daani, saru rujn lojni, huinäljaz Diosni. Gułaani choñ bäii rolizjni. ²¹ Dxejc huisälrenini, te guzojb xtidx Faraón. Dxejc lagajc xindxap Faraón bidxälni Moisés, cua'nini baslaanini si'c xi'nni. ²² Bisieed Moisés guiraa ni najn reben Egipto. Gunisa'cni diidx, bensa'cni dzuun.

²³ Räj p Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. ²⁴ Dxejc bahuiini casacsí te beñ Egipto te beñ sa'ni. Sas bagu'tni beñ Egipto. ²⁵ Bejn Moisés xhigab pet sacbee resa'ni cayacnäj Diosni te guslaani rexpejn. Luxh di resa'ni niacbee si'c. ²⁶ Che bara yäl, bahuii Moisés cadilñaj sa'reni tiop xpen Israel. Räj p Moisés lojreni: “Colcuedxi, Dad. Lagajc sa'tu cadilñajtu. ¿Xhicuent rijlñtu?” si'c gunii Moisés, te na'cru tilñaj sa'reni. ²⁷ Dxejcti

nani cayunniälajzga, balanaani Moisés, räjpni loj Moisés: “¿Chu baniidx yäl̄rnibee lojlu te jiäd̄nibeelu nuure? ²⁸ ¿La r̄lajzlu ju'tlu narä si'c bagu'tlu ben Egipto nai?” —räjpni—. ²⁹ Che biejn diajg Moisés rediidxga, baxunni, huijni zijt. Huiläzsiçni guedx Madián. Ro'c bachnaani, guyu' tiop xinganni.

³⁰ Räjpa Esteban:

—Che gudejd tiuu ijz, bidzuj̄n te dxej cansajni nez lo reyubi-dz ni naga' guideb gabi dajn ni laa Sinaí. Ro'c bahuini te bajl nen te yaguejch. Nen bajlga baluiloj angl xten Dios lo Moisés. ³¹ Bidxeloduxh Moisés che bahuini si'c. Dxejcti gubigni te r̄lajzni nuhuisa'cni yajgga. Dxejc biejn diajgni gunii Dios, räjpni lo Moisés: ³² “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacoob.” Dxejcti guceuz Moisés sa'csi bidxebduxhni, diruni nuhuisa'c yajgga. ³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. ³⁴ Abahuiä xho cagusacsí reben Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxhalälu chäálu Egipto.”

³⁵ Räjpa Esteban:

—Dios badeed yäl̄rnibee lo Moisés nani baze' retoxtad-goldoonu che räjpreni: “¿Chu baniidx yäl̄rnibee lojlu te jiäd̄nibeelu nuure?” Baxhal̄ Dios Moisés te guinibeeni xpejn Dios, gucnäjza Dios Moisés baslääni rexpej̄nni nen naciön Egipto si'c gunii angl xten Dios che baluilojni lo Moisés nen yaguejchga. ³⁶ Gulää Moisés rebej̄nga. Ganiddoo bejn Moisés redzunro, yäl̄rdxeloj nen naciön Egipto näjza ro' nisdoo ni laa nido xniaa. Tiuu ijz cuansaj retoxtadgoldoonu nen yubi-dzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räjpni loj rexpej̄n Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés guyunäj rebejn nen yubidzro. Xangl Dios guninäj Moisés nen dajn xten Sinaí. Dxejcti badeed Moisés rediidx ni gunibee Dios lo retoxtad-goldoonu. Laareni basa'nreni diidxga loonu.

³⁹ Räjpa Esteban:

—Niluxh di retoxtadgoldoonu nusoob rextidx Moisés. Di r̄lajzreni guinibee Moisésreni. Canaduxh̄lajzreni naciön Egipto. ⁴⁰ Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnurení. Chu gan con Moisésre ni baluii nezyuj che gulääni nuure guejdx reEgipto.” ⁴¹ Sas bencheereni te banäjb ni najc si'c te gonbäz. Dxejcti bagu'treni guidxaa te

badeedreni rejnga lo banäjb te bazuxhijbreni lojni. Bibal-azduxhreni sa'csi abencheereni banäjbga. ⁴² Dxejcti gubicaĵ Dios loj rexpejñ Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujčni si'cni caĵ lo guiĵtz ni bejn reniguii nani bacuaa rextidx Dios. Räjĵ Dios:

La'tu beñ Israel, cheni cuansajtu tiuu ijz nez lo reyubijdz,

ĵla par narä bagu'ttu guidxaa, ä?

ĵLa loä baniidxtu xtiejnreni, ä?

⁴³ Xho gacni si'c, räjĵ Dios.

Cuansanäjtu te yu' najcw guiĵd cadro chu te banäjb.

Neñga guyu' banäjb ni laa Moloc, nani najtu najc xtiostu.

Gojñzatu balbäze' xten xtiostu ni laa Remfán.

Redios ni bencheetistu reni'c gojñtu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjĵni lojreni:

—Neñ reyubijdz gojĵ retoxtadgoldoonu te yu' najcwni guiĵd. Gujčni xquidooreni. Ro'c guninäjreni Dios. Benchee retoxtadgoldoonu yu' najcw guiĵdga si'cni gunibee Dios che baluiini lo Moisés xhoni gacni. ⁴⁵ Che gujĵ Moisés, Josué gunibee lacuaa to Moisés, huinäni retoxtadgoldoonu nación Canaán. Batzujñreni yuro ni najcw guiĵd te näj ni'c huinäreni Canaán. Gulää Dios rebejñ ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguiĵd ni najc xquidooreni che gojlli xtiemp reii David. ⁴⁶ Huinäłajz Dios David. Räjĵ David lo Dios: “Rlazä gunä te guidoo par guejblu, Dios xten nuure, rexpejñ Israel.”

⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiini te yu' nani runchee bejñ. Scree bacuaa te niguii nani gunii xtidx Dios. Räjĵ Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjĵ Dios.

⁵⁰ ĵLa et naädi benchee guiraa nani ruhuiitu?, räjĵ Dios.

⁵¹ Räjĵ Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dxañ xten Dios, dizani cuääz neñ lastootu. Si'c bejñ retoxtadgoldootu, si'cza rujntu. ⁵² Basacsí retoxtadgoldootu guiraliini reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxañ xten Dios. Naj abiääd niguidxanga, Jesucrist laani, luxh la'tu huinäñtuni lo

guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nucuadiajg redi-idxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. ⁵⁵ Rbäjz Sprit Dxañ xten Dios neñ lastoo Esteban, ni'cni bahuitzu'tzni xh-aguibaa, ro'c bahuüini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjþ Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcn, guläyälreni xhajbreni; te niguii ni laa Saulo biannäj xhajbreni. ⁵⁹ Lañ ni cagucuaareni guij yejcn, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquiylureni.

Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. ³ Biäädza Saulo, guixeguixee basacsíni rebejn nani huililajz xtidx Dios. Biu'ni rolizjreni, gunaazni reniguii näjza regunaa te basäunireni neñ latzguuib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejn ga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jääd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' beñdxab neñ lastooreni. Che gunibee Felipe guirii

rebe_ndxab lastoo rebe_nga, guredxa' rebe_ndxabga, dxejcti biringeni ne_n lastoo rebe_nga. Yu'za xhidajl be_n nani digacdiru guiniib, yu'za reni rajc ni'reni, naareni. Con xcäl_rnibee Jesucrist basiajc Felipe guiraa rebe_nga. ⁸ Sa'csi gujc si'c, bibalazduxh guiraa rebe_n ne_n guejdxga.

⁹ Guyu' te niguii ni laa Simón ne_n guejdxga. Bisieedni be_nnni xhidajl redzuun yäl_bidxaa, basgueeni rebe_nguejdxga. Bidxeloduxh rebe_nguejdx lojni. Räj_pni lo rebe_n rutru chu stee be_n ni najc maazru be_nro lojni. ¹⁰ Luxh guiraa rebe_n, rebiuux, rebe_ngool, rebe_nrajp, rebe_nproob bacuadiajgreni xtidx bidxaaga, räj_preni:

—Laani rajpni yäl_rnibee xten Dios.

¹¹ Xchero basgueeni rebe_n, bidxelojreni rextzunyaäl_bidxaani. Guiraa rebe_n huililajz xtiidxni. ¹² Dxejcti baluii Felipe xcuent xcäl_rnibee Dios, näjza xcuent Jesucrist. Xhidajl rebe_nguejdxga huililajz rediidx nani gunii Felipe. Dxejcti birobnisreni, niguii näjza gunaa. ¹³ Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz rebe_n Samaria xtidx Dios, baxha_rreni Pedr näjza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebe_n ni huililajzga te gudeed Dios Sprit Dxan xtenni lojreni, ¹⁶ sa'csi gajd Sprit Dxan xten Dios jädläjz ne_n lastooreni. Che huililajzreni, gurobnistisreni te gucbee rebe_n chuni'c najc rexpej_n Jesucrist. ¹⁷ Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprit Dxan xtenni biädläjzni ne_n lastooreni.

¹⁸ Che bahuii Simón biädläjz Sprit Dxan xten Dios lastoo rebe_n ni batzuub reapost naani yejcreni, rlajz Simón nudeedni meel loj reapost, ¹⁹ räj_pni lojreni:

—Colguniidx yäl_rnibee loä te si'cza gudzubä naä yejc rebe_n, te jiu' Sprit Dxan xten Dios ne_n lastooreni.

²⁰ Dxejcti räj_p Pedr lojni:

—iSunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl ne_n lastoolu. ²² Basie'ch lajzlu, badzucaj rexhigab guiidx xtenlu. Guredx-gunab lo Dios, top susiäj_l lajz Dios xtoj_llu ni be_nnlun ne_n lastoolu. ²³ Naj narä nanä ruguilazduxhlu, luxh runduxhlu xhigabguiidx.

²⁴ Dxejcti räj_p Simón lo guiro'preni:

—Col_nab loj Dios xcuentä te na'c sacä si'cni caniitu.

25 Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siääd naciõn Etiopía

26 Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

27 Sä'ti Felipe. Che bidzujñni lo nezyujga, bidxaagni te dade' ni siääd naciõn Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios. 28 Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero. 29 Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

30 Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijt z nani cayollu, ä?

31 Dxejcti räjp dade'ga lojni:

—¿Xho gacheäni palga rut gusule'dini loä?

Sas räjp dade'ga lo Felipe chä'pni neñ gare'tga.

32 Cadro cayol dade'ga neñ guijt z ni caj xtidx Dios rnii scree: Di xiil cuedxa' che rinä bejñni cadro guetni; dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

33 Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäjñ gunreni.

¿Xho guiniinu yu' xpejñni?

Ni abagu'trenini. Diruni guibajñ lo guedxliuj.

34 Dxejcti gunabdiidx beñ Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

35 Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. 36 Lañ ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojñ tiobnisä?

37 Dxejc räjp Felipe lojni:

—Palga rililajzlu xtidx Dios neñ lastoolu, sajz tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

38 Dxejc gunibee dade'ga gusudxi gare't, sas biäjñ guiro'preni, biu'reni neñ nis, ro'c batiobnis Felipe dade'ga.

39 Che biriireni neñ nis, huinä Sprit Dxañ xten Dios Felipe

ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujn̄ni guedx Azoto. Baluiizani xtidx Dios neñ guiraa reguejdx che bidzujn̄lini guedx Cesarea.

9

Huililajz Saulo rextidx Jesucrist

(Hch. 22:6-16; 26:12-18)

¹ Lałtis cagusacsí Saulo rexpejn̄ Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guiitz chanäni lo reguidoo neñ guedx Damasco te palga guidxäl̄ni reni najc xpejn̄ Jesucrist neñ reguidooga, niguii sigac gunaa, guliibnireni, jädnänireni guedx Jerusalén te jäüreni. ³ Lał sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo. ⁴ Dxejc biajbni lo yuj, biejn diajgni te xse' bejn̄ nani canii lojni:

—Saulo, Saulo, ¿xhicuent rusacsílu narä, näjza rexpeña?

⁵ Räj̄p Saulo lojni:

—¿Chuluj Dad?

Räj̄pni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuanii' yejc caru'ch.

⁶ Bidxebduxh Saulo, racejsni räj̄pni:

—Dad, ¿xhini'c rlajzlu gunä?

Dxejc räj̄p Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn̄ ni siädnä Saulo sugadxireni, bidxebreni sa'csi biejn diajgreni te xse' bejn̄, luxh rut lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejc gunaaazreni ñaani, sanärenini guedx Damasco. ⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn̄ Jesucrist ni laa Ananías. Baluiloj Jesucrist loj Ananías lo te bacal, räj̄p Jesucrist lojni:

—Ananías.

Dxejc räj̄p Ananías lojni:

—Anaree Dad.

¹¹ Räj̄p Jesucrist lojni:

—Huistie te chääl̄u lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, beñ Tarso. Cabejdx, canabni loä ñaj. ¹² Lo bacal abahuiini siäd te niguii ni laa Ananías te gutzuubni ñaani yejcn̄i te fiini stehuält.

¹³ Dxejcti räj̄p Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén. ¹⁴ Luxh rebixhojz ni rnibee abadeed guijtz lojni te guiniaazni ree guiraa rebejn nani rbedx-rniab lojlu, chanänireni jiäureni.

¹⁵ Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpeñ Israel, näjza loj reni rnibee renacion, näjza loj rexpejn Israel. ¹⁶ Narä suluiä lo Saulo trabajwduxh ni tedni te jiädnajlni narä.

¹⁷ Dxejcti säa Ananías, bidzujñni ro yu' cadre rbäzlaa Saulo. Batzuubni naani yec Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädllu, lagajc laani baxhañni narä te filu stehuält, te jiädläjzza Sprit Dxañ xten Dios neñ lastoolu.

¹⁸ Lagajc dxejc bitejb si'c xmelbäjñ yec baloñ Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwñni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

Gusloj basule' Saulo xtidx Dios neñ guedx Damasco

²⁰ Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguuib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxuñ Saulo guedx Damasco

²³ Che gudejd xhidajñ dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'trenini. ²⁵ Dxejcti che gojñ te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejt gabi guejdxga. Basiäjtrenini nez dejt padeerga, te si'c baxuñni guejdxga.

Bidzujñ Saulo guedx Jerusalén

²⁶ Che bidzujñ Saulo guedx Jerusalén, rlanjñ nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzñ xtidx Dios. ²⁷ Dxejcti huiñä Bernabéni lo reapost, bijñi diidx xcuent Saulo. Räjp Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani rnii didx griegw. Laareni rdxecheduxhrenei, rlajzrenei nugu'treni Saulo sa'csi direni nichaglazj xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxañ xten Diosreni.

Biajc Eneas

³² Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälmi te niguii ni laa Eneas. Agujc xhujñ ijz naga' niguiiga cayacxhuuni. Abixu'ñ tiejxhni, digacdiru guiliini.

³⁴ Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcti, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni neñ reguejdxga huililajz xtidx Dios.

Gubansac Dorcas

³⁶ Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujc bahuajz rebejn togoolga, huitixhrenini neñ te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujñreni, huinäreni Pedr neñ yu' cadre naga' togunaaga. Ro'c cayonduxh guiraa regunabiud, baluiireni lo Pedr guiraa rexbajbreni nani benchee Dorcas, ni badeed Dorcas lojreni che nabajñni. ⁴⁰ Dxejcti gunibee Pedr birii guirareni neñ yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. ⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud nájza sgaii reni najc rexpejn Jesucrist. Baluiini gunaaga lojreni te bahuilojreni agubansacni. ⁴² Gucbegajc reben guedx Joje xhini'c gujc, dxejcti xhidajl rebejn ga huililajz xtidx Jesucrist. ⁴³ Xchejza guyu' Pedr ro'c, gulájzni rolijz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc beñzajt, dini gac beñ Israel. ² Beñsacduxh najc Cornel, nájza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuiini loj xangl Dios, rájpní loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxelojni, rájpní lojni:

—¿Xhini'c, Dad?

Dxejcti rájp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii cháa guedx Joje te chaxiireni Simón Pedr. ⁶ Rbájzni rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni nájza te xsoldaadni nani sanälajz Dios. ⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Joje.

⁹ Che bara yääl, sääreni lo nezyuj. Asiäddzungen gajxhrene guedx Joje, pet si'cti läidxejni. Lagajc orga huä'p Pedr yecyu' te guininäjni Guejb Dios. ¹⁰ Calanduxh Pedr, rlanjni gauni. Lal ni cayujnreni xhi gauxhuejni, gusloj canixcalni. ¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. ¹² Neñ bariaadga yu' guiraa reman ni yu' lo guedxliuj nani rsianäj guidap ni'ni, nájza renani rxeeb si'c bäl, nájza renani rutajt. ¹³ Gunii Dios lo Pedr, rájpní lojni:

—Pedr, huisu te ju'tlu man gaulu.

¹⁴ Dxejc rájp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnií xleilu najc mandxuudx.

¹⁵ Gunisac Dios loj Pedr, rájpní:

—Na'cru guiniilu nacdXuudx reman nani abasia.

¹⁶ Che gujc choṅ huält gujc si'c, huä'psac bariaadga xh-aguibaa. ¹⁷ Laḷ ni cayujn Pedr xhigab xhichani'c säloj nani bahuiini, bidzujn reniguii ni baxhaḷ Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸ Che bidzujnreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laḷ ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choṅ dade' caguiillu. ²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaḷäreni lojlu.

²¹ Dxejcti biäjt Pedr jiaaga, bidzujnni cadro suga' redade'ga, räjpni lojreni:

—Narä nacä ni caguiiltu. ¿Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te beṅsa'c, te bejn ni rajn Dios, te bejn ni sanälajz rexpejn Israel, laani baxhaḷ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejnğa, biu'reni neṅ yu'. Ro'c bia'nreni te guxhijn. Che bara yääl, Pedr näjza sgaii beṅ Jope ni najc xpejn Jesucrist, sanä redade' ni baxhaḷ Cornel.

²⁴ Che bara yääl, bidzujnreni guedx Cesarea. Abatojpc Cornel resa'ni näjza rexamigwni rolijzni. Cabäjzreni guidzujn Pedr. ²⁵ Che bidzujn Pedr ro yu', huichagloj Cornelni, bazuxhijbni lo Pedr. ²⁶ Dxejc gunaaz Pedr ṅaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neṅ yu'. Che biu'ni bahuii Pedr nadxagsa' rebejn neṅ yu'. ²⁸ Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj beṅzajt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacheä digacdiru jiuä releiire. Abaluii Dios narä sajc guchagsa'ä chutis bejn. ²⁹ Ni'cni, che gurejdxtu narä biälğacä. Naj rniabdixä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajpc dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'.

³¹ Najni loä: “Cornel, che rbedx-rniablu lo Dios, riejn diajpc Dios xtiidxlu, che rudeedlu meel lo rebeṅ proob, racbee Dios, di lajzni jiäl luj. ³² Ni'cni naj baxhaḷ tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guijd. Rolijzni sojb gajxh ro' nisdoo. Che guidzujnni, laani gusule'ni xtidx Dios lojtu.” ³³ Dxejc baxhaḷä chu biädxiiilu.

Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guniilu loonu.

Basule' Pedr xtidx Dios rolizj Cornel

³⁴ Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenzijt sigajc rexpejn Israel. ³⁵ Niluxh rinälajz Dios chutis ben guedxliuj nani ruzuxhijb lojni, nani rusooob rextiidxni, nani laaca nabajn. ³⁶ Badeed Dios xtiidxni loj rexpejn Israel, basule' Dios biäd Jesucrist te gac chanälaznu Dios te cuedxilajznu, sa'csi Jesucrist rnibee guideb guedxliuj. ³⁷ Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea. ³⁸ Nancheetu xho badeed Dios yälrnibee loj Jesucrist, ben Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejn redzunro, remilagwr, basiajcn rebejn nani caguteed ben dxab trabajwduxh. Redzunroga bejn sa'csi bennäj Diosni dzuun. ³⁹ Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruzj, ro'c gujtni. ⁴⁰ Dxejcti che biojn dxej, guläs Dios Jesucrist lo reben gut, gubañsacni, badeed Dios yälrnibee lojni te gujc biädluiloj Jesucrist loonu. ⁴¹ Di Jesucrist nuluiloj loj chutis bejn. Lojtis renani agule Dios gutie'ch diidx gubañsac Jesucrist lo reben gut, loj reni'c baluilojni. Nuure nadxagnu loj reni gule Dios. Bidaunänuni, bidunnänuni che gubañsacni lo reben gut. ⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte reben bajn näjza xte reben gut. ⁴³ Galooli bacuaa renani gunii xtidx Dios lo guijt, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

Biädlajz Sprit Dxan xten Dios neñ lastoo rebenzijt

⁴⁴ Lañ ni canii Pedr rediidxga, biädlajz Sprit Dxan xten Dios neñ lastoo renani huililajz xtiidxni. ⁴⁵ Bidxeloj guiraa rexpejn Israel nani huinä Pedr sa'csi biädlajz Sprit Dxan xten Dios neñ lastoo renani najc benzijt. ⁴⁶ Gucbeereni biu' Sprit Dxan xten Dios lastoo rebenzijt sa'csi bejn Sprit Dxan guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dxan xten Dios neñ lastoonu, abiädlajzni neñ lastoo rebejnre.

48 Dxejcti gunibee Pedr gurobnisreni te gachee bejn najczeni xpejn Jesucrist. Dxejcti gunabreni loj Pedr jia'nni ro'c tiop-choṇ dxej.

11

Basule' Pedr xho biädlajz Sprit Dxaṇ xten Dios lastoo rebenzijt lo rexpejn Jesucrist neṇ guedx Jerusalén

1 Reapost, näjza renani huililajz xtidx Jesucrist neṇ reguedx Judea, biejn diajgzeni huililajz rebenzijt ni digac xpejn Israel xtidx Dios. 2 Che bidzujṇ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilnäjreni Pedr. 3 Räjpreni lo Pedr:

—¿Xhicuent biu'lu rolijz benzijt nani xhet yu'di bee si'c nure? ¿Xhicuent gudaunäjjlureni, ä?

4 Dxejcti basule' Pedr diidx xho gujc huijni loj rebenzijt:

5 —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. 6 Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neṇ dajn, renani rxeeb si'c bäl, näjza renani rutajt. 7 Dxejcti biejn diagä naj Dios loä: “Pedr, huisu. Bagu't man gaulu.” 8 Dxejcti räpä: “Digacdini Dad. Nicla tej gadna gauä te man nani rnii leii xtenlu najc mandxuudx.” 9 Dxejc gunisac Dios loä: “Na'cru guiniilu nacdXuudx recos nani abasia Dios.” 10 Che gujc choṇ huält gunii Dios si'c, huä'psac bariaadga xhaguibaa. 11 Lagajc orga bidzujṇ choṇ dade' ro yu' cadro yu'ä. Guedx Cesarea biriireni, biädxireni narä. 12 Dxejc gunii Sprit Dxaṇ xten Dios loä: “Huinä reniguiire. Na'c gun tiop lajzlu.” Dxejcti huinää xho'p beṇ Jope, dade' nani rililajz xtidx Jesucrist. Che bidzujṇ guedx Cesarea, biu'nu rolijz Cornel. 13 Basule' Cornel diidx loonu xho baluiloj te angl xten Dios lojni lagajc rolijzni. Räj angl xten Dios lojni: “Baxhal tiop dade' chää guedx Jope te chaxiireni Simón ni rniireni Pedr. 14 Laani siniini xtidx Jesucrist te gacheelu con resa'lu xhini'c nanab gunlu te guslaa Dios la'tu lo rextojltu.” 15 Che gusloj cagusule'ä xtidx Dios lojreni, biu' Sprit Dxaṇ xten Dios neṇ lastooreni si'c biu'ni lastoonu galooli. 16 Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxaṇ xten Dios te cuääzni neṇ lastootu.”

17 Dxejc räjpa Pedr:

—Palga badeed Dios Sprit Dxaṇ xtenni lojreni si'c baniidxni Sprit Dxaṇ xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxaṇ xtenlu lojreni.”

¹⁸ Che biejn diajg reben Jerusalén rediidxga, biäuu ro'reni, dirureni nidilnäj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechljazreni te guibañnjazreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, najza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel.

²⁰ Lojreni nadxaag gaii beñ Chipre, najza gaii beñ Cirene. Redee bidzujñ guedx Antioquía. Ro'c gusloj caniireni lo beñzajt nani rnii didx griegw. Basule'reni lo rebenzajtga guiraa xcuent Jesucrist. ²¹ Guclnäj Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

²² Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutiyp lajzreni gusoobreni xtiidxtis Jesucrist. ²⁴ Beñsa'c najc Bernabé. Rililazduxhni xtidx Jesucrist. Racnäjduxh Sprit Dxañ xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxälmi Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid beñguejdxga gulälaj "Cristianos" renani rililajz xtidx Jesucrist.

²⁷ Neñ redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía. ²⁸ Huisulii te dade'ga ni laa Agabo. Guclnäj Sprit Dxañ xten Diosni te guniini siääd te gubijn guideb guedxliuj. Luxh gujc gubijnğa neñ reijz ni gunibee rei Claudio ni sajru. ²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea. ³⁰ Batojpreni meel, baxhalrenini lo rebeñgool ni rnibee rexpejn Jesucrist ro'c. Saulo najza Bernabé huinä meelga che huijreni Judea.

12

Gujt Jacoob, biäu Pedr neñ latzguib

¹ Neñ redxejga, trabajwduxh bateed rei Herodes gaii rexpejn Jesucrist. ² Gunibeeni gujt Jacoob betz Juan, biru' guejni. ³ Che bahuii Herodes bibalazduxh rexpejn Israel sa'csi bagu'tni Jacoob, gunibeeni gunazgajczeni Pedr. Dee gujc neñ

redxe lanij che rajwreni yätxtiil ni di saguij. ⁴ Che gunaazreni Pedr, biäuni nen latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr nen latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr nen latzguiib

⁶ Bidzujnti dxe bispr dxej ni rlanj Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij nen latzguiib. Dxejcti gunaazni xhajcw Pedr, basniibnini te gubajjni. Räjpmi lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räjpmi xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpmi xangl Dios lo Pedr:

—Gojt xhablajzlu, gudanajl narä —räjpmi.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnini xhigab pet canixcalni. ¹⁰ Gudejdreni nez loj te soldaad, gudedgajcreni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdejd galäii guejdxga. Xtebca bixal puertroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajni Pedr, bejnini xhigab:

—Naj sii nanä baxhal Dios te xanglni baslaa narä ladznäa Herodes te digacdi gun rexpejn Israel nani rlanjreni gunnäjreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'. ¹⁴ Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni nen yu', räjpmi lojreni:

—Pedr suga' ro lä'.

¹⁵ Dxejcti räjpmi lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpmi loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷ Dxejcti bazääb Pedr naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadre rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jääj lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajru lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejn ga. ²¹ Basoobtini te dxej te guinäjnireni. Dxejga gojt Herodes xhajn reini, gurejni lo xyacxhil reini. Dxejcti gusloj caniini didxsa'c loj rebejn ga. ²² Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtidixdi niguii najc diidxre.

²³ Lagajc dxejc biääd te angl xten Dios, bejn ni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn najcni te dios, sa'csi dini niliä'p xpala'n Dios.

²⁴ Xhidajl bejn biejn diajgni xtidix Dios, huililajzreni xtidix Dios.

²⁵ Che gulujx badeed Bernabé näjza Saulo meel ni batojp reben Antioquía lo reben gool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxaan xten Dios Bernabé näjza Saulo

¹ Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidix Dios, näjza gaii niguii ni rusule' xtidix Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujtni si'c bejtzni; näjza Saulo. ² Bidzujn te dxej cagucua'nreni laj ni cabedx-canabreni lo Dios, dxejc räjp Sprit Dxaan xten Dios lojreni:

—Colçue Bernabé nájza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni ñaareni yejc guiro'preni, te si'c baxhalreni Bernabé nájza Saulo te guluiireni xtidx Dios ste'ca lajt.

Guiro'preni baluü xtidx Dios lo rebeñ Chipre

⁴ Baxhal Sprit Dxan xten Dios Saulo nájza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre. ⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejñ Israel. Náj Marcw gucnäjreni. ⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguü ni laa Barjesús. Najcni te bidxaa, najczani te xpejñ Israel. Cagusgueeni rebejñ guejdxga, räjpni xtidx Dios caniini, niluxh dini gac xtidx Dios. ⁷ Bidxaare nu'ch lo rexpejñ Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rlazñi jieñ diajñi xtidx Dios. ⁸ Dxejcti Barjesús, ni laaza Elimas, bidxagdijñni guiro'preni sa'csi di rlazñi chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

¹⁰ —Rusgueduxhlu rebejñ, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxechñájzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz beñ xtidx Jesucrist? ¹¹ Náj siääd xcastiigw Dios yejclu. Xhidajl dxej sicäy lojlu, xhetliidi filu —räjp Pabl.

Gujcsi räjpni si'c, bicägajc lojni. Dxejctiru cuansajni cagui-
ilni chu guiniaaz ñaani guluiini canejz chääni. ¹² Che bahuii Sergio Paulo xhi gusajcni, huililajzni xtidx Dios, sa'csi bidx-
eloduxhni xcuent xcäl'ruluii Dios.

Bidzujñ Pabl nájza Bernabé guedx Antioquía xten distrit Pisidia

¹³ Che baluux Pabl nájza resa'ni xtzuunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejñ Israel, biu'reni neñ xquidoo rexpejñ Israel, ro'c gurejreni. ¹⁵ Che gulujx bil te dade' reguijtz xten Dios ni laa leii nájza reprofet, baxhal reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejñre, colguiniini.

16 Dxejc huisulii Pabl, guläsni naani bejnni seen lo rebejn te cuadiajgreni xtiidxni. Räjpa Pabl lojreni:

—Colcuadiajg, la'tu rexpejn Israel, guiraatu ni rajn Dios. 17 Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjdixh Diosreni bejnni remilagwr, te guläänireni guedx Egipto. 18 Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. 19 Guyu' gajtz nación guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. 20 Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. 21 Dxejcti gunab rexpejn Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. 22 Che badzucaj Dios Saúl, badeedni gunibee toreii David. Räjpa Dios: “Agucbeä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

23 Räjpa Pabl:

—Galooli bia'n diidx lo rexagdo David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnga, rudzucajni xtojlnu, ruslaani nuure lo dojl. 24 Che gusloj cagulijdx Juan rebejn, baluini nanabpac gusiechljaz rexpejn Israel, tiobnisreni te jia xtojlni. 25 Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhal Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

26 Räjpa Pabl:

—Rniä lojtu sa'ä, rexagdo toAbram, näjza lo chutis ni rajn Dios, loonu baxhal Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl. 27 Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtza. 28 Baliidxreni Pila't ju'tni Jesucrist, luxh xhet bejndini te guetni. 29 Che bagujc guiraa ni caj lo guijtza xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj. 30 Dxejcti guläs Dios Jesucrist lo rebeñgut. 31 Balti huält baluiloj Jesucrist lo rexamigwni nani biädnajlni nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebeñgut, te naj rusule'reni diidx xcuent Jesucrist.

³² 'Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. ³³ Gulās Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: "Luj najclu xi'nä. Nadxej guleälu te guinibeelu."

³⁴ Räjpa Pabl:

—Dxej cru stee lajt caj xcuent ni gulās Diosni lo rebengut te nuncru guetni. Scree bacuaa te niguii, räjp Dios: "Sunidxä recossa'c lojlu si'c ni bia'nä diidx con toDavid." ³⁵ Ni'cni bacuaaza toDavid neñ stee Salmo ni gunii Dios, guniini: "Dipaclu gusaan gudx tiejxh Xi'nlu nani sanälajzlu." ³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh gulās Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucristre, bejn ni caniä xcuentni, laani rudzucajni rextojl̄nu. ³⁹ Chutis ni rililajz xtidx Jesucrist rusläa Jesucristni loj guiraa rextojl̄ni nani digacdi guibicaj mascä rusoobni guiralii ni caj lo leii xten toMoisés. ⁴⁰ Col̄susiñ te na'c sajctu recos ni caj lo guitz ni bacuaa te niguii nani bacuaa xtidx Dios:

⁴¹ Col̄huilaa, la'tu ni ruxhiznäj xtidxä col̄guidxeloj, col̄nitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jääd chu gusule'pacni lojtu.

⁴² Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejn̄ga, xhidajl rexpejn̄ Israel, näjza xhidajl reben̄zijt nani rusoob xtidx Dios si'c rujn rexpejn̄ Israel, birinajlreni Pabl näjza Bernabé. Dxejc baliidxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejn̄ Israel, xhidalduxh reben̄guejdx bire' te gucuadiajgreni guinii Pabl xtidx Dios. ⁴⁵ Che bahuii rexpejn̄ Israel guiraa rebejn̄ ni bire', bidxechlajzreni, gucnadareni. Dxejc gusloj cadxagdijl̄ rexpejn̄ Israel Pabl. Che rniini te diidx, laareni rniireni "didxxhiini". Caniyajzareni Pabl näjza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäj̄l ganid lojtu guiniinu xtidx Dios, sa'csi la'tu najctu rexpejn̄ Israel. Niluxh ditu chalilajz xtidx Dios, lagajc la'tu caniiu digacdi guiban̄näjtu Dios par tejpas. Ni'c sibiré

loonu, te guiniinu xtidx Dios lo rebenzijt ni digac xpejn Israel.
⁴⁷ Sa'csi si'c agunibee Xtiosnu. Scree caj xtidx Dios lo guijtz:
 Suxhalätu te guluiilu rextidxä lo rebenzijt ni digac xpejn
 Israel,
 te chalilajz rebejnnga xtidxä,
 te laareni lo xtojreni, cadrotis yu'reni lo guedxliuj,
 räjp Dios.

⁴⁸ Che biejn diajg rebenzijt rediidxre, bibalazduxhrenei, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regu-naa ni sajcro, näjza reniguii ni sajcro neñ guedx Antioquía, te bidxehnäjreni Pabl näjza Bernabé, barilaagwrenei Pabl näjza Bernabé te biunejzreni guedx Antioquía. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnrenei. Sä'tireni guedx Iconio. ⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

14

Guyu' Pabl näj Bernabé guedx Iconio

¹ Che bidzujñ Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzijt. Xhidajl rebejnnga huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzijt te bidxehnäjreni rebejn nani huililajz xtidx Jesucrist. ³ Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnrenei redzunro, remilagwr xcuent xcäl'rnibee Dios te bahuii bejn cayacnäj Diosrenei. ⁴ Guyu' tiop cuaa bejn neñ guejdxga. Gala' guejdxga huililajz xtidx Dios nani gunii Pabl näjza Bernabé, ⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, näjza benzijt, näjza reguxhtis, rlanjreni nidxagdijlreni reapost, rlanjzaren i nucuaareni guij yejc Pabl näjza Bernabé. ⁶ Dxejc gucbeerenei xhi rlanjreni gunrenei, ni'c baxunreni ro'c huijreni nez reguedx Licaonia, ro'c bidzujñreni guedx Listra, guedx Derbe, näjza reguejdx ni re' nejzga. ⁷ Che bidzujñreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajz gusiajc Diosni. ¹⁰ Dxejcti dip gunii Pabl lojni, räjpni:

—¡Huisulii!

Dxejcti huisuyäl̄ni, gusajni. ¹¹ Che bahuii rexpejn̄ Licaonia xhi bejn̄ Pabl, lagajc xtiidxreni guniireni, räjpreni lo sa'reni:

—jRedios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najl guii guejnreni. Biädñäni regonga ro' xquidoo Júpiter ni suga' ro' guejdxga. Rebejn̄ näjza bixhojz rlanjreni nugu'treni regon te ganreni Bernabé näjza Pabl si'c rajn̄reni rextiosreni. ¹⁴ Che biejn̄ diajg reapost xhi cayajc, batiäjsreni tla' xhajbreni si'c te seen direni guichagljaz xhi cayujn̄ rebejn̄ga. Ruxun̄reni bidzujn̄reni lo rebejn̄, räjpreni lo rebejn̄:

¹⁵ —Colcuadiajg xtiidxnu. ¿Xhicuent cayujn̄ guejbtu recosre? Ni lagajc sabejntu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn̄, guzuxhijbtu lo Gueb Dios ni nabajn̄ par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, neñreni, ¹⁶ Galoo basaan Diosga gun reben̄ guedxliuj si'tcis ni rlanjreni. ¹⁷ Huen najc Dios, rudeedni nisguij, rudeedni rajc xhi rajw rebejn̄, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te chäii bejnreni gaan guredxi rebejn̄, sa'csi rlanjpac rebejn̄ nugu'treni regon.

¹⁹ Dxejcti bidzujn̄ gaii xpejn̄ Israel siädreni guedx Antioquía näjza guedx Iconio. Baquiilreni reben̄ Listra te gucuaareni guij yejc Pabl. Bacuaareni guij yejc Pabl, gudobx-hajxhrenini guläärenini ro' guejdxga, sa'csi naareni agujtni. ²⁰ Dxejc lañ ni suga' rexpejn̄ Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujn̄reni guejdxga, basule'reni rextidx Dios lo rebejn̄ga. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx Antioquía. ²² Balijdxreni rebejn̄ nani huililajz xtidx Dios, gucnäjreni rebejn̄ga te batiplajz rebejn̄ga, räjpreni lo rexpejn̄ Jesucrist:

—Colsnaj lajztu xtidx Dios. Susacsí rebejn̄ la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc ben̄gool te fiireni rexquidoo xpejn̄ Jesucrist. Che gulujx bacua'nreni, lañ ni guredx-gunabreni lo Dios, basadiidxreni rebejn̄, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujn̄reni estad Panfilia. ²⁵ Basule'reni xtidx Dios lo reben̄ Perge, dxejcti

biriireni ro'c sääreni guedx Atalia. ²⁶ Che bidzujñreni guejdxga, biu'reni neñ barcw, gudejdreni lo nisdoo te bidzujñreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhalreni Pabl näjza Bernabé chasule'reni xtidx Dios neñ guiraa reguejdx. Naj abaluux Pabl näjza Bernabé dzuunga. ²⁷ Che bidzujñreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, näjza xho badeed Dios huililajz rebenzijt nani digac rexpen Israel. ²⁸ Xchej biannäjreni rexpejn Jesucrist ro'c.

15

Bidxagsa'zareni neñ guedx Jerusalén

¹ Neñ redxejga bidzujñ gaii dade' ni siäd nez Judea, caguiireni rexpejn Jesucrist, räjpreni lojreni:

—Palga ditu gusal bee si'c gunibee to Moisés, di Dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlreni redade'ga. Dxejc gule rexpejn Jesucrist Pabl näjza Bernabé näjza sgaii rexpejn Jesucrist chääreni guedx Jerusalén te guininäjreni reapost näjza rebengool te guidon xho gac xcuent beega.

³ Huisunejz rexpejn Jesucrist ni najc beñ Antioquía Pabl näjza rebejn ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujñreni guedx Jerusalén, huichagloj rexpejn Jesucristreni. Dxejcti bij Pabl näjza Bernabé diidx lo reapost, lo rebengool nani rnibee rexpejn Jesucrist, näjza lo rexpejn Jesucrist, guiraa redzunro nani cayunnäj Diosreni. ⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab chureni bee, nanabza gusoobreni leiï xten to Moisés.

⁶ Dxejcti bachagsa' reapost näjza rebengool nani rnibee rexpejn Jesucrist, te don xho gunreni. ⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzijt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajzpac rebenzijt xtiidxni. Badeed Dios Sprit Dxan xteni lojreni si'c te seen te gacbee bejn najcreni xpejn. Sigac baniidxni Sprit Dxan

xtenni loonu galoo, si'cza badeednini lo rebenzjijt. ⁹ Sigajc rinälajz Dios nuunu, sigajcza rinälajzni rebenzjijt. Che huililajz rebenzjijt xtiidxni, basia Dios lastooreni. ¹⁰ Naj çxhicuent rusieedtu Dios, ä? Di niajcdi nisianäj retoxtadnu releiiga, digacciza chosanäjnu releiiga naj. Çxhicuent rlanjztu chasanäj rebenzjijt releiiga? ¹¹ Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzjijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzjijt.

¹³ Che gulujx gunii guiro'preni, xhet guniidi rebejn. Jacoobtis räjp lojreni:

—Sa'ä, colcuadiajg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzjijt te gurejdx Dios rexpejn ni nadxaag lo rebenzjijt. ¹⁵ Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajñ toDavid.

Si'c gunä,

¹⁷ te jädgajñ rebejn narä te gacä Xtiosreni,

näjza guiraa rebenzjijt nani najc rexpeñä jädgajñ narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu rebenzjijt ni cagusiechlajzreni, renani salilajz xtidx Dios. ²⁰ Gucuaanu te guijtz, jie'tznu lo rebenzjijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi neñ guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

²² Che biejn diajg reapost näjza rebeñgool nani rnibee, näjza guiraa rexpejn Jesucrist xtidx Jacob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcro loj rexpejn Jesucrist. ²³ Dxejcti bejnreni guijtz huinäreni. Bacuaaren rediidxre:

“Nuure reapost, näjza rebeñgool ni rnibee, näjza rexpejn xquidoo Jesucrist ruxhalnu xtixtios lojtu, resa'nu nani rbäjz guedx Antioquía näjza estad Siria näjza estad Cilicia.

²⁴ Rucuaanu guijtzre sa'csi biejn diaagnu birii gaii resa'nu ree

biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiadniireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé nájza Pabl, nani sanälaaznu. ²⁶ Agajc balti huält rlaizreni nugu'treni Bernabé nájza Pabl, luxh direni guidxejb gusule'reni xtidx Jesucrist. ²⁷ Naj ruxhalnu Judas nájza Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dyan xten Dios. Di rlaaznu gutaalrunu leii ni chasanäjtu. Releiidis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääł nani gurerejn, na'cza guesnäjtü nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios."

³⁰ Dxejcti basadiidx rexpejn Jesucrist Judas nájza Silas huinäreni Pabl nájza Bernabé guedx Antioquía. Che bidzujreni ro'c batojpreni guiraa rebejn nani huililajz xtidx Dios te bilreni guijtzga lojreni. ³¹ Che biejn diajg rexpenzit Jesucrist diidx ni caj lo guijtzga, bibalazduxhreni sa'csi gulecdxi diidxga lastooreni. ³² Dxejcti basule' Judas nájza Silas xtidx Dios lojreni, sa'csi rudeed Dios xtiidxni loj guiro'preni. Xhidajł diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtixtios loj reni baxhalreni.

³⁴ Dxejc Silas bejn xhigab jia'nni ro'c. ³⁵ Luxh Pabl nájza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajł dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlaiz chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl nájza Bernabé. ³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäii nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni. ⁴¹ Lał ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'rurenı xtidx Jesucrist lojreni.

16

Huinä Timoteu Pabl näj Silas

¹ Bidzũnsac Pabl näjza Silas reguedx Derbe näjza Listra. Ro'c bidxaagreni te xpen̄ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. ² Didxsa'ctis rnii rexp̄n̄ Jesucrist ni yu' Listra näjza Iconio xcuent Timoteu. ³ Rlajz Pabl chanäni Timoteu. Dxejcti basäl̄ Pabl bee Timoteu te gujcn̄i si'c xpen̄ Israel, te xhet naadi rexpejn̄ Israel, sa'csi guiraareni nanchee xtad Timoteu najc beñ griegw. ⁴ Che bidzujñreni cade tej reguejdx, basule'reni xtidx reapost näjza rebeñgool nani rnibee xpen̄ Jesucrist guedx Jeurusalén, te gusoob rexpejn̄ Jesucrist diidx ni bacuaareni lo guijt̄z. ⁵ Bazutijp̄ xtidx Dios lastoo renani huililajz xtidx Jesucrist. Guixe-guixee xhidajlru bejn̄ huililajz xtidx Dios xcuent Jesucrist.

Lo te bacal̄ gunii te niguii lo Pabl

⁶ Che gudejdreni distrit Frigia, näjza estad Galacia, di Sprit Dxañ xten Dios nusaan nusule'reni xtidx Jesucrist nen̄ reguedx Asia. ⁷ Bidzujñtiren̄i gajxh estad Misia. Dxejc rla-jzreni nijreni estad Bitinia, niluxh di Sprit Dxañ xten Dios nusaan nijreni ro'c. ⁸ Ni'c gudejdtiren̄i stelaad estad Misia, bidzujñreni guedx Troas. ⁹ Te yääl si'c lo te bacal̄ bahuii Pabl suga' te beñ Macedonia. Canabduxh niguiiga lo Pabl, räjpni: —Gudaa ladxä, estad Macedonia, te gacnäjl̄u nuunu.

¹⁰ Che bara yääl ni gunixcal̄ Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhañ̄ nuure te guluiini xtiidxni lo reben̄ Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹ Biu'tinu nen̄ barcw ro' guedx Troas. Bidzũnnu Samotracia, te yuj ni re' nen̄ nisdoo. Che bara yääl bidzũnnu guedx Neápolis. Ro'c biriinu nen̄ barcw, ¹² bionnu guedx Filipos, guejdx nani sajcro lo estad Macedonia. Guedx romanni. Ro'c bia'nnu tiop choñ̄ dxej. ¹³ Che gojl̄ sabd, dxej ni rusilajz rexpejn̄ Israel, biriinu guejdxga bionnu ro' te gueuu, sa'csi biennu xhigab ro'c jiaäd rexpejn̄ Israel te guininäjreni Dios. Ro'c gurejnu, guniinu lo renane' nani bire' ro'c. ¹⁴ Lojreni nadxaag te nane' ni laa Lidia, te benzij̄t̄ ni digac xpejn̄ Israel. Guedx Tiatira siäädni. Ruto'ni ladmuraad ni sacduxh. Rajñ̄ gunaaga Dios si'c rajñ̄ rexpejn̄ Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵ Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolijzni.

¹⁶Te dxej cheni sionnu cadro rninäj bejn Dios, bidxaagnu te dxa'p nani yu' te beñdxab neñ lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

¹⁹Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhreni guiro'preni nez roguii cadro suga' reguxhtis. ²⁰Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biey lo guejdxre. ²¹Caguluiireni garenca leii nani digacdi gusoobnu sa'csi najcnu beñ roman.

²²Dxejcti bidxechnäj rebejn Pabl näjza Silas. Gunibee rejuejz gulääreni xhajn Pabl, näjza xhajn Silas, te batiäjlni baar guideb tiejxh guiro'preni. ²³Che gulujx gudinduxhreni Pabl näjza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

²⁵Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni. ²⁶Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi naani abadxunreni niäu neñ latzguiib. ²⁸Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas. ³⁰Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade! ¿Xhini'c nanab gunä te guslaa Dios narä lo dojl?

³¹ Räj̄p Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudiibni dejtgreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räj̄pni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räj̄pni:

—Anaj reguxhtis guslaātu. Naj colchäj, gacnäj Dios la'tu, saru chäātu.

³⁷ Niluxh räj̄p Pabl loj reguixhajg:

—Nuure najczanu beñ roman. Batiäj̄lreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren i nuure neñ latzguiib. Leii xten roman di gusaan gac rebeñ roman si'c. Luxh naj rlanjzreni guslaaren i nuure xhiga'tz. ¡Dinu guirii si'c! Lagajc laaren i sujiädsläären i nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas. ³⁹ Dxejcti biääd reguxhtis, gulääreni Pabl näjza Silas, gunabreni jjäjlajzreni. Gunabduxhreni lo Pabl näjza Silas; räj̄preni:

—Coljiunejz guejdxre.

⁴⁰ Che biriireni neñ latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

17

Cadxecheduxh guiraa rebeñ Tesalónica

¹ Che gudejdreni reguedx Anfípolis, näjza guedx Apolonia, bidzuj̄nreni guedx Tesalónica cadro yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo guiitz ni bacuaa reniguii ni gunii xtidx Dios galooli. Caj lo guiitzga: “Nanab ted Crist trabajwduxh, guetni, niluxh sibañsacni lo rebeñgut.”

Dxejc räj̄p Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpní.

⁴ Yu' rexpejn Israel huililajz xtidx Dios, gusanäjreni Pabl nájza Silas. Nájza xhidalduxh beñ griegw nani rajñ Dios nájza xhidajl reguna griegw ni sajcrú huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii beñploj, beñlatsiaj, bejnreni bieje nez galäii. Biu'reni rolijz Jasón caguiilreni Pabl nájza Silas te cuääreni guiro'preni nez lo rebejn. ⁶ Niluxh che direni nidxäl Pabl nájza Silas, alga Jasón gulääreni nájza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejñ bieiduxh guideb guedxliuj abidzujñreni laadxnu, ⁷ luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis nájza rebejn diidxre, guyu'reni yärsia'. ⁹ Cua' reguxhtis meel lo Jasón nájza lo reexamigwni. Räjp reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

Che guyu' Pabl con Silas guedx Berea

¹⁰ Che biu' guxhijñ, baxhalgajc rexpejn Jesucrist Pabl nájza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel. ¹¹ Hueenru najc reben Berea loj reben Tesalónica, sa'csi rbaali lajzreni bacuadiajgreni xtidx Pabl ni guniini xcuent Jesucrist. Guixe-guixee bilreni guijtz cadro caj xtidx Dios te gucbeereni la gulii rextidx Pabl. ¹² Xhidajl rexpejn Israel nájza xhidajl beñ griegw ni sajcrú, gunaa sigajc niguii, huililajz xtidx Dios. ¹³ Che gucbee rexpejn Israel ni rbäjz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni bieje ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas nájza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädñäni gudeedreni diidx lo Silas nájza Timoteu jiädgajczeni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Lañ ni guläjz Pabl guedx Atenas, guyuduxhni yärsia' sa'csi bahuiini rajñ guiraa rebejn rebanäjb nani runchee lagajc bejn. ¹⁷ Ni'c neñ xquidooreni gudildiidx Pabl rexpejn Israel nájza rebenzijt ni rajñ Dios si'c rajñ rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biääd gaii bejn lojni. Yu' reni rolduxh guijtz ni bacuaa epicúreos,

yu'za renani rolduxh guijtz ni bacuaa estoicos, gudil_idiidxreni Pabl. Yu' reni räjp lo sa'reni:

—¿Xhicha guiniü bejn_re loonu? Entis naxhal ro'ni.

Yu'zaren_i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resureccion”, ni säloj yälgubansac lo rebengut. ¹⁹ Dxejcti gunaaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, ²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Reben_r Atenas näjza reben_rzijt ni yu' ro'c ruteedreni redxej rniireni didxcoob lo sa'reni, o rucua diajgreni didxcoob. Ni'cpac rchaglajzreni.

²² Galäi Areópago huisulii Pabl, räjpni lojreni:

—Colcuadiajg guejbtu, ben_r Atenas. Abahuiä xho ran_rduxhtu xhidajl banäjb. ²³ Che siädsaä lo guejdxre, bahuiä lo rexpanäjb_rtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza neñ reguidoo ni runchee bejn. ²⁵ Diza Diosre guiquiin chu gacnäjni sa'csi lagajc Diosre rudeed yäl_rnabaj_n, yäl_rnadaan, näjza guiralii nani rquiin reben_r guedxliuj.

²⁶ Räjp Pabl:

—Guiralii reben_r guedxliuj najc rexagdoo tejsi gunaa näjza tejsi niguii. Desde galooli gunibee Diosga bal ijz chu renacion_r, näjza cati gunibee renacion_rga. ²⁷ Benchee Dios guiraa reben_r guedxliuj te quilreni Dios te chalilajzreni xtiidxni. Luxh suga' Dios gajx cadetejnu, ²⁸ sa'csi Dios rujn nabaj_nnu lo guedxliuj, runiidxni rsiaan_r lo guedxliuj, runiidxzani rda_rjlru xcäl_rnaba_nnu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäjl jiennu xhigab najc Dios si'c rebanäjb ni nac-chee pla't, o guij, o yajg si'ttis ni runchee bejn rexpanäjb_rtu. ³⁰ Neñ redxej ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn, ³¹ sa'csi abasoobni te dxej cheni gac Jesús juejz lo guiraa reben_r guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc beñsa'c. Rnili_i Jesucrist rediidx ni najc guliitis. Guläs Dios Jesucrist,

baspañsacnini lo rebengut, te gacbeenu rajp Jesucrist yälrnibee lo guiraa recos.

³² Che biejn diajg rebejnğa gubansac Jesucrist lo rebengut yu' reni baxhiznä j xtiidxni. Yu'za reni räjp:

—Sucuadiajgrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx Roma. Birinäj Aquila Priscila chäälni. Biriireni Italia, biädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' Pabl xtidx Dios nen xquidoo rexpejn Israel. Rlajzni chalilajz rexpejn Israel näjza beñ griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhał Dios.

⁶ Dxejc bidxechnäj rexpejn Israelni, guniyajzarenı xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojłdi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpnı.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpejn Israelni. Rolijzni sojb cuä' xquidoo rexpejn Israel. ⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzni. Xhidajlza beñ Corinto huililajz xtidx Jesucrist, dxejcti birobnisreni. ⁹ Gojł te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon. ¹³ Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoldaad rexpejn Israel.

¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon huält huihui Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcní si'c te seen yu' xhi diidx bia'nni con Dios. ¹⁹ Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtixtios, räjpní lojreni:

—Nungäjlpac chatedä laníro guedx Jerusalén. Siälsacä ree palga gusaan Dios jäälä.

Biusacni neñ barcw, biriini guedx Éfeso. ²² Che bidzujnri guedx Cesarea, biriini neñ barcw, huijni guedx Jerusalén. Che bidzujnri, guniini xchan lo reapost näjza lo rexpejn Jesucrist. Dxejc huijni guedx Antioquía xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, baliidxni rexpejn Jesucrist te gutijpru lajzreni.

Baluuí Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujn guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajnri rinälajzri Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huiärenini rolizreni. Ro'c basule'rureni xtidx Dios nani gajdni gan. ²⁷ Dxejc, sa'csi abejn Apolos

xhigab chääni reguejdx ni tre' nez Acaya, bacuaa rexpejn Jesucrist guijt lo rexpejn Jesucrist ni yu' nen reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios nen reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhal Dios."

19

Guyu' Pabl guedx Éfeso

¹ La_l ni guyu' Apolos guedx Corinto, huij Pabl xhidajl reguejdx nen región Asia, dxejcti bidzuj_{nni} guedx Éfeso cadre bidxaagni gaii bejn nani huililajz xtidx Dios. ² Gunabdiidx Pabl lojreni:

—Che huililajztu xtidx Dios, ¿la biäd_{lajz} Sprit Dxan xten Dios nen lastootu, ä?

Räjpreni lojni:

—Ni_{la} gajd diajgnu jiejn la yu' te Sprit Dxan xten Dios.

³ Räj_p Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

⁴ Dxejcti räj_p Pabl lojreni:

—Guliica bastiobnis Juan che basiejch lajz rebejn xtoj_{lreni}. Räj_{pza} Juan lo rebejn: "Colchalilajz xtidx bejn ni siäd detzä." Bejn ni basä'tni najc Jesucrist —räj_p Pabl.

⁵ Che biejn diajg_{reni} rextidx Pabl birobnisreni te gacbee rebejn najc_{reni} xpejn Jesucrist. ⁶ Che batzuub Pabl naani yejc_{reni}, biu' Sprit Dxan xten Dios nen lastooreni. Dxejc gusloj canii_{reni} garen-garen didxsaj. Guslojza canii_{reni} diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c cho_n bäii, guixe-guixee gunii Pabl rextidx Dios, basule'ni xcu_{ent} xcäl_{rnibee} Dios loj rebejn nen xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucna_{jd}, dirureni nililajz xtidx Dios. Che gusloj caniyaj_{reni} xtidx Dios lo rebejn, biunejz Pabl ro'c sanäni rexpej_{nni} ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajg_{reni} xtidx Dios. Rexpejn Israel sigajc reben griegw biejn diajg_{reni} xtidx Dios. ¹¹ Gucnä_j Dios Pabl bej_{nni} xhidajl dzunro, remilagwr. ¹² Ni'cni biäd bejn ca'reni baii, ca'reni

tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza reben_udxab lastoo renani yu' ben_udxab.

¹³ Dxejcti guyu' gaii ben Israel nani entis rcansaj, direni cuääz tejsi guejdx. Najcreni bejn ni rbää ben_udxab lastoo rebejn. Bejn redee xhigabcoob, naareni cuääreni ben_udxab xcuent laj Jesucrist, ni'cni räjpreni lo renani yu' ben_udxab nen lastooni:

—Xcuent xcäl_rnibee Jesucrist nani ruluii Pabl rnibeenu guiriilu nen lastoo bejn_{ga} —räjpreni.

¹⁴ Guyu' gajdz xi'n Esceva, te ben Israel, nani sajcro lo rebixhojz. Rujn redee dzuun rbääreni reben_udxab nen lastoo rebejn. ¹⁵ Che gunii rexi'n Esceva loj ben_udxabga si'c, räjp ben_udxab ni yu' nen lastoo bejn_{ga} lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶ Dxejcti bixa't niguii nani yu' ben_udxab nen lastooni yejc rexi'n Esceva, gudinuxhniireni, basäl_ta'nireni, batiäjsni xhajbreni. Dxejcti baxun_ureni biriireni nen yu'ga, bidxälguijdxzarenen biräsya' xhajbreni. ¹⁷ Dxejcti guiraa reben Éfeso, rexpejn Israel sigajc ben griegw, gucbee xho bennäj ben_udxab reniguiiga. Bidxebduxh rebejn_{ga}, luxh huä'p xpala'n Jesucrist.

¹⁸ Xhidalduxh reni huililajz xtidx Dios biäd lo rexpejn Jesucrist. Cacäjpreni guiraa recos xhet laadi nani rujnreni.

¹⁹ Xhidajl reni najc bidxaa biädnä reguijtz cadro caj yäl_najz xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mil melpla't. ²⁰ Xhidalduxh rebejn huililajz xtidx Dios. Batijp Dios lastoo rexpejn_{ni}. Gulä'p guiraareni xpala'n Dios.

²¹ Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhał Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxechduxh reben Éfeso

²³ Nen redxejga, guyuduxh rebejn yärsia' sa'csi baluii Pabl xtidx Dios. Direni nichaglajz care'ch xtidx Dios. ²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. ²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxni. Räjpn̄i lo rebejn̄: “Xhet diosdi najc reni racchee con ñaa bejn̄.” Guedx Éfeso nājza guideb naciōn̄ Asia cagusiejchni lajz bejn̄, xhidalduxh bejn̄ salilajz xtiidxni. ²⁷ Ni'c ries nitloj xtzuunnu palga diru bejn̄ sii ni'ch ni riencheenu. Luxh riesza diru bejn̄ jädgaj̄n Diana nen̄ xquidoro Diana. Naj reben̄ Asia, nājza guiraa reben̄ guedxliuj ran̄duxh Diana, banāj̄b ni saj cru, niluxh palga diru rebejn̄ gan̄ Diana, pet sinitloj ni —rājpn̄i.

²⁸ Che biejn̄ diajg replateer xtiidxni, bidxe'chduxh reni, guredxa'reni rājpn̄i:

—Sacduxh Diana xtios reben̄ Éfeso.

²⁹ Guideb guejdx guyu' biejy. Dxejcti ruxun̄reni bidxagsa'reni lo yuj cadro rajc rexjuntreni. Gunaazreni Gayo nājza Aristarco, bejn̄ Macedonia ni rinajl Pabl. ³⁰ Rlajz Pabl niu'ni cadro bidxagsa' rebejn̄, niluxh di rexpejn̄ Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhal̄reni diidx lo Pabl, rājpn̄i:

—Na'c chäälu cadro nadxagsa' rebejn̄ga —rājpn̄i.

³² Lo rebejn̄ ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejn̄ga nicla gan̄ xhicuent bidxagsa'reni. ³³ Dxejcti gulää rexpejn̄ Israel te dade' ni laa Alejandro lo reben̄ xhidaalga, te guiniini lo rebejn̄. Dxejcti basääbni ñaani lo rebejn̄ te gac dxi rebejn̄. Rlajz Alejandro guiniini xcuent rexpejn̄ Israel loj guiraa rebejn̄, te di guidxe'chreni lo rexpejn̄ Israel. ³⁴ Niluxh che gucbee rebejn̄ najc Alejandro bejn̄ Israel, tiop or guredxaduxh reni, rājpn̄i:

—Sacduxh Diana xtios reben̄ Éfeso.

³⁵ Dxejcti biääd secretaar xten guejdxga lo rebejn̄, gu-nibeeni gac dxi rebejn̄, te rājpn̄i lojreni:

—Colcuadiajg, la'tu bejn̄ Éfeso, caguidxäj̄l te bejn̄ guedxliuj ni di gacbee reben̄ guedx Éfeso rajn̄pac Diana, nani xhaguibaali bitejb lo guedxliuj. ³⁶ Sa'csi rediidxre najc guli, nungäj̄l cuedxitu, na'c guntu recos guijdxre. ³⁷ ¿Xhicuent gunaaztu reniguii ni siädñätu ree? Direni gac gubaan ni rbajn̄ recos guidoo, dizareni niniyaj xtiosnu. ³⁸ Naj palga rlajz Demetrio nājza rebejn̄ ni najc plateer chale'c quej, naxhal̄ jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte reben̄guejdx si'c ni caj lo xleiinu. ⁴⁰ Ries jii xquejnu lo gubier, naareni bidojpn̄u te guidxagdiñu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti rājpn̄i:

—Agojl, coljiunejz.

41 Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. ² Guiraa reguejdxga cadro gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³ Che bidzujñni Grecia, bia'nni ro'c choñ bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pirios, te beñ guedx Berea; näj Aristarco näjza Secondo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzunu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujni. ¹⁰ Dxejcti biäjñ Pabl lo yuj cadro bitejb bi'nga. Bazuxhijb Pabl cadro naga' bi'nga, gudäznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. ¹² Xhetliidiru rajcdi bi'nga nani gubañsac, nani guläs Pabl. Bibalazduxhreni, huisa'nrenini rolizjni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejñ Pabl xhigab ni'ni jüini guejdxga, ro'cli jiu'ni neñ barcw. ¹⁴ Che bidxaag Pabl nuunu

guedx Asón, biu'ni neñ barcw, sonnu lo nisdoo te bidzunnu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto. ¹⁶ Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzunnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸ Che bidzujnreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabannää Dios. ¹⁹ La'tu najntu xho runä xtzuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. ²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtü huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Rápä lojreni nanab gusiechljazreni, gusa'nreni xtojlneni, nanab chalilajzreni xtidx Jesucrist te gudzucaj Dios xtojlneni. ²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadro rdedä rnii Sprit Dxan xten Dios loä sidedä trabajwduxh, siäuä neñ latzguuib guedx Jerusalén. ²⁴ Niluxh dina guidxebä, dizana chanälazduxhä xcälñabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

²⁵ Räjzpzani:

—Naj agucbeä dirutu fisac loä, la'tu nani basule'ä xcälñrnibee Dios lojtu. ²⁶ Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlanj Dios guibañnu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruzj te gac gudzucaj Dios xtojlneni. ²⁹ Anancheä che rutdiru narä, siäd bejn nani rlanj chalilajztu ste'ca diidx, na'c chalilajztu

niclaza jiutu rebejn̄ga. Rusgуетisreni la'tu. Sutie'chreni la'tu lo sa'tu si'c rutie'ch cuyo't rexiił. ³⁰ Su'za lagajc sa'tu ni guinii didx-xhii lojtu te gunreni gusaan rexpejn̄ Jesucrist xtidx Dios, te chanajlreni redee ni rusguee. ³¹ Col̄hunii te di gusgueereni la'tu. Di jiäl-lajztu chon̄ ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räj̄pza Pabl:

—Asia'are, rusa'nätu ladz̄naa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejn̄ni. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con̄ naä te bio' xhi gudaunää reexamigwä. ³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn̄ quela xcaxlia'nu xhi cos” —räj̄pni.

³⁶ Che gulujx gunii Pabl rediidxga, bazuxhibnäj̄ni rebejn̄ga, guredx-gunabni lo Dios. ³⁷ Dxejcti rondonxh guiraareni gudääzreni guejn̄ Pabl, bachagro'renini. ³⁸ Guc-huinduxh lajzreni dxejc sa'csi räj̄p Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'tinu rexpejn̄ Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzuñnu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara. ² Che bidzuñnu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. ³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzuñnu guedx Tiro cadre gule'creni cargw ni nuu barcwga. ⁴ Ro'c bidxälnu rexpejn̄ Jesucrist. Biannänureni gajdz dxej. Baluii Sprit Dxañ xten Diosreni te guniireni lo Pabl, räj̄preni:

—Na'c chääl̄u guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gubisacreni rolizreni.

⁷ Biriitinu guedx Tiro. Che bidzuñnu ro' guedx Tolemaida, gulujx xpiajnu biäjtnu neñ barcw. Dxejc biohuiinu rexpejn̄ Jesucrist ni yu' guejdxga, biannänureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzuñnu

guejdxga, bionnu rolijz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpēn Jesucrist nani xhet rajpdi guedx Jerusalén. Rolijzni huijia'nnu. ⁹ Yu' tajp xindxapxteb Felipe. Dios badeed diidx guiniireni lo bejn. ¹⁰ Xhidajl dxej gulājznu rolijz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcāriejnne te guiniini xtidx Dios.

¹¹ Che bidzujn ni loonu, cua' Agabo xsindoor Pabl, baliibni lagajc reni'ni nājza renaani, najni loonu:

—Anaj Sprit Dxan xten Dios: “Scree suliib rexpējn Israel ni yu' guedx Jerusalén niguii ni najc xtēni sindoorre te guteedrenini ladznaa rebenzajt.”

¹² Che biejn diaagnu rediidxga, nuure nājza reben ro'c, gunabduxhnu lo Pabl na'c chāāni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazā? Xhet najcdi jiāuā nejn latzguiib, xhet najcdi palga nungālā guetā guedx Jerusalén xcuent Jesucrist —rāj pabl.

¹⁴ Che naaddi Pabl gusiechlajzni, xhetru guniīdinu lojni. Rājptisnu lojni:

—Sugac nani rļajztis Dios.

¹⁵ Che gudejd redxejga, bilucheenu rehxixtēnu, biriinu guejdxga, sontinu guedx Jerusalén. ¹⁶ Gaii rexpējn Jesucrist ni najc bejn Cesarea huīsa'n nuure guedx Jerusalén. Ro'c huināreni nuure rolijz te dade' ni laa Mnasón, bejn Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolijzni, ro'c gulāznu.

Huihui Pabl Jacob

¹⁷ Che bidzunnu guedx Jerusalén, bibalazduxh rexpējn Jesucrist sa'csi siopnu ro'c. ¹⁸ Che bara yāāl huinānu Pabl lo Jacob nājza lo renani rnibee guidoo xten rexpējn Jesucrist. ¹⁹ Dxejc gudāz Pablreni, bijni diidx xcuent tebgaj redzuun nani badeed Dios bejnne che guyunājni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulā'preni xpala'n Dios, rājzarenī lo Pabl:

—Guejblu, sa'nu, anajnlū lacti xhidalduxh xpejn Israel yu' nani rililajz xtidx Jesucrist luxh rapdaduxhreni leii xten toMoisés. ²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpējn Israel nani rbājz nejn reguejdx xten rebenzajt, rulijdxlurenī na'c gusālreni bee rexi'nreni, na'cza chazanājreni rexcostumbrnu. ²² ¿Xhini'c jiēnu? Siejn diajgreni abidzujnlu ree, dxejc suchagsa'reni te jiādreni lojlu. ²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴ Huināreni, nājza luj bejn si'ctis gunreni si'c ni caj lo leii xten toMoisés, te gaclu naya

nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeereni laaca rusoooblu xleii toMoisés. ²⁵ Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶ Che bara yääl, huiinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiädnä tejgareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl neñ guidoroga. Gunaazreni Pabl, dxejcti gusloj cayujnreni biejy, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajc di xquidoronure. Colhuilaa xho siädnäni ree beñ griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siädä guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

³⁰ Guideb guejdxga guyu' yärsia', bire' beñguixhuj, bixa'treni yejc Pabl, gunaazrenini, gudobxhaxhrene Pabl, gulägajc renini neñ guidoroga. Biägajc repuetro xten guidoro. ³¹ La! ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicient cayajc biejy sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni.

³⁵ Che bidzunäj resoldaad Pabl ro' scaleer ni caj ro'c, biireni

Pabl te bejnreni gan biunäjreni Pabl, sa'csi nialazduxh rebejn rlazjreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl̄ jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsaä! ³⁸ An dilu gac niguii ni siäd nación Egipto, nani gudil̄nä j gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guinii Pabl lo rebejn. Lal ni suga'ni lo scaleer basääb Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹—Guejbtu beñgool, guejbtu resa'ä, näjza la'tu dade'. Gucua-diajgtu rextidxä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojni:

³—Narä nacä te xpejn Israel. Guedx Tarso xten Cilicia goļä. Reepac gulaä. Lo Gamaliel bisiedä guiitz. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj. ⁴ Dxejcti bidx-echduxhä loj renani huililajz xtidx Jesucrist, bagu'tazareni. Balibä xhidajl bejn, niguii näjza gunaa, con cadenguuib. Basäuäreni neñ latzguuib. ⁵ Bixhojz ni sajcru näjza guiraa rebeñgool ni sajcru neñ xquidootu, sajc guinii xhini'c benä. Laareni baniidxreni guiitz loä. Ni'c huinä lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jäuäreni neñ latzguuib, te gusacsireni rebejnğa.

Gunii Pabl xho huililajzni xtidx Jesucrist

(Hch. 9:1-19; 26:12-18)

⁶ Räjpszani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xh-aguibaali siäd bajlga. ⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpenä?” najni. ⁸ Dxejcti räpä lojni: “¿Chuluj, Dad?”

Najni loä: “Narä nacä Jesucrist ni siääd Nasare't, nani cagusacsíduxhlu.”⁹ Rebejn ni sanää bahuiloj bajlga, bidxejbreni, niluxh di diajgreni niejn xse' nani gunii loä.¹⁰ Rápä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.”¹¹ Bastujxh bajlga loä, diru loä nieñ, ni'cni gunaaz resa'ä ñaä, sontinu guedx Damasco.

¹² Räj p Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel rnii nadalajz lo dade'ga. Biääd Ananías loä.¹³ Cuä'ä guzujni najni loä: “¡Saulo, betzä, bahuísac!” Lagajc dxejc biajc loä, bahuiä lojni.¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist.¹⁵ Loj guiraa bejn susule'lu guiraa ni bahuiilu näjza nani biejn diajglu.¹⁶ ¿Xhicuent sojbtsilu ro'c? Basquejn, huistie te tiobnislul. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluini xtidx Dios lo rebenzijt

¹⁷ Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Laļ ni cabedx-canabä lo Dios, astoo gunixcalä,¹⁸ dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.”¹⁹ Narä röpäza lojni: “Dad, anajreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguiib.²⁰ Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laļ ni bacuaareni guij.”²¹ Dxejcti naj Jesucrist loä: “Huij. Suxhalä luj zitduxh. Chäälu lo guiraa rebenzijt ni di gac xpejn Israel.”

Bia'n Pabl neñ rolijzro xten resoldaad

²² Bacuadiajg guiraa rebejn laļ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjļ guibajjruni.

²³ Sanuutis cabedxa'reni. Gulääreni xcamangwreni, cacuaazareni yuyol jiaa.²⁴ Dxejcti gunibee comandant lo resoldaad, räjpreni:

—Colchanä Pabl neñ yuro xtennu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

²⁵ Sanätireni Pabl. Entis baliibreni ni', ñaa Pabl con duguijd te niguijnrenini che gunabdiidx Pabl lo capitán, räjpreni:

—¿La rajc rguijntu te beṇ roman che gajdtu gacbee xhi dojl bejnni, ä? Et si'cti caj lo xleilu.

²⁶ Che biejn diajg capitán xtiidxni, bidxejbni, huijni lo comandant, räjpni lojni:

—Coṽnati xhi gunnäjlu dade're, sa'csi najcni beṇ roman.

²⁷ Biädguxuṇ comandant lo Pabl, räjpni:

—¿La gulii najclu beṇ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beṇ roman.

Dxejcti räjp Pabl lojni:

—Narä che goṽli nacä beṇ roman.

²⁹ Che biejn diajg resoldaad nani niguijn Pabl si'c, basḷagajcreni reduguijd ni naliib ni', ṇaani. Che biejnza diajg comandant najc Pabl beṇ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rrajz comandant gacbeeni xhicuent rrajz rexpejn Israel ju't Pabl. Ni'c gunibeeni jääd rebixhojz ni sajcru näjza reguxhtis xten guidoro. Dxejcti biädñani Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laṽ ni räjpni lojreni:

—Narä gusule'ä tiop diidx lo guejbtu, beṇ Israel, sa'ä. Guideb ni nabaṇä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcru, xtidx Pabl, bidx-echduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beṇguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gacbee laa bixhojz ni sajcru xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beṅ saducee, yu'za reni najc beṅ farisee. Dxejc guredxa' Pabl räjpni lojreni:

—Sa'ä, narä nacä te beṅ farisee, xi'nza te beṅ farisee narä. Rililazä sibaṅsac beṅ lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibaṅsac rebengut, dizareni chalilajz yu' rexangl Dios, dizareni chalilajz yu' aim xten beṅ. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhreni, räjpreni:

—Di niguiire gac beṅguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gusloj cabedxaduxhreni lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebeṅga huinäsacrenini neṅ yuro xtenreni.

¹¹ Che biu' guxhijṅ, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejṅ Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidaṅnu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujṅreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidaṅdinu palga dinu guigutxgaa Pabl —räjpreni—. ¹⁵ Naj la'tu näjza guiraa rebengool ni rnibee rexpejṅ Israel, colguxhal diidx lo comandant te guixee jäädnäni Pabl lojtu. Colyejn si'c ni rlaiztu jiejnru diajgtu diidx xcuent Pabl. Che jäädnä comandant Pabl ree, nuure sugu'tnuni lo nezyuj che gajdni guidzujṅ ree —räjpreni reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujṅni, biu'ni räjpni lo Pabl rediidx ni biejn diajgni.

¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu neñ yuro xten resoldaad, gunab loä jädnälaä bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinänini te laad cadro rut jiejni diajgni xtiidxreni, dxejc räjpni lojni:

—¿Xhini'c rlazzlu guiniilu loä?

²⁰ Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Sujnsireni si'c ni rlazj jiejnru diajgrendi diidx xcuent Pabl. ²¹ Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztisreni guxhaļ guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolijzn, räpxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpni lojreni:

—Colgutojpn tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhijñ guiriireni ree. ²⁴ Colquuil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

²⁵ Dxejcti bejn comandant te guijtz chanäreni lo gubernadoor.

²⁶ Loj guijtzga rnii scree: “Gubernador Pels, nani sacduxh. Narä, Claudio Lisias, ruxhaļä xtixtios lo guejblu. ²⁷ Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni beñ roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäjļ guetni, niclazä nanab jiäuni neñ latzguiib. ³⁰ Che baxhaļreni diidx loä cabäzxhiga'tz rexpejn Israelni te ju'treni dade're, baxhaļga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijtz ni bejn comandant.

³¹ Che biu' guxhijñ, huixii resoldaad Pabl sanärenini guedx Antípatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujñ redee Cesarea, badeedreni xquijtz comandant lo gubernadoor, huinäzareni

Pabl lojni te biembeenini. ³⁴ Che gulujx bilni guijtzga, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, ³⁵ räjpni lo Pabl:

—Guidzujnsi rexpejn Israel ni cadxechnäj luj, sucuadiagacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gatii dxej, dxejc bidzujn Ananías, bixhojz ni sajcro, näjza gatii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujn guejblu.

³ Xquixtiosduxh guejblu, gubernadoor Pels, xcuent guiraa redzunsac'c ni rujn guejblu guira nejz. ⁴ Luxh na'cru gusieednu guejblu, gucuadiaglaa guejblu tiop diidx.

⁵ Agucbeenu xho najc niguiire. Benguidxduxhni. Cadrotis rijni rujnni biey lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biääd guedx Nasare't.

⁶ Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. ⁷ Niluxh bidzujn comandant Lisias näjza resoldaad. Diptis badzucajreni niguiiga ladzñaanu.

⁸ Laani gunibeeni lo guejblu jääd reni rbe'c xquejni. Naj lagajc guejblu saj guiniabdiidx lojni te gacbee guejblu guli guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn Israel ni suga' ro'c räjp guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—.

¹¹ Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdilä bejn neñ guidoro. Nicla tej dina niunä biey neñ reguidobäz, nicla ro nezyuj.

¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni. ¹⁴ Rniliäpac lo guejblu: Rañä Xtios rextadgoldoonu. Jesucrist baluii xho gañsa'cnu Dios. Rililazä rextiidxni. Xhidalduxh rexpejn Israel rniyaj xho basule'

Jesucrist gan bejn Dios. Ruzobä guiraali releii xten to Moisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibansac rebengut, rebenguijdx sigajc rebenṣa'c. ¹⁶ Ni'cni racbeä laaca nabaṇä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

¹⁷ Räj pabl:

—Agujc xchej yu'ä zijt, lajdx garenca bejn, naj gubinää meel ni baxhaḷ reben nejzga te gudedäni lo rebejn ni xhet rajpdi. Biädnääz gojn xtenä gudedäni lo Dios. ¹⁸ Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleinu. Xhet benxhidajldi suganää, xhetza bieyjdi cayunä. ¹⁹ ¿Con rebejnṅa naj? Te cue'creni quej lo guejblu palga yu' xhini'c rdexchnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räj pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räj pni lojreni:

—Che jiäädli comandant Lisias dxejc gunä yälguixhtis —räj pabl.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räj pni lojni gusaanni gun Pabl nani rlajztisni gunni. Na'cza gudxojni jiääd reexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc ben Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibansac bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fini xhi bejnreni. Racsesli Pels tant bidxejbni biejn diajgni diidxga. Räj pni lo Pabl:

—Huij naj. Sibedxsacälu che latä stee —räj pabl.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcn gubernadorcoob. Niluxh Pels rlajz chanälajz rexpejn Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcní gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén. ² Che bidzujñni guejdxga, rebixhojz nani rnibee näjza reniguii ni sajcro lo rexpejñ Israel biääd lo Festo. Gusloj cabe'creni xquej Pabl lojni. Gunabduxhreni lo Festo ³ sa'csi rlanjreni gunni te huen laareni, guinibeeni jäädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

⁴ Dxejcti räjp Festo lojreni:

—Suniau Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajcro lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnñi —räjpni.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. ⁷ Che bidzujñ Pabl lojni, biääd rexpejñ Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlanjñi guiliäsni xpala'nni loj rexpejñ Israel, räjpni lo Pabl:

—¿La sisiajlu guedx Jerusalén te cue'c rexpejñ Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjñ cue'creni xquejä lo guejblu, xhet guedx Jerusaléñdi. Ananchee guejblu xhet latsiajdi benä lo rexpejñ Israel. ¹¹ Palga nacä te benguijdx, o palga yu' xhi latsiaj benä te nungäjñ guetä, xho dina xcäbä guetä. Palga xhet latsiajdi benä nani canii rexpejñ Israel benä, dxejc rutliidi sajc guteed narä ladzñaareni. Suchale'creni xquejä lo César nani najc reii xten rebeñ roman —räjp Pabl.

¹² Che guninäj Festo reguxhtis xten xquidoro rexpejñ Israel, räjpni lo Pabl:

—Luj gunablu chäälü loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujñ reii Agripa näjza chäälñi Berenice guedx Cesarea. Biädhuiireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. ¹⁶ Rápä lojreni: “Di leiü xten nación roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejca niguiiga diidx xcuent requej, te guiniini la guliireni.” ¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl. ¹⁹ Alga cadilnäjrenini xcuent xleiiireni, xcostumbrreni. Guñizarenini xcuent te niguii ni laa Jesucrist. Agujtni, niluxh canii Pabl gubansacni lo rebengut. ²⁰ Guxii nanä xcuent sa' diidxre, ni'cni gunabdixä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni laj ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpn.

²³ Che bara yääl, biääd Agripa näjza Berenice, luxh sucheduxhrene. Näjza recapitán ni sajru näjza rebejn ni sajru lo guejdxga biu'reni nen yuro xten Festo. Dxejc gunibee Festo biääd Pabl. ²⁴ Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhrene guetni. ²⁵ Niluxh narä rchaloä xhet bejndini te nungäj] guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. ²⁷ Narä runä xhigab di nungäj] guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl ñaani, gusloj cagusule'ni diidx lojreni. Räjpnj:

² —Reii Agripa, rbalazduxhä sa'csi sajc gusule'ä diidx lo guejblu, sa'csi ñaj suze'cä diidx xcuent guiraa requej ni gule'c rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucuaadiaglaa guejblu guiraa rextidä.

⁴ Räjpzä Pabl:

—Guiraa rexpejn Israel nanchee xho nacä che gucäli bi-uux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleiinu si'cni rililajznu. ⁶ Ñaj suga'a ree, rlajzreni jläüä sa'csi rililazä diidx nani bia'n Dios con rextadgoldoonu. ⁷ Guitzubiop cuaa rexpejn Israel huililajz siliäs Dios guiraa rebengut te guibansacreni. Ni'cni bazuxhijbreni lo Dios dxej-yääl. Ñaj rniliä lo guejblu reii Agripa, sa'csi rililazä siliäs Dios guiraa rebengut te guibansacreni, ni'cni rlajzreni gusäureni narä. ⁸ Palga abejn Dios xhigab guiliänsi guiraa rebengut te guibansacreni, ¿xhicuent di lajztu chalii xtidx Dios?

⁹ Räjpzä Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäuäreni neñ latzguiib. ¹⁰ Guiraa recosre benäza guedx Jerusalén. Baniidx rebixhojz ni rnibee guijtjz loä te basäuä rexpejn Jesucrist neñ latzguiib. Che biäureni neñ latzguiib, narä gule'cä xquejreni te gujtreni. ¹¹ Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxziyt te ro'c huisacsä rexpejn Jesucrist.

(Hch. 9:1-19; 22:6-16)

¹² Räjpzä Pabl:

—Ni'c sa'a nez guedx Damasco, ca'a guijtjz ni baniidx rebixhojz ni rnibee. ¹³ Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuanj yejc garu'ch.” ¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. ¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. ¹⁷ Ñaj suxhalälu loj rexpejn

Israel näjza lo rebenzijt nani di gac xpejn Israel. Che gusacsj rexpejn Israel näjza rebenzijt luj, sacnäduxhälü, te di ju'treni luj. ¹⁸ Gacnäã lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Benxäb ni rnibee rebenxäb, sa'csi susoobreni xtidx Dios. Che chalilajzreni rextidxä, sudzucaj Dios xtojlnreni. Dxejcti suchaag Diosreni loj renani anajc benaya sa'csi basoobreni xtidx Dios, huililajzreni xtidxä.”

¹⁹ Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgää xtiidxni lo reben Damasco. Röpä lojreni: “Colgusiechljaz, colgusoob xtidx Dios. Colyujn dzunsa'c te gacbee rebejn abasiechljaztu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. ²¹ Sa'csi benä si'c, gunaaz rexpejn Israel narä nen guidoro, rlajzreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo reben gut, ganiddooza laani suluiini loj rexpejn Israel näjza loj guiraa rebenzijt guliipac xtidx Dios, sibañsac bejn lo reben gut, si'c ni guniini galooli.

Di Agripa nililajz xtidx Jesucrist

²⁴ Lañ ni canii Pabl rediidxga lojreni, dip gunii Festo, räjpmi lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

²⁵ Dxejcti räjpa Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. ²⁶ Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, çla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjpa Pabl.

²⁸ Dxejcti räjpa Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjpa Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni,

nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni. ³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

³² Dxejcti räjp Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹ Basoobtireni dxej ni niu'nu nen barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu nen barcw, bideednu xnisdoo reguedx Cilicia näjza xnisdoo reguedx Panfilia, te bidzuñnu ro' guedx Mira xten Licia. ⁶ Ro'c bidxäjl capitán xten resoldaad stee barcw ni siääd guedx Alejandria. Agojl chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzuñnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu nen barcw lo nisdoo nez cuä' yu Creta; si'ctis gujc bidzuñnu te lajt ro' nisdoo ni laa Buenos Puertos cadre guxii säab bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejzä dxej ni rucua'n rexpejn Israel, guxii riäädx chaa ijz. Rebäire di bejn chää nen barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgä bis guejbtu, palga chonnu nen barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw.

¹² Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice

ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niacclaa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. ¹⁶ Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni. ¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹ Ni riojn dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtnu. ²¹ Xchero rut rlajzdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di läädxre niajc, dizanu nidejd trabajwduxhre. ²² Niluxh colcuedcxi lastootu. Niclatej bejn ni siäd lo barcw di guet. Barcwrtis sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴ najni loä: “Na'c guidxejblu Pabl. Nanabpac chäälü lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadro chalaj barcw lo yujxh nen nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balañaä beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, ²⁸ ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlajzreni malaii jianijga lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee

guench guiib lo nisdoo, niluxh rlazzeni guxunreni guidon la sajc guidzujnreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayani, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj caya-jwnini. ³⁶ Dxejc bibaa-lazzeni, näjza laareni gusloj caya-jwreni. ³⁷ Nuunu najcnu tiop gayuu gayonbitzubixho'p bejn ni yu' neñ barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadro rdzujñ te gueübäz ro' nisdoo cadro yu' xhiroob yujxh ro' nisdoo. Rlazzeni nusu'reni barcw ro'c. ⁴⁰ Dxejcti baslaareni guidap guench guiib ni naaz barcw, bia'reni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh neñ nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. ⁴² Dxejcti rlaz resoldaad nugu't repres te di guixoobreni lo nis guxunreni. ⁴³ Niluxh di rlaz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujnreni lo yujxhga.

28

Bidzujñ Pabl lo yuj ni laa Malta ni re' lo nisdoo

¹ Che bidzujñnu lo yuj ni tre' lo nisdoo, biembeenu yujga najc ni laa Malta. ² Guenä j rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. ³ Ca' Pabl te däaz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni ñaa Pabl. ⁴ Che bahuii reben Malta li najl bäl nialajzga cayauya' ñaa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtnei naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶ Dxejc reben ro'c cabäjz fiireni la sisiägüij naa Pabl o laa sejtnei. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcuber-nadoor Malta. Biojia'nnu rolijzni choñ dxej. Huenduxh gujc dade'ga, baniidxni guiraa ni biquiinnu. ⁸ Naga' xtdad Publio cayacxhuuni, yu'ni xliaa, cayajczani yobrejn. Huihui Pablnei. Guredx-gunab Pabl lo Dios, dxejc batzuub Pabl naani yejcn, basiacgajcnini. ⁹ Che gucbee reben guejdxga abasiajcn beñ racxhuuga, bidzunäjreni beñ racxhuu lo Pabl, basiajcn Pabl guiraareni. ¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu neñ barcw.

Bidzujñ Pabl guedx Roma

¹¹ Agujc choñ bäii yu'nu ro'c che biu'nu neñ te barcw ni siäd Alejandria. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹² Biriinu Malta sonnu neñ barcw nez guedx Siracusa. Ro'c bia'nnu choñ dxej. ¹³ Dxejcti biusacnu neñ barcw, sonnu lo nisdoo cheni bidzunlinu guejdx ni laa Regio. Che bara yäl, gubi' te bej birii lad sur. Biusacnu neñ barcw. Bara yäl bidzunnu guedx Puteoli. ¹⁴ Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuäänzi. Tejtis soldaad biannäj Pabl.

Baluii Pabl xtidx Dios lo reben Roma

¹⁷ Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzguuib guedx Jerusalén, dxejcti bateedreni narä ladznaa reroman. ¹⁸ Che biejn diajgreni xtidxä, rlajz reguxhtis roman nuslaa narä sa'csi xhet benädi te

nugu'treni narä. ¹⁹ Niluxh naaddi rexpejn Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebeņgut, ni'c nalibä cadenre.

²¹ Dxejcti räjpreni lojni:

—Nicla tej guiitz gajd reguxhtis xten reguedx Judea guxhal loonu xcuentlu, gajdza rexpejnmu ni bidzujn ree jiädsa'n diidx xhet laadi bejnlu. ²² Rlajznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujn dxejga, bidxagsa' xhidalduxh bejn neņ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz rebeņ Israel jiäd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxaan xten Dios rediidxre guniini, räjpni lo rextadgoldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojlreni.

²⁸ Räjp Pabl lojreni:

—Colgabee. Najli sisiule' xtidx Dios lo rebeņzijt ni di gac xpejn Israel te gusiejch lajzreni, te gudzucaj Dios xtojlreni. Rniliäpac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni laļ ni sääreni.

³⁰ Tio ipz guläjz Pabl guejdxga neņ yu' ni cualaani. Biuni guiralii rebejn ni biäd rolijzni. ³¹ Lo guiraa rebeņga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeņ Roman

Rucuaa Pabl lo rebeņ guidoo neņ guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiijtzen xten reprofetga. ³ Rediidx ni rusule'ä najc xcuent Jesucrist, Xi'n Dios, ni najc xagdoos toreei David xcuent tiejxhni. ⁴ Xcuent Xsprit Dxan Dad Jesucrist, najcni Xi'npac Dios. Badeed Dios yälrnibee lojni, ni'cni gubansacni lo rebeņgut. ⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeņ ni rej guideb guedxliuj xtiidxni. ⁶ Luxh nadxaagtu loj rebeņ ni guleni te chalilajzreni xtiidxni.

⁷ Ruxhalä guiijtze lojtu ni yu' guedx Roma, guiraatu ni sanälajz Dios ni bibeetu gactu beņdxan. Gacnäj Dios ni najc Xtdadnu näjza Dad Jesucrist la'tu, guscuedxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju beņ diidx xcuent xcälrlilajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuum Dios guideb lastoä, rusule'ä diidx xcuent Xi'nni Jesucrist. ¹⁰ Sanuutis canabä lojni, top sajc jädhuiä lojtu si'cni rlazä gunä agujc xchejli. ¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustiobnu lajz sa'nu xcälrlilajz xtidx Dios xten sa'nu.

¹³ Rebetzä rlazä gacheetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru beņ xtidx Dios sigajcni salilajzreni guiralajt cadro hua'a loj rebeņ ni di gac xpeņ Israel. ¹⁴ Nungäjlpac gusule'ä xtidx Dios loj rebeņ nani rnii garen-garen didxsaj, sigajc loj rebeņ griegw, loj renani nayääl, sigajc loj rebeņ najn. ¹⁵ Rbaali lazä suga'a naj, te gusule'ä xtidx Dios näjza lojtu ni yu' guedx Roma.

Xcälrnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis beņ nani rlazchililajz xtiidxni, ganidtoo reni najc rexpeņ Israel, dxejcti näjza rebeņ ni di gac xpeņ Israel. ¹⁷ Sa'csi xtidx Dios rusule'ä xho nanab chalilajz te beņ te gacni te beņsa'c nez lo Dios sa'csi

huililajzni xtiidxni. Lo xtidx Dios caj scree: "Palga rililajz te bejn xtidx Dios, najcni te beɲnaya nez lo Dios, nabaɲɲajni Dios xcuent xcäl_rililajzni."

Rextojl bejn

¹⁸ Xcälrdxe'ch Dios nani yu' xhaguibaa siajbni yejc rebejn nani gun dojl, nani rlajz gun cosguijdx, nani di gusaan guisieed sabejnreni didxgulli. ¹⁹ Sa'csi anancheereni nani sajz gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fii bejn xcuent Dios, si'c xcäl_rnibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yäl_rnibee par tejpas, ni'c di gacdi guiniireni loj Dios direni niembee xhini'c rlajz Dios gunreni. ²¹ Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicäy xcariejnreni, naareni hueen najc gunreni si'ctis ni jiajb yejcreni, si'cni rsia' lajzreni neɲ lastooreni. ²² Caniireni nanduxhreni, per direni gan, nayäälreni. ²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

²⁴ Ni'cni gulälaz Diosreni, basaanni gunreni si'ctis ni rlajzreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäj niguii, lagajc sagonaareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlajzreni jiureni Dios, basaanti Dios suyu' cosguijdx'tis xcariejnreni, te chanuutisreni lo xcällatsiajreni, rujnreni recos ni xhet laadi. ²⁹ Guidxareni dojl, näjza cosguijdx, näj yäl_ruguilajz xhixten sa'reni; rugu'treni bejn, rujnreni yäl_rsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizareni didxxhii. ³⁰ Rnijaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacoob rbäxtiejreni, gualajzreni lo xcuzajnreni, ³¹ nadduxhreni, xheti xcariejnreni, xhet sajcdi xtiidxreni ni ria'nreni lo sabejnreni, direni chanälajz sa'reni

si'cni nungäjĭ gacni, dizareni gulaslajz sa'reni. ³² Luxh mase agucebereni gun Dios yälġuxhtis lojreni, najnzareni nungäjĭ guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

2

Dios rujn yälġuxhtis con didxguliipac

¹ Ni'cni, ħcanejz chäätu, la'tu beņguedxliuj? Chutis luj ni rgubeelu sabejnĭlu, lagajc si'c cubeezareni luj, lagajc xcuent ni'c sajclu yälġuxhtis, sa'csi luj rgubeelu sabejnĭlu, lagajcza luj rujnĭlu lagajc dojlġa. ² Nancheenu sujn Dios yälġuxhtissa'c loj renani rujn sa' dojlġa. ³ Beņ guedxliuj ni rgubee loj renani rujn dojl, luxh sigajcza rujnĭlu, ħla rujnĭlu xhigab sidedcaj gun Dios yälġuxhtis lojlĭu xcuent xtojĭĭlu, ä? ⁴ O ħla rbälazlu ni rujn Dios, najcni huenduxh, lacti guroob najc xcälġulaslajzni, rapduxhzeni pasens? ħLa dilu gan dee najc ni gacnäjĭlu gusiech-lajzlu te guibicajĭlu lo dojl, ä? ⁵ Luxh sa'csi nadduxhĭlu, di lastoolu guigoodz te gusiech-lajzlu, cagutajĭĭlu yälġuxhtis ni gaclu che guidzujĭn dxej ni gun Dios yälġuxhtis loj rebeņ guedxliuj, ⁶ siguijx Dios loj tejgatu xcuent dzuun nani bejn tejgatu. ⁷ Loj rebejn nani rġajztisreni guibaņsa'c, ni gusoob xtiidxni, sudeed Dios yälġnabajĭn par tejpas sa'csi gudiilreni xhaniduj nājza go'preni xpala'nreni loj Dios, rġajzreni guibajĭnreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusobreni reyällatsiaj, redidxguijdx. ⁹ Guiraa rebeņ guedxliuj ni rujn dojl sidejd trabajwduxh nājza sac-huin lastooreni; ganid rexpen Israel, dxejcti nājza rebeņ griegw. ¹⁰ Loj guiraa rebejn nani rujn cos-hueen, sudeed Dios xhaniduj, nājza bala'n, nājza yälġrbecdxi lastooreni, ganid rexpen Israel, dxejcti nājza rebeņ griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälġuxhtisreni xcuent xtojĭreni. ¹³ Xhet ganaxdi renani rucudiajgtis xleii Moisés najc beņnaya nez loj Dios; rebejn ni rusoobpac rexleii toMoisés, reni'c najc beņnaya loj Dios. ¹⁴ Yu' xhidat bejn ni di gumbee xleii toMoisés, dizareni gac rexpen Israel, rujnreni recos ni caj lo lei. Najnreni xhini'c najc cos sa'c. Ni'cni lagajc xcäriejnreni najc si'c lei par laareni. ¹⁵ Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. ¹⁶ Guiraa recosre sajĭ che guidzujĭn dxej ni gun Dios yälġuxhtis guiraa rexhigabxhiga'tz ni yu' lastoo

rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpen Israel näj xleii toMoisés

17 Luj ni laalu xpen Israel, ni rniilu sanäpaclu xleii to-Moisés, rniduxhlu najclu xpen Dios, 18 rniilu nancheezalu xhini'c rlanjz Dios gunlu, anajnzalu xhini'c najc hueenru sa'csi bisiedsa'c paclu leii. 19 Rchalolu sajz guluiilu nezyusa'c lo rebejn nani najc si'c lotiä'p, sajz guzaniylu xcäriejn reni nacäy xäriejnreni. 20 Rchalolu najclu maestr lo renani nayääl, najczalu maestr lo rebuux, sa'csi nansa'clu leii, luxh lojni caj guiraa yäl'najn näjza guiraa didxguliipac. 21 Ni'cni rniä lojlu, luj ni caguseed xtee bejn, ¿xhicuent dilu guseed lagajz luj? Luj ni rusule'lu diidx na'c cuan bejn, ¿xhicuent rbajnlulu? 22 Luj nani rniilu na'c guesnäjni te ni di gac chääl'ni, ¿la resnäjlulu nani di gac chäällu, ä? Rdxechlu xcuent rebanäjb, ¿xhicuent rbäälulu xhicos neñ xquidoo rebanäjb, ä? 23 Luj rlanjzlu chä'p xpala'nlu sa'csi najnlulu leii, ¿la rusanxtujylu Dios sa'csi dilu gusoob xtidx leiiga, ä? 24 Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajz ni caj lo xtidx Dios.

25 Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. 26 Ni'cni palga te bejn ni di chu beega, luxh rusoobni guiraliipac xtidx leiiga, ¿la di gacdi guchaagni cuent najcni si'c te nani yu' beega, ä? 27 Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. 28 Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. 29 Najcpac te xpen Israel nani najcni neñ lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejn di.

3

1 ¿Xhini'c sacnäj te bejn najcni te rexpen Israel, ä? O ¿xhi sajz chuni beega? 2 ¡Empac sacduxhni! Ganidtoo, sa'csi loj rexpen Israel badeed Dios xtiidxni. 3 Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejn, ä? 4 ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios: Lagajz xtiidxlu suluii laaca rujnlulu, te che gaclu yälguxhtis, nicla tej xtojllu di guidxäjl.

⁵ Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te ben guedxliuj naj.) ⁶ ¿Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bendojl? ⁸ Yu'za bejn ni canii didx-xhii, najreni cayäjpnu lo rebejn: “Coļyejn cosguijdx te guiluilojni recoshuen.” Per rebejn ni canii si'c sidzujn dxej gacreni yälguxhtis.

Guiraanu najcnu bendojl

⁹ ¿Dxejca'? ¿La najcnu benhuenduxhru lojreni, ä? Dini gac; tebloj abile'cnu yälquij xten rexpən Israel con rebejn ni di gac xpen Israel, sa'csi guiraareni yu'reni lo dojl. ¹⁰ Si'cni caj lo guijtz:

Ruti te beṅsa'c, nicla tejni.

¹¹ Ruti te bejn ni racbee, ruti chu tej nani rguuil Dios.

¹² Guiragajcreni abirii lo xnejz Dios, teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxguijdx,

najcni si'c te baa ni naxal, rusgueerene con lujdxreni,

didxlatsiaj rii ro'reni najcni si'c beneṅ ni yu' ro' te bälñialajz.

¹⁴ Ro'reni entis cague,

entis canii didxrdxe'ch lo sa'reni.

¹⁵ Ni'reni ruxunli saxhe' xtiejn sa'reni.

¹⁶ Cadrotis rijreni rujnreni latsiaj,

ruteedreni sa'reni trabajw.

¹⁷ Direni gumbee nezyuj ni ruscuecdxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacbeerene yu' xtojlni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtojlni bejnga, sa'csi leiiga najc nani guluii dojl ni yu' neṅ lastooni.

Ruslaa Dios lo dojl xcuent yälrililajz xtiidxni

²¹ Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. ²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu

nez lojni. ²³ Sa'csi guiralii rebejn guedxliuj abanijt lo Dios, direni guiga' guidzujñreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yäl'nabannaya nez loj Dios sa'csi Jesucristis gudijx yäl'guxhtis xten dojl che baxhe'ni xtiejn ni lo cruuz te badzucajni xtojlnu. ²⁵ Baxhal Dios xi'nni, Jesucrist, te cuajni lo cruuz nez loj rebejn te si'c gudijxni guiraa rextojl chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yäl'guxhtis rextojlreni, ²⁶ sa'csi acanajn Dios guc gunni yäl'guxhtis redojlga, te si'c guiluiini xcäl'nayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni ¿con yäl'naro? ¿Con yäl'bindaan? ¡Xhet sajcdini! ¿Xhi leii rudzucaj xtojlnu? ¿La leii najc ni rnii jiennu dzunsa'c, ä? ¡Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. ²⁸ Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujni redzunsa'c ni caj lo leii.

²⁹ ¿La najc Dios Xtiooztis rexpenn Israel, ä? ¿La dini gac näjza Dios xten rebejn ni di gac xpen Israel? ¡Xho dini gac! Najcni Dios xten guiroc cuaa bejn. ³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzreni xtiidxni. ³¹ ¿La rudzucajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

4

Xcäl'rililajz toAbram

¹ ¿Xhini'c sajc guiniinu xcuent toxtadgoldoonu, Abram? ² Paru niajc toAbram beñnaya nez loj Dios por redzuun ni bejn ni, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre: Huililajz toAbram xtidx Dios, ni'c bachaag Dios cuent najcni te beñnaya nez lojni.

⁴ Meel nani rca' te bejn ni rujn te dzuun, meelga najc ni riäjł xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejn ga najc te beñnaya nez loj Dios, sa'csi huililajzni xtiidxni. ⁶ Sigajcza naj toDavid, chicbaa bejn nani ruhaag Dios cuent najcni te beñnaya luxh di niquiin niujni redzuun ni caj lo leii. Räjpn:

⁷ Chicbaa renani abaslaa Dios lo xtojlni, renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et najdziza renani di niu' bee, ä? Sa'csi rniinu: “ToAbram gujc te beñnaya nez loj Dios sa'csi huililajzni xtidx Dios.” ¹⁰ Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yälñaya sa'csi huililajzni xtidx Dios che gajdlini chu bee te gacni xtad guiraa renani rililajz laḷ ni xhet beedi yu'reni, te näjza laareni guidxaag cuent najcreni beñnaya nez loj Dios, ¹² te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälñrililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. ¹⁴ Sa'csi paru renani rusoob xtidx leiiga najc nani xca' yälñasa'cga, xlia'si chalilajz bejñ xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejñ. Cadro xheti leii, xhetiza xtojḷreni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälñasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yälñabajñ loj rebeñgut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtad xhidajl nación, te gusojb xtidx Dios ni guniini che räjpni: “Scree gac xhidajl rexagdoolu.” ¹⁹ Di toAbram nunijt xcälñrililajzni, mase ayu'ni tegayuu ijz, najnni anajcni beñgool, luxh sigajcza Sara abeñgool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. ²¹ Anajnni rajp Dios yälñribee te gunni guiralii nani bia'n diidx gunni. ²² Ni'c bachaag Dios cuent najcni te beñnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: “Bidxaag cuent najcni te beñnaya nez loj Dios sa'csi huililajzni xtidx Dios”, ²⁴ näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebeñgut, sidxaag cuent najcnu beñnaya nez loj Dios. ²⁵ Bacuaareni Jesucrist lo cruzj

te gudijxni rextojl̄nu nez loj Dios, luxh gubansacni lo rebengut, te gac gacnu beṅnaya nez loj Dios.

5

Xhi rsiajc bejṅ che najcreni beṅnaya nez loj Dios

¹ Ni'cni che rililajznu xtidx Dios rudzucaj Jesucrist xtojlnu rajcnu beṅnaya nez loj Dios, ni'cni ruscuedxini lajznu. ² Sa'csi gujt Jesucrist, sa'csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl̄nabajṅ, su'pacnu lo xcäl̄rdimbicha' Dios. ³ Luxh xhet ni'ctis, sajcza guibalaaznu che tednu trabajw, sa'csi najnnu trabajwga sujṅ jia'pnu pasens. ⁴ Luxh che rajpnu pasens rajcnu te beṅguyajlru; che anajczanu beṅguyajl, rililazsa'crunu. ⁵ Luxh yäl̄rililazsa'cnu dini gusanx-tujy, sa'csi yäl̄sanälajz ni rajp Dios ruchaj lastoonu sa'csi neṅ lastoonu rbäjz Xsprit Dxan xten Dios ni baniidxni loonu.

⁶ Laṅ ni xhetliidi sajcdi jiennu lagajc xcuentnu te guibicaj xtojlnu, che basa' dxej biäd Jesucrist te gujtni lo cruzj xcuent rebendojl. ⁷ Guliipacni, naganduxh guidxäl̄ni te bejṅ ni xcäjb guet lacuaa te bejṅ ni laaca rujnni. Per sidxäj̄l te bejṅ ni xcäjb guet lacuaa te beṅsa'c. ⁸ Luxh Dios baluiloj xcäl̄rinälajzni xcuent nuurnu sa'csi laṅ ni yugajcnu lo dojl, gujt Jesucrist lo cruzj xcuentnu. ⁹ Aticaxh ṅaj ni najcnu beṅnaya nez loj Dios sa'csi baxhe'ni xtiejnni te gubicaj xtojlnu, ṅaj sidedcaj gacnu xcäl̄guxhtis Dios. ¹⁰ Palga laṅ ni rdxe'chnu lo Dios, basiäj̄l̄ni lajzni xcuentnu sa'csi gujt Xi'nni lo cruzj, ṅaj ni abiäj̄l̄ lajzni, suslaani nuure lo dojl sa'csi gubansac Xi'nni loj rebengut. ¹¹ Luxh xhet ni'ctis, sibalaznäj̄nu Dios xcuent Dad Jesucrist, sa'csi xcuentni ara'pnu yäl̄rbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojl̄ lo guedxliuj, luxh xcuent dojl̄ biädza yäl̄gujt, gudejdti yäl̄gujt loj guiraa rebejṅ, sa'csi guiraa rebejṅ bejnreni dojl̄. ¹³ Cheni gajd xleii toMoisés chu lo guedxliujre, alabejṅ rebejṅ dojl̄, per di niajcdi nu-cuaquijni rebejṅ sa'csi xheti leii. ¹⁴ Luxh empac gujt rebejṅ neṅ redxej ni gubajṅ toAdán hasta redxej ni gubajṅ toMoisés, mase direni niujṅ lagajc dojl̄ nani bejṅ toAdán; luxh ruluiloj yu' chu stee bejṅ nungäj̄l̄ jiäd.

¹⁵ Luxh nani runidx-xlia' Dios dini gac si'c najc xtoj̄l̄ toAdán. Dini gac si'c sa'csi palga xcuent dojl̄ ni bejṅ toAdán, gujt xhidalduxh bejṅ, cuantimaaz ṅaj sunidx-xlia' Dios yäl̄nabajṅ par tejpas loonu por xcäl̄rulaslajz Dios, nägajc por xcäl̄rulaslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yäl̄runijṅ ni biäd loonu xcuent dojl̄ ni bejṅ toAdán;

sa'csi xcuent tejtis dojlga biääd yälguxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzjz, ni'c gujc sa'csi yuduxhtej dojl, te xcuent ni bejn Jesucrist sajc gac bejn bejnaya nez loj Dios. ¹⁷ Palga xcuent dojl ni bejn tejsi bejnnga gunibee yälgujt lo guiraa bejn, cuantimaaz lo yäl'nabajn par tejpas sinibee guiraa reni rca' xcäl'rulasajz Jesucrist näjza renani rcaxlia' lojni yäl'racnaya nez loj Dios.

¹⁸ Ni'cni sigajc ni biääd yälguxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bejnaya nez loj Dios, cua'reni yäl'nabajn par tejpas. ¹⁹ Nalajznu sigajc ni banijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajc bejnaya nez loj Dios xcuent tej niguii ni basoob xtiidx Dios. ²⁰ Ni'cni badeed Dios xleii toMoisés, te guzenru dojl. Niluxh cadre guyuduxh dojl, ro'c nanabza chuduxhru xcäl'rulaslazduxh Dios, ²¹ te sigajc ni gunibee dojl guyu' yälgujt, sigajcza guinibeeru xcäl'rulasajz Dios te jia'cnu bejnaya nez loj Dios, te xca'nu yäl'nabajn par tejpas xcuent Xi'nni, Dad Jesucrist.

6

Agujtnu lo dojl per nabañnäjnu Jesucrist

¹ ¿Xhini'c guiniinu, ñaj? ¿La sajc guidxunrunu lo dojl te tiobru xcäl'rulasajz Dios, ä? ² ¿Gurniälojtu gacni si'c! Nuurnu najcnu si'c te beñgut lo dojl sa'csi rililajznu xtidx Dios; ¿xhoxh gac guibajñrunu lo dojl? ³ ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? ⁴ Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcäl'rnibee Dios, sigajcza näj nuurnu sajc guidxunnu lo te yäl'nabañcoob.

⁵ Sa'csi palga gujcnu tejsi con laani lo xcäl'gujtni che birob-nisnu, sigajcza sajcnu tejsi con laani lo yäl'nabañsac lo re-beñgut. ⁶ Ni'cni xcärienbiejwnu cuaj lo cruzjz con laani, te badzucajni rextojlnu, te di gacdiru guinibee dojl loonu. ⁷ Sa'csi nani agujt, di gacdiru guinibee dojl lojni. ⁸ Palga nuurnu agujtnu con Jesucrist, rililaaaznu sibañsaczanu con laani. ⁹ Sa'csi nadonpacnu gubañsac Jesucrist loj rebeñgut, ni'c diruni guet, diru yälgujt ga'p yäl'rnibee lojni. ¹⁰ Che gujt Jesucrist, gujtni xcuent dojl, luxh diru gacdi guinibee dojl laani par tejpas; ñaj ni gubañsacni, nabajñni nez loj Dios. ¹¹ Ni'cni la'tu colguchaag cuent najctu si'c te beñgut lo dojl, luxh nez loj Dios, colguchaag cuent nabañnäjtu Jesucrist.

¹² Ni'cni na'c gusaantu guinibee dojl tiejxhtu te guntu si'ctis ni rlanj tiejxhtu. ¹³ Na'cruza gusaantu jiajb guideb lagaa

tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, najza colgudeed guideb lagaa tiejxhtu te guntu recoshueen si'c ni rlanj Dios guntu. ¹⁴ Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulasajz Dios.

La'tu najc si'c remos

¹⁵ ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl'rulasajz Dios, ä? ¿Xho gacni si'c! ¹⁶ La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu beñnaya nez loj Dios. ¹⁷ Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸ Luxh agulaatu lo dojl, biädjiajctu xmos Dios lo dzunsa'c. ¹⁹ Narä cagusule'ä diidx con sa' didx guyasire sa'csi gajdtu gachesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beñnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis. ²² Per naj, sa'csi agulaatu lo dojl, abiu'tu najctu xmos Dios, sujntu sajctu beñnaya nez loj Dios, luxh xnezyuj recoscoobre rdzujn lo yäl'nabannäj Dios par tejpas. ²³ Xcäl'rajx xten dojl najc yälgujt, per nani runidx-xlia' Dios najc xcäl'nabannäj Dios par tejpas xcuent ni bejn Jesucrist xtdnu.

7

Yäl'ruluii ni rudeed yälguchnaa

¹ Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre?

² Najcni si'c te gunaa nani bachnaa te niguii. Nanabpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni.

³ Ni'cni, laj ni nabajn chääl gunaaga, palga cuäznäj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajc guchnaani stee niguii, xhet dojldi cayujnni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruz, te naj sajc jiu'tu lo ste'ca bejn, loj lagajc Jesucrist nani gubansac loj

rebengut te sajc jiennu redzunsac ni rlazj Dios jiennu. ⁵ Sa'csi la_l ni gubaj_nnu lo yäl_naban_nbiejwga, lagajc rediidx nani rnii leiiga di gacdi gun bej_n, lagajc recosga rlazj gun tiejxhnu, luxh si'c sozaatisnu lo xnezyuj yäl_gujt. ⁶ Naj abiriinu lo leiiga, sa'csi agujtnu lo leiiga nani gunibee loonu galoo. Naj con xp_ritcoob ni yu' ne_n lastoonu yu'nu lo Dios, xhet con xcärienbiejwdi ni goj_pnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bej_n palga dina niolä lo leii rediidxre: “Na'c chuguij lajzlu rehxixten bej_n.” ⁸ Ni'cni lagajc diidx ni caj lo leiiga bejn guyuguij lazä rehxixten bej_n sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. ¹⁰ Luxh baxha_l Dios leiiga loonu te jiuäni, te xca'ä yäl_nabaj_n, luxh alga baze_nni benä dojl, banitä nez loj Dios, gutäti dxejc. ¹¹ Con leiiga, basguee dojl narä, bej_nni narä si'c te bengut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³ ¿Dxejca'? ¿La nani najc te coshuen huinä narä lo yäl_gujt, ä? ¿Xho gacni si'c! Dojl najc ni huinä narä lo yäl_gujt. Te si'c xcuent leiiga ni nasa'c, jien_lojni dojl_pac najc dojl sa'csi bagu'tni narä con te coshuen, te lagajc rediidx ni caj lo leiiga jien_loj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te be_n guedxliujre, nacä xmospac dojl. ¹⁵ Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c ruluii hueenca najc leii. ¹⁷ Naj, diruni gac narä ni cayujn latsiaj, sa'csi yu' dojl ne_n lastoä, ni'c ni cayujn runä latsiaj. ¹⁸ Sa'csi narä nanä ne_n lastoä, nalajznu lo tiexhä, xhetliidi cossa'c_di yu'; sa'csi rlazä gunä cossa'c, per dina gacdipä te gunä_pac recossa'cga. ¹⁹ Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä. ²⁰ Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹ Ni'cni narä, nani rlazä gunä redzunsac, rdxälä leiire: yu'pa dojl tiexhä. ²² Sa'csi ne_n lastoä, rlazä_pac gusobä diidx xten xleii Dios. ²³ Luxh ruhuiä garenca leii yu' guideb lagaa tiexhä, ruchagdi_lni leii ni yu' xcärienä, rutedzani narä ladz_naa xleii dojl nani yu' guideb lagaa tiexhä.

²⁴ ¡Proobza narä! ¿Chuni'c guslaa tiexhä ni nungäj] guet xcuent dojl? ²⁵ ¡Xquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rla]z gusoob xtiidx dojl, chuni lo xleii dojl.

8

Yäl nabajñ ni najc xcuent Sprit Dxañ xten Dios

¹ Ni'cni naj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rla]z gun tiejxhreni, alga riurureni rujnreni ni rnibee Sprit Dxañ xten Dios ni rbäjz neñ lastooreni. ² Sa'csi leii xten Sprit Dxañ xten Dios ni rudeed yäl nabajñ xcuent Jesucrist, abaslaani narä lo yälrnibee xten xleii dojl nä]za yälgujt. ³ Sa'csi nani di niajcdi niujñ leibiejw, sa'csi dini niajc nadip lo rebenguedxliuj te gacreni beñnaya nez loj Dios, ni'c bejn Dios che baxhañni Xi'nni Jesucrist, si'c te beñ guedxliujre xcuent dojl, te bejñni yälgujxhtis lo dojl ni rnibee tiejxh bejñ. ⁴ Te si'c gac xcälgujxhtis xten leibiejw lo tiejxh nuurnu, renani dirunu gusoob nani rla]z gun tiejxhnu, sa'csi naj rbajñnu si'c ni rnibee Sprit Dxañ xten Dios ni yu' neñ lastoonu.

⁵ Sa'csi renani rusoobtis nani rla]z gun tiejxhreni, rujntisreni xhigab xcuent redo]lga, luxh renani rusoob xtidx Sprit Dxañ xten Dios rujntisreni xhigab xcuent nani rla]z Dios gunreni. ⁶ Sa'csi renani yu'tis yejcreni nani rla]z gun tiejxhreni, sejtreni, sinijtreni; luxh renani yu'tis yejcreni nani rñii Sprit Dxañ Dios, reni'c sibecdxi lajzreni, sica'reni yäl nabajñ lo Dios par tejpas. ⁷ Te xcäriejñ nani riutis ni rla]z gun tiejxh bejñ rdxe'ch Dios lojñi sa'csi dini gusoob xleii Dios, luxh nicla gac gunnini. ⁸ Renani nabajñtis te gunreni latsiaj ni rla]z gun tiejxhreni di Dios guibalazñajreni.

⁹ Luxh la'tu dirutu gun si'ctis ni rla]z gun tiejxhtu, ni'cni rujntu si'c ni rla]z Sprit Dxañ xten Dios guntu, palga rbäjzñi neñ lastootu. Palga yu' chu te]tu ni di Sprit Dxañ cuääz neñ lastooni, di ni'c gac xpejñni. ¹⁰ Palga rbäjz Jesucrist neñ lastootu, agujt tiejxhtu xcuent dojl, xprittu nabajñ sa'csi anajctu beñnaya nez loj Dios. ¹¹ Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xpritni nani yu' neñ lastoonu.

¹² Ni'cni rebetzä, najcnu bejñ ni cuaj di'n, xhet lojdi tiexhnu te jiennu si'c ni rla]z gun tiexhnu. ¹³ Sa'csi palga cayujntu si'c ni rla]z tis gun tiejxhtu, se]tpactu. Palga nabajñtu xcuent Sprit Dxañ xten Dios ni rbäjz neñ lastootu, sibälaztu latsiaj ni rla]z gun tiejxhtu, sibaññajtu Dios par tejpas.

¹⁴ Sa'csi guiraa renani ruluii Sprit Dxan xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiajb ni cua' bejn si'c xi'npacni, naj najcnu xi'nni, ni'cni sajc gäbnu lojni: “Guejblu, Xtadä.” ¹⁶ Sa'csi lagajc Sprit Dxan xten Dios ruluii loj xpirtnu, najcpacnu xi'n Dios. ¹⁷ Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu nen redx-
ejre, digacdi gun tebloonureni con yälrdimbicha' nani churu
guihuiinu. ¹⁹ Sa'csi guiraa recos nani benchee Dios lo guedxli-
ujre, cabäzreni, yuduxhreni gaan fiireni dxej che gululoj
Dios chuni'c najc rexi'nni. ²⁰ Guiraa recos ni gulecxtiej Dios
lo guedxliujre, xlia'si gujcreni, xhet sa'csi si'c rlanjdi recosga,
per sa'csi si'c bejn Dios, ni cabäzjis ²¹ guslaapacni guiraa recos
ni bencheeni lo guedxliujre lo xcälrnibee yälgujt, yälrnitloj, te
dxejc sajc jiu'ni lo yälrbedxi xten xcälrdimbicha' xten rexi'n
Dios. ²² Guiraa recos ni gulecxtiej Dios lo guedxliujre entis
roonreni, guira dxej rdejreni trabajw, si'c rdej te gunaa
trabajw che rajl xi'nni. ²³ Luxh xhet nani tre'tis lo guedxliujdi,
näjza nuunu ni yu' Sprit Dxan xten Dios nen lastoonu, roon-
zanu cabäaznu dxej cheni xca' Dios nuure si'c rexi'nni, cheni
guscoobzani tiexhnu. ²⁴ Sa'csi xcälrlililaaznu ni rbäaznu, ni'c
bejn gulaanu luxh yälrbäz ni guyasi rien, di ni'c gac yälrbäz,
sa'csi ¿chu laa ni cuäaz xcuent te cos ni ala bahuiini? ²⁵ Palga
cabäaznu xcuent te cos ni gajdnu guihuii, rbaali laaznu, rsi-
udzu'tznu rbäznu guihuiinu gacni.

²⁶ Sigajcza racnäj Sprit Dxan xten Dios nuure cadro xheti
yälrutijp laaznu sa'csi nicla guidonnu xho mood riäj] guiniab
bejn lo Dios. Luxh lagajc Sprit Dxan ni yu' lastoonu rniabni
lo Dios xcuent nuure con yälrbedxneñ nani nicla gajd bejn gäb
con diidx xho najcni. ²⁷ Dios, nani rula'tz lastoonu, nanchee
xhini'c rniab Sprit Dxan xtenni xcuent nuurnu, sa'csi rniabni
si'cpac ni rlanj Dios guiniabnu xcuent rexpejn pac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios,
reni agule Dios te gunreni xtzuunni rsiajcrenini te gun Dios
gac recosga par xcäl'nasa'creni. ²⁹ Sa'csi renani biembee Dios
galooli, reni'c gule Dios cheni gajdli guirixtiej guedxliujre, te
gacreni si'c ni najc Xi'nni; te gacza Xi'nni ganid loj guiraa ni
najc famil xten Dios. ³⁰ Renani guleni galooli, reni'c gure-
jdxni; renani gurejdxni, bejnzani najcreni beñnaya nez loj
Dios; renani bejnni najcreni beñnaya nez loj Dios, gulä'pzani
xpala'nreni.

³¹ ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo cruz te gujtni, te gudijxni xcuent xtojlnu, ¿xho dini guniidx loonu xcuent Xi'nni guira'ti nani rquiinnu, ä? ³³ ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu beñnaya nez lojni. ³⁴ ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadre rnibeeni; laazani cabejdx canabni lo Dios xcuentnu. ³⁵ ¿Chuni'c sajc gudzucaj nuurnu lo yälšanälajz xten Jesucrist: trabajw, o yälxliajs, o yälrusacsí, o yälrliaan, o yälxhabääl, o yälrdxejb, o te spaad, ä? Nicla tejni. ³⁶ Si'c ni caj lo guijtz ni caj xtidx Dios:

Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, niclza yälñabajñ, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yälmilaagwr, ³⁹ nicla jiaroduxh, niclaza jäjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcälšanälajz Dios, yälšanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios caguluii xcärienä laaca rniä; ² cayac-huinuxh lastoä, sanuutis yälxliajsga. ³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäjlgacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios neñguidoo. Sica'reni reyälñasa'c xten Dios palga jiureni xtiidxni. ⁵ Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te beñ guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejnnpac Israel. ⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: "Rexagdoolu nani guigab najc reni gac xagdoo Isaac." ⁸ Ni'cni

xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: "Stebijz, lagajc bäiire guibisacä, te dxejc chu te xi'n Sara."

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: "Xingangaloolu gac xmos xinhuinlu." ¹³ Si'cza caj lo guijtz rediidxre: "Sanälazä Jacob, niluxh bidxehnää Esau."

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnäa chutis bejn nani rlazä gacnäa." ¹⁶ Ni'cni dini gac xcuent ni rlanj rebejn gac, dizani gac xcuent nani rujn rebejn. Rajctisni si'c rlanj Dios nani rulaslajz bejn. ¹⁷ Ni'cni caj lo guijtz xten Dios che gunii Dios xcuent Faraón: "Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre." ¹⁸ Rulaslajzni rebejn nani rlanjtisni, runnadipzani lastoo bejn nani rlanjtisni.

¹⁹ Naj la'tu siniitu loä: "¿Xhicuent rucuaquijni bejn? ¿Chuni'c sajc sudzu'tz nez loj nani rlanjni gac, ä?" ²⁰ ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: "¿Xhicuent bejnlu narä scree?" ²¹ Gurniälojlu. Bejn nani runchee guejs, ¿la di gacdi gunni si'ctisni rlanjni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlanjni guluilojni xho rujnni yälguxhtis, näjza rlanjni guluilojni xcälrnibeeni, gopnäjni pasens renani nungäjł gac yälguxhtis, te nitlojzareni, ä? ²³ Bejn si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni. ²⁴ Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. ²⁵ Cajza lo guijtz ni bacuaa Oseas:

Renani di gac xpenä, reni'c cuälaä "xpenä".

Luxh nani dina ninälazä, sinälazäni.

²⁶ Dxejcti lagajc cadre räjpreni lojreni:

"Ditu gac rexpenä",

lagajc ro'c säjpreni lojreni:

"La'tu najctu xi'n Dios ni nabajñ par tejpas."

²⁷ Cajza lo guijtz ni bacuaa Isaías: "Mase najc xhidajł rexpen Israel si'c najc yujxh ni tre' ro' nisdoo, guxii gac reni laa lo dojl. ²⁸ Sa'csi susoobpac Dad, Dios xtiidxni xcuent xcälguxhtis

reben_n guedxliuj, luxh siojbza gunnini.” ²⁹ Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdo reben_n tiemp,

niajcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpən Israel

³⁰ ¿Xhini'c sajc guiniinu näj? Rebejn_n nani di gac xpen_n Israel, direni niguiil xho gacreni beñnaya nez loj Dios, niluxh agucreni beñnaya nez loj Dios sa'csi huililajzreni xtidx Jesucrist.

³¹ Luxh rexpən_n Israel, mase sanuutisreni lo xleii Moisés ni ruluii xho gac bejn_n beñnaya nez loj Dios, banijtreni, direni niujn gaan nusoobreni guideb leiiga. ³² ¿Xhicuent gujcn_n si'c? Sa'csi direni nililajz xtidx Dios, alga rlanjreni guntisreni dzuun xten leii, naareni si'c gacreni beñnaya nez lo Dios. Ni'cni gulaj ni'reni lo guij ni rutienta' bejn_n, nalajznu direni nililajz xtidx Dios xcuent Jesucrist. ³³ Si'cza bacuaa Isaías, räjpni:

Aguleä te bejn_n lo guedx Sión ni gac si'c te guij cadre rtiäj_n ni' bejn_n,

te guij ni rusälta' bejn_n.

Chutis tej nani chalilajz xtiidxn_n, dini jianxtujy.

10

¹ Rebetzä, rlazduxhä chalilajz rexpənä xtidx Dios. Rni-abduxhä lo Dios te guslaanireni lo xtoj_nreni. ² Narä rniäpac nancheä ruzuxhijb rexpən_n Israel lo Dios, niluxh direni gumbesa'c xhini'c rlanj Dios gunreni. ³ Sa'csi direni niacbee xcuent xho rajc te bejn_n te beñnaya nez loj Dios, ni'c rlanjreni gunreni dzuun si'c ni caj lo leii te gacreni beñnaya nez loj Dios, ni'cza direni nusoob xtidx Dios te gacreni beñnaya nez lojni. ⁴ Abasoob Jesucrist xtidx Leii, ni'cni che chalilajz bejn_n xtidx Jesucrist, anajceni beñnaya nez loj Dios.

⁵ ToMoisés bacuaa rediidxre: “Chutis ni rlanj gac beñnaya nez loj Dios sa'csi rusoobni xtidx leii, nanab gusobsa'cpacni diidxga guideb nabaj_nni lo guedxliujre.” ⁶ Xcäl_nayareni nez loj Dios sa'csi rililajzreni xtidx Jesucrist, rnii scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jädnäsacni Jesucrist loj guedxliuj. ⁷ Na'cza gäbni: “¿Chuni'c jäjt gabijl?” (nalajznu te chaxiini Jesucrist loj rebeñgut).

⁸ ¿Xhini'c rniini näj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yälirililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebeñgut, suslaani la'tu lo dojl. ¹⁰ Sa'csi con lastooni rililajz biniet

xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, rusläa Diosni lo dojl.

¹¹ Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” ¹² Sa'csi guiraa rebejn najc tebloj nez lojni, rexpejn Israel sigajc rebenzijt, sa'csi lagajc laani najcni Dad lo guiraareni, rulaslazduxhni guiraa renani rbedxrniab lojni. ¹³ Lo xtidx Dios caj rediidxre: “Chutis ni rbedxrniab lo Dad, siliaani lo xtojlni palga rililajzni xtidx Dios.” ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? ¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädnä diidx xcuent cossa'c, yälrbecdxilajz rebejn.”

¹⁶ Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?” ¹⁷ Rililajz bejn xtidx Dios che rucuardiajgreni diidxga; rucuardiajgzareni che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,

abidzujnza rextiidxreni lo guiraa reguejdx ni tre' lo guedxliujre.

¹⁹ Rniäza: Dipac rexpen Israel niacbee, o ¿la gucbeereni, ä? Galooli gunii toMoisés rediidxre:

Sunä gudxojuentu xcuent rebejn ni di gac te guejdx, con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguiil narä, bidxäjl narä, baluiloäza loj renani di niniabdiidx narä.

²¹ Guniiza toIsaías xcuent rexpen Israel:

Desde galooli, dxej-yääl basgää naä lo rebejnnga te niurenixtidxä,

luxh najcreni bejn ni di gusoob diidx, rutzu'reni didxnaj.

11

Rexpen Israel nani guläa lo dojl

¹ Arniä: ¿La agulälaz Dios rexpen Israel, ä? ¿Xho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín. ² Di Dios nibälaz rexpejn ni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpnii scree: ³ “Dad, abagu'treni guiraa reniguii nani gunii

xtiidxlu, abatzujlreni rexquidoolu, xtebtis narä bia'nä, luxh naj rlanjreni ju'treni narä.”⁴ Luxh, ¿xhini'c räjp Dios lojni? Räjpni: “Abalucheä gajdz mił bejn nani gajd guzuxhijb nez loj Baal.”⁵ Si'cza naj, abia'n te chinae' rexpen Israel nani agule Dios xcuent xcäl_rulaslajzni.⁶ Dxejc palga ruslaani nuure lo dojl xcuent xcäl_rulaslajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcäl_rulaslajz Dios gac yäl_rulaslajz.

⁷ ¿Dxejca'? Di rexpen Israel nidxäl nani caguilreni, luxh re-bejn nani agule Dios, ni'c bidxälni, luxh ste cuaareni, aguyalajzreni.⁸ Gujcn si'c caj lo xtidx Dios: Bascäy Dios xcäriejnreni, näjza balojni di jien, lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,
te gac guiga'reni,

sugacni si'c guij ni rulani' bejn, te gacreni yäl_guxhtis.

¹⁰ Suguscäy Dios balojreni te na'c fisa'creni,

sujie't dejtzreni, sutedreni trabajwduxh par tejpas.

Yäl_ruslaa lo dojl xten bejn ni di gac xpen Israel

¹¹ Naj rniabdixä: ¿La biajb rexpen Israel te gunijtreni par tejpas, ä? ¡Xho gacni si'c! Sa'csi biajb rexpejn Israel, ni'cni gojl biääd yäl_ruslaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl.¹² Palga xcuent dojl ni bejn xpen Israel gojp reben guedxliuj xcäl_nasa'c Dios, palga xcuent yäl_runijt xten rexpen Israel guyu' xcäl_nasa'c Dios par rebejn ni di gac xpen Israel, aticaxh chu xcäl_nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä,¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist.¹⁵ Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibansac renani najc si'c bengut.¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpen Israel najczeni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajjni con xtiejn yajg oliibga.¹⁸ Ni'cni, na'c gactu gualajz lo reñaapac yajgga. Colgusnaj lajztu, xhet la'ditu ni rudeed yäl_nabajn lo xlobaa yajgga, lobaaga ni runiidx yäl_nabajn lojtu.

¹⁹ Dxejc colguinii: “Batiuugreni naapac yajgre, te gujc biguidä cuä' yajgga.”²⁰ Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi

huililajztu xtiidxni. Na'c gactu gualajz, colguidxjeb, ²¹ sa'csi palga di Dios nutedbia renaa yajgga, diza Dios gutedbia la'tu. ²² Bahuii j lacti hueen najc Dios! Luxh lacti niälajzzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxni sajc suquidsac Diosreni lo yajgga. ²⁴ Luxh la'tu najctu beñzajt, najctu si'c ñaa te yagoliib ni xtebca gulejn nen dajn. Luxh batiuugni la'tu te baquidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpem Israel ni banijt najc si'c ñaapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpem Israel lo dojl

²⁵ Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxey ni chalilajz rebenzajt xtidx Dios. ²⁶ Dxejcti siliaapac guiraa rexpem Israel lo dojl che chalilajzreni xtidx Dios, sa'csi si'c caj lo xtidx Dios, cadro caj rediidxre:

Nani ruslaa sajc beñ guedx Siön,
luxh sudzucajni xtoj l renani najc xagdoo tojacoob.

²⁷ Dee najc diidx ni bia'nä con laareni,
che gudzucaä xtoj lreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. ²⁹ Sa'csi rut rajcdi rudzucaj nicla yälñasa'c ni rudeed Dios, niclaza yälñbejdx xten Dios. ³⁰ La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpem Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulasajz Diosreni sa'csi balaslajzzani la'tu. ³² Dios basaan biajb guiraanu lo dojl, te si'c sajc gulasajz Dios guiraanu.

³³ j Lacti guroob najc yälñasa'c xten xcälñajn, xcälñacbee xten Dios! Nicla tej bejn guedxliuj di gacbee guiraa rexcälñguxhtisni, rudliidiza najn rexnezyujni. ³⁴ Si'c caj lo guijt: “¿Chuni'c gucbee xcäriejn Dios? ¿Chuni'cza abaluiini? Rutliidi. ³⁵ O ¿chuni'c badedxgaa te xhi cos lojni, te quixsacnini lojni, ä? Rutliidi.” ³⁶ Sa'csi loj Dios siääd guira'ti, luxh laani bencheeni guira'ti par lagajcza laani. Suguiä'pnu xpala'nni par tejpas. Sugacni si'c.

12

Yälñabajn rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guibaṅsa'ctu si'cni rlajz Dios. Dee najc yäl'rajṅpac Dios si'c ni nungäjl gantu Dios. ² Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlajzni guntu, nalajznu xhini'c najc hueen, xhini'c rdxaglajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴ Sa'csi sigajc najc tiejxhnu, yu' xhidäl la'ni, luxh tejgareni rujn xtzuun-xtzuunreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶ Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguiniinini, si'c ni najc xcäl'rililajzni; ⁷ nani rajc racnäy sa'ni, sugacnäjni; nani rajc ruluii xtidx Dios, suguluuini; ⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

Xho nanab guibaṅnu lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac. ¹⁰ Colchanälajz resa'tu si'c rinälajz bejn rebejtzni. Colguiliä'p xpala'nreni.

¹¹ Colyejn dzunsac, na'c cuedxitu. Colyejn xtzuun Jesucrist con guideb xtijptu, guideb xcäriejntu.

¹² Colguibalajz sa'csi ahuililajztu xtiidxni. Colcuedcxi lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäy rebejn nani rililajz xtidx Dios; sacru colnii loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäy renani rbalajz, colyonnäy renani roon.

¹⁶ Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu bennanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossac nez loj guirasi bejn. ¹⁸ Cadrotis sajcní, dxitis colguibaṅnäy guiraa rebejn. ¹⁹ Rebetzä, na'c guntu xhigab lagajc la'tu gudeedu xten renani rujn dojl lojtu, sa'csi lagajc Dios gun yäl'guxhtis lojreni, ni'cni caj lo xquijtzni

scree: “Narä gunä yälguxhtis, narä quixä lojreni si'c naj Dad, Dios.” ²⁰ Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.” ²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. ³ Renani rnibee di guchejb renani riu xtiidxreni, ruchejbreni renani najc beñ guijdx ni di jiu xtiidxreni. Palga di rlanjtu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. ⁴ Reguxhtis rujnreni lojtu xtzuun Dios te guibansa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl. ⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnsa'c, te xcäriennaya. ⁶ Ni'cni colquijx lojreni nani riäjł xca'reni sa'csi renani rnibee najc xmos Dios, luxh ni'cpac najc xtzuunreni.

⁷ Colgudeed lo guiraa bejn nani riäjł xca'reni. Colquiix loj renani nazääbtu; colquijx impuest loj ni riäjł xca'ni; colchanälajz renani riäjł chanälajztu; colguiliä'p xpala'n renani riäjł chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejnga abasoob xleii Dios. ⁹ Sa'csi lo xleii Dios caj scree: “Na'c guesnäjlu bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.” ¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusoob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacal sa'csi abidzungajxhru dxej che laanu neñ dojl lo dxej che huililajznu. ¹² Aguxhindhuxh, asiädgajxh bianij. Ni'cni cuääz jiennu redzuun guijdx ni rajc lo xcäy, te jientisnu redzunsa'c ni rajc rdxee, lo bianij. ¹³ Guibansa'cnu si'c riäjł guibajn rebejn rdxee, na'c guibanu lo yälrä', niclaza lo yälbiejy, na'c guidiesnäjnu bejn ni di gac chäälnu, na'c ga'pnu rebis, na'c guidxagdilnu resa'nu, na'c chuguij lajznu xhixten resa'nu. ¹⁴ Ni'cni colca' xcälrnibee Jesucrist te na'c guntu redojl ni rlanj gun tiejxhtu.

14

Na'c guiniyajtu rebejtzu

¹ Colnii didxdoo lo rebejn nani di gumbesa'c xtidx Dios, na'c tilnäjtureni. ² Sa'csi yu' reni rililajz nani sajc gaureni guira'ti xhi cos, niluxh nani gajd sutijp lo yälrlilajz, ganaxtis berduur rajwni. ³ Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga. ⁴ ¿Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

⁵ Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, tejga bejn sugunpac lagajc xhigabni. ⁶ Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajn xcuentcanu, nicla tejzanu dinu guet xcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, laltis najcnu rexpen Dad, Jesucrist. ⁹ Ni'cni gujt Jesucrist, ni'cni gubañsaczani, te sajc gacni Dad xten rebejgut, näjza Dad xten rebejn nani nabajn.

¹⁰ Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. ¹¹ Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,
guiraa reben guedxliuj suzuxhijbreni loä,
luxh guiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcälrnibee

Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabañnya nez loj Dios, näjza yälrbexilajz con yälrbalajz xcuent Sprit Dxan xten Dios. ¹⁸ Sa'csi nani rujn si'c lo xtzuun Jesucrist, bejnğa rchaglajz Dios, luxh reben guedxliuj rniiza didxsa'c xcuent sa' bejnğa.

¹⁹ Ni'cni chanuutis guidiilnu recos nani rujn chu yälrbexilajz, näjza nani rujn racnäjnu resa'nu te tioobrureni loj xnezyuj Dios. ²⁰ Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu neñ dojl. ²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rilihajz, sa'csi xhitis ni di gac xcuent yäl'rilihajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yäl'rilihajz nanab gacnäjnu resa'nu nani gajd chalilazsa'c. Di gacdi guibañtisnu xcuentcanu. ² Tejganu nanab chonälaznu resa'nu lo xcäl'nabañsa'cni te gacnäjnu chalilajzrureni. ³ Sa'csi nicla Jesucrist dini nibajñ xcuentcani, luxh si'cni caj loj xtidx Dios: "Redidxyaj ni guniyajreni lojlu biajbreni yecä." ⁴ Guiraa rediidx ni cuaj lo guijtz galooli, cuajreni te guluiireni nuurnu te ga'pnu yäl'sutijp näjza yäl'rustioblajz te gacza guibääznu lo xtidx Dios. ⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtad Jesucrist.

Gusule' xtidx Dios loj rebenzajt

⁷ Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸ Sa'csi narä rniä lojtu, biääd Jesucrist te gujcnä si'c te mos loj rexpen Israel te baluiini xcuent didxguli xten Dios te gusojb rediidx nani bia'n Dios loj retoxtadgoldoonu, ⁹ näjza par rebenzajt, te guliä'preni xpala'n Dios sa'csi baluilojni xcäl'rulasajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzajt,
soläza dij lojlu.

¹⁰ Dxejcti stee lajt rniini:

La'tu benzajt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzijt, colguiliä'p xpala'n Dad,
suguiä'pza guiralii rebejn xpala'nni.

¹² Stee huält guniiza Isaías scree:

Siricaj te xagdoo toIsaí,
näjza te ni chäs te guinibeeni loj rebenzijt,
laani cabäjz rebenzijt.

¹³ Naj rniabä lo Dios ni rudeed yälrbäzlajz, te laani gacnäj guibalajztu, cuecdxilajztu, sa'csi salilajztu, te tioobru yälrbäzlajz ni rajptu sa'csi Sprit Dxan xten Dios yu' nen lastootu, luxh laani rajpni yälrnibee.

¹⁴ Luxh xcuent la'tu rebetzä, anancheä nabaṅsa'ctu nasinduxhtu, arajcza rulijdxtu sa'tu, ¹⁵ luxh loj guiitzre bacuaä gaii didxnaj xcuent tiop-choṅ cos, te gusnaä lajztu. Runä si'c xcuent yälrulaslajz ni baniidx Dios loä ¹⁶ te gacä xpeṅ Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beṅnaya sa'csi rbäjz Sprit Dxan nen lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸ Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzu-unni, ¹⁹ con yälmlaagwr xten redzunro, resenro, ni gujc con xcälrnibee Sprit Dxan xten Dios. Ni'cni lo guedx Jerusaléni, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. ²¹ Te gacni si'cni caj lo guiitz: Renani rutliidi bij diidx xcuentni, suhuiipacreni lojni, luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiädhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti iij rlazduxhä jiädhuiä lojtu, ²⁴ naj che cha'a España siädhuiäpac lojtu. Che tedä, jiädhuiäpac contu te ganid guibal-aznää la'tu, dxejcti gacnäjtu narä te cha'a España. ²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶ Sa'csi rebejn Macedonia näjza reben Acaya rlajzpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con

xhixtenreni. ²⁸ Ni'cni che chasa'nä meel lojreni dxejc tedä lajdxtu, jädhuiä contu, dxejc cha'ä España. ²⁹ Luxh ananä che jäälä lojtu, li guidxa lastoä xcäl'nasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxaan xten Dios, colguidxagsa'tu, te colgacnäjä colcuedx-guiniabtu lo Dios xcuentä. ³¹ Col'nab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni. ³² Te cabaa lazä guidzunä lojtu, sa'csi rlanjpac Dios jäälä lojtu, te la'ni yu'ä lojtu siälyuä, susilazäza con la'tu. ³³ Dios ni rbedcxilajz bejn gacnäjä guiraatu. Sugacni si'c.

16

Ruxhal'ni xtixtios lojreni

¹ Colgacnäjä bisiajnnu Febe. Nane're bejn dzunduxh nen guidoo ni tre' Cencrea. ² Col'ca'ni xcuent Dad, Jesucrist, si'cni riäj'l gun bejn gacnäjä renani rililajzpac xtidx Dios. Col'yacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

³ Ruxhalä xtixtios lo Priscila näjza lo Aquila, ni racnäjä narä lo xtzuum Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist nen guedx Acaya. ⁶ Ruxhalä xtixtios lo Marii nani benduxh dzuun lojtu. ⁷ Ruxhalä xtixtios loj reben ladxä ni laa Andrónico näjza Junias; laareni guyunäjä narä nen latzguuib, najcreni benro loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcuent Jesucrist. ⁹ Ruxhalä xtixtios loj Urbano, ni runnäjä nuurnu xtzuum Jesucrist. Ruxhaläza xtixtios loj Estaquis, ni sanälazä. ¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. ¹¹ Ruxhaläza xtixtios lo Herodiön bejn ladxä, näjza loj resa' Narciso nani ahuililajz xtidx Jesucrist. ¹² Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. ¹³ Ruxhaläza xtixtios lo Rufo nani agule Dios, näjza lo xnanni, sa'csi gujcti si'c xnanäza. ¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhaläza xtixtios loj Filólogo, näjza lo Julia, näjza

lo Nereo con bisiajn̄ni, n̄jza lo Olimpas n̄jza guiraa rexpen Dios nani yun̄jreni ro'c.

¹⁶ Col̄ye'tz xchan loj resa'tu. Guiraa rexquidoo Jesucrist ruxhal̄ xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn̄ biey te guilia' sa' bejn̄, nani r̄lajz guntu guiraloj nani najc garenca loj yäl̄ruluii ni bisieedtu, col̄guibicaj lojreni, ¹⁸ sa'csi sa' rebejn̄ga direni gun x̄tzuun Jesucrist. Laareni r̄lajztisreni gunreni si'c r̄lajz tiejxh̄reni; r̄niireni didxdoo, diid̄x ni rgudx̄guel diajg bejn̄ te rusgueereni lastoo rebejn̄ nani di susiñ. ¹⁹ Guiranejz abire'ch diid̄x xcuent xho rusobsacpactū x̄tid̄x Jesucrist, ni'cni r̄baa lazä, ni'cni r̄lazä gactu nasiñduxh xcuent recoshueen, luxh si'c b̄az xhet ganditu xcuent recosguijdx. ²⁰ Luxh Dios nani ruscued̄xilajz bejn̄ siojb guta'cwni beñdxab xhan ni'tu. Gacn̄j Dad Jesucrist la'tu.

²¹ Timoteu nani racn̄j narä lo dzuun, ruxhal̄ xtixtios lojtu. Lucio, Jasón, n̄jza Sosíater, beñ ladxä, ruxhal̄za xtixtios lojtu.

²² Najrā Tercio, ni cagucuaä guijtzre xcuent Pabl, ruxhal̄äza xtixtios lojtu xcuent Jesucrist.

²³ Ruxhal̄za Gayo xtixtios lojtu. Rbäaznu rolijzni, luxh rudeedzani rolijzni guidxagsa' reben̄ guidoo. Ruxhal̄za Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacn̄j Dad Jesucrist la'tu. Sugacni si'c.

Rediidx lult xten Pabl

²⁵ Col̄guiliä'p xpala'n nani sajc gusudzu'tz la'tu loj x̄tiid̄xni nani basule'ä, n̄jza loj x̄tid̄x Jesucrist xcuent rehxigab ni naga'tz galooli, ²⁶ naj abaluiloj rediidxga lojtu; n̄jza xcuent ni bacuaa reprof̄e't galooli; si'c najc diid̄x ni bia'n Gueb Dios ni nabajn̄ par tejpas loj rexpejn̄ni, agusule'ni loj guiraa reben̄ guedx̄liuj, te gusoobreni diid̄x sa'csi rililajzreni x̄tiid̄xni, ²⁷ col̄guiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guiijtzre lojtu ² ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yäl'rulaslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcäl'nabansa'ctu baluiitu huililajzpactu xtidx Dios xcuent Crist. ⁷ Ni'cni xhetliidi cayääxditu loj redzunsa'c ni runiidx Dios, laļ ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtennu, te sanäjtuni.

Rlia' sa'reni nen guidoo

¹⁰ Rulidxä la'tu, rebetzä, xcuent Xtad Jesucristnu, colyejn tejsi xhigab te na'c la' sa'tu, saru guibañäjtu sa'tu, colyejn tejsi xhigab, colga'p tejsi xcäriejn. ¹¹ Sa'csi agucebä xcuenttu, betzä ni huililajz xtidx Dios. Tej resa' Cloé biädsa'n diidx loä xcuenttu, yu' yäl'rdirj lojtu. ¹² Rlazä guiniä scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rnii: "Narä nacä xpejn Crist." ¹³ ¿La rujntu xhigab nala' sa' Crist, ä? ¿La cuaj Pabl lo cruujz xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejtü, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷ Di Crist nuxhaļ narä te gutiobnisä. Baxhaļni narä te gusule'ä

rextiidxni xcuent xho gun bejn te laareni lo dojl, xhet con didx-nanduxhdi, te di gudzucaä loj dzunroduxh ni bejn Jesucrist che gujtni lo cruzj.

Crist najc xcälmilaagwr näjza xcälnajn Dios

¹⁸ Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcälmilaagwr Dios. ¹⁹ Scree caj loj rexquijtz Dios:

Narä sutzulä yäl_nnasin_n xten reben_nnajn,
sudzucaäza xcäl_nnadxällajz, xhigab rebejn ni nadxällazduxh.

²⁰ ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl_nnasin_n xten guedxliuj si'c nayällajz nez loj Dios, ä? ²¹ Ni'cni loj xcäl_nnasin_n Dios, di rebejn guedxliuj niembee Dios con xcäl_nnasin_n guedxliujre, ni'c bichagajz Dios con yäl_rrusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rrajzpacreni fiireni remilaagwr; rebejn griegw rguuil yäl_nnanduxh. ²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl_nmilaagwr najczani yäl_nnasin_n xten Dios. ²⁵ Sa'csi xcäl_nayääl xten Dios si'c rchalo rebejn ni'c najc nasin_nduxhru loj xcäl_nnasin_n xten reben_n guedxliuj; luxh xcäl_rniaj xten Dios sacduxhruni loj guiraa xcäl_nnadaan reben_n guedxliuj. ²⁶ Col_nhuui la'tu, betzä ni ahuililajz xtidx Dios, xho gule Dios la'tu, col_nyejn xhigab guxiitu najctu ben_n nasin_n loj reben_n guedxliuj, guxiiza rajptu yäl_rnibee, guxiizatu najctu bejn ni agojl guiga'tu ben_nsa'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rniabee te gusanxtujyni rebejn ni rnibeduxh. ²⁸ Agule Dios rebejn ni di guiga' ben_nro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'n_ni nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yäl_nnasin_n xten Dios, te guiban_nsa'cnu nez loj Dios, te gacnaya lastoonu, näjza te quixni rextoj_nnu. ³¹ Si'c bejn Dios te soob xtiidxni cadro caj scree:

Ni rrajz guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo cruju

¹ Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, ni claza didxnagajn, xhet si'cti basule'ä xtidx Dios xcuent Crist. ² Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruju. ³ Bidzunä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yäl_{nasin} xten guedxliuj, alga guniä xtiidx yäl_{nasin} xten Sprit Dxan xten Dios näjza xcäl_{rnibee} Dios, ⁵ te di gac xcäl_{rililaj}ztu xcuent yäl_{nasin} xten guedxliujre, te gac xcäl_{rililaj}ztu xcuent yäl_{rnibee} xten Dios.

Rumbee bejn Dios xcuent ni ruluii Sprit Dxan xten Dios

⁶ Rniizanu lo sa'nu ni aguyajl lo xtidx Dios rediidx xten yäl_{nasin} xten Dios, per te yäl_{nasin} ni di gac xcäl_{nasin}di guedxliuj, ni claza xten reni rnibee lo guedxliujre, sa'csi sidzuj_n dxej sinitlojreni. ⁷ Niluxh che rniinu yäl_{nasin} xten Dios, rniinu diidx ni rut racbextebdi, xcuent xho gac guidzunu cadro yu' Dios xhaguibaa. Cheni gajdli gac guedxliuj, rapcheeni yäl_{nasin}xhiga'tz xtenni. Baluiinini loonu te guibanäänuni lo xcäl_{rdimbicha}' xtenni. ⁸ Nicla tej reni rnibee lo guedxliujre gajd gacbee recosre niluxh paru ni acbeerereni, direni nucuaa lo cruju Dad Jesucrist nani rajp xcäl_{rdimbichaduxh}. ⁹ Najcni si'cni caj lo rextidx Dios cadro rni: Recos ni gajdpac baloj bejn fii, nani gajdpacza diajg bejn jiejn; nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluii Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

¹¹ Loj rebejn guedxliuj çchuni'c racbee rexhigab ni rujn bejn? Lagajc sprit xten bejn ni yu' nen_ni racbee xhi xhigab cayuj_ni. Sigajcza rut racbeedi rexhigab xten Dios; Sprit Dxantis xten Dios racbeeni. ¹² Luxh nuurnu dinu nica' yäl_{najn} xten guedxliuj, alga cua'nu Sprit Dxan ni siäd lo Dios te gacbeenu rexhicos ni abasalajz Dios loonu. ¹³ Nuurnu rniizanu xcuent recosga, xhet diidxdi ni ruluii xcäl_{najn} guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios nen_n lastooreni.

¹⁴ Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcäl_{nasin} Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn rexhigab

xtenni. ¹⁵ Rebejn ni ahuililajz xtidx Dios, rula'tzreni guira'ti ni ruluii Sprit Dxi xten Dios lojreni. Luxh rebejn ni ahuililajz rutliidi rula'tzdireni. ¹⁶ Sa'csi scree caj lo xtidx Dios: "¿Chuni'c agucee xho najc xhigab xten Dios te gac guluiini Gueb Dios, ä?" Nicla tej bejn. Niluxh nuurnu rajpnu lo xcäriejnu xhigab xten Crist, nalajznu racbeenu rextiidxni.

3

Reni rujn dzuun lo Dios

¹ Rebetzä, di niajcdi niniä redidxnagajn lojtu si'c ni rniä loj rebejn ni rajp yäl_nasi_n xten Sprit Dxi xten Dios, basule'ä ganaxtis didx guyasi lojtu, sa'csi najctu bejn guedxliuj o biuxbäz ni guxi_i racbeeni xcuent Crist. ² Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³ sa'csi naba_nsijctu si'c nabajn reben guedxliuj la_tis runembiidtu, rdxechlajztu lo sa'tu, ¿la ditu gacbee nacsijctu si'c bejn guedxliuj, ä? ¿La la_tis nabajntu si'c nabajn reben guedxliuj ni di gumbee xtidx Dios, ä? ⁴ Sa'csi cheni rnii tejni: "Narä nacä te xpejn Pabl", dxejcti steeni rnii: "Narä nacä te xpejn Apolos", ¿la xhet cayujnditu sigajctis ni rujn rebejn guedxliuj, ä?

⁵ ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu. ⁶ Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷ Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusanij xcäriejn rebejn. ⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguix tejganu dzuun nani riennu. ⁹ Nuurnu najcnu si'c remos ni runnäj Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios. ¹⁰ Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcni. Niluxh tejga ni chanuu gun dzuun lojga, suga'pni cuidaad xho guiliäsni padeerga. ¹¹ Sa'csi di gacdi gusujreni garenca cimient loj nani najcxgaa, ni najc Jesucrist. ¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³ sidzujn dxej sien xho najc dzuun ni bejn tejga bejn. Sa'csi siääd fis guiboo ni guluijoj dzuunga, sa'csi lagajc guibooga guluijoj dzuunga, xho najcni.

¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnnga ni riäjł xca'ni sa'csi bejnni yusa'c. ¹⁵ Niluxh palga chec ni bejnni yejc cimientga xhet xca' dini, xcäl̄nabaj̄ntisni di nit, luxh xtzuunni sejc.

¹⁶ ¿La ditu gan la'tu najctu xquidoo Dios, luxh neñ lastootu rbäjz Sprit Dxañ xten Dios, ä? ¹⁷ Palga yu' chu gutiexhäť xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸ Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl̄nasiñ xten guedxliujre, nanab-pac gacni si'c te bejn̄ ni xhet najndi te xca'ni yäl̄nasiñ xten Dios te guliipac gacni te beñnajn, te beñ nasin̄. ¹⁹ Sa'csi yäl̄nasiñ xten guedxliuj xhet sajcdi nez loj Dios. Lo rexquijtz Dios caj scree: "Dios rujn rga' reni rajp yäl̄nasiñ xten guedxliuj lagajc xcuent xcäl̄rusgueereni ni rujn lagajc xcäl̄nadxällajzreni." ²⁰ Ste'ca lajt caj scree: "Nanchee Dios xho najc xhigab ni rujn rebejn̄ ni rajp xcäl̄nasiñ guedxliujre, luxh xhetliidi sajcdi nez loj Dios." ²¹ Ni'cni na'c guiliä'p bejn̄ xpala'n te bejn̄ guedxliuj. Sa'csi loj tejpgatu abaniidx Dios guira'ti rexhicos najc xtengatu, ²² palga najcni Pabl, o Apolos, o Pedr, o guedxliuj, o yäl̄nabaj̄n, o yäl̄gujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ² Mbaj pues, te bejn̄ ni cahuii te dzuun nanab gusoobreni diidx, gunreni te dzunsa'c. ³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'cdi sajcdi guiniä xheti xtolä, Dad Jesucrist najc nani rula'tz narä, rhuilojni xho nacä. ⁵ Ni'cni la'tu na'c gucuaquijtu bejn̄ che gajd guidzujñ dxej; col̄cuäjz jiaäd Jesucrist dxejc laani sibääni lo bianij guiralii ni naga'tz lo nacäy, luxh suluilojzani xhi xhigab yu' neñ lastoo tejga rebejn̄, dxejc lo tejpganu sudeed Dios ni nungäjł xca'nu.

⁶ Rebetzä, xcäl̄nasa'ctu cania rediidxre lojtu. Cania xcuent Apolos näjza narä, si'c te yäl̄rului te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, lał̄ ni cabälaztu steeni. ⁷ Sa'csi ¿chuni'c rnii najclu beñsa'cru lo ste'ca bejn̄?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii guli najcpactu reii te näjzanu guinibenäjnu la'tu. ⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rdedlojtis bejn lojreni. ¹⁰ Nuurnu najcnu beñnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. ¹¹ Cadeednu trabajwduxh naj, rliaannu, riojlnu, xho rniaj xhajbnu, rdilnäj rebejn nuurnu, luxh xheti roliznu. ¹² Rdxaggu riennu dzuun la-gajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsí rebejn nuurnu, rientisnu huant. ¹³ Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu mil bejn ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabañä lo yälñabajn xten Jesucrist, sigajcni ruluiä neñ reguidoo guiraasi lajt. ¹⁸ Yu'tu ni acayajc guyalajz, naatu pet dina guibisacä lojtu. ¹⁹ Cabäzä jädhuiätu, palga si'c rlahz Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä. ²⁰ Sa'csi xcälñibee Dios xhet ganaxtis xcuent diidx najcni, näjza dzuun ni rujnreni rului loj xcälñibee Sprit Dxan xten Dios ni rajpreni. ²¹ ¿Xho rlahzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunää yälñinalajz näjza yälñadolajz te gulidxätu, ä?

5

Xho nanab gunnäjtu te bejn ni rujn falt lo sa'ni

¹ Agucbeä yu' tejtü ni ahuililajz xtidx Dios, cua'ni si'c chäälñi te gunaa ni gujc chääl xtadni. Dee najc te dolduxh nani nicla reni di chalilajz xtidx Dios direni gun. ² Luxh la'tu gujctu guyalajz lacuaa niac-huin lastootu; te bejn nani bejn dojlga, riäjñ nibäätuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejn ga ni bejn dolduxhga, sigajc ni niunä paru suga'ä ro'c. ⁴ Con laj Dad Jesucrist, che abidxagsa'tu, luxh alastoä suganäj la'tu,

con xcäl̄rnibee Dad Jesucrist, ⁵ abenä xhigab guteednu bejn̄ga ladzn̄aa ben̄dxab te ted tiejxhni trabajw, niluxh sprit xtenni laani nen̄ dxej ni jiädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl̄ najc si'c tudxe'n cojb ni ruslaj, rusaguijni cojb cadro ru'chni, ä? ⁷ Col̄gudzucaj cobyujxhga, te guibajntu te yäl̄naban̄nayaacob si'c te cobyä, sa'ni racchee yätxtiil ni xheti levaduur yejcn̄i par lanij xten pascw. Arajptu yäl̄naban̄naya sa'csi agujt Jesucrist sigajc gujt te xile' lo lanij pascw te badzucajni rextojlnu. ⁸ Si'c nanab jiennu lanij xten pascw con yätxtiil ni xheti levaduur yejcn̄i, nalajznu con yäl̄guliipac nen̄ lastoonu, xhet yätxtiildi ni yu' cobyujxhga yejcn̄i, nalajznu na'c gunlu latsiaj.

⁹ Lo stee guijt̄z abacuaä lojtu, na'c guchaagtu reben̄ ni runnäj cosguijdx bejn̄ ni di gac chäälreni. ¹⁰ Niluxh xhet caniädi xcuent reben̄ guedxliuj ni rujn̄ cosguijdx con bejn̄ ni di gac chäälreni, niclaza xcuentdi rebejn̄ ni rchaglaztej meel, niclaza rebejn̄ ni najc gubaan, niclaza rebejn̄ ni riu rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijt̄zga lojtu te na'c guchagsa'tu te bejn̄ nani rnīi ahuililajzni xtidx Dios, luxh rujnr̄uni cosguijdx con bejn̄ ni di gac chääl̄ni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn̄ te rca'ni xhi xtenni. Rniäza lojtu, nicla gaunäjt̄u sa' bejn̄ga. ¹²⁻¹³ Sa'csi narä di gacdi gunä yäl̄guxhtis loj rebejn̄ ni gajd chalilajz xtidx Dios. Gunti Dios yäl̄guxhtis lojreni. La'tu nungäjl̄ guntu yäl̄guxhtis loj rebejn̄ ni ahuililajz xtidx Dios. Ni'cni col̄gudzucaj ben̄dojl̄ga lojtu.

6

Na'c chäät̄u loj reben̄dojl̄ te gunreni yäl̄guxhtis lojtu

¹ Palga tejt̄u ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj reben̄dojl̄ te gunreni yäl̄guxhtis lojtu? ¿Xhicuent ditu guiniab yäl̄guxhtis loj rebejn̄ ni ahuililajz xtidx Dios, ä? ² ¿La ditu gan, rebejn̄ ni ahuililajz xtidx Dios sujn̄ yäl̄guxhtis lo reben̄ guedxliuj, ä? Palga la'tu sujntu yäl̄guxhtis lo reben̄ guedxliuj, ¿la di gacdi guntu yäl̄guxhtis lo sa'tu lo recosbäz lacuaa chäät̄u loj reben̄dojl̄ te gunreni xcäl̄guxhtisreni lojtu, ä? ³ ¿La ditu gan sienzanu yäl̄guxhtis lo rexangl̄ Dios, ä? ¡Aticaxh jiennu yäl̄guxhtis loj recos baze' xten sa'nu lo yäl̄nabajn̄re! ⁴ Palga la'tu cadil̄nä j sa'tu xcuent recos xten guedxliujre, ¿xho mood chääl̄u loj reben̄dojl̄ ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujytu. ¿La ruti nicla tej ben̄nasiñ loj guiraatu ni saj̄c gun yäl̄guxhtis lo resa'tu, ä? ⁶ ¿Xhicuent rile'c

te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijttu sa'csi yu' yälrdilnä j sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O ħla ditu gan reben dojl dipacreni jiu' lo xcälrnibee Dios, ä? Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajn rebanäjb; reni resnä j bejn ni di gac chäälni; reniguii ni rungunaa; reni najc biräax; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu bejnaya nez loj Dios sa'csi abiälajz Dios xtojltu xcuent Jesucrist, näjza xcuent Sprit Dxan xteni. La'tu anajctu rexpejnni.

Tiejxhnu najc xquidoo Dios

¹² Guliini sajz gunä xhitis ni rlazä gunä, niluxh xhet guiraa-dini najc hueen par narä. Narä sajz gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebejgut, siliäsazani nuurnu con xcälrnibeduxhni.

¹⁵ ħLa ditu gan tejpgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ħla sajz gudeednuni loj te gunadxab, ä? ħGurniälojlu jiennu si'c! ¹⁶ ħLa ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guiro'preni sajz si'c tejtis bejn." ¹⁷ Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios nen lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnä jni bejn ni di gac chäälni najc dojl lagajc nen tiejxhni. ¹⁹ O ħla ditu gacbee tiejxhtu najc xquidoo Sprit Dxan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu. ²⁰ Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtu.

7

¹ Naj gudzu'ä diidx lojtu xcuent ni gunabdiidxtu cheni bacuaatu guijtз loä. Guliini hueen najcni na'c guchṇaa te niguii. ² Niluxh sa'csi yu' xhidajl reni richunäj chutis gunaa, suga'p tejsa reniguii chäälpacni; sigajcza suga'p tejsa regunaa chäälpacni. ³ Nanab niguii guchaagni chäälni che rļajz chäälni, sigajcza gunaa nanab guchaagni chäälni che ni si'c rļajz chäälni. ⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtu lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil beṇdxabtu chunäjtu ste'ca bejṇ.

⁶ Rniä rediidxre lojtu te ni rļajz guchṇaa sajс guchṇaani, niluxh dina guiniä lojtu, nanabpac guchṇaatu. ⁷ Narä rļazä maläii sajс gac guiraa bejṇ si'c ni nacä. Dios abadeed loj tejsa bejṇ xho mood guibajṇni. Yu'reni sajс guibajṇ tej mood, yu'zareni sajс guibajṇ garenca mood.

⁸ Loj rebejṇ xteb nājza loj regunabiuud rniä, hueen najc na'c guchṇaareni, gacreni si'c narä. ⁹ Niluxh palga di gacdi cue'cdxi lajzreni, suguchṇaareni. Maazru huen guchṇaareni te na'c guntisreni xhigab rļajzreni guchaagreni te niguii o te gunaa.

¹⁰ Loj rebejṇ ni abachṇaa, rniä rediidx ni basa'n Dad Jesucrist loonu: "Na'c guṛo'n gunaa chäälni." ¹¹ Niluxh palga guṛo'n te gunaa chäälni, na'c guchṇasacni, o maazru hueen gusiäjṇni diidx guibisacni lo chäälni. Sigajcza te niguii na'c guṛo'nni chäälni.

¹² Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rļajz gunaaga cuāznājni niguiiga, na'c guṛo'n niguiigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rļajzni cuāznājni gunaaga, na'c guṛo'n gunaaga chäälni. ¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabaṇṇāj sa'reni, hueen najc yāl'ruchṇaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabaṇṇājsa'reni, hueen najc yāl'ruchṇaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵ Palga chääl te gunaa o chääl te niguii ni di chalilajz xtidx Dios luxh rļajzni guilia' sa'ni con chäälni ni ahuililajz xtidx Dios, sujizani. Nani rililajz xtidx Dios diruni ga'p por cuāznājni chäälni ni di chalilajz xtidx Dios, niluxh gurejdx Dios nuurnu te cuedcxini lajznu. ¹⁶ Sa'csi xho najnlu, gunaa, la susḷaa Dios chäällu lo

dojl̄ xcuentlu, ä? O ¿xho najnlu, niguii, la sus_laa Dios chäällu lo dojl̄ xcuentlu, ä?

17 Si'ctis ni baniidx Jesucrist lo tejganu, si'ctis ni gule Dios tejganu, si'c suguibaj̄n̄nu. Si'cza rulidxä gunrenini neñ guiraa reguidoo. 18 Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. 19 Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. 20 Tejgani jia'n si'cni najcni cheni gurejdx Diosni. 21 Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlam̄lu, badzu'zani te gaclu te bejn̄ ni rut rnibeedi. 22 Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn̄ ni rut rnibeedi che rililajzni xtidx Dios, anajcni mos ni guzii Dios, najcni xmos Dios. 23 Guzii Cristtu con xtiejnni, ni'c na'c gusaantu guinibee bejn̄ la'tu te gac guntu xtzun Dios. 24 Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn̄ ni rut rnibeedi.

25 Redxa'p ni gajd guch̄naa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäzani narä. 26 Runä xhigab hueen najc palga di reniguii guch̄naa sa'csi siäd yäl̄naganduxh lo guedxliujre. 27 ¿La alabach̄naalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. 28 Palga guch̄naalu, xhet dojl̄di rujnlu. Palga guch̄naa te dxa'p, dizani gun dojl̄. Niluxh reni ruch̄naa sidejdreni trabajw lo yäl̄nabaj̄n̄re. Ni'cni rniä na'c guch̄naatu sa'csi di rlazä tedtu trabajw.

29 Rebetzä, rlazä guiniä lojtu rediidxre: Guxiiru dxej guibaj̄n̄nu lo guedxliujre, ni'cni reni abach̄naa na'c gunreni xhigab xtentis yäl̄ruch̄naa, te gac gunreni xtzuun Dios. 30 Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; 31 näjza reni rujn recos lo guedxliujre, nanab gunreni si'cni dini gunni, sa'csi recos ni rhuinu lo guedxliujre, alacanitlojreni.

32 Narä rlazä na'c chutu yärsia'. Rebejn̄ ni gajd guch̄naa, ri-ureni rextzuun Dios, näjza xho guspaareni lajz Dios. 33 Renani abach̄naa riureni recos guedxliujre te guspaani lajz chäälni, 34 tiop najc xhigabni xcuent recos nani gunni. Sigajcza najc te gunaa ni abach̄naa con tejni gajd guch̄naa. Sa'csi te gunaa ni gajd guch̄naa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa

ni abach_{naa} riureni recos guedxliujre, näjza xho guspaani lajz chäälreni.

³⁵ Rniä rediidxre par xcäl_{nasa'}ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guch_{naa} xindxa'pni sa'csi acayajcni gunagool, dini gun dojl, sajc gudeednini guch_{naa}ni. ³⁷ Palga steeni dini gun xhigab si'c nanab gunni, sajc gunni si'ctis ni rlanjni palga abejnpacni xhigab ne_n lastooni di xindxa'pni guch_{naa}, hueenza najc si'c. ³⁸ Ni'cni nani rudeed xinda'pni guch_{naa}, hueen rujnni, sigajcza nani dini gudeed xindxa'pni guch_{naa}, laacaza rujnni.

³⁹ Te gunaa ni abach_{naa}, rajpni por guiban_{nä}jni chääl_{ni} guideb nabaj_n chääl_{ni}. Palga guet chääl_{ni}, jianxtebni stehuält, dxejc sajc guch_{naa}ni chutis niguii ni rlanjni, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guch_{naa}. Si'c najc xhigab ni runä, luxh riliipac lazä cayacnä_j Sprit Dxan xten Dios narä.

8

Yälrajw ni ruzujreni lo rebanäjb

¹ Rniä lojtu xcuent reyäl_{rajw} ni ruzujreni lo rebanäjb. Guliini guiraanu rajpnu yäl_{najn} xcuent recosga. Niluxh yäl_{najn} rujn rajc bej_n gualajz. Luxh yäl_{rinälajz} sa'ni, ni'c rujn racnä_{jnu} resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayääd_{xru} gacbeeni si'c ni nanab gacbeeni. ³ Palga yu' chu sanälajz Dios, Dios anumbee bej_{nga}.

⁴ Ni'cni, xcuent reyäl_{rajw} ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam_n ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabaj_{nnu}. Rajpnu tejtis Dad ni rnibee loonu, ni'c najc Jesucrist. Xcuent xcäl_{rnibeeni} guc-chee guiraa recos loj guedxliuj, luxh nuurnu nabaj_{nnu} xcuent Jesucrist.

⁷ Niluxh xhet guira'ti bej_n najn yu' tejtis Dios. Yu' re-bej_n ni ahuililajz xtidx Dios abia'reni raj_{nreni} rebanäjb, luxh rajwzaren_{ni} reyäl_{rajw} lascanu guzujni loj banäjb sa'csi nacä_{jyru} xcäriejnreni, ni'cni et laadi ria'n lastooreni, rxhin_{za} xcäriejnreni. ⁸ Xhet xcuent xhi rdaudinu sajc guiban_{sa'}crunu lo xnejz Dios. Xhet najcdi palga guidaunu o palga dinu guidau. ⁹ Col_{natiro} xhi rujntu te na'c guntu jiajb te bej_n lo dojl nani gajd chalilazsa'c xtidx Dios. ¹⁰ Palga te bej_n ni gajd chalilazsa'c xtidx Dios fiini cayajwlu reyäl_{rajw} ni guzuj lo rebanäjb, luxh luj najclu te be_{nnajn}, sa'csi dee gajd gachesa'c rextidx Dios, &la

di lajzni gac nadip te näjza laani chatajwni yälrajw ni guzu lo rebanäjb? ¹¹ Niluxh luj, xhet dojl di cayujnlu, per bejtzlu ni gajd chalilazsa'c xtidx Dios, sixijñni, luxh najcni bejtzlu sa'csi näjza par laani gujt Dad Jesucrist lo crujz. ¹² Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

9

Xhi sajc gun te apost

¹ ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiem-besa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ¿La di riäjl xca'ä guiraa ni runiidxtu gauä näjza ni runiidxtu yä'ä? ⁵ ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O ¿la xtebtis Bernabé näjza narä di gacdi cuääz jiennu dzuun te guidaunu laj rusule'nu xtidx Dios? ⁷ ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcay lojga, ä? O ¿chuni'c rajp gaii dxib, luxh dini yä le'ch ni rudeedreni, ä? ⁸ Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. ⁹ Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ¿La guniitis Dios rediidxre sa'csi riuni regon, ä? ¹⁰ ¡Dini gac! Xcäl_nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yäl_nasa'c ni rajc lo xniaani. ¹¹ La'tu najctu si'c te yuj cadre gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäjru gacnäjtu nuurnu.

Niluxh gajdnu guinii si'c lojtu sa'csi di rlajzdinu guidxonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³ La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadre risa'nreni xpääl reguidxaa lo Dios, näjza laarenj rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaurenj lagajc loj reni rililajz xtiidxni. ¹⁵ Niluxh gajdpacna gunä si'c, xhetza

caca'adi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸ ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰ Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibañä lo leiiga. ²¹ Stee lajt cadro rlazä gunä gaan reni di guibajn lo xleii toMoisés, runä si'c rujnzarenä, mase empac nabañä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'czeni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³ Runä guira'ti xcuent xtidx Dios ni ruslaa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

²⁴ Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵ Guiraa reni rrajz guxun rapdareni tiejxhzeni te ga'p tiejxhzeni yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunu te guniidx Dios loonu nani dipac nitloj. ²⁶ Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayääztisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rrajzni, te gunni nani rrajz Dios te di cheni abasule'ä xtidx Dios loj xhidajl bejn, gusanxtujy tiexhä narä.

10

Yäl'rulijdx lo xcuent rebanäj

¹ Rebetzä, di rlazä jlällajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. ² Gudejdreni xpalaa te za näjza gudejdreni galäii nisdoo; ni'c najc si'c te yäl'robnis sa'csi sanajlreni toMoisés. ³ Sigajcza guiraareni gudajw tejtis yäl'rajw ni baxhal Dios xhaguibaali. ⁴ Guiraazareni gu' nis ni badeed Dios, Dios bejn

birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcäl̄rnibeeni birii nis loj guilajga, Crist najc si'c guilaj ni huinäreni. ⁵ Dios bidxehnäj xhidajlreni, ni'c xhidajlreni gujt nez lo reyubijdzga.

⁶ Guiraa rediidxga najc te yäl̄rulijdx loonu, te na'c guichagljaznu jiennu lagajc redojl̄ ni bejn retoxtadgoldoonu.

⁷ Na'cza gan̄tu rebanäj̄b si'c ni bejn baltireni; acaj lo rexquijtz Dios xcuentreni: "Rebejn̄ ni guyaa lajz gurejreni te gu'reni, gudajwreni, dxejctiru huisuren̄i te gusloj caguijtreni." ⁸ Na'c chunäj̄nu stee bejn̄ di gac chääl̄tu si'c bejnreni, ni'cni gujt gal̄bichon̄ mil̄reni tejtis dxej. ⁹ Na'cza guche'chnu Dios con rextojl̄nu si'c bejn balti rebejn̄ga, ni'cni gujtreni sa'csi gudauya' bäl̄reni. ¹⁰ Na'cza chamojmtu xcuent ni rujn Dios si'c ni bejn rebejn̄ga xcuent ni bejn Dios, ni'cni baxhal̄ Dios angl̄ xten yäl̄gujt bagu't xhidajlreni.

¹¹ Guiraa redee gusajc retoxtadgoldoonu te rulijdxni nuurnu, cuajzaren̄i lo guijtz te guluii rediidxga nuurnu xho riäj̄l̄ jiennu, nuurnu ni nabaj̄n̄nu neñ redxej̄ naj. ¹² Ni'cni chutis ni rujn xhigab nabañsa'cni nez loj Dios, sudzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn̄. Niluxh di Dios cuäl̄aztu, dini gusaan tedrutu dzunduxh nani digacdi guntu huant, suniidx Dios yäl̄nadip yäl̄nadaan lojtu te che tedtu trabajw sidxäl̄tu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, col̄bicaj lo yäl̄rajn̄ xten rebanäj̄b. ¹⁵ Rniä lojtu si'c lo te beñ nasin̄, te bennaj̄n̄: col̄gulatzsa'c rextidxä don la laaca najcreni. ¹⁶ Che rdaunu xchej xten Dad Jesucrist najcni te seen nabañnäänu Jesucrist. Che rdunnu neñ co'p, rnaalajznu gudijx Dad Jesucrist xtejn̄ni xcuent xtoj̄l̄nu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. ¹⁷ Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ Bahuii xho rujn rexpejn̄ Israel! Rajwreni xpääl̄ reguidxaa ni rile'creni lo Dios lo dxan neñ guidoo, ni'c najcreni tejsi con guiraa rebejn̄ nani rujn sigajc rujnreni. ¹⁹ ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn̄ lo banäj̄b, ä? O ¿la yu' xhi sajc banäj̄bga, ä? ²⁰ Xhet sajcdireni. Narä caniä lojtu dee: Recos nani rbe'c reben̄zijt lo rebanäj̄b, lo reben̄dxab cabe'crenini, et lojdi Dios. Luxh narä dina rlazä gactu tejsi con rebejn̄ nani rbe'c lo reben̄dxab, te di chachunäj̄zatu reben̄dxab. ²¹ Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo reben̄dxab. Digacdiza guidaunu xchej xten Dad

Jesucrist nāgajcza xchej ni rudeedreni lo rebendxab. ²² O ħla rlanjnu guche'chnu Dad Jesucrist, ä? ħXhixh maazru nadipnu lojni, ä? ħGurniä lojtu!

Colyejn guira'ti te chä'p xpala'n Dios

²³ Guliicani, sajc jiennu xhitis ni rlanjnu jiennu, niluxh xhet guira'ti ni rlanjnu jiennu najc hueen par nuurnu. Guira'ti najc laaca, niluxh yu' reni di gacnaj gustioobnu lo xcälirilajz Dios. ²⁴ Na'c guntu xhigab quiiiltistu lagajc xcäl'nasa'ctu; maazru hueen quiiizatu xcäl'nasa'c xpisintu. ²⁵ Coltajw xhitis bääl ni rdo' lo guii, na'c guiniabdiidxtu caro siädni te di gacnaj xcäriejntu. ²⁶ Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

²⁷ Palga jiädgajñ te bejn ni di chalilajz xtidx Dios luj jiädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸ Palga yu' chu naa lojlu: "Dee najc bääl ni bile'cnu lo rebanäjb", na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹ Dina guiniä xcäriejnlu, didi gunnajni xcäriejn stee dade'ga; mbaj naj, ħxhicuent riäjł gula'tzreni narä sa'csi rajc runä guira'ti porsi racnaj xcäriejn ste'ca bejn, ä? ³⁰ Palga rudedä xquixtios lo Dios nani runiidx xhi rauä, ħxhicuent rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. ³² Na'c guche'chtu nicla rexpejn Israel niclaza rebenzijt, niclaza rexpejn xquidoo Dios. ³³ Sigajcza runä narä, runä guira'ti ni rus-paa lajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujñ Jesucrist.

Xho riäjł gun regunaa neñ xquidoo Dios

² Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu. ³ Narä rlazä gacheepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴ Chutis te niguii ni yu' xhumbreel yejcnı lałni cabedx-canabni lo Dios o lałni caguluıini xtidx Dios, laani rusanxtujynı yejcnı. ⁵ Palga yu' te gunaa ni dini gusäu xpäiini yejcnı che cabedx-canabni loj Dios o che caniini xtidx Dios, rusanxtujynı yejcnı sa'csi najcni sigajc najc te gunaa ni abigaj yejcnı. ⁶ Palga di te gunaa gusäu xpäiini yejcnı suguıgaj yejcnı. Palga najcni te xtujy guıgaj

yejcní, sugusäuni xpäiini yejcní. ⁷ Di guchaag gusäu te niguii yejcní sa'csi najcreni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹ Xhetza xcuent gunaadi guc-chee niguii; gunaa najc ni guc-chee xcuent niguii. ¹⁰ Ni'cni nanab jiäu yejc gunaa neñ guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii niclaza gunaa digacdi guiban xtebreni. ¹² Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

¹³ Colyejn lagajc xhigabtu naj, ¿la laaca najcni cuedx-guiniab te gunaa lo Dios lañ ni xhet niäudi yejcní, ä? ¹⁴ Loj rebeñ guedxliuj guiraa reniguii rgaj yejcreni, sa'csi najcni te xtjuy guigaduxh xquidxejcreni. ¹⁵ Niluxh regunaa hueen najc rga' xquidxejcreni te rusäuni yejcní. ¹⁶ Palga yu' chu tildiidx xcuent rediidx nani caniä lojtu, nanab gacbeeni si'ctis riennu, si'ctisza rujnreni neñ guiraa rexquidoo Dios.

Xho ruxhijreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. ¹⁸ Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. ¹⁹ Pet naatu nanab guntu si'c te gacbeetu chureni'c sanälajzpac Dios, chureni'c sajcru lo xtzuun Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejga bejn rlanj xcaxgaa xhi gauni, dxejc yu' reni agudxadoo xque'reni, agusojzarení, lañni yu' stee cuaa bejn calaan, gajdreni gau. ²² ¿Xho mood? ¿La xheti roliztu cadre gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¡Gurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejnni guxhijñ che gudaunäjni rexpejnñni te xchej xten pascw, guxhijñ ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵ Si'cza bennäjni co'p che gulujx gudajwreni, räjpni lojreni: “Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te

guinalajztu narä.”²⁶ Che gautu yätxtiilga, che yätu neṅ co'pga, ruluilosactu xhi bejn Jesucrist che gudijxni xcuent rextojṅnu lo cruzj; si'cza colyujn dxejli ni guibisacni lo guedxliujre.

Xho riäjł gac xchej Dad Jesucrist

²⁷ Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. ²⁸ Niluxh sugula'tz tejgatu lagajc lastooni don la yu' xhi dojl bejnni, dxejcti sajç gauni yätxtiil, yäni co'p xten xchej Dad Jesucrist, sa'csi abaxhobdojṅni. ²⁹ Chutis bejṅ ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejçni. ³⁰ Ni'cni lacti resa'tu racxhuu, xhet nadaanreni, luxh yu'zarenı agujt. ³¹ Ni'cni nanab fiinu xho najcnu, guiniabnu lo Dios gudzucajni rextojṅnu te didi tednu trabajw. ³² Niluxh che rdejdnü trabajw, rdejdnuni te na'c tednu trabajwduxh si'c ted rebeṅ guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colçuaäj resa'tu. ³⁴ Palga yu' chu tejtü ni calaan, sugauni lagajc rolijzni, te di gun Dios yälguxhtis lojtu. Guiraa rexhistee cos, che jialä ro'c fiä don xho gacsa'cni.

12

Dzuun ni rudeed Sprit Dxan xten Dios lo tejga ni rililajz

¹ Rebetzä, rlazä gacheetu xcuent dzuun ni rudeed Sprit Dxan xten Dios lo tejganu.

² La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejṅ gaṅtu. ³ Ni'cni rlazä gacheetu naj, nicla tejtü ni yu' Xsprit Dxan Dios neṅ lastooni sajç guinii: “Xhet sajçdi Jesucrist.” Luxh rut rajçdi rniı: “Jesucrist najç Dadbid baxhuaannu”, palga di Xsprit Dxan Dios cuääz neṅ lastooni.

⁴ Mbaj naj. Yu' xhidajł dzuun ni rudeed Dios loj rebejṅ ni huililajz xtiıdxni, niluxh tejsi najç Xsprit Dxan Dios ni rujn dzuunga neṅ lastoo guiragajcnu. ⁵ Yu'za balti cuaa dzuun nani riennu, niluxh tejsi najç Xtabbid baxhuaannu. ⁶ Yu' xhidajł mood rajç dzuun, niluxh tejsi Dios rujn dzuunga lastoo guiralii bejṅ. ⁷ Tejga bejṅ ruluiloj garen-garen xtzuun Sprit Dxan xten Dios, niluxh guira'ti redzuunga najç te gacnäjreni guiraanu. ⁸ Lo tej bejṅ rudeed Sprit Dxan yälṅnasin, lo steeni rudeed lagajç Sprit Dxanga yälṅnajn. ⁹ Lagajçza Sprit Dxanga rudeedzani yälṅrililajzro lo tejni, dxejç lo steeni rudeedza lagajç Sprit Dxanga yälṅnibee te rusiajçni yälṅracxhuu. ¹⁰ Loj stee bejṅ rudeedzani yälṅnibee te gunni milaagwr, loj

stee bejn rudeedni yälriembee te sajc guinixgaani xcuent recos ni churu gac; lo steeni rudeedni yäl_{nasi}n te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl_{rac}bee te rajc rniini loonu xhini'c gunii bejn ni rniü garen-garen redidxsaj. ¹¹ Niluxh tejsi najc Sprit nani rujn guiraa redzuunre, racnäjni rujn tejganu xtzuunni si'ctis ni rlanjni.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajl la' xtenni, teygareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexpejn Israel o ben griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädläjz nen lastoonu.

¹⁴ Sa'csi tiejxhnu dini gac tejsi la', najcni balti la'. ¹⁵ Paru naa ni'nu: "Sa'csi dina gacä te _{naa}, ni'cni dina gacä te la' tiejxhre." ¿Xhixh porsu ni'c dini gac tla' tiejxhga, ä? ¡Gurniälojlul!
¹⁶ Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsu ni'c dini gac tla' tiejxhga, ä? ¡Gurniälojlul!
¹⁷ Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni?
¹⁸ Mbaj _{naj}, ni'c basoob Dios guiraa rela' te guc-chee tiejxhnu si'ctis ni rlanjni gacni. ¹⁹ Paru niajc guidebni si'c tejtis la'ni, ¿xho niajcpacni te tiejxhni dxejc? ²⁰ Niluxh _{naj} ensilaani yu' xhidajl la' te najcni tejsi tiejxhni.

²¹ Te balojnu di gac gäbni lo _{naanu}: "Dina guiquinälu", niclaza bitiuyceni di gac gäbni lo ni'ni: "Dina guiquinälu."
²² Chucala lapacreni rquiinru nani ruzen lascanu xhet sajcdireni. ²³ Luxh retla'ga nani rchalonu guxii sajcreni, reni'c maazru sajc. Luxh reni rtuinäanu, niguü sigajc gunaa, reni'c riapdarunu. ²⁴ Biätla sgaii la' tiejxhnu nani rlui saruru, reni'c di guiquin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc. ²⁵ Bejnii si'c te di chu yäl_{rdijl} lo retla' tiejxhnu, te guiraa retla'ga gacnäj sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yäl_{rnibee} lo tejganu lo xquidooni te gunnu xtzuun-xtzuunni. Ganidtoo guleni reapost; ni _{roj}pga guleni rebejn ni rniü xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusajc be_nracxhuu, reni racnäj, reni rniü garen-garen redidxsaj. ²⁹ Et guiraadi rexpejn Jesucrist najc

apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusiajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. ³¹ Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yäl'nasiñ xten guedxliujre, palga rapä yäl'rilibilazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäjzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵ Direni gun recos ni di guchaag, dini quuil xcäl'nasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejzni xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäjz rediidxga. ¿La rajc rnii bejn garen-garen redidxsaj, ä? Sidzujn dxej siacdxi redidxsajga. ¿La yu' yäl'najn? Sidzujn dxej sinitlojpacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jiädsac Jesucrist ni rajp guiralii yäl'najn, sinitloj xcäl'nandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yäl'bengol, gunitloj rehxigab biuux ni benä galoo. ¹² Sa'csi naj rhuiinu si'c loj te guihuajn ni nacäy, luxh che guibanänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. ¹³ Niluxh naj ria'n yäl'rilibilajz näjza yäl'rbäzljajz, näjza yälsanälajz. Lo guidxon redee, sajcru yäl'rinälajz.

14

Renani rnii rediidx

¹ Ganiddoo colquuil yäl_rinälajz, col_nabza lo Dios te guni-dixruni xhi stee dzuun, niluxh col_yejnru te xca'tu yäl_rnibesac'te gusule'tu xtidx Dios. ² Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluii Sprit Dxan xten Dios guiniini. ³ Niluxh bejn ni rusule' xtidx Dios, rustioobni xcäl_rililajz bejn ni rulijdxni, ruspaani lajz nani rac-huin lajzni. ⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebe_nguidoo.

⁵ Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. ⁶ Mbaj naj betzä, che jlälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl_najn, o xcuent te xtidx Dios, o xcuent te yäl_ruluii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn gol_sa'creni, ¿xho jiennu gacbeenu xhi dij cayol_reni, ä? ⁸ Sigajcza lo guerr, palga direni gol_cornet dippac, ¿xho gacbeereni agojl chatij_reni, ä? ⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu. ¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te be_nzijt loj nani canii loä, sigajcza sajc nani caninäj narä. ¹² Ni'cni la'tu ni r_lajztu xca'tu yäl_rnibee xten Sprit Dxan te guntu xhi redzuun, col_guejs, col_nab lojni xhidajl dzuun te gacnäjtu tioobru xcäl_rililajz rexpen_guidoo.

¹³ Ni'cni palga yu' te bejn ni rnii garenca didxsaj, suguniabni loj Dios yäl_rnibee te gac gusule'ni diidx ni rniini lo rebejn. ¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. ¹⁵ ¿Xho ricajni dxejc? Siniab xspritä näjza xcärienä lo Dios; sol_xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu. ¹⁷ Hueenza calä'plu xpala'n Dios, per stee bejnga dini tioob loj yäl_rililajz. ¹⁸ Rudedä xquixtios lo Dios maazru rajc rniä garen-garen diidx loj guiragajctu. ¹⁹ Niluxh ne_n_guidoo maazru rlazä guiniä con

xcärienä gaiitis diidx nani gacbeetu, nani guluii la'tu, loj tzuu mił diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹ Scree caj lo xleii toMoisés: "Mase guiniä lo rebejn con garenca diidx näjza xtidx benzijt, nicla si'c direni gucuadajg xtidxä", naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu neñ guidoo dxejcti caniitu garen-garen diidx ni rut racbeedi, dxejc guidzujñ tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojłni, ²⁵ sienloj rexhigab xhiga'tz ni yu' neñ lastooni, dxejcti siabrlojni suzuxhibni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälřililajz renani ahuililajz xtidx Dios. ²⁷ Palga yu' renani rnii con garenca diidx, suguini ti'o'p-choñ bejn, niluxh tebgajreni, dxejcti sugusule' steeni xhi säloj ni rnii tebgajreni. ²⁸ Palga rut rajcdi gusule' rediidxga, na'c guiniireni con garenca diidx neñ guidoo, suguinixtebreni lo Dios. ²⁹ Si'cza renani rusule' diidx ni rudeed Dios lojreni, suguini ti'o'p-choñ bejn, niluxh tebgajreni, te cuadiajg stiop xchoñreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadi-ajg, sucuedxisijcni, dxejcru suguiniini. ³¹ Sa'csi guiraatu sajg gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yälřililajz. ³² Rudeed Sprit Dxan xten Dios yälñajn loj reni rusule' diidx ni rudeed Dios lojreni te acanajnreni che riäjł guiniireni o che riäjł cuedxireni, ³³ sa'csi Dios najc te Dios ni rujn guira'ti xnejz-xnejzni, dini gun biejy, niluxh rbecdxini lastoo bejn neñ guiraa reguidoo xten rebejn ni ahuililajzpac xtiidxni. ³⁴ Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadajgreni xtidx Dios ni rusule' reniguii lojreni. ³⁵ Palga rłajzreni gacbeerureni, suguiniab-diidxreni loj chäälñi che guibi'reni rolijzreni, sa'csi sianxtujy gunaaga palga guiniini neñ guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biäädni. ³⁷ Palga yu' tejtu ni rchalo rajc rniini diidx ni rudeed Dios lojni, o palga rchaloni abadeed Xpirt Dxan xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. ³⁸ Palga yu' chu tejtu ni di chalilajz rapä xcälrnibee Jesucrist, rutza jiudi xtiidxni.

³⁹ Ni'cni, rebetzä, colyejnru te gusule'tu diidx ni runiidx Dios lojtu, na'c gudxoijntu renani rniiza garenca didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

15

Gubañsac Jesucrist lo rebengut

¹ Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajru ni bisiedä, basule'ä xho gujt Jesucrist lo cruiz, bixe' xtiejnri te badzucajni rextojlnu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni. ⁵ Cheni gubañsacni, baluilojni lo Pedr, dxejtiru loj guitzubito'p rexpejn pacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabañsajc, niluxh yu'za reni agujt. ⁷ Dxejcti baluilojni lo Jacob, dxejtiru loj guiraa reapost.

⁸ Dxejcti lultpac baluilojzani loä, luxh alagudejd ruluilojni lo rexpejnri dxejc. ⁹ Narä guxiiru sacä loj guiraa reapost, niclaza nungäjil cuälajreni narä apost sa'csi basacsä rexpejn xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl'rulasajz Dios cayacnäjä narä. ¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibañsac rebengut

¹² Mbaj naj, palga nuurnu cagusule'nu diidx xcuent ni gubañsac Crist loj rebengut, ¿xhicuent yu'tu ni rnii, xheti yälrbañsac loj rebengut? ¹³ Palga xheti yälrbañsac lo rebengut, dxejc nicla Crist di nibañsac lo rebengut. ¹⁴ Luxh palga di Crist nibañsac loj rebengut, ¿xlia'si najc diidx nani basule'nu! ¿Xlia'siza najc xcäl'rililajztu! ¹⁵ Luxh et ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac

loj rebengut. ¹⁶ Niluxh palga di rebengut chäs, ni claza Crist di nibansa'c lo rebengut. ¹⁷ Luxh palga di Jesucrist nibansac loj rebengut, xhet sajcdi xcälrlilajztu, sanuutistu loj xtojltu. ¹⁸ Sigajcza agunijt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj jiaduxhrej guiraa reni ruhuii loonu.

²⁰ ¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas. ²¹ Sigajcni biääd yälgujt loonu xcuent tejtis niguii, sigajcza biääd yälransac lo rebengut loonu xcuent tejtis niguii. ²² Sigajc xcuent te niguii ni laa Adán biääd yälgujt, sigajcza xcuent Jesucrist biääd yälransac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejni che jiädsacni lo guedxliujre, guiraareni suspansacni. ²⁴ Che agujc ni'c, dxejcti siääd dxe lult che gudedscacni yälrnibee lo Dios Xtadni, che abadzujni guiraa reyälrnibee, guiraa reyälguxhtis, guiraa reyälmilagwr. ²⁵ Nungäjlpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶ Lult ni rdxe'ch lojni ni gunitlojni najc yälgujt. ²⁷ Lo xquijtz Dios caj: "Agudixhni guira'ti detz ni'ni te guinibeenireni." Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali recos, dxejcti sudeedni guideb yälrnibee loj Xtadni Dios, te xtebtis Dios guinibee guira'tipac.

²⁹ Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

³⁰ ¿Xhicuentza rdxunnu lo casionduhx guira'ti or? ³¹ Rniliäpac lojtu, rebetzä, caläpä xpala'ntu xcuent Jesucrist Xtadnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä. ³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: "Do'o guidau, do'o guidun, sa'csi guixee empac sejtun."

³³ Na'c gusaantu gusgueereni la'tu, palga sachaaглу lo benguijdx näjza luj sajclu benguijdx. ³⁴ Basanij xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujyту ni'c rniä diidxre lojtu.

³⁵ Naj yu' reni rniabdiidx: “¿Xho rbañsac bejn loj rebengut? ¿Xhoza gac tiejxhreni?” ³⁶ ¡Chip nayäällu! Che rbe'clu te binij, di gäjł guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjłga si'cni rłajzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejnni, rustioobni gäjłga, lo tejga gäjł rudeedni xpalajgni o tiejxhni, si'tcis ni rłajzni. ³⁹ Xhet guiraadi retiejxhreni najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł. ⁴⁰ Sigajcza yu' tiejxh rebajł xhaguibaa, tiejxh rexten guedxliujre. Niluxh yälrdimbicha' xten rebajł xhaguibaa najc tej, dxejc yälrdimbicha' guedxliuj najc ste'ca. ⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibañsacni loj rebengut, garenca gac tiejxhni, diruni gudx, anabajłni par tejpas. ⁴³ Che rga'tzni, rujn bejn xhigab xhetru gacnäjdı tiejxhga, niluxh che guibañsacni, lacti sacru, lacti sajč tiejxhga. Che rga'tzni, xhetru sajčdı gunni, luxh che guibañsacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääđ lo guedxliuj, yu'za te tiejxhni ni siääđ xhaguibaa.

⁴⁵ Si'cza caj lo xtidx Dios: “Nigui galooga ni laa Adán, bejn Dios gujčni te beñ nabajł.” Niluxh Adán ni biääđ lult, Jesucrist najc Sprit ni runiidx yälñabañcoob loonu. ⁴⁶ Ganid najc yälñabajł xten guedxliujre, dxejctiru yu' te yälñabañcoob xhaguibaali. ⁴⁷ Sigajcza niguii galooga najc beñ guedxliujre, niluxh ni rojp niguii ni biääđ najc beñ xhaguibaali. ⁴⁸ Benchee Dios Adán con yuj, najcni beñ guedxliuj. Xhaguibaali biääđ Jesucrist, najcni beñ xhaguibaa. ⁴⁹ Sigajčni najcnu si'c beñ guedxliujre, sigajcza sajčnu sigajč najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääł näjza rejn xhaguibaa cadre yu' Dios. Tiejxhnure nani sinitloj di gacđiza xca'ni stee tiejxh ni najc par tejpas. ⁵¹ ¡Colhunii! Rlazäza gacheetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵² tera't bälzule', si'c cheni rdinya' guzii, che jiel lult trompe't, dxejc sibañsac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. ⁵³ Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacđı guetni, najcni par tejpas. ⁵⁴ Niluxh che tiejxhnu ni najc xten guedxliuj abidxaa te

ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojḅ xtidx Dios ni caj scree: “Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcälñayanlu naj, ä?” ⁵⁶ Xcälñayan xten yälgujt najc dojl. Xcälñabee dojl najc leii. ⁵⁷ Niluxh rdeednu xquixtios lo Dios, nani runiidx te yälñabee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuumni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, colyejnni sigajcni räpä gun reben rexquidoo Galacia. ² Casob dumingw, nalajznu ganid dxej xmaan, tejgatu colcuää te meel yejc nani rujntu gaan neḅ te xmaan, colcucheeni, te na'c gutie'tu meel che jialä. ³ Te che guidzunä, guxhalä meelga, näjza tiop-choḅ guijt chanä chutis bejn ni cuetu chasa'nni guedx Jerusalén. ⁴ Palga laaca cha'aza, sajczä chänäreni narä.

Xhigab ni bejn Pabl chääni biaj

⁵ Guidzunä lojtu che agudedä reguedx Macedonia, sa'csi sidedä nejzga galoo ni jialä ro'c. ⁶ Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. ⁷ Sa'csi di rlazä jiädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. ⁹ Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujḅ Timoteu lojtu, saru colhuiini, te na'c chuni yärsia' laḅ ni yunäjni la'tu, sa'csi cayujḅni xtzuum Dios sigajc runä narä. ¹¹ Na'c gusaantu chu tej ni cuälazni, colcuedcxi lajzni, dxejc colgusunejzni, te jiädhuiini narä ree, sa'csi ree cabääznu laani con rebejtznu.

¹² Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiäädni.

Rextixtios lult ni ruxhalni

¹³ Colsusin, colsudzu'tz lo yälirilajz xten Dios, colyejn dzuun si'c niguii, colyajc beḅnaan. ¹⁴ Xhitis ni rujntu colyejnni con yälñälajz.

¹⁵ La'tu rebeztä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhrene rebejznu nani huililajz xtidx Dios ro'c. Naj rniabduxhä lojtu, ¹⁶ colgusoob xtidx rebejnğa, näjza xtidx guiraa rebejn ni racnäj rexpejn Dios, ni rujnza xtzun Dios. ¹⁷ Rbalazä bidzujn Estéfanas, näjza Fortunato, näjza Acaico, sa'csi laareni bejnrene par narä nani di niajcdi niujntu sa'csi rutitu. ¹⁸ Gulecdxireni lazä näjza lajztu, ni'cni, icoljiu sa' rebejnğa!

¹⁹ Reben xquidoo Dios nez reguedx Asia ruxhal xtixtios lojtu. Aquila näjza chäälni Priscila näjza rebejn ni re' rolijzrene ruxhalzareni xtixtios lojtu. ²⁰ Guiraa rebejznu ruxhal xtixtios lojtu. Colguinii tejgatu lo sa'tu: "Xchan, gacnäj Dios la'tu."

²¹ Narä Pabl, ruxhalä xtixtios lojtu, lagajc narä benä reletre.

²² Palga yu' chu tejtu ni di chanälajz Dad Jesucrist, sunitlojni. jDad Jesucrist, guda!

²³ Gacnäj xcälruulasajz Jesucrist guiraatu. ²⁴ Yälrinälajz ni rapä xcuent Jesucrist suchunäjni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojpw guijtz ni bacuaa Pabl lo guidoo xten guedx Corinto

¹ Narä Pabl nacä apost xten Jesucrist sa'csi si'c rlazj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guiitzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtradnu näjza lo Dad Jesucrist, gacnäjreni la'tu, guscuedxireni lajztu.

Trabajw ni gudejd Pabl

³ Guiliä'pnu xpala'n Dios Xtrad Jesucrist, nani rulaslazj nuurnu, nani rustoolajz nuunu. ⁴ Che rdejndu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. ⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuedxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejdzanu. ⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdn, suscuedxi Dios lajztu sigajcni ruscuedxini laaznu.

⁸ Rebetzä, rlazä gacheepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. ⁹ Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. ¹⁰ Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, ¹¹ sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcälrulaslazj Dios ni baniidxni loonu.

Xhicient di Pabl nij guedx Corinto

¹² Dee najc nani ruspaä laaznu: rbedxi xcäriejnnu, ni'c ruluii loonu laaca nabajnnu, con yälñadolajz riennu si'cni rnibee Dios; xhet sa'csi rajpnu xcälñajñ reben guedxliujdi, alga sa'csi racnäj Dios nuure. Si'cpac nabajnnu lo guedxliujre, luxh maazru che yu'nu lojtu. ¹³ Caculaanu lojtu rediidx ni sajz

gołtu, ni sajc gacbeetu, luxh cabäzä sacbesa'ctu guiragajc redi-idx ni gucuää, ¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu neñ dxej ni jiaäd Dad Jesucrist.

¹⁵ Ni'cni ganiddoo benä xhigab niädhuiä la'tu te nibalajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te beñ guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". ²⁰ Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. ²² Abacuaazani xseenni loonu, ni'cni baniidxni Sprit Dxan xteni te cuääzni neñ lastoonu.

²³ Rbedxä loj Dios gacbeeni xhi yu' lastoä, guliipacni te diruna gutalä xcälñajtu, ni'c dina niälsacä guedx Corinto. ²⁴ Di rlajznu guinibeenu xho chalilajztu, alga rlajznu gacnäänutu lo dzuun te guibaa lajztu; guliipac agusudzu'tztu lo xcälñililajztu.

2

¹ Niluxh lagajc xcuent xcälñasa'cä benä xhigab dina jiaädhuisacä la'tu che cayac-huin lazä. ² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä guc-huin lajzni. ³ Ni'cni lagajc xcuent ni'c bacuaä lojtu, te che jialä lojtu, di rebejn gunhuin lazä nani riäjł guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälñanalazduxh ni sanälazä la'tu.

Yälñrusiäjł lajz ni yu' par nani bejn falt

⁵ Palga yu' chu tej ni cayujñ cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. ⁶ Alabasacsiduxh xhidajł bejn dade'ga, na'cru gusacsítuni ñaj. ⁷ Ñaj colñsiäjł lajztu xcuent xtojłni, colñcuedxni lajzni didi gac-huinduxhrej lajzni. ⁸ Ni'cni rniabä lojtu, colñchanälajz bejnre si'c ni huinälajztuni galoo.

⁹ Bacuaxgaäza lojtu te gacbeä laa susoobtu xtidxä. ¹⁰ Naj renani jiäjl lajztu xtojlni, näj narä siäjł lazäni. Sigajcza narä, nani basiäjł lazä, palga yu' xhi basiäjł lazä, benäni xcuent xcäl_nasa'ctu, nez loj Jesucrist, ¹¹ te di gun beñdxab gaan nuure, sa'csi anajnnu xho najc latsiaj ni rujn beñdxab.

Guyu' Pablyärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä, ¹³ niluxh guyuduxhä yärsia' sa'csi dina nidxälä Tito, bejtznu. Ni'cni basadidx-gacäreni, sa'äti nez reguedx Macedonia.

Jesucrist rujn riennu gaan

¹⁴ Xquixtios lo Dios nani con Jesucrist racnä j nuurnu te dipacnu gunijt, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios. ¹⁵ Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni. ¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl_nabañcoob. ¿Chu laa ni racbee sa' recosga? ¹⁷ Sa'csi dinu gac si'c najc xhidajł bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl_racnä j Jesucrist nez loj Dios ni cahuii xhini'c riennu.

3

Diidx nacoob ni basa'n Dios loonu

¹ Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rni najcreni beñsa'c. ¿La rlazzzatu guiluinu lojtu sa' guijtzga, o guiniabnu guntu sa' guijtzga xca'nu, ä? ² La'tu najc si'c xquijtznu ni rni xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. ³ Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxiän xten Dios ni nabajn bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios. ⁵ Di gacdi jien xtebnu xhitis dzuun ni riennu, riennuni sa'csi laa Dios ni racnä j nuurnu. ⁶ Laani runiidx yäl_nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleii biädnä dojl, dxejc gujtnu. Niluxh didxcoobga ni rusule'nu biädnä Sprit Dxiän

xten Diosni, luxh runiidxni yäl'nabanc'coob loonu. ⁷ Leii baluui yu' xtojł bejn, riäjł guetreni. Xhidajł seen guyu' che bacuaa Dios rediidxga lo guij. Luxh di niajcdi nuhiii rexpejn Israel loj Moisés, bidxejbreni sa'csi rdimbicha' lojni, luxh sanuu cayuui yälrdimbicha'ga. ⁸ Palga si'c gujc che biääd leii, aticaxh naj su'ru xcälrdimbicha' xleii Sprit Dxaan xten Dios, ni najc redidxcoob nani abasule'nu. ⁹ Palga xleii toMoisés ni baluiloj yälgujt xcuent dojl biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. ¹⁰ Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. ¹¹ Palga yälrdimbicha' nani biuui bianisesduxhni tera't, stee yälrdimbicha're ni najc par tejpas sidimbichasesduxhni.

¹² Luxh ni'c runiidx yälr'becdxi lajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejn Israel cayuui yälrdimbicha' ni guyu' lojni. ¹⁴ Niluxh bicäy xcariejnreni; lo dxej najli che riel xleii toMoisés, najcni si'cni yu' xhi lajd rusäu lastooreni, rudxojn gacbeereni, te di chalilajzreni, xtidx Jesucristis rajc rudzucaj lajdga. ¹⁵ Lo dxe najli che rolreni xleii toMoisés, najcni si'cni ruscäy te lajd xcariejnreni. ¹⁶ Lo xtidx Dios rni scree: "Niluxh che gusiechljaz te bejn, gudzuréni nez loj Dad, sibicaj lajdga", nalajznu sacbeeni xtidx Dios. ¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojnu, didi guscäjyni xcariejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxaan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jäxhan. ² Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiapacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, ⁴ sa'csi abascäy bejdxab ni rnibee guedxliujre xcariejnreni, si'cni rujnni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rni xcuent xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶ Che benchee Dios guedxliuj, guniini: "Lo xcäy suguirii te bajl ni

gusanij.” Lagajc Diosga abasanij lastoonu te baniidxni bajl ni najc yälriembe xcalrdimbicha' Dios nez loj Jesucrist.

Xho guibañnu con yälirilajz

⁷ Nuurnu najcnu si'c te guesyuj, xhet sajcdinu, niluxh guidxanu te yälnasacduxh, ni najc xtidx Dios xcuent Jesucrist, te guiluloj xcalnasa'c xten xcalrnibee Dios lacuaa xhisi te yälnadipbáz xtennu. ⁸ Rdeednu trabajw guira nejz, niluxh dinu gunijt yälrunloj. Mase di jien xho jiennu, dinu chu yärsia'. ⁹ Rusacsíreni nuure, niluxh di Dios cuälaznu, rguijnreni nuure, dizareni ju't nuure. ¹⁰ Cadrotis rionnu rusacsíreni nuure si'c basacsíreni Jesucrist, te si'c neñ tiejxhnu gululojzani yälnañsac loj rebeñgut xten Jesucrist. ¹¹ Cadrotis rionnu rlajzreni ju'treni nuure sa'csi rusule'nu xtidx Jesucrist te si'cza neñ tiejxhnu gululojzani xcalnabajñ Jesucrist loj rebeñ guedxliujre. ¹² Ni'cni rujn yälgujt dzuun loonu, per yälñabajñ cayujn dzuun lojtu.

¹³ Sa'csi rajpnu lagajc xsprit xten yälirilajzga, sigajc ni caj lo xtidx Dios: “Huililazä ni'cni basule'ä diidx.” Sigajcza nuure, huililaaznu xtidx Dios, ni'cni rusule'nuni. ¹⁴ Sa'csi nadonnu lagajc nani baspañsac Jesucrist loj rebeñgut, lagajcza laani gun guibañsacnu con Jesucrist te gunni sunäjnu la'tu nez lojni. ¹⁵ Rsiajcnu guiraa ni rsiajcnu te xcuent si la'tu gudeedru bejn xquixtios lo Dios, te guiliä'pruzareni xpala'nni xcuent yälrulasajz ni sanuutis care'ch lo xhidajl bejn.

¹⁶ Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷ Retrabajw ni cadeednu lo yälñabajñre rdedgajceni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. ¹⁸ Dinu fiitis renani ruzeñ lo guedxliujre sa'csi sinitloj reni'c, alga cayenloonu renani di guzeñ, sa'csi renani di guzeñ najceni par tejpas.

5

¹ Aracbeenu tiejxhnu najc si'c te yu' xten xaimnu lo guedxliujre, sidzujñ dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Gullicani, lañni dxunnu neñ tiejxhre, rbedxneñnu rdeednu trabajw, ni'cni rlajznu maläi agojl guidxaa tiejxh guedxliujre te xca'nu te tiexhcoob ni siääd xhaguibaa. ³ Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. ⁴ Lañni dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rlajznu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. ⁵ Nani benchee

nuure parpac dee najc Dios, lagajc nani runiidx Sprit Dxaan xtenni loonu si'c te seen sujnpacnini.

⁶ Ni'cni dinu guidxeeb, sa'csi nadonnu lal'ni nabaj'nnu lo guedxliujre, di gacdi guibaj'nnu xhaguibaa loj Dadga. ⁷ Sa'csi nabaj'nnu xcuent nani rililajznu, xhet xcuentdi nani rajc rhuiinu. ⁸ Ni'cni rniä nabaj'nnu dinu guidxeeb, rchaloonu hueenru guisa'nnu tiejxhnu lo guedxliujnure, te choläznäanu Jesucrist xhaguibaa. ⁹ Ni'cni tejtis najc xhigabnu, palga lo guedxliujre o xhaguibaa, rlanjztsnu jiennu renani gun guibaa lajzni. ¹⁰ Sa'csi guiraanu riäjl suunu nez loj yagxhiil cadro gun Jesucrist yäl'guxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yäl'becdxi lajzni

¹¹ Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabaj'nnu; maläii näjza lo xcäriejntu gululoj xho nabaj'nnu. ¹² Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchaglajzts ruhuii xho rien bejn, direni gacbee xhi yu' neñ lastooreni. ¹³ Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnuni par la'tu. ¹⁴ Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebejn, te renani rililajz xtiidxni, na'cru guibaj'nnu xcuenttis laareni, alga guibaj'npacreni xcuenttis Jesucrist nani gujt, nani gubañsac xcuent laareni. ¹⁶ Ni'cni nuure dinu fii lo bejn si'cni najcni lo guedxliujre. Galoo biembeenu Jesucrist si'cni gujcnu che gubaj'nnu lo guedxliuj, niluxh naj et si'cti riembeenuni. ¹⁷ Ni'cni chutis bejn, palga rililajzni xtidx Jesucrist, sujnnini te beñcoob, diruni guichaglajz gunruni nani rajc lo guedxliuj, alga guichaglajzni gunni xtzun Dios.

¹⁸ Guiraa dee siääd lo Dios, nani basiäjl lajzni xcuent Jesucrist, dxejcti baniidxni loonu rediidx xcuent xcäl'rusiäjl lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunäj Jesucrist, cagusiäjl lajzni con rebejn guedxliuj, te xca'nireni, sa'csi diruni gudzuub xtoj' reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. ²⁰ Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, col'gusiäjl lajznu, col'yajc tejsi con Dios. ²¹ Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te beñdojl che gule'cni guiraa

rextojl guedxliuj yejc Jesucrist che cuajni lo cruzj. Si'c gujcni te sajç ga'pnu xcäl_naya, xcäl_nasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaztu xcäl_racnäj Dios; palga guntu si'c, xlia'si cua'tuni.

² Sa'csi loj xtidx Dios caj scree:

Dxej nani riäj_l gunäni, bacuadiagä xtiidxtu,

dxej che gubicaj xtoj_ltu gucnäã la'tu.

¡Coljiejn! Naj najc te tiempsa'c,

coljiejnza, naj najc dxej ni guibicaj xtoj_ltu.

³ Na'c jiennu nicla tej ni gun guidxe'ch lajz bejn, didi

guiniireni xhet laadi najc xcäl_rusule'nu. ⁴ Niluxh lo guira'ti

dzuun ni riennu, guluilojnu lo rebejn najcnu xmos Dios;

gacnu nadolajz; jiennu huant che rusacsíreni nuure; che rde-

jdnu trabajw; che di jien_xho jiennu; ⁵ che rguijn_reni nuure;

che rusäureni nuure neñ_latzguiib; che rdejdn lo bieiduxh;

che rdajl xtzunnu; che re'ch bacal_yääl; che rucua'nnu;

⁶ guluilojza najcnu xmos Dios xcuent xcäl_nabansa'cnu lo Dios;

näjza xcäl_nansa'c xtidx Diosnu; näjza yäl_rajc nadolajz; sa'csi

laaca riennu lo sa'nu; näjza sa'csi rbäjz Sprit Dxan xten

Dios neñ_lastoonu; näjza xcuent yäl_rinä_lajzpac bejn; ⁷ näjza

xcuent didxguliipac; näjza lo xcäl_rnibeduxh Dios; ca'zanu

si'c te madxed xcäl_naya Dios, ca'nuni guropñaanu, ladbee,

näjza ladbäjgw. ⁸ Ruluilozzanu najcnu xmos Dios palga chä'p

xpala'nnu, o palgaza jianxtujynu; palga guiniireni didxsa'c

xcuentnu, o palgaza guiniyajreni nuunu; palga naareni na-

jcnu beñ_rusguee, mase najcnu bejn ni rnii didxlii. ⁹ Palga rut

rlajzdi gumbee nuunu, o palga guira'ti bejn numbee nuunu;

acayejtnu, niluxh bahuii, anu anabajn; rusaan Dios rguijn_reni

nuure, niluxh dinu guet; ¹⁰ najcnu si'c bejn ni yu' xliajs,

niluxh rbalaaaznu; najcnu si'c bejn ni xhet rajpdi, luxh riennu

gapduxh bejn; najcnu si'c bejn ni xhet rajpdi, niluxh rajpnu

guiraloj.

¹¹ Lojtu, beñ Corinto, aguniliinu lojtu guiragajc rediidx

ni yu' neñ_lastoonu. ¹² Xhetliidi diidxd bacua'tznu lojtu,

niluxh pet cacuatç lajztu diidx ni nanab guiniitu loonu. ¹³ Naj

narä rulidxä la'tu si'c ruliidx te Dad rexi'nni: ¡Colguinii loonu

rediidx ni yu' neñ_lastootu!

Najcnu si'c xquidoo Dios ni nabajn

¹⁴ Na'c guchaagtu lo rebejn nani di chalilajz xtidx Dios,

sa'csi di gacdi gunteblojtu dzuun sa'csi tejni rlajz gun

dzunsa'c, steeni rlajz gunni dzunguijdx, çxho gac sanäj bajl

xcäjy, ä? ¹⁵ O çxho gac sanäj Jesucrist beñdxab ni laa Satanás,

ä? O çxho gac sanäj te bejn nani rililajz xtidx Dios te bejn ni di

chalilajz xtidx Dios, ä? ¹⁶ ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuäzä nen lastooreni, sisiaääzareni.

Narä sacä Xtiosreni, laareni sajcreni rexpenä.

¹⁷ Ni'cni colrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c fal'tu recosdxuudx.

¹⁸ Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yäl'rnibee.

7

¹ Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnno, lastoonu näjza tiejxhnu, do'o cuäcaj guiraa rexhigabguijdx, guiraa redojl, te gac sanu lo rexnezyudxan Dios con xcälrdxejb Dios.

Xho basiejch lajz reben Corinto

² ¡Colchanälajz nuunu nen lastootu! Xhet latsiajdi biennu lojtu. Rut baxhiñdinu. Rutza basgueddinu. ³ Dina guiniä rediidxre te cue'cä xquejtu; ni aguniä lojtu galooli, la'tu yu'tu nen lastoonu palga tejsi guetnu, o palga tejsi guibajnrunu. ⁴ La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajc cadejdn trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu. ⁶ Niluxh Dios ni racnäj rebejn ni rac-huin lajzreni, gucnäj nuure, sa'csi che bidzujn Tito guredxi lastoä. ⁷ Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjtu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸ Acananä guc-huin lajztu che bil'tu guiitz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guiitzga guc-huin lajztu, xhet xchejdi guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanj Dios, te di yu' xhi gunijttu xcuent nuunu. ¹⁰ Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujnni nitloj bejn tejpas. ¹¹ La'tu bejntu huant xliajs ni baxhal Dios si'cni rchaglaiz Dios gac. Naj ¡colhuii gan! ¡Lacti xhi cossa'c

bejnni par la'tu! Bejnna bahuisa'cpactu xhini'c gujc, te gac gusulegajctu xcuentni; dxejc bejnna bidxe'chtu, näjza bejnna bidxejbtu, ni'cni basaantu dojlga, dxejcti bejnna rlaizpactu nuhuiitu loä, bejnzani guyu'tu yärsia' xcuentä, bejnzani rlaiztu guntu yälguhxhtis bejn nani bejn dojlga. Guiraa redee baluiloj et la'ditu bejn dojl. ¹² Ni'cni, che bacuaä guijtza, dina nucuaäni loj bejn ni bejn dojlga, niluxh bacuaä guijtza lojtu te guiluiloj xcälrsia'tu ni rajptu xcuent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpriitni xcuent guiraatu. ¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni. ¹⁵ Ni'cni maazru sanälajzni la'tu, che rnej lajzni xho basoobtu diidx, xho bejntu cua'tuni che bidzujnnu, racsejlitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

8

Saru rudeedreni meel

¹ Naj bejtznu, rlaiznu guiniinu lojtu xho badeed Dios xcälrulasajzni lo reben Macedonia ni huililajz xtidx Dios. ² Mase gudedduxhreni trabajw, bibalajzreni, mase xhetliidi gojpreni, badeedreni meel si'c te bejn ni rajp. ³ Narä caniliä lojtu, badeedreni xmeelreni si'cni gojpreni, luxh badeedruren loj ni naa bejn sajg gudeedreni. ⁴ Gunabduxhzaren loonu guisaannu gudeedreni xmeelreni te gacnäjreni rexpen Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yälnejn; rchaglaizpactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸ Dina guiniä lojtu colyujn pacni; narä rlazätis gacbeetu xho rbaalajz reni rudeed meel te guluiloj don la guli sanälajzpaczatu rexpen Dios. ⁹ Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuentu gujcni si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlaizpactu guntuni. ¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed

si'cni rajptu. ¹² Sa'csi palga rlaizduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³ Dina guiniä gudeedtejtu te tedtu trabajw te gapduxh stee bejn, alga te gacteblojstistu. ¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc suniidxzareni te gusaloren nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojp yäl'nasa'c, xhet biäädxd."'

Tito näjza rexcompaneierni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rlaizduxhpacni gunni xtzuum Dios, naj lagajc laani bejn ni xhigab jädhuiini lojtu te luux dzuunre.

¹⁸ Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtzuum Dios nani cayennu te guiliä'pni xpala'n Gueb Dad Jesucrist, te guluilojza lacti rlaizpacni jiennu xtzuumni. ²⁰ Ni'cni rlažä jiapdaduxhnu te di chu tej ni guiniyaj nuure xcuent melrore ni chosa'nnu lo rexpejn Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlaizpacni gunsacni xhidajl dzuun, luxh naj rlaizruni gunsacni redzuinga sa'csi nadip lajzni la'tu. ²³ Palga yu' chu guiniabdidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴ Ni'c na'c guidxejbtu che yu'tu lo rebejn reguidoo guluiipactu loj rebejnğa xho sanälajztu, näjza redzuun ni rujntu ni'c rniinu ganax didxsa'c xcuenttu.

9

Meel par rebejtznu

¹ Ni'cni dina gucuaäru lojtu xcuent dzuunre, nalajznu, yälracnäj rexpejn Dios, ² sa'csi anancheä rlaizpactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. ³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgaä lojtu. ⁴ Didi che

jiädnaä reben Macedonia jiphuiinu la'tu, xhet rajpditu, dx-
 ejc jianxtuyä narä, näjza la'tu. ⁵ Ni'cni benä xhigab, nanabpac
 jiädxgaa rebejtzu, jiädhuiireni la'tu, te fiireni don xho gac
 xcuent meelro ni galooli bia'n diidx gudeedtu, te abatiex-
 gaatu nani gusalajztu sa'csi rlanjzactu gudeedtuni, xhet sa'csi
 rniinu riäjlpac gudeedtuni.

⁶ Rniliä lojtu, nani guxii rbe'c, guxiiza yäl'nasa'c guiliäsni,
 niluxh nani rbe'c xhidajl binij, xhidajlza yäl'nasa'c guiliäsni.
⁷ Tejgatu colhuii don lacti sajz gudeedni, dxejc si'c sugudeedni
 si'cti ni rlanjzi, na'c gun tiopdi lajzni, etza sa'csi riäjlpac
 gudeednini, sa'csi Dios sanälajz bejn ni rbaali lajzni rudeedni
 meel lojni. ⁸ Luxh Dios sajz guniidxru xcälracnäjni lojlu, te
 si'c guixe-guixee sajplu xhidajl guiraloj rexhixtenlu, te ga'plu
 xhitis ni rquiinlu loj guira'ti xtzunsa'clu. ⁹ Sa'csi lo xtidx Dios
 caj scree:

Abadeduxhni loj reben ni xhet rajpdi luxh
 redzunsa'c ni rujnni, najcreni par tejpas.

¹⁰ Dios nani rudeed binij ni rbe'c nani rujn dzuun loniaa,
 laani suniidxzani yätxtiil te guidaunu, lagajc Diosga suniidx,
 sutajlza binij cue'ctu, lagajc laani sustioobnini te gacduxh
 yäl'nasa'c xten xtzunsa'ctu. ¹¹ Te si'c ga'ptu lacti yäl'nasa'c te
 gac gudeedzatu xhiroob. Luxh xcuent xtzuunnu, meel ni
 ruxhaltu loj rexpejn Dios sujn gudedduxhrene xquixtios lo
 Dios. ¹² Sa'csi che racnäjtu rebejtzu, dinu guideed ganax-
 tis ni rquiinreni, rujnzanu rudeedruren xquixtios lo Dios.
¹³ Che racnäjtu sa'tu si'c, ruluilojtu lacti rusoobtu xtidx Dios
 si'cni ahuililajztuni, ni'cni siliä'preni xpala'n Dios xcuent
 xcälracnäjtu, nalajznu xcuent meel ni badeedtu lojreni,
 näjza loj guiraareni. ¹⁴ Dxejcti laareni sibedx-siniabzareni
 lo Dios xcuenttu, sinälazduxhrene la'tu sa'csi runidxduxh
 Dios xcälracnäjni lojtu. ¹⁵ Xquixtiosi Dios sa'csi baniidxni
 yäl'nasa'cduxhtej loonu!

10

Yälrnibee ni rajp Pabl sa'csi najcni apost

¹ Lagajc narä, Pabl, rniabduxhä lojtu, con guiraa didxdoo,
 guiraa didxsa'c xten Crist, (narä ni nac beñnadolajz che biälä
 lojtu, niluxh che suga'a zijt lojtu, dxejc nacä beñnialajz). ² Narä
 canabä lojtu, colguibansa'c te che jiädhuiä lojtu, dina gacä
 nialajz dizana guiniä redidxnaj ni abenä xhigab guiniä loj
 gaii bejn nani rni nabanä si'c te beñguedxliuj. ³ Guliicani
 najcnu beñguedxliuj, niluxh dinu gucuanäj sa'nu guiib nani
 rca' beñ guedxliuj che rcuaareni. ⁴ Sa'csi reguiib ni rca'nu
 te guidiisa'nu direni gac sa' guiib ni rca' beñ guedxliuj. Nu-
 unu rucuaanu con xcälrnibee Dios te riennu gaan loj guiraa

rexcäl̄rnibee guedxliujre. ⁵ Ni'cni cagutzuj̄nu guiraa rexhigabguijdxreni, näjza nani rchaloreni najc xhigabro nani rla-jzreni guiniyajreni yäl̄rumbee Dios, luxh caca'nu guiralii rexhigabnu cagutednureni ladz̄naa Jesucrist te gusoobnu rextid̄x Jesucrist. ⁶ Cabääztisnu te gunnu yäl̄guxhtis loj chutis bej̄n ni dini gusoob xtidx Dios, che abasoob guiragajctu xtidx Dios.

⁷ La'tu cahuiitu redzuun ni rien̄. Palga yu' chu tejtu ni rchaloni najcni xpej̄n Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajznanuni. ⁸ Sa'csi mase guiliä'päru xpala'nä xcuent yäl̄rnibee ni rapä, ni baniidx Dios te gustiobä xcäl̄rililajztu, et te guxhinädi la'tu, nicla si'c dina guituiä. ⁹ Dina rlazä guchalotu rlazä guchebä la'tu con rexquitzä. ¹⁰ Sa'csi rniireni: "Lo rexquijtzni caj didxnagajn, didxnialajz, niluxh che suga'ni laapacni, xheti xcäl̄siudzu'tzni, luxh xho rniaj diidx ni rniini." ¹¹ Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹² Dinu gun xhigab najcnu tebloj loj rebej̄n ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³ Nuure dinu gunnarotej lagajc nuurnu, niluxh riennu si'cni nungäj̄l̄ jiennu, xcuent yäl̄rnibee ni baniidx Dios loonu te jiennu dzuun cadro yu'litu. ¹⁴ Ni'cni dinu nidedcaj xcäl̄rnibeenu che bio'pnu lojtu, sa'csi baniidx Dios yäl̄rnibee loonu ganiddoo nuunu gusule'nu xtidx Jesucrist lojtu. ¹⁵ Dinu niennaro lagajc nuurnu xcuent xtzuun ste'ca bej̄n, ascanu lagajc nuunu biennuni. Cabääznu tioobru xcäl̄rililajztu, te gac jienrunu dzuun lojtu, si'ctis gal̄ jiennuni. ¹⁶ Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bej̄n.

¹⁷ Sa'csi nani rlazj gacnaro, suguiliä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bej̄n ni rliä'p Jesucrist xpala'nni, ni'cni rbalaznäj̄ Dios.

11

Pabl näjza rebej̄n ni rniisi najcreni apost

¹ Maläi chanunäsijctu narä lāl̄ ni guiniä gaii didxnayäle', niluxh asanunäjtu narä. ² Randzu'ä la'tu con yäl̄randzu' ni baniidx Dios, sa'csi abia'n diidx gutedä la'tu ladz̄naa Jesucrist te xca'ni la'tu. Rlazä gactu bej̄naya chäätu lojni, si'c te dxa'p che ruch̄naani te bi'n, rut bahual̄dini. ³ Niluxh rdxebä didi gus-guee bej̄ndxab la'tu si'c ni basguee bäl̄ Eva con xcäl̄nadxällajzni.

Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. ⁴ Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵ Narä runä xhigab dina gacä bejn ni guxiiru sajc loj guiraa reapost.

⁶ Mase di gacdi guinisa'cä, xhet yäl najndiza cayädxä; niluxh ni'c huenliisi rluloj guiraa rediidx ni abaluiä lojtu, guiraa redzuun ni abenä ro'c.

⁷ O ¿la benä te dojl guyu'ä lojtu si'c te bejn nadolajz, te gactu bejnroru, sa'csi xhetliidi cua'ädi xcuent ni basule'ä xtidx Dios lojtu? ⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuumtu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuumtu, luxh si'c sinuu gunä. ¹⁰ Guideb didxlii xten Jesucrist ni yu' nejn lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. ¹¹ ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn lacti sanälazä la'tu! ¹² Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. ¹⁴ Luxh xho dini gac si'c, ni lagajc bejdxab ni laa Satanás ruloj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos bejdxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdejd Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnj te guniäza didxro lagajc xcuentä. ¹⁷ Diidx ni rniä dina guiniäni xcuent xcälrnibee Dios, alga rniäni si'c te ni rajc yejcnj, lala redixro ni rniä xcuent lagajc narä. ¹⁸ Sa'csi lacti bejn yu' ni rnii didxro xcuent redzuun ni rujnreni lo guedxliujre, sigajcza siniä didxro xcuent lagajc narä. ¹⁹ Ni la'tu, sa'csi nasinduxhtu, sanunäjtu rebejn ni rajc yejcreni. ²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuumni o rliä'preni lagajc xpala'reni, o rga'preni lojtu. ²¹ Mase rtuiyä guniäni, dipac niajcdi niniä diidx lojtu te niacä si'c najc rebejnğa. Niluxh loj xhitis nani runnaroreni, (canisicä si'c te bejnyääl) narä sajcru gunnaroä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. ²³ ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcn. Abenäru dzuun lojreni, agudijnrurenari narä loj ni gudijnreni laareni, abasäururenari narä nen latzguiib, nicla gac guigab bal huält gudijnreni narä; baltiza huält ameer nietä. ²⁴ Gaii huält gudijn rexpejn Israel narä, tejga huält batiäjlneni duguijd detzä galbitzubigaa huält. ²⁵ Choñ huält bahuajcwreni narä garo't; stee huält bacuaareni guij yecä; choñ huält biääz barcw cadre sa'ä loj nisdoo; teb dxej, teb yääl guyu'ä lo nisdoo. ²⁶ Huaduxhä biaj, lacti bixun riesgw xcuentä lo gueuu, xcuent regubaan, xcuent rebenladxä, xcuenta rebenzijt. Bixunza riesgw nen reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. ²⁷ Abenduxhä dzuun, agudedduxhä trabajw, balti yääl dina niesä, balti huält gulanä, biolä, balti huält xheti xhi niaüä; agudedäza yälalduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. ²⁹ Che rdxajg tejtü, näjza narä rdxagä. Palga tejtü riajb lo dojl, narä ruduxhä yärsia' xcuentni. ³⁰ Palga nanab gunnaröä lagajc narä, sunäni xcuent rediidx nani ruluiloj xcälrdxagä. ³¹ Dios ni najc Xtad Jesucrist, nani riäjil guiliä'p xpala'nni par tejpas, ananchee dina gusgueä la'tu. ³² Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniaazreni narä te nisäurenari narä nen latzguiib. ³³ Niluxh basiäjtreni narä nen te dximro nez ro' te padeer ni rdejd gabi guejdxga, te si'c gulaä ladznareni.

12

Dios baluiloj lo bacal

¹ Mase riäjil guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluiloj Dios loä. ² Numbeä te niguii ni ahuililajz xtidx Jesucrist. Gutzudaj ijz huijni guibaa ni ri-ojnga, dina ganä laa guideb tiejxhni huijni, o la ganax xspritni huij, Diostis najn. ³ Diostis najn la guideb tiejxhni, o ganax xpritni, niluxh nanä xho huij niguiiga, ⁴ guläs Diosni cadre yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä. ⁶ Mase

rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beṇroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä beṇnaro, basaan Dios gusloj guyuguijdx tiexhä, si'c te guejch huääz tiexhä, ni baxhaḷ beṇdxab xten Satanás te gusacsini narä te di gacä te beṇnaro. ⁸ Choṇ huält agunabä lo Jesucrist xcuent ni'c, te guibicajni. ⁹ Niluxh laani najni loä: “Yälracnäj ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzeṇ xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälṇadip, yälṇadaan loä.

Yu' Pablyärsia' xcuent guidoo ni yu' Corinto

¹¹ Agucä si'c te beṇnayääl, lagajc la'tu bejntu nacä si'c. La'tu riäjḷ niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcro mase rut nacädi. ¹² Redzuun ni benä laḷ ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr. ¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¡Coḷsiäjḷ lajztu narä dojlre!

¹⁴ Naj cayunä xhigab jiädhuiätu, naj gacni choṇ huält siälä. Di quilä xhixtentu, alga lagajc la'tu rguilä. Di rlazä gutalä xtzuuntu. Di riäjḷ cuchee rebiuux meel par xcuzajreni. Reguzajn ni riäjḷ cuchee meel par rexi'nreni. ¹⁵ Xhet najcdi gunitä guiraa nani rapä, näjza lagajc narä sujuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä. ¹⁷ ¿Xhixh naatu cua'ä xhi xtentu sa'csi baxhaḷä rebejtznu lojtu, ä? ¹⁸ Che baxhaḷä Tito, räpä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Laḷni cayoltu guiraa rediidxre, cayujntu xhigab canabnu jiäjḷ lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tioobrutu lo xtidx Dios, rebetzä nani rinälazä. ²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlanjtu gacä. Rdxebä andi yu'tu ni

cadijl, ni ruguj lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajl diidx lo sa'ni; ni cayunnaro lagajc laani, ni cayujnza bieje. ²¹ Rdxebä andi che jiadhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechljaztu xcuent xtojltu. Yu'tu ni di guibanaya, resnäjtü bejn ni di gac chäältu, yu'za balti dojl rujntu.

13

Lult yälrlujdx xten Pabl

¹ Naj gac choñ huält siädhuiä la'tu. Guira'ti quej nanab cue'creni con xtidx tio'p o choñ bejn ni najnpac xhi dojl bejn tejjani. ² Mase ruti narä ro'c, arnixgaä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla tejtü, ³ sa'csi rlanjtu fiipactu la gulii runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni nen lastootu. ⁴ Guliicani che cuajni lo cruzj, gucni si'c te bejn nani casis, niluxh naj nabajnni sa'csi rapduxhni xcälrnibee Dios. Näjza nuure rsia'cnu si'c te bejn nani casisnäj laani niluxh nabannäjnu laani xcuent xcälrnibee Dios ni baniidxza Dios xcuenttu.

⁵ Colninäj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ¿La ditu gacbee rbäjz Jesucrist nen lastootu, ä? Palga rutini, rusqueetu lastootu, ditu nililajztu xtidx Dios. ⁶ Narä rlazä gacbeetu, dinu nusguee lastoonu, ahuililajzpacnu xtidx Dios. ⁷ Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸ Sa'csi xhetliidi rajcdi riennu te nitloj didxgulii, xcälrnibeenu najc te gusule'nu didxlii. ⁹ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrililajztu lo xtidx Dios. ¹⁰ Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjil tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejtznu, colguibalajz, colhuii guisa' xcälrililajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbecdxi lajz chunäj la'tu. ¹² Colnii: "Xchan" lo resa'tu. ¹³ Guiraa rebejtznu nani ahuililajz ruxhal xtiixtos lojtu.

¹⁴ Yälracnäj xten Dad Jesucrist, näjza yälrinälajz xten Dios, näjza yälracnäj xten Sprit Dxañ chu nen lastootu. Sugacni si'c.

Te Guijtz Lo Reben Gálatas

Pabl rucuaa guijtz loj reben guidoo nez región Galacia

¹ Narä, Pabl, nacä apost xten Jesucrist. Xhet rebejn̄di baxhaļ narä, xhetza bejn̄di gule narä. Lagajc Jesucrist nājza Xtadni Dios ni yu' xhaguibaa, nani guläs Jesucrist loj rebengut, laareni agulereni narä. ² Narä, nājza guiraa resa'nu nani yunāj narä, rucuaanu guijtzre lo reben guidoo ni yu' nez reguedx Galacia. ³ Xca' guejbtu xcälracnāj Dios con xcälrbexilajz xten Dios xtadnu nājza xten Dad Jesucrist. ⁴ Lagajc laani cuājbn̄i gujtni te guslaani nuure lo dojl̄ xten guedxliuj guijdxre, si'cni gunibee Xtadnu, Gueb-Dios. ⁵ Chä'p xpala'n Dios par tejpas. Sugacni si'c.

Xhetdi xhi stee didxcoob ni sajc guslaa nuure

⁶ Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh nāj cagusoobtu ste'ca diidx. ⁷ Xhetdi stee diidx ni sajc guslaa nuure lo dojl̄. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸ Niluxh palga jiääd chu jiädluui lojtu ste'ca diidx ni ruslaa bejn̄ lo dojl̄, niluxh di diidxga gac si'c najc diidx nani abaluiinu lojtu, bejn̄ga agubibdeni, chutis najcnu, mase naräni, mase te xangl Dios ni jiääd xhaguibaali. ⁹ Si'c ni guniä lojtu, si'c rnisacä lojtu nāj: Pal yu' chu jiädluui lojtu ste'ca diidx ni ruslaa bejn̄ lo dojl̄, luxh di diidxga gac si'c najc diidx nani abaluiinu lojtu, bejn̄ga agubibdeni.

¹⁰ ¿Xhi naatu? ¿La rlazä guinisa'c bejn̄ xcuentä o la rlazä guinisa'c Dios xcuentä, ä? ¿La rlazä guspaä lajz bejn̄, ä? Paru rlazä guspaä lajz bejn̄, digacdi gacä xmos Jesucrist.

Xtzun Pabl

¹¹ Colyabee sa'ä, diidx ni ruslaa bejn̄ lo dojl̄ nani abasule'ä lojtu di diidxga gac xhigab bejn̄ guedxliuj. ¹² Xhet lojdi bejn̄ guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴ Loj reni ru-soob xleii toMoisés narä cagusobäru xtiidxni, nanduxhärü loj guiraareni. Loj rebejn̄ nani sadxagä ladxä, maazru sanälazä xcostumbr retoxtadgoldoä. ¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶ Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn̄ lo dojl̄ loj reni di gac xpejn̄

Israel. Che gujc si'c rut lojdi huiye'tzá. ¹⁷ Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸ Che agudejd si'cti choñ ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. ¹⁹ Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä. ²⁰ Rniliä nez lo Dios, dina guiniä didx-xhii, rediidx ni cacuaä najc guliipac.

²¹ Dxejcti hua'a reguejdx xten Siria näjza Cilicia. ²² Resa'nu ni yu' neñ xquidoo Crist guideb nez reguedx Judea, direni gumbee narä. ²³ Riejntis diajgreni: "Bejn nani basacsíduxh nuure agujc xchej, abejnga gaguluiini xcuent lagajc xcälirililajz nani galoo rlajzni nunitlojni." ²⁴ Dxejc rliä'preni xpala'n Dios sa'csi huililazäza xtiidxni.

2

Bidxaag Pabl loj reapost

¹ Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. ² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. ³ Sanää Tito, te beñ griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. ⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdx'e'chreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni. ⁵ Dipacnu nicäjb nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni sajc, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najcdi mase beñsajcreni, sa'csi Dios runtebloj guiraa bejn.) ⁷ Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlrēni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

⁹ Ni'cni Jacob, Pedr, näjza Juan nani najc beñroru neñ guidoo xten Jesucrist, gucbeereni laa Dios ni cayacnäjä narä. Dxejc baniidxreni ñaareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni

chanuureni gusule'reni loj rexpeñ Israel. ¹⁰ Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnäáni, sa'csi abejnni dojl xhet laadi cayujnni. ¹² Galoo gudaunäjni rebenzijt, luxh che bidzujñ gatii xpejn Israel ni baxhal Jacoob, dxejcti gubicajni lo rebenzijt, diruni niaunäjreni sa'csi bidxejñni rexpejn Israel ni ru' bee ni bidzujñ ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: "Palga luj najclu te xpejn Israel, luxh nabajñlu si'c rebenzijt ni digac xpejn Israel, xhet si'c di ni caj loj leii, ¿xhicuent rlanjzlu guinibeelu guibajñ rebenzijt si'c rexpejn Israel nani rusooob xleii toMoisés?"

Nungäjñ chhalilajz rexpejn Israel, sigajc guiraa bejn, te guibicaj xtojñreni

¹⁵ Nuure najcnu rexpejn Israel cheni gojllinu; dinu gac bendojl si'c najc rebenzijt. ¹⁶ Anadonnu rut chu tejt bejn sajç guibicaj xtojñni che gunni si'cni caj lo leii, sa'csi nanab chhalilajznu xtidx Jesucrist. Ni'cni biolilaaznu xtidx Jesucrist te jia xtojñnu sa'csi rililajznu, xhet sa'csi riennu si'cni caj loj leii. Di gacdi jia xtojñ bejn xcuent yälrusooob xleii toMoisés.

¹⁷ Palga lañ ni rlanjznu jia xtojñnu xcuent xcälñrililajz xtidx Jesucrist, ruhuiinu cayenrunu dojl, la sajç guiniinu: Jesucrist rului rienrunu dojl, ¿ä? ¡Xho gacni si'c! ¹⁸ Palga rlazä gunsacä redzuun nani abar'o'nä, lagajc narä rapä dojl nacä beñ dojl. ¹⁹ Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che gucebeä di gacdi gusobä guiraa ni caj lo leiiiga. ²⁰ Najcni si'cni gutnää Crist lo cruuj. Naj xhet narädi ni nabanä, laa Crist ni nabajñ neñ lastoä. Yälñabajñ ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni xtojñ. ²¹ Dina cuälazä xcälñrulasajz Dios. Paru sajç gudzucaj leii xtojñ bejn te gacreni benñaya nez loj Dios, dxejc xlia'si gujt Jesucrist.

3

Yälñrililajz rusia dojl

¹ ¡Chipsa nayäältu beñ Galicia! ¿Chu bascäjyту te di cuadiajtu xtidx Jesucrist? Ni nez lojactu bisule'nu diidx xho cuaj Jesucrist lo cruuj. ² Tejtis diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la

sa'csi huililajztu diidx ni biejn diajgtu? ³ Chipsa nayäältu. Acua'tu Sprit Dxián xten Dios dxejcti ñaj rlaiztu guntu ni riajbctis yejctu guntu. ⁴ ¿La xlia'si gudejdtu trabajw? Chugan la guli xlia'sini. ⁵ Che runiidx Dios Sprit Dxián xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

⁶ Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. ⁷ Ni'cni colyacbee dee: renani rililajz xtiidx Dios najc xi'n toAbram. ⁸ Galooli najn Dios xcuent yälrlilajz susia Dios lastoo rebenzijt, ni'c räjpni lo Abram: “Guirali reben guedxliuj sacle' xcuentlu.” Diidxre cuaj lo guijtz ni gujc galooli, cadro caj xtidx Dios. ⁹ Ni'cni reni rililajz ñaj agucnäj Diosreni sigajc gucnäjni toAbram nani huililajz.

¹⁰ Guiraa reni rlaiz guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” ¹¹ Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabanäjni Dios xcuent xcälrlilajzni. ¹² Leii dini naa chalilajz bejn te xca'ni yälñabajñ. Scree caj lo leii: “Nani gunpac si'cni caj loj reguijtz xten leii, ni'c nanab guibajñ lojpac leiiga.”

¹³ Jesucrist badzucaj nuure loj yälrbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.” ¹⁴ Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzijt; näjza te guiraanu ni chalilajznu xtidx Jesucrist xca'nu Sprit Dxián xten Dios.

Leii näj diidx ni bia'n Dios loj toAbram

¹⁵ Betzá, ñaj gusä'tä te diidx xcuent beñ guedxliuj. Cheni rujn bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni. ¹⁶ Luxh anajnnu badeed Dios xtiidxni loj toAbram näjza loj xagdooni. Dini ninii “rexagdooni” si'c loj xhidajñreni, guniini lo tejtis xagdooni, luxh laani najc Jesucrist. ¹⁷ Diidx ni rlažä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lałtis sajcdi. ¹⁸ Paru naquiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

19 ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlneni, laḷ ni jiäd nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjl diidx. 20 Te ni rusiäjl diidx xhet par tejtis bejn di najcni, niluxh Dios tejtis najc.

Xcuent leii

21 ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yäl'nabajn, dxejc sii xcuent leiiga nica' bejn yäl'nabannaya. 22 Niluxh loj reguijtz xten Dios caj diidx ni rni: Guiraa bejn niäuu neḅ dojl, te reni chalilajz xtidx Dios si'c huililajz toAbram, reni'c xca' xcäl'rililajz diidx xcuent Jesucrist si'cni bia'n Dios diidx loj toAbram.

23 Che gajd xcäl'rililajz xcuent Jesucrist jiäd, dxejc basäuu leii nuure neḅ dojl, cabäjtisnu guiricaj xcäl'rililajz xcuent xtidx Dios. 24 Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yäl'rililajz xtiidxni. 25 Niluxh naj sa'csi arajpnu yäl'rililajz xcuent xtiidxni, dirunu guiquin te mastr, nalajznu leii.

26 Guiraatu najctu xi'n Dios xcuent yäl'rililajz xtidx Jesucrist, 27 sa'csi guiraatu ni gurobnistu loj xtidx Jesucrist, najctu rexpejn Jesucrist. 28 Naj rutiru rexpeḅ Israel niclaza rebeñzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. 29 Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl'nasa'c ni abia'n diidx gudeed Dios loj Abram.

4

1 Mbaj naj. Nani xca' yäl'nasa'c, che najcni biuux, najcni sigajc te mos, mase xtenni gac guiraa xhixten xtadni. 2 Yu' chu te bejn ruhuiini, yu'za chu rnibee xhixtenni cheni agurooblini, cheni guidzujḅ dxej xca'ni ni gudeed xtadni. 3 Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jieḅnu lo guedxliuj. 4 Niluxh che bisa' dxej ni basoob Dios, baxhaḷ Dios Xi'npacni. Xi'n te gunaa gojlni, loj rexpejn Israelza biädjiäjlni, basoobni leii xten toMoisés. 5 Si'c gujc te xcasacni reni rusoobpac leii, te xca'ni nuure gacnu si'c te xpisiäjbni.

6 Luxh sa'csi anajctu xi'nni, ni'c baxhaḷ Dios Sprit xten Xi'nni te cuääzni neḅ lastoonu. Laani rniini lo Dios xcuentnu: "Guejblu, Xtadnu." 7 Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl'nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. ¹⁰ Cayutistu redxej, rebäii, retieemp, reijz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuzé' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶ Naj ¿la rdxe'chtu loä sa'csi caniä didxlii lojtu, ä?

¹⁷ Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rrajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. ¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjpacli Jesucrist neñ lastootu. ²⁰ Maläii gac jialä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rrajz gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä? ²² ¡Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. ²³ Niluxh xi'n xmosni gojl sa'csi lagajc laani bejn ni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴ Diidx xcuent regunaare najc si'c diidx ni ruluui. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpen Israel con rexi'nreni, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷ Scree caj loj xtidx Dios: Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejd gunaa che rajl xi'nni.

Sa'csi su'ru xi'n gunaa nani gulälajz cháälni quela xi'n gunaa ni gudiesnä j cháäl stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n cháälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ ¿Xhi caj lo reguijtz? “Barilaagw gunamos nä j xi'nni, te di xca' xi'n gunamos yäl_hnasa'c xtenlu si'c ni xca' xi'n gunaa nani najc cháälpacu.” ³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

5

Colguzutijp lajztu lo yäl_hrililajz xtidx Dios

¹ Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladz_hnaa leii, badzucajni xtoj_hnu che huililajznu xtiidxni, ni'cni na'cru gusiejch lajztu te gacsactu mos ladz_hnaa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlanjpac chu bee, nanab gunni si'cpac ni caj lo leii. ⁴ Palga rlanjztu guntu redzuun ni caj lo leii te guibicaj xtoj_htu, dxejc agubicajtu lo Jesucrist, agubicajzatu lo xcäl_hracnä j Dios. ⁵ Niluxh nuure xcuentpac Sprit Dxan xten Dios rililajznu gudijx Jesucrist xtoj_hnu lo cru jz, cayenloonu jiädsacni te guniidxni yäl_hba_hsa'c par te jpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx Dios. Yäl_hrililajzga rujn guiba_hsa'cnu te chonälajznu resa'nu.

⁷ La'tu laaca sasajtu. ¿Chu badxojn gusoobtu xtidxlii Dios? ⁸ Xhet Diosdi ni guletu badxojnditu. ⁹ Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii. ¹⁰ Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtoj_hnu lo cru jz. Luxh si'cpacza rlanjzreni. ¹² Rebejn nani cagusgueetu canireni chutu bee, jmalaiiza gutiuugreni te jpas lagajc tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni rus_haa bejn lo dojl. Col_hhuixgaa na'c xca'tistu rediidxga dxejcti guntu si'ctis ni rlanjz tiejxhtu, si'ctis ni riajbza yejctu. Colgacnä j sa'tu con yäl_hrinälajz, tejni sigajc steeni.

¹⁴ Sa'csi guiraa diidx ni caj lo leii con tejtis diidxre rsiojbni: “Chanälajztu sa'tu sigajc rinälajztu lagajc la'tu.” ¹⁵ Palga rdijltu, rauya'tu sa'tu, rajwtu sa'tu, jcolnatiro! Andi lagajc la'tu gunittu sa'tu.

Nani rchagljaz rebejn näj yäl'nabajn ni rudeed xtidx Dios

¹⁶ Rniä lojtu, colguibajn si'c ruluui xtidx Dios näjza Sprit Dxa xteni, te si'c na'c guibajntu si'ctis ni rlanj tiejxhtu, si'c ni najctis xhigabtu. ¹⁷ Sa'csi ni najc xhigab xten bejn rdxe'ch loj xhigab Sprit Dxa xten Dios. Sigajcza xhigab xten Dios dini gac tebloj con xhigab xte bejn. Rudxojnntu loj sa'tu, ni'cni digacdi guntu dzuun ni rlanjztu guntu. ¹⁸ Luxh palga cagulijdx Sprit Dxa la'tu, dxejc dirutu quiquiin guntu si'c ni caj lo leii.

¹⁹ Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruhaag sa' te dxa'p con te bi'n loj redolguijdx, guiraa redolguijdx ni rujn nigui con gunaa, ²⁰ yälrajn rebanäjb, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yäl'nayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzun-guijdxre rujnreni: ²¹ yälrdxe'ch lajz, yälrgu't sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

²² Niluxh xtzuuun Sprit Dxa xten Dios najc yälrinälajz sa'ni, yälrbalajz lastooni, yälrbedxi lajzni, yälrbecdxi lajz sa'ni, yäl'najc be'nsa'c lo chutis bejn, yäl'nagodzljajz, yälrlilajz, ²³ yäl'nadolajz, yälrnibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre. ²⁴ Niluxh renani ahuililajz xtidx Jesucrist, abatio'nreni guiraa redolguijdx ni rlanj gun tiejxhneni. ²⁵ Palga rbäjz Sprit Dxa nen lastoonu, do'o guibajn si'c rnibee Sprit Dxa guibajn nu.

²⁶ Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

6

Colgacnäj sa'tu

¹ Sa'ä, palga chu tejtu ni abiajb nen dojl, lagajc la'tu nani aracheetu xtidx Dios colgulijdx bejnga, colgacnäjni te guiriini nen dojl. Colnii lojni nadolajz, nasinälajztu lagajc la'tu didi che guidon nägajcza la'tu jiajbtu nen dojl. ² Colhuui xhi rquuin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴ Tejgatu colcubee xho najc xtzuumtu te fiitu la laaca najcni, dxejcti sajc guiliä'ptu lagajc xpala'ntu. Dxejc ditu guiquin chu stee bejn guiliä'p xpala'ntu. ⁵ Sa'csi tejsa bejn susule'ni diidx lo Dios xhini'c bejni.

⁶ Nani casieed xtidx Dios nanab gacnäj bejn nani ruluiini, gudeedni tudxe'n xhixteni loj nani ruluiini.

⁷ Na'c gusgueelu lagajc luj. Dios digacdi guigeeeni, ni'c guira'ti dzuun ni rujn bejn lagajcza ni'c xca' bejn. ⁸ Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinitloj tiejxhni, dizani jiu' loj xcälrnabee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejsas. ⁹ Ni'cni na'c guidxajgnu jienu dzunsa'c te che guidzujn dxej ni xca'ni yálnasa'c, xca'zanu te yálnasa'cro. ¹⁰ Ni'cni nanab laj ni sajcni, gacnäjnu chutis bejn, ganiddoo resa'nu ni ahuililajz.

Yärlulijdx näjza xtixtios

¹¹ Colhuilaa lacti reletrduxh cacuaä lojtu con naäpac. ¹² Guiraa reni rdxaglazj gun ni rlanjz tis tiejxhni, laa reni'c ni rlanjz chutu bee, tedi tedreni trabajw xcuent ni cuaj Jesucrist lo cruzj. ¹³ Lagajc reni ru' bee direni gun si'cni caj lo lei, niluxh rlanjzreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextoljnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵ Che ahuililajz te bejn xtidx Jesucrist, xhetru sajcni chu bejn bee, xhetza sajcni na'c chu bejn bee. Nani sajtis najc gacni si'c te beccoob lo xtidx Jesucrist. ¹⁶ Guiraa renani nabajn si'cni ruluii xtidx Jesucrist sibeexi lajzreni xcuent xcälrulaslazj Dios. Näjza rexpen Israel nani ahuililajz xtidx Jesucrist sibeexi lajzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacnäj Dad Jesucrist guiragajctu con Sprit Dxan xteni. Sugacni si'c.

Te Guijtz Lo Rebeņ Efesios

Bacuaa Pabl lo rebeņ guidoo nen guedx Ēfeso

¹ Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebeņ nani huililajz xtiidxni, loj reni rujn si'cpac rniini nen guedx Ēfeso. ² Xca'tu yälracnäjä, yälrbedxi lajz xten Xtdadnu Dios, näjza xten Dad Jesucrist.

Rusule' Pabl xtidx Jesucrist

³ Rliä'pnu xpala'n Dios, Dad näj Xtdad Jesucrist. Dios racnäjä nuure, xcuent Crist runiidxni guiraa reyälracnäjä xca' lastoonu, astoo yu'lanu xhaguibaa. ⁴ Laani gule nuure, che gajdli guirixtiej guedxliujre, te gacnu xpejñni, te guibaņnayanu nez lojni con yälrinälajz. ⁵ Sigajcza anungäjl xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure. ⁶ Gucnäjä Dios nuure te guiliä'pnu xpala'n Dios, sa'csi lagajc laani acua'ni nuure, abejñni nuure tejsi con xi'nni ni sanälajzni. ⁷ Laani baslaani nuure nen dojl xcuent xtiejñni, laani badzucajni xtojñnu xcuent xcälruslaslajzni ⁸ nani banidxduxhni loonu. Guideb yälñajñ, guideb xcäriejñ ⁹ basule'ni loonu xhigab xhiga'tzni xcuent redzuun ni rlajzni gunni, xhigabza ni bejñni galooli. ¹⁰ Luxh sidzujñ dxej sisiojbpac xhigab ni bejñ Dios. Che guidzujñ dxejga sutojñ Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcälñasa'c Jesucrist, sa'csi galooli bejñ Dios xhigab guniidxni yälñasa'cga. Lagajc Dios benchee guira'ti ni yu', luxh rujñpacni nani abejñni xhigab najc laaca gunni ¹² te guiliä'p bejñ xpala'n xcälñibeeni xcuentnu, nani ganiddoo biolilaaznu xtidx Jesucrist. ¹³ Näjza la'tu, che biejñ diajgtu redidx gulii, rediidx ni ruslaa bejñ lo dojl, dxejç huililajztu xtidx Jesucrist, dxejç gujczatu tejsi con laani. Dxejç cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dxan xtenni te cuääzni nen lastoonu, te ni'c najc seen xca'nu yälñasa'c nani guniidx Dios che abaluuxni xtzuunni, nalajznu guslaani guiraa rexpejñni te guiliä'preni xpala'nni lo xcälñibeeni.

Rniab Pabl gudeed Dios yälñajñ loj renani ahuililajz

¹⁵ Ni'cni näjza narä, sa'csi abiejñ diagä xho rililajztu xtidx Dad Jesucrist näjza xho sanälajztu guiraa rexpejñ Jesucrist, ¹⁶ dina gusañä gudedä xquixtios lo Dios xcuent la'tu. Rnaduxh lazä la'tu che rniabä lo Dios. ¹⁷ Rniabä lo Xtios

Dad Jesucrist, xtadni ni rnibee xhaguibaa, guniidxni lojtu te yälñanduxh, te yälñuluiloj recos xhiga'tz te gacbeduxhrutu xcuent Gueb Dios. ¹⁸ Rniabäza lo Dios jianij xcäriejntu te gacbeetu xhini'c najc speranz xten yälñacrejdxtu lo xtiidxni, te gacbeetu lacti saru, lacti sajc yälñasa'c ni gudeed Dios lo Jesucrist näjza loj rexpejnñi, ¹⁹ te gacbeezatu lacti gurobduxh najc yälñnibee nani rajpni nez loonu nani ahuililajz xtiidxni. Guiraa redee rului lacti nadip najc yälñnibee xten Dios. ²⁰ Lagajc yälñnibeere bejn dzuun par Jesucrist. Con yälñnibeere baspajn Dios Jesucrist lo rebengut, te gurejni xladbee Dios cadre rnibeeni xhaguibaa. ²¹ Maazru sajcnì lo chutis gubier, lo chutis yälñnibee, lo xhitis yälñnadip, lo chutis ni rnibee; maazru sajcnì lo chutis nani abibee te guinibee, sigajc ñaj, sigajc neñ redxej ni churu jiääd. ²² Niluxh badeed Dios guira'tini ladzña Jesucrist, laazani bejn bibee Jesucrist gunibeeni lo guiraa xhixten xquidooni. ²³ Rebeñ guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebeñ ni najc xquidooni.

2

Ruslaa Dios nurnu sa'csi rinälajzni nurnu

¹ Laani baniidxni yälñabajn lojtu che najctu si'c bengut nez loj Dios sa'csi rujntu dojl. ² Galoo gubajntu lo dojl, entis lo xnez guedxliujre guzajtu, biutu xtidx beñdxab nani rnibee guedxliujre. Sprit xtenni rujn dzuun neñ lastoo rexi'nni nani di gucua diajg xtidx Dios. ³ Luxh galoo, näj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjñ guidxe'ch Dios loonu, sigajc bidxe'chni loj guiraa rebeñ guedxliuj. ⁴ Niluxh balaslajz Dios nuure. Con xcälñsanälazduxhni huinälajzni nuure. ⁵ Mase anajcnu beñgut lo dojl, laani baniidxni yälñabajn loonu. Rajpnu yälñabajnre con Jesucrist. Sa'csi balaslajzni nuure baslaani nuure neñ dojl. ⁶ Baspañsacni nuure con Jesucrist; sigajcza bejnñi cuenäjnu Jesucrist xhaguibaa, ⁷ te neñ redxej ni churu jiääd, guluilojñi lacti sajc xcälñasa'c xten yälñrulasajzni, ni'c sanälajzni nuure, najcni huenduxh loonu por Jesucrist. ⁸ Sa'csi rulasajz Dios nuure, ni'c baslaani nuure neñ dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹ Xhet xcuent xhi dzunsa'cdi ni biennu, te di chu tejtu gac nayedxlajzdi. ¹⁰ Dios najc ni benchee nuure. Sigajcza con Jesucrist bejnñi gacnu bejn ni rujn dzunsa'c nani galooli agunibee Dios jienpacnu.

Yälñbedxilajz ni rajpnu por Jesucrist

¹¹ Ni'c colsnaj lajztu xho gujctu galoo. Ditu niajc rexpejn Israel. Rniireni la'tu 'benzijt' sa'csi ditu chu bee si'c ru' rexpejn Israel. Sa'csi lagajc con naareni rusälreni bee. ¹² Dxejc suga'tu ditu gumbee Jesucrist. Zijt yu'tu loj rexpejn Israel, najctu benzijt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³ Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. ¹⁴ Jesucrist najc ni rbedcx lajznu. Laani bejn gujc rexpejn Israel tejsi con rebenzijt. Laani badzucajni redzuun xten leii te gujc rexpejn Israel tejsi con rebenzijt. ¹⁵ Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzijt. Lagajc laani bejni bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc gulecdxini lajznireni. ¹⁶ Con yälgujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

¹⁷ Cajza lo guijtz rediidxre:

Biädni te basule'ni xho ga'p rebejn yälrbexi lajz rebejn ni suga' zijt lo Dios näjza reni suga' gajxh lo Dios.

¹⁸ Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit. ¹⁹ Ni'cni dirutu gac benzijt, bejn ni rut numbeedi. Anajctu tejsi con rexpejn, najczatu sa' rexpejn Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost näjza reprobe't najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcru, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²² Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te neñni cuääz Sprit Dxaan xten Dios.

3

Pabl nungäj l chanä xtiidx Dios lo rebenzijt

¹ Ni'cni yu'ä neñ latzguiib, narä, Pabl sa'csi cagusule'ä Jesucrist, te jiädnää xtiidxni lojtu, najctu benzijt. ² Pet abiejn diajgtu lacti hueen najc Dios baniidxni dzuunre loä, jiädnää xtiidxni lojtu. ³ Dios baluiini xhigab-xhiga'tzni loä (si'cni bacuaä lojtu galoo). ⁴ Che gojtu guijtzga, sacheetu cati ananä rexhigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh naj Sprit Dxaan xten Dios abaluiinini loj reapost näjza loj reprobe't. ⁶ Dee najc xhigab-xhiga'tzga: por rediidx xcuent Jesucrist ni ruslaa bejn neñ dojl rujn Dios gac reni najc benzijt tejsi con reni najc xpen Israel, guidxaag

sa'reni, gacreni tejsi bejn. Guiro'preni xca' yálnasa'c si'c bia'n Dios diidx.

⁷ Narä nacä te apost xten dzuun ni baniidxni, por xcäl'rulaslajz Dios ni cuaxlia'ä. Dios baniidx dzuunre loä con xcäl'rribeduxhni. ⁸ Luxh masä guxiiru sacä lo guiraa rexpejni, loä baniidxni xcäl'racnäjni te lo rebenzijt gusule'ä xtiidxni, nalajznu redidxcoob xcuent xcäl'nasa'c Jesucrist, ⁹ te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te naj jien guiralii yäl'nanduxh xten Dios. Reni najc xpejnpacni nen xquidooni guluii yäl'najnre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

Xcäl'sanälajz Jesucrist

¹⁴ Ni'cni ruzuxhibä nez loj Xtad Dad Jesucrist ¹⁵ nani badeed lajni lo guiraa reni yu' xhaguibaa näjza reni yu' lo guedxliuj, ¹⁶ rniabä loj Dad xhaguibaa gutijpni lastootu con yäl'rnibee xcuent Sprit Dxan xteni, sa'csi yuduxh xcäl'nasa'cni lo xcäl'rdimbicha'ni xhaguibaa. ¹⁷ Rniabäza lo Dios te jädläjz Jesucrist nen lastootu sa'csi ahuililajztu. Te che agusudzu'tztu, agusutijptu lo yäl'rinälajz ¹⁸ dxejc sajc gacbeetu sigajc guiraa rexpejnpacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist. ¹⁹ Te gumbeezatu xcäl'sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexäl'nasa'c Dios.

²⁰ Dios rnibeduxh. Sajc gunidxduxhruni loj xhitis ni rni-abnu lojni, loj recos ni riennu xhigab. Con Sprit Dxan ni rujn dzuun nen lastoonu suniidxni reyäl'nasa'c. ²¹ Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

4

Por Sprit Dxan nadxaag sa'nu

¹ Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj], si'cni bejnzatu xhigab cheni gurejdxni la'tu. ² Colguibajn con yäl'nalaslajz, näjza yäl'nadolajz, colcuedcxilajz. Colyujn huant resa'tu con yäl'rinälajz sa'ni. ³ Colhuii te guidxaag sa'tu gactu tejsi con Sprit Dxan ni ruscuedcxilajz. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl'runloj ni rajptu xcuent diidx nani gurejdxtu. ⁵ Rajptu tejsi Dad, tejsi

yäl_rililajz, tejsi yäl_robniš, ⁶ tejsi Dios, tejsi Xtad guiraanu nani rnibee guira'ti lo guiraanu.

⁷ Lo tejganu abaniidxni dzuun si'ctis bejn Jesucrist xhigab guniidxni lo tejganu. ⁸ Ni'cni caj lo reguijtz:

Che huä'pni xhaguibaa, cadro rnibeeni, abejnni gaan loj guiraa yäl_rnibee,

dxejcti badeedni dzuun lo rexpejnni lo guedxliuj.

⁹ ¿Xhi säloj cadro caj, "huä'pni"? Dee säloj ganid biäjtni maazru jät lo guedxliuj. ¹⁰ Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj. ¹¹ Lagajc laani badeedni xtzuum tejgareni. Yu'reni badeedni gac apost, yu'reni badeedni gac profet, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejnni. ¹² Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. ¹³ Nungäj_l gac dzuunre che guidzujnli dxej ni nadxaag-sa'nu guiraanu loj yäl_rililajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcäl_rnibee Jesucrist. ¹⁴ Dirunu gac si'c rebiuux ni tera'tsi rusiejch lajzni, rucuaadjgreni xtidx chutis bejn, mase xhitis diidx ruluuini. Dxej riajbreni lo redidx-xhii xten bejn nani rusguee, nani cabäjztis gusguee bejn. ¹⁵ Maazru hueen chonuunu loj redidxlii xten Jesucrist con yäl_rinälajz te tioobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdu'tz guiraa rexpejnni, te si'cni nazdu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedruren te cayajc xhidajlrü rebejnga con yäl_sanälajz.

Te yäl_nabañcoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riajb yejcreni. ¹⁸ Nayääl xcäriejnreni, direni ga'p xcäl_nabajn Dios sa'csi nadduxh lastooreni. ¹⁹ Redee che guncnajd xcäriejnreni gusloj bejnreni guiraløj yäl_rtuuj, guiraa redojl ni di nungäj_l gunreni. ²⁰ Niluxh la'tu xhet si'c di bisieedtu loj Jesucrist. ²¹ Palga abiejn diajgtu xtiidxni, niluxh abaluuini lojtu didxlii ni siädnä Jesucrist, ²² colgusaan yäl_nabañyujxh ni gojptu: Lo yäl_nabañyujxhga rujn bejn si'ctis ni rlajzni. Dxejcti si'c runijtni la'tu lo Dios. ²³ Colgusiejch lajztu, colgusia xcäriejntu, ²⁴ te gactu beñcoob nani bejn Dios, colchanuu te yäl_nabañsa'c, te yäl_nabañya xten xtidxliini.

²⁵ Colguo'n diidx-xhii, colnii didxlii lo resa'tu sa'csi tejsi najcnu guiraanu.

²⁶ Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷ Na'c gusaantu jiu' bendxab nen lastootu.

²⁸ Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

²⁹ Na'c gusaantu guirii nicla tej didxguijdx ro'tu. Colnii ganax didxa'c te gacnäjni guisieed reni rucudiajg xtiidxtu.

³⁰ Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzni nen lastootu che guidzujnli dxej ni chäätu lo Dios.

³¹ Colguro'n yäl'nabandxuudx xtentu, näj yälrdxe'ch, näj yälrdxagdijl sa'ni, näj yälrbedxa', näj yälrgue. Colguibicaj lo guiraa redojlga, na'c gactu benguijdx. ³² Nungäjil gactu huen loj resa'tu, colgulaslajz resa'tu, colsiäjil lajztu con resa'tu ni rujn dojl lojtu si'c rsiäjil Dios lajzni rextojltu xcuent Dad Jesucrist.

5

Xho nanab guibajñ rexi'n Dios

¹ Colguibajñ si'c nabajñ Dios, sa'csi najctu xi'nni nani sanälajzni. ² Colchasanäj yäl'sanälajz sigajcni huinälajz Jesucrist nuure cheni badeedni lagajc laani lo Dios, cuajni lo cruzj, gujtni. Laani gujcni si'c gojn, gujczani yälrbibyaal ni bidxaglajz Dios.

³ Nicla gusä'ttu yäl'rusguee chääal bejn, nicla redoļ dxuudx, niclaza yäl'sanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjil gun bejn ni naban-naya. ⁴ Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios. ⁵ La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajñ rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcäl'rnibee Jesucrist, xcäl'rnibee Dios. ⁶ Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcälrdxe'ch Dios loj rebejn ni di gusoob xtiidxni. ⁷ Na'c guntu sigajc rujnreni.

⁸ Galoo nacäyjtis xcäriejntu gubajntu, luxh naj abasanij Jesucrist xcäriejntu. Colguibajñ si'c nungäjil guibajñ nani abianij xcäriejnni. ⁹ Sa'csi nani abianij xcäriejnni rujn dzunsa'c, rniini didxgulii. ¹⁰ Colguisieed xhini'c rchaglajz Dios. ¹¹ Na'c guntu redzundxuudx nani rujn reni nacäy xcäriejnreni, coltilnäj reni rujn sa' dzunguijdxga. ¹² Sa'csi te xtujyli najc jieinu diidx xcuent xtzunreni ni runxhiga'tzreni. ¹³ Niluxh guiraa sa' redzunre ni rdilnäjnu, huenliisi sien xhi najcreni, suzenni lo

xpianij Jesucrist. Sa'csi guira'ti ni ruzeṅ najc nianij. ¹⁴ Ni'cni caj loj reguijtz, räjp Dios:

Gubajṅ, huistie luj ni rejslu.

¡Huistie lo dojl, luj ni naga'lu lo dojl si'c beṅgut,

te gusanij Jesucrist xcäriejnlu!

¹⁵ Colḥuui, colṣin, na'c guibajṅtu si'c te bejṅ nani di gacbee, colguibajṅ si'c bejṅ nani yu' xcäriejnni. ¹⁶ Colṭedsa'c redxej sa'csi neṅ redxejre ganax cosguijdx rujn bejṅ. ¹⁷ Ni'cni na'c guibajṅtu si'c rebejṅ nani di gacbee, colyacnasin, te gacbeetu xhini'c najc ni rlanj Dad xhaguibaa guntu. ¹⁸ Lacuaa yätu nejp nani runij bejṅ, colgapchee Sprit Dxaṅ xten Dios neṅ lastootu. ¹⁹ Colṅii loj resa'tu rediidx nani gunii rebejṅ tiemp gulä'preni xpala'n Dios, colyelza redij xten Dios, con reyälriē colguiliä'p xpala'n Dios neṅ lastootu. ²⁰ Di jläj lajztu gudeedtu xquixtios lo Dios xtadnu con laj Dad Jesucrist.

Xho guibaṅṅäj sa' rexpejṅ Jesucrist

²¹ Sa'csi rajṅtu Jesucrist, colgusoob xtidx sa'tu.

²² Lojtu, regunaa ni abachṅaa, rniä scree: Colgusoob xtidx chäälto si'c rusoobzatu xtidx Dad Jesucrist. ²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejṅ guidooni lo redojl, najcreni si'c tiejxhni. ²⁴ Ni'cni, sigajc rusoob rebeṅ guidooga nani rnibee Jesucrist gunreni, sigajcza nungäjṅ gusoob regunaa ni abachṅaa nani guinibeetis chäälreni gunreni.

²⁵ Lojtu, reniguii ni abachṅaa rniä scree: Colchanälajz chäälto sigajc ni huinälajz Jesucrist rexpeṅ guidooni, badeedni lagajc tiejxhni loj Dios cheni cuajni lo crujz por laareni ²⁶ te basiani xtojṅ rexpejṅ guidooni, te gujcreni te beṅcoob, abidiib lastooreni con xtiidxni si'c rdiib te cos con nis ²⁷ te che xca'ni rexpeṅ guidooni, najcreni te guidoo ni sajcro, te guidoo nani xheti xtojṅni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtojṅdini. ²⁸ Sigajcza, te niguii nani abachṅaa nungäjṅ chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejṅ ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpeṅ guidooni. ³⁰ Najczanu tejsi loj tiejxh Jesucrist, loj xpäälni, loj rextzujtni. ³¹ “Ni'cni che guchṅaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejṅ.” ³² Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpeṅguidooni. ³³ Niluxh nanabpac chanälajz tejgatu chäälto sigajc sanälajztu tiejxhtu. Dxejcti gunaa ga'pzani xpala'n chäälni.

6

¹ Lojtu biuux, rniä scree: Colgucuadaiajg xtidx Jesucrist, colgusoob xtidx xtadtu sa'csi ni'c sajc nez loj Dios. ² Colga'p xpala'n xtadtu, xnantu, sa'csi ni'c najc didx galoo xten leiï nani runiidx xhi xca'tu palga gusoobtu diidxga; ³ "Te saruduxh guibajntu xchero lo guedxliujre."

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yäl'naj, colgulijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadaiajg xtiidxni, xhet xhi steedi xhigabdi guntu nen lastootu. Colyejn xtzuumni si'cni najc xtzuum Jesucrist. ⁶ Colyejn xtzuumni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuumnactu; si'cni rlanj Dios. ⁷ Colyujn xtzuumni guideb lastootu si'c xmos Jesucrist, et si'cni xmos ben guedxliuj. ⁸ Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yäl'rusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejn Jesucrist lo guerr

¹⁰ Didx lult ni rniä, sa'ä, najc scree: Colsutijp lo xcäl'racnäj Jesucrist, colsudzu'tz lo xcäl'nadip xcäl'rnibeeni. ¹¹ Colgajcw xhabguiib xten Dios te gac sudzu'tztu lo reyäl'rusguee xten bendxab. ¹² Sa'csi xhet ben guedxliujtis cadil'näjnu. Cadil'näjzanu reguxhtis xte yäl'cäy, näjza reyäl'rnibee, rebejn nani rnibee loj reyäl'cäy're, näjza rexangl bendxab nani rnibee bej xten guedxliujre. ¹³ Ni'cni colca' guideb ladguiib xten Dios nani runiidxni loonu te gac sudzu'tznu nen dxej ni guideednu trabajwduxh, te che agudejdni, laltis sisiudzu'tznu. ¹⁴ Colsudzu'tz pues. Xque'tu colguliib sindoorguiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. ¹⁵ Colcuaa gurach-guiib ni'tu (ni'c najc xtidx Jesucrist ni ruscuecdxi lajztu). ¹⁶ Colca' escud-guiib ni najc yäl'rilitajz te con yäl'rilitajz xtidx Dios di bendxab gun gaan gusguee la'tu con rextidx-xhiini. ¹⁷ Colca' yäl'rusläa xten Dios lo dojl si'c te xhumbrel-guiib chu yejctu; colca'za lans xten Sprit Dxi xten Dios ni najc xtidx Dios. ¹⁸ Colnab lo Dios guiraa dxej; colnab lojni con Sprit Dxi xteni; colsusintis; na'c jieedtu guiniabtu lo Dios xcuent guiraa xpejni. ¹⁹ Colnabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yäl'rusläa bejn lo dojl. ²⁰ Xcuent rediidxga

ni yu'ä nen latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäjl guiniäni.

Lult xtixtios

²¹ Niluxh te gacheetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx. ²² Laapacni ruxhalä lojtu, te gacheetu xho yu'nu, te si'c guscuedxini lajztu.

²³ Rniabä yälrbexilajz par resa'nu, näjza yälrlilajz con yälšanälajz xten Dios Xtadnu näjza xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Reben Filipos

Latzguiib yu' Pabl bacuaani loj rebenquidoo xten guedx Filipos

¹ Pabl näjza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbäjz guedx Filipos, loj rebejn nani ruluii xtidx Dios nejn reguidoo näjza loj rediaconos. ² Gacnäj Dios la'tu con yälrbedxi-lajz xten Xtradnu näjza xten Dad Jesucrist.

Rniab Pabl lo Dios xcuent rebejn nani rililajz

³ Che rnaj lazä la'tu, rudedä xquixtios lo Dios. ⁴ Che rniabä lo Dios, rbaa lazä rniabä lo Dios xcuent la'tu, ⁵ sa'csi abidxaag sa'nu lo xtidx Jesucrist che guslojli huililajzta hasta najli. ⁶ Anancheä Dios nani gusloj cayunsa'c dzuun nejn lastootu, lagajc laani suluxsa'c dzuunga dxejli ni jääd Jesucrist. ⁷ ¿Xhiru xhigab nungäjil gunä? Ni rapä la'tu nejn lastoä sa'csi cayacnäjtu narä nejn latzguiib luxh rsiudzu'tzta riye'tzta lo bejn, guliü najc rediidx nani rusule'ä xcuent Jesucrist näjza la'tu rusule'tu rediidxga. ⁸ Dios nanchee xho rbannäätu, xho sanälazä guiraatu lo xcäl'sanälajz Jesucrist. ⁹ Rniabä lo Dios te tioobru xcäl'rinälajzta näj xcäl'najntu nägajc churu xcäriejn guiraatu, ¹⁰ te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jääd Jesucrist. ¹¹ Te guidxa lastootu yälhasa'c xten te yäl'nabansa'c ni runiidx Jesucrist, te guspaa lajzta Dios, guliü'ptu xpala'nni.

Jesucrist najc xcäl'nabañä

¹² Rlazä gacheetu betzä: guiraa nani gusacä ni'c cayacnäj guire'chru xtidx Jesucrist. ¹³ Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist. ¹⁴ Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzareneni loä. Yu'za reni rusule' xtidx Jesucrist sa'csi laaca najc xhigabreni. ¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä nejn latzguiib. ¹⁷ Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. ¹⁸ Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru

lazä. ¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcälracnäj Sprit xten Jesucrist ²⁰ rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. ²¹ Sa'csi palga guibanä, su'ä lo Jesucrist; luxh palga guetä sunäru gaan. ²² Palga guibanäru lo guedxliujre, sajcru gunä xtzuun Dad Jesucrist, ni'cni dina gacbeä xhnic cueä xca'ä. ²³ Nagajn najcni par narä cueä lo guiro'preni. Te lajt runä xhigab: malaii guetä te cha'a cadre yu' Jesucrist sa'csi ni'c najc hueenru par narä. ²⁴ Niluxh stee lajt nancheä nungäjl guibanäru lo guedxliujre xcuent la'tu. ²⁵ Niluxh narä racbeäpac siannääru la'tu, su'äru lojtu te chanuurutu lo xtidx Jesucrist, te guibalajztu lo yälirililajz, ²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colhuiitis guibajntu si'cpac ni rnii xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yälirililajz xten xtidx Jesucrist. ²⁸ Na'c guidxejbditu renani rdxe'ch lojtu. Laareni huenliisi ruseñ agunijtreni ni'c rdxe'chreni, ni'cni la'tu huenliisi ruseñ agulaatu neñ dojl si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani. ³⁰ Cadejdtu lagajc trabajw ni cahuiitu gudedä luxh najc riejn diajgtu cadedsicä trabajwga.

2

Xcälñalaslajz näjza xcälguobduxh Jesucrist

¹ ¿La ruspaä Jesucrist lajztu? ¿La racnäj xcälñinälajztu la'tu? ¿La yu' Sprit Dxan xtenni con la'tu? ¿La yu' xcälñanälajzni näj xcälñulaslajzni lastootu? ² Palga yu'ni, colguspaa lazä, colyejn tejsi xhigab con narä, colga'p lagajc yälñanälajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuntu con yälñalaslajz, colhuii loj sa'tu si'c beñroru lojtu. ⁴ Na'c jiu chu tejtü lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist ⁶ nani mase najcni sigajc Dios, dini niniazdzu'tz xcälñnibee Dios, ⁷ alga basa'nni te laad yälñnibee nani rajpni con Xtadni Dios te gujcn mos cheni gojlni lo guedxliujre. Gujcn si'ctis te bejn. ⁸ Che gujcn si'ctis beñ guedxliuj, gujcn beñ nadolajz, beñ nasobdiidx. Basoobni xtidx Dios, gujtni lo crujz, luxh yälñrejt lo crujz najc te yälñtuiduxh. ⁹ Ni'cni baspañsac Diosni, gule'cni Crist te lajt ni najc jiaaru, badeedza Dios sajcru lajni lo laj

guiraa relaj ni rusä't bejn. ¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez nen yuj. ¹¹ Te guiraareni gacheepac, guiniizareni: "Jesucrist najc Dad", te si'c chä'pduxh xpala'n Xtadnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu nen dojl, colyajc bejn ni rusoob diidx con yälrdxejb. ¹³ Sa'csi Dios najc ni rujn dzuun nen lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

¹⁴ Loj guira'ti ni rujntu, na'c gusmojm̄tu, na'cza gun tiop lajztu, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' lał ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy, ¹⁶ sa'csi arapdzu'tztu xtidx yäl nabajn ni runiidx Crist nen lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷ Mase lagajc xtienä guixe' te guiza' te gojn ni xca' Dios xcuent xcälirililajztu, rbaa lazä, sibalaznääza la'tu. ¹⁸ Sigajcza colguibaa lajztu, colguibalaznäj narä.

Timoteu con Epafrodito

¹⁹ Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebä xho yu'tu nejzga. ²⁰ Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. ²¹ Guiraa rebejnre rujntis xtzuuncareni, direni jiu gunreni xtzuun Jesucrist. ²² Niluxh la'tu anajntu xho rujn Timoteu; si'c racnäj te bi'n xtadni, si'cza racnäjni narä lo xtidx Jesucrist. ²³ Ni'cni rlazä guxhaläni te jädhuini la'tu, fixgaäsi don xho sasaj xcuentä ree. ²⁴ Cabäzäza nez lo Dad Jesucrist don la näjza narä sajl jädhuigaätu.

²⁵ Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä. ²⁶ Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yäl nahuinlajz ni yu'ä ree. ²⁸ Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Colca'ni con yälrbalajz si'c bejtztu lo xtidx Dios, sigajcza colyejn reni najc sigajc laani. ³⁰ Xcuent

xtzuun Jesucrist ameer niejtni, dini niu xcäl̄nabaj̄ntisni te bejn̄ni redzuun nani di niajcdi niujntu lagajc la'tu xcuentä.

3

Te yäl̄nabaṅsa'cpac

¹ Naj rebetzä, col̄guibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. ² Col̄nati renani najc si'c bä'cw. Col̄natiza rebejn̄ nani rujn dzun guijdx. Col̄natiza reni ru' bee tiejxhtisreni luxh xlia'si rujnreni si'c. ³ Renani guliipac yu' bee najc nuure nani ahuililajz xtidx Dios, rienzanu xtzuumni si'cni rlanjzi sa'csi ayu' Sprit Dxaan xtenni neṅ lastoonu. Rbalaaznu sa'csi najcnu xpejn̄ Dad Jesucrist, xhet xcuentdi redzuun ni rujn tiejxhnu. ⁴ Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhuj̄n gubijdx; narä nacä te rexpejn̄ Israel; narä nacä tej rexpejn̄ toBenjamín, nacä te hebreo, luxh xtaḁä najc te beṅ hebreo; xcuent leii nacä te farisee. ⁶ Basobduxhä guiralii rextidx Dios ni caj lo leii ni'cni basacsiduxhä rexpen̄ Jesucrist; xcuent yäl̄nabaṅsa'c xten leii, xhetliidi xtoḁä yu'; basobdu'tzä xtidx leii. ⁷ Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yäl̄riembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹ te chu'ä lojni, xhet xcuentdi xcäl̄nabaṅsa'cä ni najc xcuent leii, alga xcuent yäl̄nabaṅsa'c ni najc xcuent xcäl̄rililajz Jesucrist, yäl̄nabaṅsa'c ni najc xten Dios xcuent yäl̄rililajz. ¹⁰ Ni'cni rlazä gumbeäru Jesucrist loj yäl̄rnibee ni rajpni sa'csi huistie gubaṅsa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlanjz Dios si'c gucbee Jesucrist, bejnzani ni rlanjz Dios che gujtni. ¹¹ Te gac guidzunä lo yäl̄guibaṅsac loj rebengut te xca'ä yäl̄nabaj̄n par tejpas lo Dios.

¹² Dizana guiniä “abenä gaan” o “anacä beṅsa'c”, alga sanuätis te gunä gaan yäl̄nabaj̄n nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgaä naä si'cni guiniazä nani churu gac. ¹⁴ Si'cni sanuutis ruxuṅ bejn̄ te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guibaņsijcnu, chanuutis gusoobnu rediidxga; nungäjļ guibajņnu loj rediidxre, jiennu tejsi xhigab.

¹⁷ Rebetzä, coltanajļ narä, colyejn si'c runä narä, colhuiiza rebejn nani nabajņ si'c nabaņä. ¹⁸ Xhidajļ huält aguniä lojtu, naj ronäli rnisacä lojtu, yu' xhidajļ reni rdxe'ch lojtu, rniyajreni nani bejn Jesucrist che gudijxni xtojņnu lo crujz. ¹⁹ Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtujy; luxh riutisreni xcälņasa'c guedxliujre. ²⁰ Niluxh nuure, xhaguibaali najc laadxnu, luxh ro'cli cabäaznu jiaäd nani ruslaanu neņ dojļ, nalaaznu lagajc Dad Jesucrist. ²¹ Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcälņnibeeni. Sujņni dee con yälņnibeduxh ni rajpni te rnibeeni loj gurali'ti, guiraa nejz.

4

Colguibalajztis xcuent Dad Jesucrist

¹ Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaa lazä, lojtu ni najc yälņasa'c xtenä, colsudzu'tz loj xtidx Jesucrist.

² Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. ³ Sigajcza rniabä lojlu betzä, ni runnäjä narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neņ reguijtz xten yälņabajņ par tejpas.

⁴ Colguibalaznäjtis Dad Jesucrist; stehuält rniä: colguibalajz. ⁵ Sugachee guiraa rebejn xho najc xcälņabajņtu lo xtidx Dios. Asiäddzunğajxh dxej xten Dad Jesucrist.

⁶ Na'c guidxejbtu, colnabtis lo Dad guira'ti, colgudeedza xquixtios lojni laļ ni cabedx-canabtu lojni. ⁷ Dios guniidx xcälrbedxilazduxhni, nicla guntu xhigab lacti najc yälrbedxilajzga. Yälrbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsac xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹ Nani bisieedu, nani cua'tu, nani biejn diajgtu, nani bahuiitu benä, ni'c guntu te Dios ni rbedxilajz, laani jiannäjni la'tu.

Gojn xten refilipenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaiztu niacnäjtu narä, luxh di niajcdini. ¹¹ Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹² Sajc guibanä che guxii rapä; sajc guibanä che xhidäl rapä; abisiedä guibanä xhotis: sajc gauduxhä, sajca guilianä; sajc gapä xhidajl xhixtenä, sajca tedä trabajw. ¹³ Guira'tini sajc gunä sa'csi Jesucrist racnäj narä. ¹⁴ Niluxh xhet najcdi; laaca dzuun bejntu che bejntu xhigab gacnäjtu narä laḷ ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä. ¹⁶ Cheni yu'äli guedx Tesalónica, baxhaltu meel loä tej-tio'p huält. ¹⁷ Niluxh narä di rlazä xca'ätis xhixtentu ni guniidxtu, nani rlazä najc tioobru xcäl_nasa'ctu nez lo Dios xcuent dzuun ni rujntu ruxhaltu meel loä. ¹⁸ Naj acua'ä guiraa ni baxhaltu, arapä xhidajl, arapduxhä sa'csi acua'ä nani biädnä Epafradito baxhaltu loä, te gojn ni rlianejxh si'c guxhyaal, te dzunsa'c ni rchaglaiz Dios. ¹⁹ Dios xtenä guniidx lojtu guiraa nani riäädx xca'tu, si'tisni rajpni reyäl_nasa'cduxh xhaguibaa con Dad Jesucrist. ²⁰ Col_guiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Col_deed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree näj narä ruxhal_nu xtixtios lojtu. ²² Guiraa rebenree ni abia lastooni nez loj Dad Jesucrist ruxhal_xtixtios, niluxh ruxhal_ru resa' César xtixtios lojtu.

²³ Suga'p xcäl_racnäj Dad Jesucrist lastootu. Sugacni si'c.

Te Guijtz Lo Rebeņ Colosas

Bacuaa Pabl loj rebeņ guidoo ni yu' guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu ² cagucuaanu reguijtzre loj rebeņ Colosas nani nabaņnaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäj näjza yälrbedxilajz xten Dios xtdanu.

Rniab Pabl gudeed Dios yälñajn xtenni

³ Rdeednu xquixtios lo Dios xtdad Dad Jesucrist rniabnu lojni xcuenttu guixe-guixee. ⁴ Abiejn diajgnu xho rililajztu xtidx Dad Jesucrist, näjza xho sanälajztu rebeņ ni ahuililajz xtidx Jesucrist, ⁵ sa'csi cabäjztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälruslaa lo dojl. ⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeņ ni cayachee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeezatu guliipac najc xcälñulasajz Dios. ⁷ Sigajcza bisieedtuni lo Epafras, ni sanuutis cayacnäjni nuure lo dzuun. Laani najc te beņsa'c, yu'ni lojtu cayujnpacni xtzun Jesucrist lacuaa nuure. ⁸ Laani abasule'ni diidx loonu xho sanälajz sa'tu sa'csi nabajņ Sprit Dxan xten Dios neņ lastootu.

⁹ Laa ni'cni dxejli nani biejn diajgnu diidxre xcuenttu, di cuäaz cabedx-canabnu lo Dios, canabnu gacheduxhtu xho rlajz Dios guntu, guniidxni guiraa yälñajn näjza gusanijni xcäriejntu ¹⁰ te guibajntu si'cni nungäjļ guibajņ bejņ ni sanajļ Dad Jesucrist, te guspaatu lajzni lo guiraa redzuun. Chanuzatu gunrutu guiraa redzunsac näjza jianijru xcäriejntu xcuent yälriembee Dios. ¹¹ Tioobrutu loj xcälñadip, xcälñibee Dios te guibaa lajztu gusutiplajztu, cue'cdxilajztu loj xhitis ni sajctu. ¹² Guibalajznu guideednu xquixtios loj xtdanu Dios nani basudzu'tz nuure te xca'nu yälñabajņ par tejpas sigajc guiraa rebeņ nani ahuililajz xtiidxni yu'reni lo xpianijni. ¹³ Laani abaslaani nuure loj xcälñibee yälñacäjy, abateedni nuure lo xcälñibee xi'nni ni sanälajzni. ¹⁴ Laa xi'nni ni baslaa nuure neņ dojl cheni baxhe'ni xtiejnni, gujtni lo cruzj, dxejc gudijxni rextojļnu.

Gubisacnu loj Dios xcuent xcälgujt Jesucrist

¹⁵ Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh

rnibeeni lo guiralii ni yu' lo guedxliuj. ¹⁶ Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rerei, nājza reni rnibee loj rexangl Dios, nājza reni rnibee loj rexangl bendxab, nāgajcza reyālrnibee xten reguixhajg, sigajczani loj regubier, lo reguxhtis ni rajp yālrnibee, guiraani guc-chee por laani, nājza par laani. ¹⁷ Alanabajn Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸ Laani najc nani rnibee guidoo, nalajznu rebejn nani ahuililajz xtiidxni. Laani najc ni gulāxtiej guira'ti. Ganiddoo laani huājs lo rebengut te rnibeeni. Loj guira'ti ni yu' laatisni najc nani sajc guinibee. ¹⁹ Sa'csi bidxaglazj Dad Dios ga'p Jesucrist guiralii yālrnibee nani najc xten Dios, ²⁰ por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiājł-lajzni, aguredxi lajzni sa'csi bixe' xtiejn Jesucrist lo cruzj.

²¹ Luxh la'tu gujctu si'c benzijt lo Dios sa'csi galoo rdxe'chtu lo Dios neñ lastootu xcuent redzunguijdx nani bejntu. ²² Niluxh naj abiājł-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruzj cheni gujtni. Ni'c bejn ni te che suutu nez lojni, xhetiru xtojłtu, xhet xhi guiniidi Dios lojtu sa'csi anayapactu. ²³ Niluxh riājł chanuu sudzu'tztu, cuedxitu lo yālrililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵ Ni'c nacä te bejn ni rusule' diidx neñ guidooga. Dzuunga baniidx Dios gunä par xcäl_nasa'ctu te gusule'äpac guiragajc xtidx Dios, ²⁶ te gacheenu rexhigabxhiga'tz nani najc xhiga'tz galododuxh niluxh naj abaluini redidx-xhiga'tzre loj rexpejn ni. ²⁷ Lojreni bejn Dios xhigab guluini reyālnasa'c xten yālrndimbicha' xten redidx-xhiga'tz ni cagusule'ni loj rebenzijt. Yālxhiga'tzre säloj Jesucrist rbājz neñ lastootu ni'c runlojtu chalājztu lo yālrndimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yālnajn ruluiinu te guisa' yālnajn xten guiraa rebejn xcuent Jesucrist che guidzujnreni nez loj Jesucrist. ²⁹ Xcuent dzuunre guideb xtipä runä dzuun con guiraa yālrnibee nani runiidx Jesucrist narä.

2

¹ Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl₁sanälajz, näjza te ga'ptu guiraa reyäl₁nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtdnu näjza Dad Jesucrist. ³ Nen lastoo Dios näjza lastoo Jesucrist naga'tz guiraa reyäl₁nasa'c xten guiraa reyäl₁najn, guiraa yäl₁numbee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl₁rililajz xten Jesucrist.

⁶ Ni'cni sigajc ni huililajztu xtidx Jesucrist, sigajcza col₁chasanäj Jesucrist. ⁷ Col₁sudzu'tz lo Jesucrist si'c rsiobdzu'tz xlobaa te yajg. Col₁sudzu'tz lo yäl₁rililajz xten Jesucrist si'c ni abisieedu. Col₁gededduxhru xquixtios lo Dios.

Yäl₁naban₁coob ni rudeed Jesucrist

⁸ Col₁huii, na'c gusaantu guxhiid bejn xcäl₁rililajztu con xtiidx-tisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlanj Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxdidi lo yäl₁nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl₁guxhtis, guiraa reyäl₁rnibee ni yu' guira lajt. ¹¹ Sa'csi huililajztu Jesucrist aguyutu bee, niluxh xhet beedi nani rusäl₁ bejn con naareni, alga xpee Jesucrist, ni najc yäl₁rusia xtoj₁ bejn sa'csi rusaan bejn redzunguidx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujttu ni'c biga'tztu con Jesucrist, najczani si'cni guban₁sactu con laani sa'csi huililajztu rajp Dios yäl₁rnibee nani gulässac Jesucrist lo rebengut. ¹³ Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl₁nabajn par tejpas lojtu con Jesucrist, badzucajni guiraa rextoj₁nu. ¹⁴ Dios badzucaj guiraa releii nani basäuu nuure nen dojl, badzucajnini lojni, sa'csi bacuaanini lo cruzj, cadre gudijx Jesucrist guralii rextoj₁nu. ¹⁵ Cheni gujt Jesucrist lo cruzj bejnni gaan loj reyäl₁guxhtis näjza guiraa reyäl₁rnibee xten bendxab näjza rexspritni. Basanxtujynireni nez loj guiraa rebejn. Laani bejnni gaanreni cheni cuajni lo cruzj.

Col₁quiil recos ni najc xten xhaguibaa

¹⁶ Nicla tejtutu na'c cubee sa'ni xcuent reyäl₁rajw näjza reyäl₁rä', niclaza xcuent redxe lanij näjza rexchej rebäicoob, näjza redxej ni rusilajzni. ¹⁷ Guiraa redee najc si'csi te balaa xten

nani churu jiaäd, te guluiireni ni rujn balaaga, nalajznu ni'c najc Jesucrist. ¹⁸ Na'c gusaantu gudzucaj bejn xcäl'nasa'ctu te gunreni gactu nadolajz, te gan̄tu reangl. Sa' bejn̄ga richu' loj nani gajdreni fii; rchaloreni najcreni beñro xcuent lagajc xhigabreni. ¹⁹ Laareni direni chanajl Jesucrist nani rnibee, nani rujn roobru tiejxhni, nalajznu rexpejn̄ni, sa'csi lojni rca'reni ni rquiin lastooreni, te ruchaagni sa' tejpgareni si'c nadxaquiid bääl cuä' dzujt lo tiejxh bejn̄, te gacreni tejsi con Dios.

²⁰ La'tu agujttu con Jesucrist, abiriitu lo rehxigab xten guedxliujre. Naj çhichuent guibajntu sigajctis nabajn̄ rebejn̄ nani di gumbee xtidx Jesucrist, ä? çhichuent rusooobtu rediidx ni caj lo releii? Loj releii caj sa' diidxre: ²¹ "Di chahuallu dee, di gaulu ni'c, di can̄lu dec." ²² Luxh guiraa redee rnitloj che runnäjn̄ini dzuun. Luxh guiraa sa' leiiga najc diidxtis nani ruluii bejn̄. ²³ Guluiicani sa' releiiga rien asdoo ruluiireni yäl'nanduxh, luxh che rusooob bejn̄ releiiga rchaloreni rajn̄reni Dios, rchaloreni rac nadolajzreni, rusacsíreni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3

¹ Palga anabañsactu con Jesucrist, col̄quiil reyäl'nasa'c ni yu' xhaguibaa cadro sobga' Jesucrist xladbee Dios. ² Col̄yejn̄ xhigab xcuenttis reyäl'nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³ La'tu anajctu si'c beñgut loj reyäl'nasa'c ni yu' lo guedxliuj, luxh yäl'nabajn̄ ni rajptu naj, yäl'nabajn̄ga naga'tz con Dios xcuent Jesucrist. ⁴ Che guluiilosac Jesucrist ni najc xcäl'nabajn̄tu, dxejc näjza la'tu suluiilojtu con laani lo xcäl'rdimbicha'ni.

Yäl'naban̄biejw con yäl'naban̄coob

⁵ Col̄cuälaz redzunguijdx xten guedxliuj nani rujntu, yäl'rusguee gunaxteb, yäl'rujn recosdxuudx, recos ni rdxaglaiz tiejxhtu, rehxigab-guijdx, yäl'rsiäb-lajz xhi xten bejn̄, guiraa redee rujn runijt bejn̄ lo Dios sigajc rujn bejn̄ che rajn̄ bejn̄ rebanäjb. ⁶ Guiraa redzuunga rujn riääd xcäl'rdxe'ch Dios yejc renani rujn sa' redzuunga. ⁷ Näjza la'tu bejntu sa' redzunguijdxga galoo cheni guyu'tu lo sa' yäl'nabajn̄ga. ⁸ Niluxh naj näjza la'tu col̄gusaan recosre; nalajznu yäl'rdxe'ch, yäl'ruche'ch sa'ni, yäl'rujn latzsiaj sa'ni, yäl'rniyaj sa'ni, näjza rediidx-dxuudx ni rniitu. ⁹ Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰ Col̄yajc te beñcoob, ni guixe-guixee cayaniijru xcäriejn̄ni, te gumbesa'ctu Dios, te gactu sigajc najc Dios ni benchee beñguedxliuj. ¹¹ Lo yäl'naban̄coobre rutiru beñzijt, niclaza xpen

Israel, rutiza rebejn ni ru' bee, niclaza bejn ni di chu bee; rutiza benzijt, niclaza bejn ni siäd zitduxh; rutiza mos, niclaza bejn nani di chu lo bejn, sa'csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

¹² Naj agule Dios la'tu te gactu xpejnni nani gac naya, nani sanälajzni, colguibajn con yäl'rulasajz, na'c guidxe'chtu, colyacnadoo con yäl'nadolajz, colniiza nadolajz. ¹³ Colyujn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäjl-lajztu sigajcni basiäjl-lajz Dad Jesucrist lojnu xcuent rextojl'nu. ¹⁴ Che abejntu guiraa recosre, colguilru yäl'sanälajz nani rusa' loj guiraa recosre. ¹⁵ Xcäl'rbedxilajz Dios guinibee nen lastootu, sa'csi parpac ni'c gurejdxni la'tu, te gaczatutejsi con rexpejn Jesucrist. Colgudeed xquixtios loj Dios.

¹⁶ Xtidx Jesucrist chuduxh nen lastootu con guiraa yäl'najn, te guluiitu, te gulijdxte tejsa resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios nen lastoonu. ¹⁷ Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtadnu con laj Jesucrist.

Xho nanab guibajn te famil ni najc xpejn Jesucrist

¹⁸ Regunaa nani abachnaa, colgusoob xtidx chäältu sa'csi si'c r'rajz Dad Jesucrist. ¹⁹ Reniguii nani abachnaa, colchanälajz chäältu, na'c guidxechnäjt'ureni. ²⁰ Reni najc biuux, colgusoob xtidx xtadtu loj guira'ti, sa'csi si'c rchag'rajz Dad Jesucrist. ²¹ Reni najc Dad, na'c guche'chtu rexi'ntu, didi gac-huin lajzreni. ²² Reni najc mos, colgucua diajg xtidx xlamtu lo guedxliujre loj guira'ti xtzuumni. Na'c gunsa'ctu dzuun che cahuiitisreni si'c rujn renani ruspaa lajz bejntis. Con yäl'nadolajz colyejn dzuun sa'csi sanälajztu Dios. ²³ Guira'ti nani guntu, colyejnni guideb lastootu si'c xtzuum Dios, et si'c xtzuumdi rebejntis. ²⁴ Anajntu lo Dad Jesucrist sica'tu yäl'nasa'c ni najc yäl'nabajn par tejpas, sa'csi loj Dad Jesucrist rujntu dzuun. ²⁵ Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa reben'guijdx.

4

¹ Renani najc lam, coldeed loj rexmistu nani riäjl xca'reni sa'csi anantu näjza la'tu rajptu xlamtu xhaguibaa.

² Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³ Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä nen latzguiib. ⁴ Colnab lo Dios te guyasi gusule'ä rediidxga si'cni riäjl guiniä.

⁵ Colguibaṅsin loj rebejn nani di gumbee xtidx Jesucrist, colgusule' diidx cheni riäjl guiniitu lojreni. ⁶ Rextiidxtu nanab gacni si'c rchaglazj Dios, saruduxhza gac xtiidxtu te gacheetu xho riäjl gudzu'tu diidx loj tejgareni.

Lult xtixtios

⁷ Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸ Ruxhaläni lojtu te gacheepactu xho yu'ä, te guspaani lajztu. ⁹ Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj narä neṅ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jädhuini la'tu, sacru colhuiini). ¹¹ Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaa lazä. ¹² Epafra, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu. ¹³ Narä rniliä xho rdzuun Epafra xcuent la'tu, näjza xcuent rebejn ni yu' guedx Laodicea, näjza guedx Hierápolis. ¹⁴ Lucas, doctoor ni sanälajznu, näjza Demas ruxhalzareni xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolijzni. ¹⁶ Cheni agulujx biltu guiitzre, colguxhalni te jielni neṅ guidoo xten guedx Laodicea, dxejcti colyelza guiitz nani baxhalä lo reben guedx Laodicea. ¹⁷ Colye'tz loj Arquipo: "Bahuisa'c xtzuum Dad Jesucrist nani cua'lu lojni. Bensa'c dzuunga."

¹⁸ Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Reben Tesalónica

Bacuaa Pabl con reexamigwni lo guidoo guedx Tesalónica

¹ Narä, Pabl, näjza Silvan, näjza Timoteu cacuaanu guijsre lojtu, resa'nu ni yu' guidoo lo guedx Tesalónica, reni yu' lo Dios Xtdnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz ben Tesalónica xtidx Dios

² Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³ Ruzä'tnu lo Dios xtdnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. ⁴ Bejtznu, racheenu sanälajz Dios la'tu, laani aguleni la'tu. ⁵ Sa'csi che basule'nu xtidx Dios lojtu, et ganax diidxtis gujcn, niluxh xcälrbibe Sprit Dxan xten Dios neñ lastootu bejn gucbeepactu diidx ni najc didxlii. Nanchesä'ctu xho gujcn che guyu'nu lojtu. Si'c baluiinu la'tu te guibaṅsa'ctu.

⁶ Sigajcni nabaṅnäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw. ⁷ Si'c guj te baluiitu loj guiraa reni rililajz nez Macedonia näjza nez Acaya xho nungäjł gac. ⁸ Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. ⁹ Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjbe te rajntu Dios ni nabajṅpac ni najc guliipac. ¹⁰ Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrdxe'ch Dios ni churu siäd.

2

Xhi bejn Pabl neñ guedx Tesalónica

¹ Naj lagajc la'tu najntu, bejtznu, et xlia'di bio'pnu lojtu. ² Et najntu xho gudéreni loonu, basacsíreni nuurnu guedx Filipos. Niluxh mase gudejdn trabajw, gusutijpnu lo Dios, xhet bidx- ejbtinu basule'nu xtidx Dios lojtu, mase gudejdn trabajw- duxh. ³ Sa'csi dinu nulijdx la'tu con didx-xhii, niclaza didx- dxuudx, niclaza diidx ni rusguee. ⁴ Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu

lo Dios ni ruhuii lastoonu. ⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj] niennu niacbeetu rajpnu yäl]rnibee sa'csi baxhal Jesucrist nuurnu. ⁷ Niluxh guc nadolajznu che guyu'nu lojtu, cuanäjnu la'tu si'c rcanäj te nañ rexpäzni. ⁸ Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. ⁹ Bejtznu, la'tu rnalajztu xho biennu dzuun te biennu gaan xcäl]nabaannu. Biennu dzuun dxej-yääl, te di niednäjtü nuurnu la] ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni ran]duxh Dios, gujcnu be]dxoj], gujcnu be]sa'c. ¹¹ Anajntu xho baliidxnu la'tu, xho bascuecdxinu lajztu si'c runnä] te dad rexingaanni. ¹² Guiraa dee biennu, te guiba]sa'ctu si'c nungäj] gun reni najc xi'n Dios, lagajc Dios ni gurejdx la'tu te chunäj]tuni lo xcäl]rnibeeni näjza lo xcäl]rdimbicha'ni.

¹³ Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi be] guedxliuj. Niluxh guli] xtidx Diosni, sa'csi rusiani lastoo renani rililajz. ¹⁴ Bejtznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen] Jesucrist; luxh gusajctu lagajc ni gusajcreni, basacsí rebe] lajdxtu la'tu. Sigajcza birinaj] rexpem] Israelreni. ¹⁵ Rexpem] Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzaren] nuurnu. Direni chanälajz Dios, dizaren] gusaan chanaj] rebejn Jesucrist. ¹⁶ Che r]ajznu gulijdxnu reni digac rexpem] Israel, te näjza laaren] laaren] lo doj], direni gusaan, si'ctis cagutaj]reni xtoj]reni. Niluxh naj abiääd]pac yäl]rdxe'ch xten Dios yejcreni.

R]ajz Pabl nihuisacni ro'c

¹⁷ Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, r]lazduxhnu fisacnu lojtu. ¹⁸ R]ajznu nio'pnu, narä, Pabl xhidal huält r]lazä niälä, niluxh be]dxab di nusaan. ¹⁹ ¿Xhini'c najc xcäl]rbäaznu, xcäl]rbalajznu, xcäl]racnaronu? Lagajc la'tu gactuni che suunu nez loj Jesucrist che j]ädsac Dad Jesucrist. ²⁰ La'tu najc ni ruspaa lajznu ni rliä'pza xpala'nnu nez lo Dios.

3

¹ Dxejc, che dirunu nutijp lajznu, biennu xhigab bianxtebä guedx Atenas. ² Dxejc baxhalä Timoteu, bejtznu nez loj Jesucrist, te biädhuuini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcälrlilajztu. ³ Te nicla tejtü di guidxejb che jääd reyälhuin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhalä chu jäädnä diidx xho najc xcälrlilajztu, sa'csi cadxebä andi abasguee bendxab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuuini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷ Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraa näj xcuent yälrbalajz ni yu' lastoonu xcuent la'tu nez lo Dios. ¹⁰ Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacbeetu xcuent xcälrlilajztu.

¹¹ Rniabnu lo Xtradnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu, ¹³ te gunni sudzu'tz lastootu, na'c ga'ptu dojl nez lo Xtradnu Dios, che jääd Jesucrist näjza guiraa rexpejn ni xhaguibaali.

4

Guibajnu si'c rchaglajz Dios

¹ Naj, rebejtznu, rniabduxhnu lojtu, ruliidxnu la'tu con laj Dad Jesucrist, guibajntu si'cni baluiinu la'tu nungäjil guibajntu te guspaatu lajz Dios, te si'c chanuutis guibaṅsa'ctu nez lo Dios.

² La'tu, anajntu rediidx ni baluiinu lojtu con xcälrnibee Dad Jesucrist. ³ Lagajc Dios rlanjz nayatis guibaṅsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. ⁴ Tejgatu gantu xho guibaṅnäjtu chäältu nayatis näjza xpala'nni. ⁵ Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios. ⁶ Rut chutejditu gusguee bejtzni lo redzun-guijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. ⁷ Sa'csi Dios gurejdxni nuurnu te guibajnu lo yäl'nabaṅnaya xtenni, xhet

lo yäl̄nabaṅdxuudxdi. ⁸ Ni'cni bejṅ ni di gucuadiajg rediidxre, dini gac xtiidx te bejṅ ni dini cuadiajg, xtiidxpac Dios ni dini cuadiajg, Dios nani abaniidx Sprit Dxaṅ xtenni loonu.

⁹ Ditu guiquiin gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰ Luxh rinälajztu guiraa reni rililajz, guiraa reni siäd guideb nez Macedonia. Ni'cni rniabnu lojtu bejtznu, chä'pru xcäl̄rinälajztu. ¹¹ Colgutijp lajztu, dxitis col̄guibajṅ, col̄jiu xtzuncatu, lagajc naatu col̄yejṅ dzuun si'cni agunibeenu guntu. ¹² Te fii rebejṅ ni di chalilajz laaca nabaṅsa'ctu, nägajcza te xhet jiädxdxi xhi rquiintu.

Xho gac che jiädsac Jesucrist lo guedxliuj

¹³ Bejtznu, rlaiznu gacbeetu xcuent rebengut te di gac-huin lajztu si'c rujṅ rebejṅ ni di chalilajz xtidx Dios. ¹⁴ Si'c ni rililajznu gujt Jesucrist, dxejc gubaṅsacni, sigajcza rililajznu suspaṅsac Dios guiraa reni nagayejs neṅ baa, renani huililajz xtidx Jesucrist. Luxh che guibi' Jesucrist, siädñäniireni.

¹⁵ Xcuent xcäl̄rnibee Jesucrist rniä lojtu, nuurnu ni nabajṅnu che jiädsac Jesucrist, dinu nid loj reni nagayejs neṅ baa. ¹⁶ Sa'csi lagajc Dad Jesucrist siäjt lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibaṅxgaa reni nagayejs neṅ baa, reni huililajz xtidx Crist. ¹⁷ Dxejc nuure ni nabaṅsijcnu sidxaagnureni neṅ rebäj te lo bej chachagloonu Dad. Si'c chonnu cholaznäjṅni par tejpas. ¹⁸ Ni'cni rniä lojtu, col̄cuedcxilajz sa'tu con rediidxre.

5

¹ Niluxh xcuent redxejga, reijzga, xhet riquiinditu gucuaäni lojtu, ² sa'csi la'tu anansa'ctu sidzujṅ dxej ni jiäd Jesucrist cheni rut cayunlojdini, sigajc che riäd te gubaan yääl. ³ Che canii bejṅ: "laaca dxunnu, dxunsa'cnu", chela gacbeereni acadajdreni trabajw si'c che rdzujṅ yäl̄nayan te gunaa che rajl xi'nni, luxh digacdi guxun̄reni lojni. ⁴ Niluxh bejtznu, di gac nayäältu te di che xhet cayunlojditu dxej xten Jesucrist, guidzun̄xhiga'tz dxejga si'c gubaan. ⁵ Sa'csi guiraatu najctu beṅsa'c nabajṅtu lo bianij, lo rdxee, dinu gac beṅguijdx, dinu guibajṅ lo yääl, lo yäl̄rcäjy. ⁶ Ni'cni di nungäj̄l guidiesnu si'c rejs stecuaa bejṅ, ni'cni nungäj̄l sunasiṅnu na'cza jiennu redojl̄ ni rlaiz tiejxhnu. ⁷ Reni rejs, rejsreni yääl, reni rsiojz, rsiojzreni yääl. ⁸ Niluxh nuure nabajṅnu lo rdxee, ni'cni nanab na'c jiennu si'c, riäj̄l xca'nu yäl̄rililajz näjza yäl̄rinälajz si'c rca' soldaad gamangw guib ni rajcwni, ni rusäuu lastooni. Riäj̄lza guiläzdu'tznu sa'csi yäl̄rusläa lo dojl̄ najc si'c xhumbrel-guib ni ru' yejc soldaad ni rusäuu yejṅni. ⁹ Sa'csi di Dios nibe nuurnu te chonnu gabijl, alga guleni nuurnu te xca'nu yäl̄nabajṅ ni rudeed xi'nni, Jesucrist. ¹⁰ Sa'csi gujt Jesucrist

lacuaa nuurnu, te guibanñajnuuni masä nabajnu lo guedxliujre o nagayejsnu neñ baa che guibi'ni. ¹¹ Ni'cni, colguspaa lajz sa'tu, tejtü sigajcza steetu, sigajcni cayujntu ñaj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjzä chanälazduxhturen i xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc beñlatsiaj; colsudzu'tz lajz reni guxii rbalajz lo xnez Dios; colgacnä j reni di gumbesa'c xtidx Dios, colcuedxi lajz guiraasi bejn.

¹⁵ Colhuui di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

¹⁶ Colguibalajztis guideb nabajntu. ¹⁷ Na'c cuääz guiniitu lo Dios. ¹⁸ Mase xhitis rsiajctü, coldeed xquixtios lo Dios, sa'csi si'c rla jz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios ni rniini neñ lastootu. ²⁰ Na'c cuälaztu xtidx reni rnii xtidx Dios xcuent nani churu gac. ²¹ Colquiil guiraa rediidx, coljiannäjtis rediidx ni najc didxsa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, ñaj lastootu, ñajza tiejxhtu, te na'c guntu dojl ni di riäjz guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujnza guiraa ni rniini, ni'c sujnzani guiraa redzuunre.

Ruzadiidxnireni

²⁵ Bejtznu, colnab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, goltu guijtze lo j guiraa rebejtznu.

²⁸ Gacnä j Dad Jesucrist la'tu. Sugacni si'c.

Guijtz Ni Rojp Lo Reben Tesalónica

Rucuaanu guiτζzre lojtu, rexpēn Jesucrist ni rbājz guedx Tesalónica

¹ Narā Pabl, nājza Silvan nājza Timoteu, cacuaanu guiτζzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu nājza lo Dad Jesucrist. ² Gacnāj Dios Xtadnu nāj Dad Jesucrist la'tu, guscuedxizareni lajztu.

Gun Dios yālguxhtis loj rebēdojł che guibi' Jesucrist lo guedxliuj

³ Bejtznu, rudeednu xquixtios lo Dios xcuenttu, si'c riājł jienunni, sa'csi xcālřililajztu siādroobru, nājza yāłřinālajz ni rajp tejgatu nājza sa'tu siādroobruni. ⁴ Ni'cni rliā'pnu xpala'ntu neņ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. ⁵ Dee ruluiipac xcālguxhtis Dios najc laaca, ni'c rnii Dios riājł jiu'tu lo xcāłřnibeeni sa'csi cadejdtu trabajw xcuent yāłřnibeega.

⁶ Sa'csi rujn Dios xhigab riājłza quiix reni bateedtu trabajw xtojłreni, ni'c suteedzani reni'c trabajw. ⁷ Niluxh la'tu ni cadejdtu trabajw, sujn Dios gusilaznājtu nuure che guluiiloj Jesucrist, siriini xhaguibaa siādnājni rexangłni ni sajc, ni rnibeduxh. ⁸ Lo te balduxh siāadni, dxejc guisloj susacsíduxhni reni di gaņ Dios, dizareni gusoob xtidx Dad Jesucrist nani rudzucaj dojł. ⁹ Guiraareni sidejdreni trabajw, par tejpas agunijtreni, zijt chureni lo Dios, lo yāłřdimbicha' xten xcāłřnibeeni. ¹⁰ Che jiāād Dad guiriini xhaguibaa, dxejga siliā'p rexpejņni xpala'nni, sidxelojza renani huililajz laani nājza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riājł guibajņ reni guleni. Rniabzanu guniidx Dios lojtu guntu guiraa redzunsac' ni rchagłajz Dios guntu, gacnājzani la'tu con xcāłřnibeeni te guntu redzuun ni rujntu sa'csi rililajztu. ¹² Te chā'p xpala'n laj Dad Jesucrist si'cni nabajntu, te laani guiliā'pzani xpala'ntu, xcuent yāłřinālajz xten Dios nājza Dad Jesucrist.

2

Bēndolduxh

¹ Naj, rniabduxhnu lojtu bejtznu, xcuent dxej ni jiāād Jesucrist, dxej ni guidojppzanu lojni, ² na'c chugajtu yarsia'. Na'cza gusaantu guchejbreni la'tu con diidx ni ruluii te bejņ ni najc profe't, nicla con diidx ni rnii stee bejņ lojtu, niclaza con

diidx ni naareni lojtu caj loj te guijtz ni naareni baxha_lnu lojtu, cadro caj “dxej ni guibi' Jesucrist abidzuj_n”. ³ Na'c gusaantu gusguee bejn la'tu xcuent rediidxre. Che gajd dxejga guidzuj_n, su' bejn ni sibälaz xtidx Dios, dxejc suluiloj be_nlatsiaduxh, xi'n nani sinitloj par tejpas. ⁴ Bejnre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni raj_n bejn, te cueni ne_n xquidoo Dios, guluilojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä rediidxre lojtu, ä? ⁶ Naj la'tu anajntu xhini'c ruscuääzni, te na'c guiricajni ansde guisa' redxej xtenni. ⁷ Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuääzni galäiini. ⁸ Dxejc suluiloj be_nlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpiani-jni sujn nitlojni. ⁹ Be_nlatsiaduxhre najc si'cpac najc be_ndxab. Che guidzuj_nni, guidzuj_nni si'c te bejn nani rnibee, sujnni seen, sujnzani milagrw ni rusguee. ¹⁰ Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni ne_n dojl. ¹¹ Ni'cni susaan Dios jääd te yälrusgueduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxagljazreni yällatsiaj.

Reni gule Dios guirii ne_n dojl

¹³ Niluxh nuurnu riäj_l gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jäällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxha_lnu lojtu. ¹⁶ Lagajc Dad Jesucrist, näj Dios Xtadnu, ni sanälajz nuurnu, ni ruscäjn lajznu par tejpas, ni baniidx xcälrbääznu racnäjni nuunu, ¹⁷ guspaani lajztu, gusudzu'tzni la'tu lo guiraa redidxsa'c ni guiniitu näjza redzuna'c ni guntu.

3

Col_nab lo Dios xcuent nuurnu

¹ Bejtznu, col_nab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcn con la'tu. ² Col_nabza lo Dios xcanäjni nuurnu te di tednu ladz_naa rebe_nlatsiaj, rebe_nguijdx, sa'csi xhet guiraadi bejn rajp yälrililajz. ³ Dios rusoob xtiidxni, susudzu'tzni la'tu, sacnäjzani la'tu te di sactu dolguijdx.

⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacbeerutu xcälsanälajz Dios, canabäza colcuedcxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtrad Jesucristnu, rnibeenu guibicajtu lo chutis te sa'nu ni ricanzajtis, ni di rlanj gunni dzuun. Guibicajzatu loj reni di guibajñ si'cni baluiinu riäjļ guibajntu. ⁷ La'tu anajntu xho riäjļ guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejtu; guiraani bidiixnu, biennu dzuun dxej-yääl, te di nutaalnu xtzuun chu tejtu. ⁹ Masä nungäjļ niniabnu niacnäjtü nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlanj gun dzuun di riäjļ xca'ni xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujñ rebejñ. ¹² Rulijdxnu rebejñre, rnibeenureni con laj Xtrad Jesucristnu: colcuedcxi, colyejñ dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtu di gucuadiajg xtiidxnu ni caj lo guijtzre, colhuii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbedxi, guscuedcxi lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con ñaäpac si'c runä lo guiraa rexquitzä, scree rucuaä. ¹⁸ Gacnäjä Xtrad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu. ² Timoteu, luj najclu si'cpac xinganä lo yälirililajz. Xtdnu Dios näjza Xtd Jesucristnu gacnäjl, gulaslajzreni luj, guscuecdxireni lastoolu.

Pabl rulijdx xcuent reni ruluii diidx-xhii

³ Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴ te na'c jiutejreni rexcuent reben̄tiemp, te na'cza jiuduxhreni chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibeä si'c chanuu gulijdxlu rebejn.

⁵ Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶ Yu'reni abaro'n rediidxre, riejytis ro'reni saniduxhreni diidx ni xhet sajcdi. ⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni. ⁹ Najnnu di leii gac par beñsa'c, najcni par reni najc ben̄latsiaj ni di jiu leii xten Dios, näjza reni di gusoob diidx; par reben̄ guiidx, näjza reben̄dojl; par reni di jiu Dios, näjza reni rusguee; par reni rugu't xtdni, xnanni, näjza guiraa reni rugu't bejn; ¹⁰ par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rni didx-xhii; reni rni didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹ nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannäa diidxre.

Rudeedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. ¹³ Luxh galoo guniyaäni, birinalä xpejn̄ni, basacsíäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴ Niluxh lacti guroob gujc yälracnäj xte Xtdnu, guideb yälirililajz, näj yälšanälajz ni rajp Jesucrist.

¹⁵ Diidxre najc guliduxh, nanab chalilajzpacuni: Jesucrist biääd lo guedxliujre te guslaani reben̄ dojl; lo reben̄ dojl narä

nacäru bendolduxh. ¹⁶ Ni'cni balaslajz Dios narä, mase nacä bendolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajn par tejpas. ¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yäl'rulijdx ni runidxä lojlu te gucuasa'clu si'c te soldaad ni abisieed, sigajc ni gunii reprofet' xcuentlu galoo. ¹⁹ Di gunijtlu yäl'rilitajz, bejnza xhigabsa'c, sa'csi yu'reni abar'o'n xtidx Dios, ni'c abanijtreni yäl'rilitajz. ²⁰ Si'c gusajc Himeneo näj Alejandro, luxh abat-edäreni ladznaa bendxab te guisieedreni na'c guiniya'reni Dios.

2

Ruluiini xho guiniabreni lo Dios

¹ Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn. ² Guiniabzalu xcuent rereii näj guiraa reni rnibee lo guedxliujre, te gac guibanxinu, te gac chanuunu xnez Dios, te saru guibajnnu. ³ Sa' yäl'rniabga najc laaca, luxh si'c rdxaglajz Dios ni rusläa nurnu lo dojl guiniabnu lojni. ⁴ Dios rlajz laa guiraa bejn lo dojl, rlajzzani gacbeepacreni xtidxliini. ⁵ Yu' tejtis Dios, näjza tejtisza nani rusiäj] diidx lo Dios näjza loj reben guedxliuj. Laani najc Jesucrist ni gujca niguii. ⁶ Jesucrist gujt lo cruz te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios. ⁷ Dios gule narä te gacä apost te gusule'ä xtiidxni, yäl'rilitajz näjza didxlii lo reni di gac xpejn Israel. Si'c ni rlajz Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yäl'rdxe'ch, na'c gunreni bieje. ⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cdi regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni. ¹⁰ Masru ruchaag gunreni si'cni rchalglajz Dios, si'c riäj] gun guiraa regunaa ni yu' lo Dios. ¹¹ Riäj] dxitis gucua-diajg regunaa xtidx Dios ni rusule' reniguii. ¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucua-diajg diidx nani cagusule'ni. ¹³ Sa'csi ganid benchee Dios Adán, dxejctiru bencheeni Eva. ¹⁴ Luxh et Adandi basguee bendxab, bendxab basguee gunaaga, dxejc biajbni neñ dojl. ¹⁵ Niluxh siliaa regunaa, palga jiuren xtzunreni si'c nan, palga chanuu

chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

3

Xho riäjł gac reni rnibee

¹ Dee najc didx gulii: palga rłajz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rłajzni gunni. ² Ni'cni, ni rłajz gac nani rnibee, riäjł guibańsa'cni te na'c chu xhicuent guiniyaj rebejn. Riäjł gacni chääł tejtis gunaa, riäjł susińni, gacni te beńsa'c, cuedxini, te guibańsa'cni. Riäjłza di gudxojni rolijzni guidzujń bejn, nągajc riäjł gacni te bejn ni nansa'c te guluiini. ³ Na'c gacni te beńgu, nicla te ni rdxagdijł bejn, na'cza gacni te nani rsia' lajzni ga'pni xhidajł meel, riäjł cuedxini lajzni, na'c chanälajzni meel. ⁴ Riäjł guinibesa'cni rolijzni, saru gunni te gusoob rexi'ni xtiidxni. ⁵ Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶ Di riäjł guinibee te beńcoob nani entis huililajz, te di guschä'pni xpala'ni sas jiajbni lo lagajc xcälńaj Dios ni biajb beńdxab. ⁷ Luxh riäjłza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzńaa beńdxab.

Xho riäjł gac reni rcanäj nen guidoo

⁸ Si'cza rediaconos riäjł gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹ Riäjł gapdzu'tzni rediidx nagajn xten yälřirilajz, ni'c nanab gac naya lastooreni. ¹⁰ Riäjł fixgaatu xho nabajńreni. Palga nabańsa'creni, rutza gacdi gucuaquijdireni, sajz gacreni diacono. ¹¹ Regunaa ni rłajz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹² Riäjł gac rediacono chääł tejtis gunaa. Riäjł guinibesa'cni rexi'ni näj guiraa reni yu' rolijzni. ¹³ Sa'csi rediaconos ni runsa'c xtzuunni, sanälajz bejnreni, dizareni guidxejb rsiudzu'tz lastooreni lo xcälřirilajz xtidx Jesucrist.

Gurobduxh najc yälřhiga'tz xten Jesucrist

¹⁴ Cacuaä diidxre lojlu, niluxh rłazä jiädhuigaä la'tu. ¹⁵ Luxh palga gacłää, anajnlu xho riäjł guibajń bejn rolijz Dios, nalajznu xquidoo Gueb Dios ni nabajń par tejpas. Guidoore rniaszdu'tz näjza ruluiiru didxlii xten Dios. ¹⁶ Rdxeloyaduxh guiralii bejn yälřhiga'tz xten xcälńajn Dios: Dios biääđ lo guedxliuj si'c te beńguedxliuj, Sprit Dxań xten Dios gunii beńdxanni; bahuii rexangł Dios lojni;

basule'reni xtiidxni lo rebejn ni di gac xpejn Israel;
 guira lajt huililajz bejn xtiidxni;
 huäjsni lo xcälrdimbicha' Dios xhaguibaa.

4

Reni rbicaj lo xnezyuj Dios

¹ Aguniipac Sprit Dyan siääd redxej che chu reni guro'n yälrlilajz, sucuadiajgreni xtidx rebejn ni rusguee näj xtidx rebeñdxab, ² nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxujy te guiblaa: xhetru raceedini. ³ Suluii rebejnre na'c guchnaa bejn, suluiizareni na'c gau bejn guiralaj, niluxh Dios bejnpac redee te xca' rebejn ni rlilajz, ni racebeza didxlii, te gudeedreni xquixtios lo Dios. ⁴ Guiralii reni benchee Dios najc laaca, di riäj] cuälaznu xhi rca'nu che rudeednu xquixtios loj Dios. ⁵ Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälrlilajz, näj yälrluisa'c ni sanuulu. ⁷ Na'c jiulu ni rnii regunaroyeii ni xheti xtzuunni. Bisieed sudzu'tz lastoolu lo xtidx Dios. ⁸ Guxii sajz guinibduxh bejn te gusutijpni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yäl'nabajñre näjza lo yäl'nabajñ ni najc par tejpas. ⁹ Dee najc didxlii, riäj] chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäznu Gueb Dios ni nabajñ, ni ruslaa bejn lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, näjza guluiilu rediidxre. ¹² Di gusaanlu cuälazreni luj sa'csi najclu bi'n; riäj] gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c. ¹³ La] ni guidzunä ro'c, bil] xtidx Dios lo rebejn, balijdxreni, baluiiza xtidx Dios lojreni. ¹⁴ Di gusaanlu reyäl'najn ni baniidx Dios lojlu cheni basuj rebengool ñaareni jejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶ Gopdu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuadiajg xtiidxlu.

5

Xho guibanñäjnu reni rlilajz

¹ Na'c quidxa'lu loj te beṅgool; guninäjni si'c xtaḍlu, balijdx rebi'n si'c bejtzlu, ² balijdx renanbeṅgool si'c xnanlu, balijdx redxap steeb si'c rebisiajnlu con rexhigabsa'c.

³ Gucnäj rebiuud ni guliipac rquiin chu gacnäjreni te chu xhi gaureni. ⁴ Niluxh palga yu' chu biuud yu' xi'nni o xajgni, suguisiedxgaareni guiban̄ nayareni lo xnez Dios, te quiixreni di'n ni nasääbreni lo xtaḍreni, näj xnanreni ni baslaareni, sa'csi ni'c najc laaca, rdxaglaḗzza Diosni. ⁵ Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. ⁶ Niluxh biuud ni nabajn cadedgustisni najc si'c te ni agujt nen̄ dojl̄. ⁷ Basule' rediidxre lojreni te rut gucuaquijdireni. ⁸ Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, beṅguijdxru najcni lo rebejn̄ nani di chalilajz xtidx Dios.

⁹ Di gucuaalu laj rebiuud lo guijtz te gacnäjtuni palga gajdni chu gayojn̄ ijz. Riäjla za gac biuudga te gunaa ni gubannäsa'c chäälni. ¹⁰ Riäjla za gumbee bejn̄ni xcuent redzunsac ni rujnni; palga baslaani rexi'nni, palga badedlaani rolijzni gues beṅ zijt, palga gudiibni ni' rexpejn̄ Dios te si'c guzeṅ xcäl̄nadolajzni, palga racnäjni reni rdejḍ trabajw, palgaza riuni rujnni guira'ti redzunsac.

¹¹ Niluxh na'c gucuaalu laj biuud ni yu' guxiiru ijz sa'csi che guichaglaḗzreni te niguui, siäl̄laḗzreni diidx ni bia'nreni lo Jesucrist, te rlaḗzni guchṅasacreni. ¹² Dxejc siu'reni nen̄ dojl̄ sa'csi rbälazreni rediidx ni bia'nreni che galoo bejnreni xhigab ninuureni lo xtzuum Dios. ¹³ Dxejc sia' lojreni xhet gundireni, rijreni rolijz bejn̄ ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rni-izareni diidx ni di guchaag guiniireni. ¹⁴ Ni'cni rlaḗä rebiuud ni najc dxa'pru guchṅaareni stehuält, chu xi'nreni, fisa'creni rolijzreni te na'c guiniyajreni rebejn̄ ni rdxe'ch lojnu. ¹⁵ Sa'csi yu' gaii biuud ni alagubicaḗ lo xnez Dios sanajlreni beṅdxab.

¹⁶ Pal yu' tej resa'nu ni najc sa'ni te biuud, riäjla gacnäjnini, na'c gusaanni gutajlni xtzuum guidoo, te si'c guidoo sajc gacnäj rebiuud ni rquiinpac chu gacnäjreni.

¹⁷ Rebeṅgool ni rnibesa'c guidoo, riäjla chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxsa'creni la'tu con xtidx Dios. ¹⁸ Sa'csi lo xtidx Dios caj scree: "Na'c gusaällu guijxh ro' gon che rusiani triuu"; si'cza caj stee diidx: "Riäjla gax bejn̄ ni rujn̄ dzuun."

¹⁹ Na'c cucuadiajglu xtidx tej ni rucuaquij te beṅgool palga ruti tio'p, choṅ testiḡw. ²⁰ Niluxh reni sanuu rujntis dojl̄, riäjla gulijdxlureni nez loj rebeṅ guidoo, te näjza laareni guidxe-jbreni. ²¹ Nez loj Dios, nez loj Dad Jesucrist, nez lojza reangl̄ ni gule Dios, rulidxduxhälu chanuulu lo rediidxre, na'c jjuurulu

tej bejn lo sa'ni. Bejn tebloj loj guiraa rebejn. ²² Na'c gusiojb lajzlu gusuflu naalu yejc te bejn, te gacni bejn guidoo palga gajdni guisieed guibaŋsa'cni lo xnez Dios sa'csi lagajc yejclu jiajb rextojlni. Gubicaj lo guiraa dolgujdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

²⁴ Yu' bejn ruzengajc rextojlni ni'c rajcni castiigw, niluxh yu' bejn ni di xtojlni guzengajc. ²⁵ Sigajcsa redzunsac'ni ni rujn bejn; yu'reni ruzengajc, niluxh mase dini guzengajc, digacdi jianxhiga'tzni, sidzujn dxej suzenni.

6

¹ Reni najc mos riäjł cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ² Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzni lo xcälirililajz Jesucrist. Riäjł gunsa'crueni xtzuumni, sa'csi najceni sa'ni loj yälirililajz xten Dios, luxh sanälajzarenini. Rediidxre baluii, basule'.

Yäl nabansa'c näjza te lastoo ni rbedxi

³ Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibaŋsa'c bejn, ⁴ bejn ga rlajz guiliä'p lagajc xpala'nni, niluxh xhet najndini. Si'c te yälgujdx yu'tis yejcn yälguiniab diidx, yälrdiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵ Rujnzani rdilnäj bejn sa'ni. Guiraa redee gun bejn ni aguxhijñ xcäriejnni, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. ⁶ Niluxh yäl nabansa'c näjza te lastoo ni rebedxi, redee sa'cduxh. ⁷ Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riäjł guibalaaznu. ⁹ Niluxh reni rlajz ga'p xhidalduxh meel, riajbreni lo xhigab gujdx, rujnzareneni xhidajl dzuun ni xhet sajcdi, ni rujn daan, ni rusiääz bejn lo yälruhxhñ, lo yälrnitloj. ¹⁰ Sa'csi yäl rinälajzni meel najc xlobaa guiraa redzungujdx. Yu'za bejn ni rladzuxh ga'pni meel, rusaanreni xcälirililajz Dios, dxejc lagajc laareni rujn rdedduxhreni trabajw.

Dzun-huen xten yäl rililajz

¹¹ Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yäl nabansa'clu; te chanajllu yäl rililajz näjza yäl sanälajz; te chanuulu lo yäl rbecdxi lajz näjza yäl nadolajz. ¹² Benduxh dzuun xcuent yäl rililajz Jesucrist, gunazdu'tz yäl nabajn ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn,

te anancheereni. ¹³ Naj rulidxälu nez loj Dios ni rudeed yäl_nabaj_n lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴ rnibeä guzobsa'clu guiraa rediidx ni rniä lojlu, na'c guchaaluni, te na'c guiniya-jreni luj naj niclaza cheni jääd Xtad Jesucristnu. ¹⁵ Sidzuj_n dxejga nani agunii Dios guidzuj_nni. Dios ni najc le' sujn scree sa'csi laatisni najc Dios, najcni reii xten re_reei, rnibeezani reni rnibee. ¹⁶ Laatisni dini guet, nabaj_nni lo bianij cadro rut rajcdi rbig. Nicla te bej_n gajd fii lojni, niclaza gac fiireni lojni. Xtebtis laani riäjl ga'p rebej_n xpala'nni. Laani rajp yäl_rrnibee par tejpas. Sugacni si'c.

¹⁷ Baliidx reni rajp xhidajl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabaj_n, ni runiidx loonu guiralii xhixtenu ni rquiinnu te guibalajznu. ¹⁸ Baliidxreni gunreni dzunsa'c, gundaj_nreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yäl_nasa'c ni guzudzu'tzreni che jääd Jesucrist, te guiniaztzu'tzreni yäl_nabaj_n par tejpas.

Rulidxni Timoteu

²⁰ Timoteu, cuenäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl_naj_n'. ²¹ Sa'csi yu' reni sanuu yäl_naj_nre ni'c banijtreni lo Dios xcuent yäl_rrililajz. Gacnäj Dios luj. Sugacni si'c.

Guijtz Ni Roj Lo Timoteu

Stee guijtz ni baxhal Pabl loj Timoteu

¹ Narä Pabl, nacä apost xten Jesucrist. Dios gule narä, xcuent yäl**na**bajñ ni gudeed Dios loj reni yunäj Jesucrist, si'c ni bia'n diidx. ² Cacuaä guijtzre lojlu, Timoteu, xi'nä lo yäl**ri**lilajz. Rinälazä luj. Rniabä lo Xtradnu Dios näj lo Dad Jesucrist gacnäj luj, gulaslajzreni luj, guscuedxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. ⁴ Rnaj lazä xho biinlu, naj rlazä fiä lojlu te guibalazä. ⁵ Rnaj lazäza yu'pac yäl**ri**lilajz lastoolu si'cni guyu'ni galoo lastoo xmañlu Loida dxejcru lastoo xnanlu Eunice si'cza yu' yäl**ri**lilajzga lastoolu naj.

⁶ Ni'cni rniä lojlu naj, si'cni rcanäj bejn rodäj te di juini, si'cza cuanäduh reyäl**na**najñ ni baniidx Dios lojlu cheni basuä naä yejclu. ⁷ Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu. ⁸ Na'c guitujylu guiniilu rediidx xten Xtrad Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yäl**ru**sule' xtidx Dios si'ctis gacnäj Dios luj. ⁹ Dios ni gulää nurnu neñ dojl, gurejdx nurnu te guibañsa'cnu lojtisni. Gurejdxni nuurnu xhet sa'csi biennu dzuñsa'c, alga sa'csi si'c rlanjñi laani, sa'csi balaslajzñi nuurnu xcuent Jesucrist galooli che gajdli guncheeni guedxliuj. ¹⁰ Niluxh cheni biääd Jesucrist ni badzucaj rextojlñu lo guedxliujre, baluiloj yäl**ru**laslajzga. Jesucrist banitloj yäl**ri**nibee xten yäl**gu**jt. Xtiidxni, ni rusule' xho rbicaj dojl, baluii yäl**na**bajñ, näjza yäl**na**bajñ par tejjas.

¹¹ Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. ¹² Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani saj gapdzu'tzni dzuun ni baniidxni loä dxejli cheni guibi'ni.

¹³ Chanuu guluiilu redidxa'c ni banidxä lojlu. Gubajñza lo yäl**ri**lilajz näj lo yäl**sa**nälajz ni rajpnu sa'csi yu'nu lo Jesucrist. ¹⁴ Cuanädu'tz reyäl**na**najñ ni baniidx Dios lojlu näj Sprit Dxan xtenni ni rbäjz neñ lastoonu.

¹⁵ Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. ¹⁶ Dad Jesucrist gacnäj

reni yu' rolijz Onesíforo sa'csi balti huält biädspaani lazä, dini nitujy sa'csi yu'ä neñ latzguiib. ¹⁷ Che bidzujñni guedx Roma, gudiilpacni narä te bidxälñi narä. ¹⁸ Dad Jesucrist gulaslajz laani che guidzujñ dxej ni guibi' Jesucrist. Luj anajñlu balti dzunsa'c bejnñi che guyu'ni guedx Éfeso.

2

Te ni runsa'c xtzuum Jesucrist

¹ Ni'cni xi'nä, guzutijp sa'csi rulaslajz Jesucrist luj, racñäjñilu. ² Rediidx ni abiejñ diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajç guluiiza diidxga lo stecuaa bejn.

³ Batijp lajzlu tednäjlñu narä trabajw si'c te soldadsa'c xten Jesucrist. ⁴ Di te soldaad gun dzuun ni bejnñi che gajdñi gac soldaad. Rujñni xtzuum bejn ni guleni gacni soldaad, te si'c guspaani lajz bejnga. ⁵ Sigajcza, ni rguijt digacdi xca'ni yälñasa'c palga dini quitsa'c si'c riäjñ quitni. ⁶ Bejn ni rujñ dzuun loniaa nanab xca'ni xcälñasa'cni ganidoo. ⁷ Bejn xhigab xcuent ni rniä lojlu, dxejç sujn Dios gacbeelu guiraani.

⁸ Basnaj lajzlu Jesucrist, te xagdoe toDavid ni huäjz lo rebeñgut. Dee najc xtidx Dios ni rudzucaj dojl, si'c ni rusule'ä lojlu. ⁹ Ni'cni cagutipä lazä cadedä trabajw, caduä caden si'c te bejn ni bagu't sabejnñi. Niluxh digacdi xcaduu xtidx Dios. ¹⁰ Ni'cni cadedä trabajwre te gacnäã reni agule Dios te näjza reni'c chalilajz xtiidxni te guibajñreni lo bianij xten Jesucrist par tejpas.

¹¹ Guliiduxh najc diidxre;
palga agujtñu con laani, sibaññäjzanu laani.

¹² Palga rdejñnu trabajw, sinibenäjzanu laani.
Palga dinu guicä'p numbeenuni, dizani guicäjç numbeeni nuurnu loj Xtadni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

Te bejn nani abia xtzuumni

¹⁴ Basnaj lajz rebejn xcuent rediidxre, gunibee lojreni nez lo Dad Jesucrist na'c tilñiidxreni sa'csi sa' diidxga xhet sajcdini, ruxhñtisni reni riendiajgñi. ¹⁵ Batijp lajzlu te guidzujñlu lo Dios si'c te bejn ni runsa'c dzuun, xheti xhicient guitujyлу, sa'csi ruluisa'cpaclu xtidxliitis Dios. ¹⁶ Gulälaz yälñriyaj näjza xhidalduxh diidx ni xhet sajcdi, sa'csi renani rucua diajç rediidxga riajbrureni lo redolguijdx. ¹⁷ Luxh diidx ni ruluiireni suxhñgajcni lastoo bejn si'c rxhññlajz tiejxh bejn. Ni'c casiajç Himeneo näj Fileto. ¹⁸ Abanijtreni lo didxlii. Caniireni ala huäjs bejn lo rebeñgut. Si'c cagusiejchreni lajz gaii rebejn

ni rilajz. ¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejn̄ni"; nājza "Nanab guibicajreni lo redolguijdx, guiraa reni ahuililajz xtidx Jesucrist."

²⁰ Neñ te yuro, xhet ganaxdi cos or̄ nājza cos plat yu'. Yu'za cos yajg nāj cos bajn̄; yu'reni najc parsi te laniro, yu'za reni rquiin guixe-guixee. ²¹ Sigajcza te bejn̄ ni rlajz gun dzuunro xten Dios, riāj̄l guibicajni loj redolguijdx ni xhet sajcdi. Dxejcti Dad Jesucrist sacnājni te gunni redzunro xtenni.

²² Gubicaj lo redzunguijdx ni rujn rebejn̄, huinuu yäl̄nabansa'c, yäl̄rililajz, yäl̄sanälajz, gulecdxiza lajzlu nāj reni rujn xtzuun Dios, naya lastooreni rbedx-rniabreni lo Dios. ²³ Na'c jiulu rediidx ni ruluii rebejn̄ guedxliuj. Anajnlu rediidxga rujn rdil̄nāj rebejn̄ sa'ni. ²⁴ Niluxh te xmos Dad guibaa di riāj̄l guchaagni reni rdijl̄; riāj̄l gacni beñsa'c loj guiraatis bejn̄. Riāj̄lza guluisa'cni; riāj̄lza gutip lajzni che xhet laadi rujn bejn̄ lojni. ²⁵ Guideb yäl̄nadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacbeereni didxgulii, ²⁶ te jianij xcäriejnreni te guiriireni ladzn̄aa beñdxab, te gunreni ni rlajztis Dios.

3

Xho gac rebejn̄ neñ redxelult

¹ Nanab gacbeelu neñ redxelult sidzujn̄ dxej tedtu trabajw. ² Sa'csi su' bejn̄ ni chanälajz lagajctis laani, ni rinälajz xmeeltisni, bejn̄ ni rniyaduxhtis, bejn̄ ni rchaglajz chä'p xpala'ntisni, bejn̄ ni rniyaj Dios; su' bejn̄ ni di gusoob xtidx xtadreni, su' bejn̄ ni di gudeed xquixtios lo Dios, su' bejn̄ ni najc beñguijdxctis. ³ Neñ redxelultga su'za bejn̄ ni di chanälajz sa'ni, bejn̄ ni di lajzni jiāj̄l, bejn̄ ni rusgueduxh; bejn̄ ni digacdi guscuääz dolguijdx ni rujnreni; bejn̄ ni guyalazduxh; bejn̄ nani ruo'n guira'ti dzunsa'c. ⁴ Neñ redxelultga su' bejn̄ ni ruto' sa'reni; bejn̄ ni di guidxejb gunreni ni riajbtis yejcreni, bejn̄ ni rchalosi najcreni beñsacduxh; bejn̄ ni rchaglajzru gun nani rchaglajz tiejxhreni lacuaa chanälajzreni Dios. ⁵ Neñ redxelult su' bejn̄ ni najc si'c beñguidoo, ascanu rusoobreni xtidx Dios, niluxh naadireni xca'reni yäl̄nadip nāj yäl̄rnibee xten Jesucrist ni ruchaa lastoo bejn̄.

Na'c guchaaglu rebejn̄ga, ⁶ sa'csi loj sa' bejn̄re yu' reni richu' rolijz bejn̄, sasgueereni regunanayääl ni rujn dojl̄. Regunaare rinuu rujreni ni rlajztis tiejxhreni, rujnreni guiraloj. ⁷ Rebejn̄re rsiedduxh didxcoob, niluxh di didxlii xten Jesucrist jiu' yejcreni. ⁸ Sigajcni gujc Janes nājza Jambres ni bidxe'ch loj Moisés, sigajcza najc rebejn̄re, cadxechnājreni didxlii xten Jesucrist, najcreni bejn̄ ni aguxhijn̄ xcäriejnreni,

luxh direni gacbee xtidx Dios, direni ga'p yälrlilajz. ⁹ Niluxh direni chanuu xchej, sa'csi huenliisi suhüi guiraa rebejn najcreni benguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ä, näj xho nabañä, näj xhicuent runä dzuunre, lo xcälrlilazä, lo xcälñadolazä, lo xcälñanälazä, näjza xho batip lazä. ¹¹ Najnlu xho basacsíreni narä gudedäza trabajw ladzña rebejn neñ reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa re trabajwga. ¹² Guliduxh guiraa reni rlajz chutis loj Jesucrist sidejdpacreni trabajw. ¹³ Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

¹⁴ Luj huinuu guzudzu'tz loj ni abisieedlu, nani ahuililajzalu, luj anajnlu chuni'c baluini lojlu. ¹⁵ Cheni biuuxlilu racbeelu xtidx Dios, ni ruluiilu xho guiriilu neñ dojl te xca'lu yälñabajn par tejpas sa'csi rililajzlu xtidx Jesucrist.

¹⁶ Guiraa rediidx xten Dios ni caj lo guijtz, lagajc Dios bandidxni te xcajni lo guijtz.

Guiralii xtidx Dios najc laaca te guluii nuurnu xhini'c najc didxlii,

te gacbeenu xhi najc didx-xhii,

te gacbeezanu xho riäj] guibañsa'cnu.

¹⁷ Te susiñ niguii ni najc xpejn Dios,

te gac gunni guiraa redzunsa'c ni riäj] gunni.

4

¹ Rulidxälu nez lo Dios näjza nez lo Dad Jesucrist ni jiäd si'c reii te gunni yälguxhtis loj reni nabajn näjza loj reni agujt; rniäza dee lojlu: ² basule' xtidx Dios, gususiñ lo Dios mase xhitis or. Baluii reben dojl, gudilñäj reni di rlajz guzobdiidx xtidx Dios, balidxnäj resa'tu xtidx Dios. ³ Sa'csi sidzujñ dxej di rebejn guidxagljajz gucuadiajg yälrluisa'c; alga diidx ni najc lagajc si'c najc xhigabreni rlajzreni jiendiajgreni, ni'cni siguilreni xhidajl bejn ni ruluii te guisieedreni ganax ni rlajzreni gucuadiajgreni. ⁴ Susäuureni diajgreni te di jiendiajgreni xtidxlii Dios; alga xhitis diidx gucuadiajgreni. ⁵ Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextojlreni, beñsa'c xtzuunlu.

⁶ Sa'csi narä suga'ä ree te ju'treni narä, asiäddzujñgajxh dxej ni guetä. ⁷ Agulujx bacuaä si'c te soldaad ni huicuasa'c lo guer, agulujx xnezyuä, gopdzutzä yälrlilajz. ⁸ Naj cabäzä xca'a yälñasa'c ni guniidx Dad xhaguibaa, suniidxni yälñabañsa'c.

Dad najc juejz ni runsa'c yälgu_hxhtis. Niluxh xhet loätis guni-
id_xni ya_naba_nsa'c. Sudeednini loj guiraa rebej_n ni catiplajz
cabäjzreni dxej cheni guibisac Jesucrist.

Rediidx ni räjpni lojtis Timoteu

⁹ Basaaga lajzlu jiädhuigajlu narä; ¹⁰ sa'csi abasa'n Demas
narä. Sanälajzruni redzuun xten guedxliujre, naj sääni guedx
Tesalónica. Baxhalä Cresent sää lo reguejdx ni re' nez Galacia.
Baxhalä Tito sää guedx Dalmacia. ¹¹ Xtebtis Lucas suganäj
narä. Gudiil Marcw te jiäd_näluni sa'csi sajc gacnäjni narä lo
xtzun Dios. ¹² Tíquico baxhalä sää guedx Éfeso. ¹³ Cheni jiäd_dlu,
jiäd_nälu ca'p ni basa'nä guedx Troas rolijz Carpo, naj rexlibrä;
di jiälza lajzlu rexquitzä. ¹⁴ Alejandro, ni najc gubetzguiib,
basacsíduxhni narä. Dios quiixni sigajcni bejn_ni. ¹⁵ Luj bahuii
te di gunni xhi gunni luj sa'csi rdxe_hduxhni lo xtidx Dios ni
rusule'nu.

¹⁶ Galoo che bazecä diid_x lo reguxhtis, rut gucnäjdi
narä; guiraareni gulälazreni narä. Rniabä lo Dios na'c
guchagcuentni nani bejnreni. ¹⁷ Niluxh Dad ni yu' xhaguibaa
gucnäj narä, baniid_xni yäl_nadip te gujc guniä guiraa xtidx Dios
te biejn diajg reni digac xpe_n Israel xtidx Dios. Luxh gucnäj
Dios narä gulääni narä ladz_naareni, si'c ro' te beedz. ¹⁸ Susläani
narä loj guiraa redol_guijdx, saptzu'tz_ni narä, sigucheezani
narä te chunääni lo xcäl_rnibeeni xhaguibaa. Lojni col_deed
xquixtios, col_gand_uxhni par tejpas. Sugacni si'c.

Rudeedni xtixtios lo reexamigwni

¹⁹ Badeed xtixtios lo Prisca näjza lo Aquila näjza loj resa'
Onesíforo. ²⁰ Erasto bia'n guedx Corinto, niluxh basa'nä
Trófimo guedx Mileto sa'csi cayacxhuuni. ²¹ Jiädgajlu ansde
guisloj rebäinajl. Eubulo, Pudente, Lino, Claudia, näjza guiraa
rebejtznu ni yu' lo Jesucrist ree, ruxhal_reni xtixtios lojlu.

²² Dad Jesucrist chunäj xaimlu. Dios gacnäj guiraatu. Sug-
acni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnäã guiroobru xcälirililajz reni agule Dios, te gacbeezareni didxlii ni rusia xcälñabajñnu. ² Cayunlojzanu yälñabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³ Niluxh che bidzujñ dxej ni agulexгаа Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu neñ dojl. ⁴ Cacuaã guijtzre lojlu, Tito, xi'nä lo yälirililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu neñ dojl, gacnäjäreni luj, gulaslajzreni luj, guscuedcxizareni lajzlu.

Dzuun ni rujñ Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo neñ tejga reguejdx si'cni gunibeä gunlu. ⁶ Gule bengool ni nabansa'c, te na'c guiniyaj bejñreni, nanab gacni chääl tejtis gunaa, riäjłza chalilajz rexi'nni, na'c guibajñreni si'ctisni rłajz tiejxhreni, jiureni xtidx xtadreni. ⁷ Niguii ni rnibee guidoo rcanäj rexhixten Dios, ni'cni riäjł ga'pni te yälñabanya. Na'c gacni te beñnajd, na'c gacni te beñnadxecha', na'c gacni beñgu, na'c gacni te bejñ ni rdxagdijł bejñ, na'cza xca'ni meel ni dini niunsa'c gaan. ⁸ Nanab gacni te bejñ ni rudedlaa rolijzni jia'n beñ biooz, riäjłza chanälajzni dzunsa'c, gac nasinni, chu xcäriejñni; guibansa'cni nez lo Dios, sigajcza nez lo rebejñ, guibanñayani nez lo Dios, na'c gunni nani rłajztis tiejxhni. ⁹ Riäjł chanuutisni lo didxlii ni bisieedni te gac gulidxnäjzani bejñ xtidx Dios, te guzejcni diidx lo rebejñ ni rniyaj xtidx Dios.

¹⁰ Yu' xhidajł beñguijdx, bejñ ni rnii diidx ni xhet sajcdi, näjza xhidajł bejñ ni rnii didx-xhii ni rusguee. Näjza lo rexpen Israel ni riuduxh leii yu' sa' bejñre. ¹¹ Sa' redee ni nanab jiäu ro'ni, sa'csi rusgueereni xhidalro sa'reni, ruluiireni ni di riäjł guluiireni te gunreni gaan meel.

¹² Te niguii ni siääd lagajc lajdxreni guniini xcuent lagajc reben lajdxni: "Rebejñ ni najc cretenses rñiduxhreni didx-xhii, niälajzaren. Rłajzreni gausa'ceni niluxh di rłajzreni gunreni dzuun." ¹³ Niluxh guliini, ni'cni gudilñajreni, te chalilazsa'ceni xtidx Jesucrist, ¹⁴ te na'cruza gucuadijgreni rediidx ni rdxällajz rexpen Israel, ni claza rediidx ni rnibee bejñ ni gulälaz didxlii.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnliireni nacdxuudx. ¹⁶ Naj rujnsireni si'cni numbeereni Dios, niluxh ni rujnreni huenliisi ruzen direni nililajz, najcreni benguijdx, direni jiu xtidx Dios, digacdi gunreni nicla tej dzunsa'c.

2

Rulijdx Pabl Tito guluisa'cni rebejn

¹ Niluxh luj guniitis rediidx ni ruluisa'c. ² Baluui rebengool gac beña, bejn ni yu' xcäriejnni, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yälirililajz, yälsanälajz, näjza ni rbecdxi lajzni. ³ Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxxsa'c ⁴ te guluiireni regunaa dxa'p chu xcäriejnreni, chanälajzreni chäälreni näj rexi'nreni. ⁵ Gacreni nasin, guibanayareni, xcanäsa'creni rolizreni, gacreni beñsa'c gusoobreni xtidx chäälreni, te rut guiniyajdi xtidx Dios.

⁶ Sigajcza gojz lo rebi'n riäjł chu xcäriejnreni. ⁷ Luj guzuj te fiireni xho riäjł gun bejn dzunsa'c. Che guluiilureni, saru baluui guiraa reni riäjł guluiilu. ⁸ Didxxsa'c gunii te rut gacdi guiniyaj diidxxga, te si'c guituj chutis ni rlaiz guidxe'ch lojtu te xhet xhi didxguijdxdi gac guiniireni xcuentlu.

⁹ Balijdx remos te gusoobreni xtidx xlamreni, te gusa'creni dzuun, na'c guzejcreni diidx lo rexlamreni. ¹⁰ Na'c cuanreni alga guibanäsa'creni te guluii xcälñabajñreni lacti sacduxh xtidx Dios ni basläa nuurnu neñ dojl.

¹¹ Sa'csi abiääd xcälracnäj Dios, abiädnäni yälrusläa neñ dojl lo guiraa rebejn. ¹² La xcälracnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibanäsa'cnu, te chonälajznu Dios lo guedxliujre. ¹³ Ruluiizani nuurnu cuääznu guidzujñ dxej ni soob xtiidxni ni basa'nni loonu xcuent dxej che jääd Gueb Dios näj Xtrad Jesucristnu ni rusläa nuurnu lo dojl. ¹⁴ Laani gujtni te gusläani nuurnu lo guiraa redolguijdx, te basiani nuurnu te gacnu xpejnñi, gaczanu te bejn ni rdxagälajz rujn dzunsa'c.

¹⁵ Diidxxre gunii, balijdx, basule' si'c te beñnajñ. Di gusaanlu cuälazreni luj.

3

Ni riäjł gun reni rililajz

¹ Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenen gunreni xhitis

dzunsa'c. ² Na'c guiniyajreni bejn, cuedxireni, gaczareni bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagljaztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu.

⁴ Niluxh che baluiloj xcäl_rulaslajz näjza xcäl_rinä_lajz Dios ni ruslaa nuurnu näjza reben_guedxliuj lo dojl, ⁵ dxejc baslaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Baslaa Dios nuurnu lo dojl sa'csi bidiib lastoonu, te biäjt xtoj_lnu te najcnu ben_coob, sa'csi bascoobza Xsprit Dxan xten Dios xcäriejnnu. ⁶ Baniidx Dios cuääzpac Xsprit Dxanni nen lastoonu xcuent ni bejn Jesucrist ni baslaa nuurnu, ⁷ te sa'csi rujn Dios cuent najcnu ben_sa'c sa'csi abadzucajni xtoj_lnu, naj sica'nu xcäl_nasa'cnu ni cabääznu, nalaaznu yäl_nabaj_n par tejpas.

⁸ Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhrene ganax dzunsa'c. Rediidxre najc laaca, sacduxhrene loonu.

⁹ Naj basaan rediidx ni najc xlia'si, rediidx ni gunii reben galoo, yäl_rdi_l_diidx xcuent xleii to Moisés sa'csi guiraa rebieyjga xhet sajcdini, xhetza huendi rujnreni.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, col_cuääni lojtu. ¹¹ Sa'csi anajntu sa' bejn_ga abaro'nni, agulälazni didxlii, lagajc xtoj_lni sujn nitni.

Diidx ni bacuaani lojtis Tito

¹² Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajl.

¹³ Gucnäduhx licenciaad Zenas näjza Apolos, badeed guiraa ni rquiinreni te chanuureni xpiajreni, te xhet jäädxdireni.

¹⁴ Suguisieedza resa'nu gunreni dzunsa'c te gacnäjreni che guiqiinnureni, te na'c guibaj_nreni xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl_rililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ² Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu. ³ Dios Xtradnu näj Dad Jesucrist gacnäj la'tu, guscuedxireni lajztu.

Xcäl̄sanälajz näj xcäl̄rililajz Filemón

⁴ Rudedä xquixtios lo Dios xcuent luj che rniä lo Dios. ⁵ Abiejn diagä xcuent yäl̄rinälajz näj yäl̄rililajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tioobru xcäl̄rililajzlu lāl̄ ni rusule'luni, te gacbesa'creni xcuent guiraa reyäl̄nasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcäl̄rnibee Jesucrist sajç guiniä gunlu xhitis ni riäj̄l̄ gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä beñgool, yu'ä latzguiib xcuent Dad Jesucrist. ¹⁰ Canabä xcuent Onésimo ni najç si'c xi'nä, sa'csi huililajzni xtidx Dios ni basule'ä lojni ñaj ni yu'ä latzguiib.

¹¹ Galoo, dini niajç beñsa'c lojlu, niluxh ñaj sacnäduxhni guiro'pnu. ¹² Ruxhañsacäni lojlu, te xcasacluni stehuält si'c ni najräni xca'lu, sa'csi siädhäni lojlu ascanu lagajç lastoä. ¹³ Narä rlazä niannäjni narä xcuentlu, te niacnäjni narä ñaj ni yu'ä latzguiib sa'csi basule'ä xtidx Dios. ¹⁴ Niluxh di rlazä ni-unä si'c palga luj dilu xcäjb gacni si'c. Dina guinia gacnäjpac̄lu narä si'c gojn. Narä rlazä gunluni sa'csi rlanjpac̄lu gacni si'c. ¹⁵ Pet gubicaj Onésimo lojlu tio'p-choñ dxejsi. Niluxh ñaj xca'luni te chuni lojlu par tejpas. ¹⁶ Ñaj xhetru si'c di te mos chuni lojlu. Ñaj sajcruni loj te mos. Ñaj najçni si'c te betzbiidlu ni sanälajzlu. Narä sanälazduxhäni, niluxh luj riäj̄l̄ chanälajzruluni, xhet si'c chutis te beñ, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajç narä. ¹⁸ Palga yu' xhi bejnni lojlu o palga yu' xhi nazääbni lojlu, basa'nni lo xcuentä. ¹⁹ Lagajç narä, Pabl abacuaä guijtzre con ñaä con xleträ, narä siguixäni. (Te na'c guiniä nazääbzu)

lagajc luj loä.) ²⁰ Betzä, ben_laa hueenre narä si'c te ni sanälajz Dios te guspaalu lazä nez loj Dad Jesucrist.

²¹ Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²² Sigajcza basuchee te lajt cadro jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

Ruxhal_{ni} xtixtios lojni

²³ Epafra_s ruxhal_l xtixtios lojlu. Laani yunäjni narä latzguiib, sa'csi guniizani xtidx Jesucrist. ²⁴ Marcw, Aristarco, Demas, näj Lucas, ni racnä_j narä lo dzuunre, ruxhal_zareni xtixtios lojlu.

²⁵ Dad Jesucrist gacnä_j la'tu. Sugacni si'c.

Te Guijtz Nani Biääd Loj Reben Hebree

Agunii Xi'n Dios xtidx Xtradni

¹ Neñ redxe galoo garen-garen mood guninä j Dios retoxtadgooloonu. Xhidajlza huält guniini por reniguii ni bacuaa xtiidxni. ² Neñ redxejre aguniini loonu por Xi'nni, lojzani badeed Dios yälrnibee guncheeni guedxliujre, badeedzani guira'ti lojni. ³ Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrnibee si'c te bejn ni riannäj xhixten Xtradni. Lajzani sajcro lo relaj rexangl Dios. ⁵ Sa'csi Dios di niäjb loj nicla tej rexangl ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl ni:

Narä gacä xtradni, laani gacni xi'nä.

⁶ Niluxh che biädnäni Xi'n xtebni lo guedxliuj, guniini:

Guiraa rexangl xten Dios, ¡Colgañ Xi'nä!

⁷ Che gunii Dios xcuent rexangl ni räjpni:

Rujnni ruxhuñ rexangl ni si'c bej, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabajnlu par tejpas;

xcälrnibeelu par tejpas najc te yälrnibesa'c.

⁹ Ahuinälajzlu xhigabsa'c, dipaclu nichagljaz xhigabguijdx, ni'cni Dios ni najc Xtioslu, baniidxru yälrbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti,

bencheelu cad soob guedxliuj, ñaazalu bencheelu reguibaa.

¹¹ Laareni sinitlojreni, niluxh luj nabajnlu par tejpas.

Guiraareni siujx si'c riuix te lajd.

¹² Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

¹³ ¿Gucxha räjp Dios lo te xangl ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

14 Guiraa rexangl Dios najc sprit, ruxhal Diosreni te chay-acnäjreni rebejn ni xca' yäl_nabajn par tejpas.

2

Na'c gusaanni diidx ni rus_laani lo dojl

1 Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. 2 Anajntu aguzojb diidx ni gunii rexangl Dios nen redxe galoo. Luxh reni di nusoob diidxga bejnreni dojl, dxejc bateed Diosreni trabajw. 3 ¿Xho gac guibicaj xcäl_naj Dios yejcnu palga dinu jiu rextidx Dios xcuent yäl_{rus}läa lo dojl, ä? Ni Dad, Jesucrist basa'n diidxga lo rexpejn_npacni, dxejc laareni basule'reni rediidxre loonu. 4 Niluxh Dios baluui najc diidxga guliipac sa'csi bejn_ni reseen, näjza yäl_rdxeloduxh, näjza xhidajl remilagr_w. Badeedzani Sprit Dxan xtenni loj renani ahuililajz xtiidxni te gun tejegareni garen-garen xtzuumreni si'ctis ni r_lajz Dios gunreni.

Nani guläxtiej yäl_{rus}läa bejn lo dojl

5 Di Dios gudeed yäl_rnibee lo rexanglni te guinibeereni guedxliucoob ni cagusä'tnu _naj. 6 Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

7 Nagabsi dxej guxiiru saj_ni lo reangl xhaguibaa,

dxejcti badeed_saclu xcäl_nasa'cni,

badeed_saclu xpala'nni,

badeedzalu yäl_rnibee lojni te guinibeeni guira'ti ni bencheelu.

8 Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh _naj ruhuiinu gaj_ni guinibee guiralii ni'c. 9 Alga rhuiinu Jesucrist, ni bejn Dios guxiiru saj_ni lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yäl_rdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajw_{du}xh, guj_ni lacuaa niejtnu.

10 Dios benchee guiralii ni yu' lo guedxliujre, _najli rnibeeza Dios guira'ti. Luxh Diosre r_lajz chanäni xhidajl xi'nni xhaguibaa, ni'cni baxhal Dios xi'_npacni Jesucrist te guläxtiejni yäl_{rus}läa bejn lo dojl che gudejdni trabajw_{du}xh lo cruzj.

11 Sa'csi Jesucrist, ni rujn chasanäj bejn te yäl_nabanya, näjza reni risanäj yäl_nabanya, tejtis najc xtadreni. Ni'cni di Xi'n Dios guitujy guiniini lojreni: "betzä". 12 Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

13 Räjpzani:

Sibäzä gacnäj Dios narä.

Ste lajt guniini:

Bahuii loä näjza rexi'nä ni baniidx Dios loä.

¹⁴ Te famil najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c benguedxliuj, gujtzani te gujc bejnii gunijt nani rnibee yälgujt, nalajznu, bendxab. ¹⁵ Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajjreni, lacti rdxejbreni yälgujt. ¹⁶ Guliini dini niääd te gacnäjni reangl xten Dios, biäädni te gacnäjni guiralii rexajg toAbram. ¹⁷ Ni'cni gujcnii si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquuilza bendxabni niujnni dojl, ni'c naj sajc gacnäjni renani ruquuil bendxab gun dojl.

3

Jesucrist sajcru loj Moisés

¹ Ni'cni bejtznu, reni anabaṅsa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajcru, rusule'zani xtidx Dios xcuent nani ahuililajznu. ² Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. ³ Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. ⁴ Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj. ⁵ Basoob Moisés diidx si'c te mos, cuanäjni rexpen Dios si'cni gunibee Dios gunni, te baluini xho gac redzuun ni gajd gac dxejc, luxh naj agujc redzuunga. ⁶ Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rnii Sprit Dxan xten Dios:

Naj, palga jiendiajgtu xse'ni,

⁸ na'c gun-najdttu lastootu si'c bejn rebejn ni bidxechnäj Dios che cuansajreni lo reyubijdz.

⁹ Ro'c bidxechnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

¹⁰ Ni'cni lał ni cadxe'ch Dios loj rebejnğa, bejn Dios xhigab: Sujiannäjreni xhigabguijdxreni, dina gusanä jiu'reni xcälrusilazä.

11 Ni'cni bidxe'ch Dios lojreni,
bejn Dios te xhigabduxh,
di rebejnğa jiu' te gusilaznäjni.

12 Bejtznu, colnatiro andi chu tejtı rujn xhigabguijdx, rıajz guibicaj lo Dios, ni nabajı par tejpas, sa'csi dini chalilajz xtiidxni. 13 Ni'cni colgulijdx resa'tu guixe-guixee, laga najcni nadxej; te di chu tejtı gacnajd lastooni xcuent reyälrusguee xten redojl. 14 Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. 15 Si'c caj lo guiitz:

Nadxej, palga jiendiajgtu xse' Dios,
na'c gunnajdıtı lastootu si'c bejn rebejn ni bidxechnäj Dios lo reyubijdz.

16 ¿Chu reni'cni bidxechnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä? 17 ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? 18 ¿Chu loj räjpni dipacreni jiu' lo xcälrusilajzni? Loj reni di nusoob xtiidxni. 19 Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

4

1 Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. 2 Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxga sa'csi bacuadiajgrenini niluxh direni nililajzni. 3 Luxh nuure ni ahuililaaznu siu'nu lo yälrusilajzga; caj lo guiitz gunii Dios rediidxre:

Ni'cni bidxe'chä lojreni, benä te xhigabduxh,
di rebejnğa jiu' te gusilaznäjreni narä.

Mase abaluuxni xtzuunni cheni birixtiejli guedxliuj. 4 Sa'csi loj stee guiitz caj diidx ni guniini xcuent dxej ni rusilajz bejn: Xho'p dxej bejn Dios xtzuunni, dxejcti basilajzni tebdxej.

Xhet bejndini dxejga.

5 Stehuält guniini:

Di rebejnğa jiu' te gusilaznäjreni narä.

6 Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni.

7 Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdıtı lastootu.

⁸ Paru nudeed Josué yälrusilajzga loj rexpen Israel, diru Dios ninisac xcuent stee dxejre. ⁹ Naj ria'nza te yälrusilajz par rexpejn Dios, ¹⁰ sa'csi nani riu' lo xcälrusilaznäj Dios, rusilajzzani lo xtzuunni sigajc basilajz Dios lo xtzuunni. ¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gacnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räazni nez nen redzujt näj yojb. Sigajcza xtidx Dios räaz nez cadro rlia' sa' xsprit näjza xaim bejn. Ruluiiza xtidx Dios rehxigab ni yu' lastoo bejn, näjza redzuun ni rlajz lastoo bejn gun. ¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴ Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. ¹⁵ Xpixhojznu ni sajcru sajc gulaslajzni nuure te di jiajbnu lo dojl, sa'csi laani sigajcza gudejdni trabajw, baquiiil bendxabni te niujjni dojl, niluxh dini niujn dojl. ¹⁶ Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

5

¹ Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlrēni nez lo Dios. ² Rdejdza bixhojz trabajw sigajc beḡgedxliuj, ni'c sajc ga'pni yälḡadolajz loj rebejn nani nayääl näjza reni abanijt lo Dios. ³ Niluxh sa'csi näjza laani rujjni dojl, nanab gudeedni guidxaa lo Dios te jiäu lo rextojlḡni sigajc rudeedni guidxaa lo Dios te riäu lo xtojḡ rebejn.

⁴ Rut sajcdi gac bixhojz xcuentcāni. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón. ⁵ Si'cza di Jesucrist niajc bixhojz ni sajcru xcuentcāni. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷ Cheni gubajḡ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucājni lo yälgujt; Dios bacuadiajg xtiidxni sa'csi huiälajz Jesucrist Dios.

⁸ Ni'cni Jesucrist mase najcni Xi'n Dios bisieedni basoobni

diidx luxh näj ni'c gudejdni trabajw. ⁹ Che bidzujn dxej baluuxni guiraa redzuun ni rlanj Dios gunni, laani gujcn nani rudeed laa bejn nani rusooob xtiidxni lo dojl par tejpas ¹⁰ sa'csi Dios gulälajni bixhojz ni sajcro, gujcn bixhojz sigajc gujc Melquisedec.

Rxhunriezgw gusa'nni xcärlililajzni

¹¹ Rlanjnu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee. ¹² Agujc xchej huililajztu rediidx xcuent Jesucrist. Ariäjł gusule'tu rediidxre naj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rlanjztu yäsactu le'ch lacuaa gautu yäjt, bääł; nalajznu, redidxnagajn xten Dios. ¹³ Reni najc si'c báz, rä' le'chtis, direni gumbesa'c redidxxsa'c xten Dios. ¹⁴ Niluxh reben guyajł rajw yäjt. Sigajcza redidxnagajn xten Dios najc par rebejn ni aguyajł lo xtidx Dios, renani ayu' xcäriejnni, arumbeereni nani najc dzunsa'c, nani najcza dzungujdx.

6

¹ Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechłajz, xcuent redzuun ni rujn rejł bejn, näj yälřililajz xtidx Dios. ² Na'c guluiitisnu xcuent yälřobnis, näj yälřudzubnaa yejc bejn, näj xcuent yälřbajnsac rebengut, näj xcuent yälřuxhtis par tejpas. ³ Alga do'o guisieedru xtidx Dios te churu xcäriejnnu, palga si'c guniidx Dios jiennu.

⁴ Yu' bejn ni abianij xcäriejnni, ni acua' reyälřnasa'c ni rudeed Dios, ni rbäjz Sprit Dzan xten Dios neñ lastooreni, ⁵ luxh bidxaglajzreni xtidx Dios näj yälřnibee xten Dios ni churu jiääd. ⁶ Palga laareni guibisacreni lo sa' yälřnabajn ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucuasacreni Xi'n Dios lo cruz, nalajznu susanxtujyreni Jesucrist nez loj rebejn. ⁷ Ben guedxliuj ni biejn diajgni najc si'c najc yuj ni rä' nis che riajbtis nisguij. Palga yujga gudeed yälřnasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujñ rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajnnu huililajztu xtidx Jesucrist näjza xtiidxni ni rusłaa lo dojl. ¹⁰ Sa'csi Dios najc ni rujñ yälřuxhtissa'c, diza łajzn jiäl ni rujntu la'tu näj yälřsanälajz ni rajptu par laani che racnäjt rebejztu lo yälřililajz, luxh guixe-guixee si'c rujntu. ¹¹ Naj rlanjnu tejjatu chanuu ga'p lagajc

yälrbalajzre dxe lultli, te gac guiraa ni cabäjztu. ¹² Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yälrlililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, gu-niini por lagajc laani sa'csi ruti stee ni sajzru lojni. ¹⁴ Scree gu-nii Dios: "Guliä sacnää luj, sunidxäza xhidajl xi'nlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni rniliipac bejn te diidx, rniireni diidxga por laj ste'ca bejn ni sajzru lojreni, sas che rusä'treni laj bejnğa xhetru yu'di xhi gunreni bieje. ¹⁷ Rlajz Dios gacbeepac rexag-doo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. ¹⁸ Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xti-idxni, rudeedzani yälrbedxilajz loj renani gubig-guxun lojni, loj reni sanuu loj yälrlililajz xtiidxni nani abaniidxni loonu por lagajc lajni. ¹⁹ Laa ni'cni cabääznu ni rusudzu'tz lajznu si'c duu-guiib con ancl ni rniazdu'tz te barcw. Si'c rusudzu'tzni lastoonu te jionnu cadro yu'ni detz ladró. ²⁰ Lagajc ro'c biu' Jesucrist xcuent nuure, te galooli baxhalni xnez Dios loonu, te gujcnı bixhojzro par tejpas si'c gujzca bixhojz nani laa Melquisedec.

7

Jesucrist najc bixhojzro si'c najc Melquisedec

¹ Galoo che gujc Melquisedec reiı xten guedx Salem, gu-jcni bixhojzro xten Gueb Dios. Che gubi' Abram che gu-lujx guer cadro bagu'tni rereiı ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. ² Dxejcti bejn Abram tzuu cuaa guiraa ni bejnıi gaan, te badeedni tej cuaani loj Melquisedec. Laj Melquisedec säloj "reiı ni runsa'c yälğuxhtis", dxejctiru reiı xten guedx Salem sälojzani "reiı xten yälrbedxilajz". ³ Baluiılojni lojreni, niluxh dinu gan chu najc xtdani, niclaza chu najc xnanni, niclaza chu najc resa'ni. Dizanu gan guc gojlnı niclaza guc gujtnı. Gujcnı si'c najc Xi'n Dios. Najctiszani bixhojzro par tejpas.

⁴ Naj colhuiı, lacti te bensa'c, te benro najc Melquisedec. Lojni badeed toxtadgoldoonu Abram tejga ni sajzru lo tejga tzuu ni bejnıi gaan. Luxh Abram najc bejn ni sajzru lo rexpejnı. ⁵ Leiı xten Moisés, rnıbee xca' rebixhojz ni najc xfamilı Levı te cuaa lo sa'reni si'c ni badeed toAbram loj Melquisedec, mase najcreni rexagdoö Abram. ⁶ Niluxh di Melquisedec gac xfamilı Levı. Niluxh badeed Abram te cuaa xhıxtenni loj Melquisedec. Dxejcti benle'ni Abram ni biannäj

xtidx Dios. ⁷ Naj rut sajcdi guinii garenca, sa'csi nani sajcrunle' yejc nani guxiiru saj. ⁸ Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. ⁹ Ni'cni saj guiniinu xcuent Leví nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec. ¹⁰ Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab näjza leiiga guidxaa. ¹³ Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. ¹⁴ Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini niajc bixhojz si'c rnii releii ni guyu' dxejc. Laani gujcnii bixhojz xcuent yälrnibee ni najc par tejpas, ni rut gacdi gutzujl. ¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujcnii, di niajcdi niujn bejn si'cni rniini. ¹⁹ Di xleii toMoisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni. ²¹ Stecuua rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:

“Luj najclu te bixhojzro par tejpas,

lagajc si'c gujc Melquisedec.”

²² Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés. ²³ Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz.

²⁴ Niluxh Jesucrist rajpni yäl nabajn par tejpas, naj najczani bixhojz par tejpas. ²⁵ Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajni par tejpas te canabni lo Dios xcuent laareni.

²⁶ Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. ²⁷ Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejdni trabajw, bejnnini cheni cuajni lo cruzj, baxhe'ni xtiejnni xcuent nuure, gujtni. Si'c gudijxni xtojlnu par tejpas. ²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

8

Jesucrist najc nani rusiäjl diidx

¹ Diidx ni sajcro loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. ² Nen yu' ni najc dxan, nen guidoo ni benchee Dios yu' bixhojzre, xhet nendi guidoo ni runchee reben lo guedxliuj. ³ Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios. ⁴ Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn si'c ni rnibee xleii Moisés. ⁵ Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: "Bahuii te gunlu guira'ti si'cpac ni baluiä lojlu lo dan Sinai." ⁶ Niluxh xpixhojznu Jesucrist rujn dzuun ni sajcro, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejnni xhigabcoob, basa'nni didxcoob loj reben guedxliuj. Luxh didxcoobre sacduxhruni.

⁷ Paru niajc nusiejch leii ni badeed Dios galooli lo Moisés lajz rebejn, di niqiiin niujn Dios ste xhigabcoob. ⁸ Niluxh bahuii Dios xhet cayunsa'cdi reben guedxliuj, dxejc räjpni:

Naj rniliä sidzujn redxej che gunä stee xhigab,
jia'n stee diidx loj rexpejn Israel näjza loj rexpejn Judä te
xca'reni didxcoob.

⁹ Xhet si'cdi xhigab ni benä che bia'nä diidx loj retoxtd-goldooreni nen redxej ni gunazä ñaareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel nen redxejre gac scree, räjp Dad:

Sunä chu rexleiä lo xcäriejnreni, sucuaäza xtidxä nen las-tooreni.

Dxejcti narä gacä Xtiosreni, laareni gac rexpənä.

¹¹ Rut chu tejdi guluii sa'ni,

nicla bejtzni, nicla chu stee bejn gäbreni, “colyembee Dad”, sa'csi alanumbee guiraareni narä, rebäz sigajc rebengool.

¹² Narä sulaslazäreni susiaä redzundxuudx ni bejnreni, diru lazä guizaj rextojlreni, nicla latzsiaj ni bejnreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

9

Xquidoo guedxliujre näjza guidoo xhaguibaa

¹ Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. ² Gucchee guidoo dxejcti gojl te ladro galäiini te gujcnio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' ³ Ni rojp yu'ga najc dejtz ladro, ro'c najc yudxanduxh. ⁴ Ro'c suga' te guiib cadro ru' yaal. Najcni ganax oor. Ro'c yu'za te guijn ni laa “arco de pacto”, najcwni ganax oor, sigajc dejtzni, sigajcza nenni. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen gujnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. ⁵ Yejc gujnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtoj rebajn. Ro'cti di gaddiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. ⁷ Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni gudeedni te jia xtojlni näjza te jia xtoj rebajn ni najc xpejn Israel. ⁸ Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. ⁹ Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj rebajn. ¹⁰ Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhreni che guidzujnli dxej cheni guchaa Dios guira'ti.

¹¹ Niluxh abiääd Jesucrist, naj laani najc bixhojzro xcuent redidxcoob ni sajcrunaj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani

gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas. ¹³ Reni basia xtojł bejn galoo najc redee: xtiejn regon nájza redxib, náj cobdáj xten reguidxaa ni rejc nen guidodxanga; bastiojbni guiro'preni yejc reni yu' xtojłni. ¹⁴ Palga basia redee xtojł bejn, aticaxh xtiejn Jesucrist sajc gusia dojl, sa'csi rajpni yálnabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcáriejn nu xcuent retzuun ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galäii: nez lo Dios nájza nez loj reben guedxliuj xcuent didxcoob. Yälgujt xten Jesucrist najc te gudzucajni xtojł reben nájza xtojł renani bejn si'cni caj lo leii, te xca' guiraa reni agurejdx Dios yálnabajn par tejpas, si'c bia'n diidx galooli. ¹⁶ Didxcoobre najc si'c che rlanj tej bejn guinibee xho guidis xhixtenni che agojl guetni, nanab gucuaa bejnga lo te guijt xho guidisni, dxejcti gucuaani lajni. Niluxh xhet sajcdi guijtza che gajd bejnga guet. ¹⁷ Xhet sajcdi guijtza che nabansijc nani bejn ni. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga nájza nis, bahuajdxni guid-xiil xniaa nájza te la' yajg balagbáz, hysopo, dxejcti bastiojbni rejn yejc guijt cadro caj leii, nájza yejc rebejn. ²⁰ Dxejc guniini lojreni: "Rejnre najc seen sile'pac diidx ni abaxhal Dios lojtu."

²¹ Sigajcza bastiojb Moisés rejn guidoo náj guiraa renani rquiin rebixhojz che rajnreni Dios. ²² Leii xten Moisés rnibee jia guralii con rejn, palga di rejn guixe', di xtojł bejn jia.

Xtiejn Jesucrist rudzucaj dojl

²³ Ni'cni biquinpac gujt remanre, bixe' xtiejn ni te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcrú. ²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn ni. Di guiquin jiu'runi balti huält. ²⁶ Palga nanab gunni si'cni rujn rebixhojz, sajpní por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn ni

lo Dios cheni gujtni, cuajni lo cruzj te si'c badzucajni par tejpas xtojĵ rebejn. ²⁷ Guiraa bejn nanabpac guetreni tejtis huält, dxejctiru sidejdreni yälguxhtis xten Dios. ²⁸ Sigajcza tejtis huält badeed Jesucrist xtiejn ni bixe' lo cruzj te badzucajni xtojĵ xhidalduxh bejn. Luxh loj renani cabäjzni suluiiloini stehuält, xhet te gudzucajdiruni dojl, alga te gusa'ni xcälruslaa renani cabäjzni.

10

¹ Sa'csi leii xten toMoisés najctis si'c te balaa xten nani siäd naj. Niluxh dini gac si'cpac redidcoobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextojĵreni. ² Paru niajc nibicajpac xtojĵ reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtojĵreni, diru xcäriejnreni gumbee dojl. ³ Niluxh yälrejt man näj yälrudeedreni rejn casob ijz rusnajtisreni lajzreni xcuent dojl. ⁴ Sa'csi digacdi gudzucajpac regon näjza xtiejn redxib xtojĵ bejn.

⁵ Ni'cni che biäd Jesucrist lo guedxliuj räjpni lo Dios: Di rlajzlu xtiejn guidxaa niclaza regon niluxh abejnlu gacä nigui-guedxliuj.

⁶ Dilu nichagljaz yälrejc xten guidxaa niclaza yälrudeed rejn, niclaza gojn ni rudeed rebejn te gusiani xtojĵreni.

⁷ Dxejc räpä: “Narä basiälä te gunä si'cni rlajzlu Dad, Dios, (si'cni caj neñ reguijtz xcuent ni sacä).”

⁸ Che gulujx gunii Jesucrist diidxga: “Di rlajzlu, dizalu guidzagljaz xcälrejt guidxaa näjza regon niclaza xcälrejc guidxaa, niclaza yälrudeed rejn xcuent xtojĵ bejn si'cni caj lo leii gun bejn.” ⁹ Dxejcti räjpni: “Narä siälä, te gunä si'cpac ni rlajzlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰ Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn ni lo cruzj tejtis huält par tejpas.

¹¹ Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl.

¹² Niluxh Jesucrist tejtis huält baxhe' xtiejn ni lo cruzj te badzucajni xtojĵ rebejn par tejpas. Naj agurejni xladbee Dios cadre rnibeeni. ¹³ Ro'c cabäjzni guiraa ni rdxe'ch lojni te cuereni ladzni'ni. ¹⁴ Ni'cni tejtis huält cuajni lo cruzj te basiani par tejpas guiraa renani ahuililajz xtiidxni.

¹⁵ Sigajcza rnii Sprit Dxaan xten Dios loonu; najni:

¹⁶ Diidx nani jiannääreni neñ redxejre gac scree, naj Dad Dios: sucuaä rextidxä lo xcäriejnreni,

susäläza xtidxä neñ lastooreni.

Dxejcti räjpni:

¹⁷ Diru lazä guizaj rextojlreni nicla rextolguijdxreni.

¹⁸ Ni'cni, cheni abia xtoj bejn, diru quiquiin gudeedreni guidxaa te jia rextojlreni.

Nanab guibignu lo Dios

¹⁹ Ni'cni resa'nu, na'c guidxejbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiucoob, nezyuj xten xcäl'nabañcoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejnni lo Dios. ²¹ Jesucrist najc xpixhojzronu nani rnibee rexpejn Dios. ²² Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl'rilihajzpac abia lastoonu xcuent rexhigabguijdx, abidiibza tiejxhnu lo nis-ya. ²³ Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c. ²⁵ Na'c jiennu si'c rujn rebejn nani diru jääd che rdxagsa'nu. Nanab guiliidxnu resa'nu sa'csi naj asiäddzungajxh dxej ni guibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojlnu dxejc. ²⁷ Dxejcsii guidxeebtisnu guilääznu yälguxhtisduxh xten Dios näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoob leii, gujt bejnğa, rut balaslajzdini. ²⁹ Maazru yäl'rusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ruro'nreni xtiejnni ni baxhe'ni lo cruz te basianini. Rusanxtujyzani Sprit Dxañ xten Dios nani badeed didxcoob lojni. ³⁰ Anancheenu gunii Dios: "Narä susquixä bejn; loä siguijx bejn", räjp Dios. Stehuält guniini: "Dad sujn yälguxhtis rexpejnni." ³¹ ¡Cosduxh gac bejn ni jiajb ladzñaa Dios nani nabajn par tejpas!

³² Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw. ³⁴ La'tu banaj lajztu renani yu' latzguiib, guideb yäl'rbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyäl'nasa'c ni saj cru, niluxh yu'ni par tejpas. ³⁵ Na'c gunijttu xcäl'rilihajz xtidx Jesucrist, sa'csi yäl'rilihajzga gun xca'tu yäl'nabajn par tejpas. ³⁶ La'tu nanab cuedxitu te che

abejntu ni rlaiz Dios, dxejc xca'tu nani aguniini guniidxni.

³⁷ Sa'csi xtidx Dios ni bia'n rni:

Asiäddzungenajxhpac dxej ni jiaädni,

asiäddzungenajxhpac dxej ni jiaäd nani siaäd, dipacni gaclaa.

³⁸ Renani naba_{nsa}'c sibannäy yälirililajz,

niluxh palga yu' chutej ni guidxejb chalilajz,

dini'c gun guibaa lazä.

³⁹ Niluxh nuure dinu gac si'c reni rusaan yälirililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

11

Yälirililajz

¹ ¿Xhini'c najc yälirililajz? Yälirililajz säloj cabääznu sajcpac tejni gajd gac, yu'pacza ni mase dinu fini, najcni si'cni abahuiinuni. ² Dios huinälajz retoxtadgoldoonu sa'csi huililajzreni xtiidxni.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihuii.

⁴ Gojpza toAbel yälirililajz badzubyaalni rexquidxaani lo Dios. Yälrbijbyaal xtenni sajcro loj yälrbibyaal xten toCaïn. Ni'cni gunii Dios najc toAbel be_{nsa}'c. Naj mase agujt Abel, sanuutis racbeenu xcuent yälirililajz ni gojpnii.

⁵ Sigajcza gojp Enoc yälirililajz, ni'c sinä Dios Enoc xhaguibaa, guideb nabajnni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubansa'cni, baspaani lajz Dios. ⁶ Rut chu tejdi sajg guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzani sudeed Dios xcäl_{hasa}'cni loj renani rguilni, nalajznu renani rlaiz gum-beepac Dios.

⁷ Gojpza toNoé yälirililajz. Che räjp Dios lojni siajbpac nisguij ni gajdreni fii, huililajzni. Bejnii si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpnii yälirililajzga, bejnii gubibde rebejn guedxliuj, gunijtreni sa'csi direni nililajz xtiidxni. Dx-jecti cua'ni yäl_{nabansa}'c ni siaäd xcuent yälirililajz.

⁸ Sa'csi gojp toAbram yälirililajz, basoobni xtidx Dios che gurejdx Diosni, biriini lajdxni te huijni cadre gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹ Gojp toAbram yälirililajz, ni'c huiläjzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni nen reyuguijd, sigajcza bejn toIsaac näjza toJacooob, sa'csi näjza lojreni räjp Dios gudeedni yujga.

¹⁰ Niluxh to Abram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp to Sara yälirililajz te mase anajcni bengool niluxh agudejd chu xi'nni, cua'ni yälrnibee xten Dios te gujcn nan, guyu' te xi'nni, sa'csi huililajzni susoob Dios xtiidxn.

¹² Ni'cni mase siäddzungenajx dxej ni guet to Abram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³ Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälirililajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. ¹⁴ Reni rnii si'c, rniliireni caguilsijcreni cadro gac lajdxreni. ¹⁵ Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶ Niluxh laareni rlanjreni te lajdxreni ni sajcro, nalajznu lajdx Dios xhaguibaa, ni'c rguuilreni. Ni'cni di Dios gutujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷ Gojpza to Abram yälirililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: ¹⁸ "Isaac guniidx chu xhidajl xajglu, xagdoolu." ¹⁹ Sa'csi nanchee to Abram rajp Dios yälrnibee te guspajnni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Näjza to Isaac gojp yälirililajz benle'ni to Jacob näjza to Esaú, räjpni xhini'c gun tejpgareni. ²¹ Gojpza to Jacob yälirililajz, che agojl guetni, benle'ni guiro'p rexi'n to José. Dxejcti huistieni guzucajni yejc baston xtenni te si'c gojnni Dios. ²² To José gojp yälirililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtne.

²³ Gojp rexuczajn Moisés yälirililajz, ni'c cheni gojl Moisés, bacua'tzrenini choṅ bäii, sa'csi bahuiireni bäzdaanni. Direni niu xtidx reii ni gunibeeni, räjpni ju'treni báz niguii.

²⁴ To Moisés gojp yälirililajz, ni'cni che aguroobni di rlanjni nirilajni xi'n xindxa'p reii xten Egipto. ²⁵ Bejnne xhigab tednäjni trabajw rexpejn Dios lacuaa niujnni redzuun ni rchaglaiz rujn reben Egipto, sa'csi najc reni'c dojl, luxh tera'tsi ruspaareni laiz bejn. ²⁶ Par laani maazru sajcedni lagajc trabajw ni gudejd Jesucrist lacuaa niajpni reyäl'nasa'c xten Egipto sa'csi laani cabäjtisni reyäl'nasa'c nani churu gudeed Dios lojni. ²⁷ Gojp to Moisés yälirililajz biriini lajdx reEgipto, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuiini loj nani di guzeṅ, nalajznu Dios.

²⁸ Gojp Moisés yälirililajz bejn ni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹ Gojp rexpejn Israel yälirililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanj rebejn Egipto nidejd, gubi' nis, dxejc gulo'reni neñ nis.

³⁰ Xcuent yälirililajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. ³¹ ToRahab, te gunaguijdx, gojpszani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di gal'di guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent retoprofe't. ³³ Guiraareni gojp yälirililajz ni'c bejnreni gaan xhidajl reguejdx, bensa'creni yälgujxtis, cua'reni xcälracnäj Dios ni bia'n diidx xca'reni, basäuren ro' rebeedz. ³⁴ Guyu'reni neñ te balduxh luxh xhet gujcdireni, gojl baxunreni te di niejtreni con espad. Reni gujc beñrdxaj, guzutzut'reni gujcreni nadipduxh, gujcreni beñduxh lo guer, barilaagwreni resoldaad xten reni rdxe'ch lojreni. ³⁵ Guyu' regunaa ni cuasac rextogoolreni, guban'sacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nusläa bejnreni sa'csi rlanjzreni xca'reni stee yäl'nabajn ni saj cru. ³⁶ Sgaiireni gudejd trabajw guniyaj bejnreni, gudinnäj bejnreni chiir, cuaduuzaren caden, guyu'zaren latzguuib. ³⁷ Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsí bejnreni. ³⁸ Sa' rebejnnga di nungäj'l reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gauren nicla nis te yäreni; cuanzajreni nez neñ redajn, nez neñ rebiliäa näj nez neñ guedduxh ni yu' neñ yuj. ³⁹ Guiraa rebejnnga gojp yälirililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laaren nani bia'n diidx guniidx Dios.

12

Guihuitisnu lo Jesucrist

¹ Ni'c najcni si'cni suga'nu galäii guiraa rebejnre luxh cahui-ireni xcälrlililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl_nabaj_nnu, te di jieednu chosaanu nez lo nezyuj ni sasanäanu nez cadro chonnu. ² Do'o guihuidzu'tz nez loj Dad Jesucrist nani guläxtiej, nani guluuxza xcälrlilajznu. Jesucrist gudejd trabajw lo cruzj, dini nitujy gujtni lo sa' yäl_gujtga, sa'csi najnni cheni agudejdni trabajw, sica'ni yäl_rbalajz; naj agurejtni xlad-bee Dios cadro rnibeeni.

³ Colyujn xhigab la'tu xho gudejd Jesucrist ladz_naa reben dojl, te na'c guidxajgtu, na'cza jieedtu la_l ni cabäjztuni. ⁴ La'tu gajd xtiejntu guixe' lo yäl_rucuanäj dojl. ⁵ ¿La abiäl_lajztni xho baliidx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcäl_naj Dad niclaza jieedlu che til_näjni luj.

⁶ Sa'csi si'c runnaj Dad renani sanälajztni,

rujnnti ríaa guiraa renani rca'ni si'c xi'nni.

⁷ Palga gatijp lajzlu lo xcäl_naj Dios, sica'ni luj si'c xi'nni, sa'csi ¿chu dad di gunnaj xi'nni? ⁸ Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redol_guijdx.

⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajztni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yäl_nabaj_n, ä? ¹⁰ Xtadnu lo guedxliujre bennajreni nuure tio'p-chon_dxej, te gac gusoobnu xtiidxni. Niluxh si'c runnaj Dios nuure te jia'pnu te yäl_nabanya, te gac nayazanu sigajc najcni laani. ¹¹ Guliini xhet xhi yäl_najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl_najga rusoob xtiidxni, rca'reni te yäl_nabanya ni rbecdxilajzreni.

Riez guze'ni xtidx Dios

¹² Ni'cni col_sudzu'tz re_naatu ni abadxajg, col_sudzu'tz yecxhi-jbtu ni abadxajg, ¹³ te col_quiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Col_quiil xho cuedxinäjtu guiraa rebejn. Col_chanä te yäl_nabanya, sa'csi renani di guibanyadi, digacdi fiireni loj Dad Jesucrist. ¹⁵ Col_huisa'c te di gunijt chutejtu lo xcäl_racnäj Dios, col_natiro gac chu tejtu si'c te cuanlaa ni rujn daan, sa'csi sa' bejn_ga suxhinni guiraa renani ahuililajz. ¹⁶ Nicla tejtu na'c ga'p stee gunaa te laad, nungäj_l cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl_nasa'cni ni najc xtenni sa'csi najcni xingan galoo xtadni. Bato'nini te cua'ni yäl_rajwtis. ¹⁷ Anajntu, cheni rlajztni niunle' xtadnini te nica'ni ni najc xten xingangalooni, dini

nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Colnatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäy, nacäiboo, cayajcza bedonduxh. ¹⁹ Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni rediidxga, direni nutiplajz, gunabduxhrene na'cru guiniini lojreni. ²⁰ (Sa'csi direni nutiplajz diidx ni caniini, räjpni: "Palga ted te mantis guläj xhuj dajnga, colju'tni con guij.") ²¹ Te yälñadxebduxh najc nani guzeñ ro'c, lagajc toMoisés räjp: "Cayacditä yälrdxejb."

²² Niluxh la'tu agubigtu lo dajn xten Siön, cad najc lajdx Dios ni nabajñpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebejn nani abasia Dios te anajcreni beñnasa'c. ²⁴ Agubigzanu lo Jesucrist nani suga' galäii nez loj Dios näj beñguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jiäjñ lajz Dios, luxh ni'c sajcro loj nani rniab xtiejn toAbel. Xtiejn toAbel rniab quiix nani bagu'tni.

²⁵ Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siääd guedxliujre, ¿xho jiennu tedbianu palga guilälaznu nani ruluii nani siääd xhaguibaali? ²⁶ Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa." ²⁷ Che gunii "ste huält", ni'c säloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yälñadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yälñinälajz sa'ni. ² Di gusaantu gudeedu rolijztu guidzujñ biooz, sa'csi loj reni bejn si'c, yu'reni badeed rolijzreni bidzujñ xangl Dios rolijzreni, niluxh direni niacbee chu najcreni.

³ Colsnaj lajztu reni yu' neñ latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsireni sa'csi näjza la'tu najctu beñguedxliuj si'c najcreni.

⁴ Colga'p xpala'n yälguchnaa te guiban-nayatu con chäältu sa'csi sujn Dios yälguxhtis rebejn ni resnä j chää l bejn näjza reni rusguee rebenxteb.

⁵ Na'c chanälajztu meel, colguibalaznä j ni rajptu, sa'csi Dios agunii: “Dipacna gusanälu, dizana cuälazälu.” ⁶ Ni'c dinu guidxeb guiniinu:

Dad ni yu' xhaguibaa najc ni rcanä j narä; dina guidxebä xhitis ni gunnä j bejn narä.

⁷ Colsnaj lajztu renani baluii guiban'sa'ctu, ni basule'za xtidx Dios lojtu; colhuii xho nabajjreni te sigajcza colchanä xcälirililajzreni.

⁸ Sigajc gujc Jesucrist nani, sigajcza najcni nadxej, sigajcza sajcn par tejpas. ⁹ Na'c gusaantu gusiejchreni lajztu xcuent ste'ca yälruluii ni digac si'c najc xtidx Jesucrist. Sacduxh sudzu'tz lastoonu lo yälracnä j ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo. ¹¹ Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtoj l rebejn xcuent lagajc xtiejnni. ¹³ Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguuilnu laadxnu ni chu jiaädru, te ro'c guidxunnu par tejpas. ¹⁵ Guideb xcälracnä j Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni nä j jielnu redij. ¹⁶ Na'cza jiallajztu guntu huen, gacnä j sa'tu, sa'csi reni'cni najc redzuun ni rdxagljaz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcuent nuunu, sa'csi racbeenu naya xcäriejnnu, rlaaznu laaca jienu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jialä lojtu.

Te didxle' nä j lult xtixtios

²⁰ Dios xten yälrbedxilajz ni baspajn Dad Jesucrist lo reben gut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. ²¹ Dios gun gactu ben'sa'c, bendxojn loj xhitis te guntu ni rlanjni, nä j gunni loj guiraa nuure si'c ni rlanjni xcuent Jesucrist. ¡Colspaa lajz Jesucrist par tejpas! ¡Sugacni si'c!

²² Resa'nu, rniabä lojtu, colcuedcxi lajztu, colcuadiajg redi-idx ni ruliidxre, sa'csi riojbgä cacuaä te labäz guijsre lojtu. ²³ Colyacbee abirii bejtznu Timoteu latzguiib. Palga guidzungenajni ree, siädnääni jiädhuiä la'tu.

²⁴ Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhal xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

¹ Narä Santiaag, xmos Dios näjza xten Dad Jesucrist, rux-halä xtixtios loj guitzubitio'p cuaa rexpejn Israel ni nare'ch lo guedxliujre.

Yälñajn nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios, ³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz. ⁴ Dxejcti yälrbecdxilajz sajc gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd xcalñajnni.

⁵ Palga yu' tejtü ni cayäädxd xcalñajnni, suguniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni.

⁶ Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bāj ni sanā bej, nezree-nezre'c sääbni. ⁷ Nani najc si'c, na'c gunni xhigab yu' xhi xca'ni lo Dad Jesucrist. ⁸ Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹ Te sa'nu ni najc nadolajz, suguibalajzni sa'csi najcni benro sa'csi gulās Diosni, ¹⁰ sigajcza bejtznu ni yu' xhixtenni, suguibalajzni sa'csi abaluu Dios lojni najcni bejn ni xhet sajcđini, sa'csi nāgajc laani sinitlojni si'c rnitloj reguii ni yu' lo cuaan ni yu' loniaa. ¹¹ Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreni, dxejcti agunijt xcālsacruni. Si'cza sinitloj te bejn ni yuduxh xhixtenni laļ ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz laļ ni cadejdni trabajw, sa'csi che agunii Dios didxsa'c xcuent nani bejn sica'ni coron xten yälñabajn par teipas ni bia'n Dios diidx gudeedni loj rebejn ni sanälajz Dios. ¹³ Che gunijt tejtü, rujntu dojl, na'c gābtu: "Dios bejn banitā", sa'csi di gacdi quiquiił Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴ Niluxh tejgatu runijt che rcāy xcāriejntu sa'csi riajb yejctü guntu cosguijdx. ¹⁵ Che riajb yejctü guntu cosguijdx, runijttu rujntu dojl, luxh dojl che abejntuni, riädñani yālgujt.

16 Sa'ä ni sanälazä, na'c gusaantu gusgueereni la'tu.
 17 Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni.
 18 Lagajc xcuentni bejn Dios gacnu xpejn ni sa'csi huililajznu xtidxliipacni, te gacnu reben galoo loj rexpejn ni.

Xho nanab jiennu

19 Acanajntu recosre, sa'ä ni sanälazä. Niluxh tejgatu nanab gusquejn ni te gucuadiajgni, per gaclaani te guiniini, gaclaazani te guidxe'chni, 20 sa'csi xcälrdxe'ch bejn dini gun xcäl'nasa'c Dios. 21 Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc gusläa xaimtu lo dojl.

22 Niluxh baluui lo guira'ti bejn najctu bejn ni rusoobpactu xtidx Dios, xhet bejn di ni rucuadiajgtis xtiidxni, ni rusgueeni lagajc laani. 23 Sa'csi palga najc te bejn te nani rucuadiajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihujaj. 24 Sa'csi che ruhuiini xho najcni, sägajcni, riallazgajcni xho najcni. 25 Niluxh nani ruhuidzu'tz lo leisa'c, nalajznu leii nani rusläa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni saj p yälrbalajzpac lo xhitis ni rujn ni.

26 Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rniini, bejnga rusguee lagajc laani, luxh xhet sajcdi yäl'rajn Dios xtenni. 27 Yäl'rajn Dios ni najc guliipac, ni xhet nu'chdi lojni najc scree: chahuiini rebisiäjb, näjza regunaa ni agujt chääl ni che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

2

Nanab tebloj jiennänu guira'ti bejn

1 Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcrü tej bejn lo sabejn ni. 2 Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, 3 dxejcti la'tu jiuurutu nani najcwni ladsa'cga, naatu: "Ree gurej lo yagxhilsa'cre", dxejcti gäblu lo bejn ni xhet rajpdi: "Rec gusulii o gurej lo yujre", 4 çla xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

5 çColgucuadiajg, betzä ni sanälazä! Agule Dios bejn nani xhet rajpdi lo guedxliujre te ga'preni yäl'riliblazduxh, te lo xcälrnibee

Dios xca'reni xcäl'nasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsítu, li rgobxhaxhreni la'tu, rinäreni la'tu loj reguxhtis, ä? ⁷ ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreinu Dios, si'cni caj lo xquijtz Dios scree: “Colchanälajz sa'tu sigajc rinälajztu lagajc la'tu”, laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu ben dojl, bejn ni rbälaz leii. ¹⁰ Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. ¹¹ Sa'csi lagajc Dios ni gunii: “Na'c guesnäjlü bejn ni di gac chäällu”, lagajc laani guniizani: “Na'c ju'tlu.” Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiraliü releii. ¹² La'tu colguinii, colguibajn si'c rebejn ni gun Dios yäl'guxhtis con xtiidxni ni rusläa bejn lo dojl. ¹³ Sa'csi renani di gulaslajz bejn, che gun Dios yäl'guxhtisreni, dizani gulaslajz laareni. Sajcru yäl'rulaslajz lo yäl'guxhtis.

Yäl'rilihajz näj dzuun ni rujn bejn

¹⁴ Resa'ä, ¿xhi sajc palga guinii te bejn: “Ahuililazä xtidx Dios”, niluxh dini gun dzuun ni riäj'l gunni, ä? Sa' yäl'rilihajzre, ¿la suslaanini lo dojl, ä? ¹⁵ Palga yu' te bejtznu o te bisiajnnu ni dini ga'p xhajbni, luxh xhetiza xhi gauni, xhi yäni, ¹⁶ luxh gäb tejtü lojni: “Sucuedxi lajzlu jiilu, suguidxa' lajzlu, suguidxaj xque'lu”, niluxh dini gudeed nani caquiinni, ¿xhi sajc rediidx ni räjpni lojni, ä? ¹⁷ Sigajcza yäl'rilihajz nani di guquiil bejn gunreni xtzuun Dios najc si'c te ni agujt, sa'csi dini guquiil bejn gunreni dzuun.

¹⁸ Yu'za reni naa: “Luj rajplu yäl'rilihajz, narä runä xtzuun Dios; baluii narä xcäl'rilihajzlu xhet näjdi xtzuun Dios, dxejcti narä suluiä xcäl'rilihajz xcuent rextzuun Dios ni runä.” ¹⁹ La'tu rililajztu yu' tejtis Dios. Laaca rujnlu, niluxh näjza rebendxab rililajz yu' tejtis Dios, racdijtlireni, rdxebduxhrenini. ²⁰ ¿La di rlahjztu gacbeetu, bejnayääl? ¿La ditu gan, yäl'rilihajz ni di guichagnäj xtzuun Dios najc te yäl'rilihajz? ²¹ Dios badzucaj xtoj'l toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²² Col'huii xho tejsi junt sadxaag xcäl'rilihajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcäl'rilihajz ni sa' yäl'rilihajz nani rlahjz Dios ga'p rexpejn ni. ²³ Dxejcti huile' xtidx Dios cadre caj scree: “Abram huililajz ni räjp Dios lojni, ni'cni badzucaj Dios xtoj'l ni, cua' Dios Abram si'c te bejnaya.” Birilajzani “xamiigw Dios.”

²⁴ Ni'cni ruhuiitu rca' Dios te bejn si'c beɲnaya nez lojni xcuent xtzuun Dios ni rujnzani, xhet ganaxtis xcuent xcälirililajz bejnga. ²⁵ Sigajcza gusajc toRahab, ni gujc te gunadxab. Dios badzucajza xtojlni, bejn Dios xhigab najcni te beɲnaya sa'csi bejnni xtzuun Dios che badeedni rolijzni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälirililajz palga dini gun dzuun ni rnibee Dios gunni.

3

Rediidx nani rnii luudxnu

¹ Resa'ä, na'c gac xhidajltu bejn ni ruluui xtidx Dios, sa'csi anajnnu rac yälguxhtisoru rebejn nani ruluui xtiidxni. ² Sa'csi guiragajcnu riennu xhidajl cuaa dojl. Palga yu' te bejn ni di gunijt lo diidx ni rniini, laani najcni te beɲsa'c, rajcza rnibeeni guideb tiejxhni. ³ Palga rusälnu guuib ni ru' ro' cabaii te chääni cadro rlajznu jiini, rnibeezanu guideb xtiejxhni. ⁴ Colhuui rebarcwro, mase siolduxhreni, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw nen nis, con ni'ctis rinänini cadrotis rlajzni. ⁵ Sigajcza najc luudxnu, najcni te labáz tiejxhnu, luxh colhuui lacti didxro rniini. Najcni si'c te balbáz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajl. Rnii luudxnu guiraa redidxdxuudx ni rnii rebeɲ guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. ⁷ Rebejn sajc gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnreni, ⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, jxhet si'cdi nungäjldi gacni! ¹¹ ¿La rbää bejn nisnejxh näjza nisrop lo tejsi bisie, ä? ¹² Betzä, ¿la caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yälnejn ni siääd xhaguibaa

¹³ ¿Chuni'c lo guiraatu yu' xcäriejnni, nanduxhni, ä? Suguluiini xho najcni xcuent xcäl'nabaɲsa'cni, sugunni xtzuunni guideb yäl'nadolajz ni rudeed xcäriejnni. ¹⁴ Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcäl'nasa'c lagajc luj, na'c gaclu guyalajz, sa'csi ni'c najc

si'c ni caniilu didxrusguee xcuent xtidxlii Dios. ¹⁵ Sa'csi sa' yäl'najnre, xhet xhaguibaadi siädni, alga najcni yäl'najn xten guedxliujre, xten reben guedxliuj, xtenza reben dxab. ¹⁶ Sa'csi cadre yu' yälrdxe'ch lo sa'ni, näj cadre rujn bejn guira'ti parsi xcäl'nasa'c lagajc laani, ro'c yu' biejy, yu' guiraloj latsiaj. ¹⁷ Niluxh yäl'najn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rula-zlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸ Renani rguuil yälrbedxi, yälrbedxi rbe'creni te xca'reni te yäl'nabañnaya nez loj Dios si'c xcäl'nasa'creni.

4

Ni nabañnäj guedxliuj

¹ ¿Casiäd rebiejy, reyälrdxe'ch lo sa'ni ni casiajctu? ¿La direni jiäd xcuent lagajc xhigab ni yu' lastootu, ä? Lagajc rexhigabga rujn biejy neñ lastootu, ruscäyreni xcäriejntu. ² La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtü sa'tu. Ditu ga'p nani rlanjtu sa'csi ditu guini-abni loj Dios. ³ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu. ⁴ ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejn ga rdxe'chreni lo Dios, ä? Ni'cni palga yu' chu tejtü ni rlanj chanuu lo ni rajc lo guedxliujre, bejn ga rdxe'ch lo Dios. ⁵ O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni neñ lastoonu, randzu'ni nuurnu sa'csi rlanjni guinibeeni nuurnu”? ⁶ Niluxh runiidxru Dios xcälracnäjni loonu. Ni'cni rnii xtiidxni scree: “Dios rdxechnäj renani runnaro lagajc laareni, niluxh rudeedruni xcälracnäjni lo reben nadolajz.” ⁷ Coljiu'pac lo xnezyuj Dios. Colsudzu'tzpac te di guntu ni rlanj ben dxab, te guxunni lojtu. ⁸ Colguibigru lo Dios te guibigzani lojtu. Bendojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu. ⁹ Sugacnaj lajztu, suchuti xliajs, colyonduxh. Colguchaa xcäl'ruxijstu, colca' yälhuin, colguchaa xcälrbalajztu, colca' yälroon. ¹⁰ Colyajc si'c bejn ni xhetliidi sajc nez loj Dad Jesucrist, te laani guiliäsi la'tu gunni la'tu benro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yäl'guxhtis sa'ni, reni'c rniyaj xleii Dios, rujnreni yäl'guxhtis xleii Dios luxh palga guntu si'c, dirutu gac renani

rusoob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajczu gunitloj bejn. La'tu, ¿chuxh najctu te guntu yälguxhtis lo sa'tu, ä?

Dinu gan xhi gac guixee

¹³ Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴ Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tbäz, dxejcti rnitlojni. ¹⁵ Hueenru guiniitu scree: "Palga rlanj Dios sibaannu, te jiennu dee o dec." ¹⁶ Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl. ¹⁷ Ni'cni ni najn xho riäjl gunni, palga dini gun si'c, rujnni dojl.

5

Rulijdxni rebejn ni yu' xhidajl xhixtenni

¹ Colgucuaadiajg xtidxä, bejn ni yu' xhidajl xhixtentu. Colyoon, colcuedxa' xcuent recasionduxh ni sactu. ² Guiraa rehxixtentu nani rajptu aguxhijn, luxh rehxajbtu agudajw rebaguüidni. ³ Oor näjza pla't xtentu agubibtiejn, aguxhijn. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. ¡Xlia'si batiedajntu xhixtentu nen redxej lultga! ⁴ ¡Colhuii! Ditu niguixsa'c loj reni bejn xtzuuntu, ni'cni laareni cayujnreni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujn yälquij xtentu ni cabe'c renani batie' xcäl'nasa'ctu. ⁵ Agubansa'cpactu lo guedxliujre, bejntu lanij si'ctis ni rlanjztu, abastio'tu lastootu nen redxej xten yälrugut. ⁶ Gudiiltu xho bagu'ttu rebensa'c luxh laareni dxiitis gusujreni, xhet bejndireni te na'c nugu'ttureni.

Colcuääz jiädxhii Diostu

⁷ Resa'ä, dxitis colcuääz guidzujn dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni la'l ni riajb nisguigaloo näjza nisguij ni riajb lult. ⁸ Si'cza la'tu colcuäzdx, colgustioob lastootu sa'csi asiäddzungajxh dxej ni jiääd Dad Jesucrist. ⁹ Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujn Dios ni najc Juejz. ¹⁰ Rebetzbidä, colhuii xho gudejd reniguii nani bacuaa xtidx Dios trabajw galoo, xho guläzzareni. ¹¹ Colhuii xho rniinu chicbaa renani guläzdx lo trabajw ni gudejdreni. Abiejn diajgzatu xho bejn Job che gudejdn trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälrulaslajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

¹³ ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugolni dij te guiliä'pni xpala'n Dios. ¹⁴ ¿La yu' chu tejtü ni cayacxhuu, ä? Sucueedxni rebeṅgool ni rnibee neṅ guidoo, te guiniabreni lo Dios xcuentni laṅ ni cagusälzareni se't lo cuajni con laj Jesucrist. ¹⁵ Luxh palga rililajzpacreni che canabreni, siajc beṅracxhuuga, siliäs Jesucrist bejṅga. Luxh palga bejnni dojl, sibicaj xtojṅni. ¹⁶ Ni'cni colguxhobdojl lo sa'tu, colṅab lo Dios xcuent sa'tu te jiajctü. Che rniabduxh te beṅ naya lo Dios, dzunroza rujn Dios. ¹⁷ Elías, te bejn ni gunii xtidx Dios agujc xchero, gujca te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choṅ ijz garol. ¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyälṅnasa'c xtenreni lo guedxliuj.

¹⁹ Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejn nani racnäj guirii beṅdojl lo xnezyuguijdxni te guibisacni lo Dios, bejṅga agucnäjni te gulaa xaimni lo yälgujt, te gubicajza guiraa xtojṅni, mase xhidalduxh najc xtojṅni.

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

¹ Narä Pedr, te apost xten Jesucrist, cacuaä guijtzre loj renani agule Dios gac rexpejn_ni nani rbäjz si'c benzijz lo reguedx Ponto, Galacia, Capadocia, Asia, näjza Bitinia. ² Xtdnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xteni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxini lastootu lo guiraliiti.

Te yäl_nabaj_n ni cabäüznu

³ Colguiliä'p xpala'n Dios ni najc Xtd Jesucrist, Dios nani xcuent xcäl_rulaslazduxhni bejn_ni gojpnu te yäl_nabanc_oob sa'csi baspa_nsacni Jesucrist loj rebengut. Sa'csi rajpnu yäl_nabanc_oob, ni'c nadippac lajznu. ⁴ Ni'cni laani suniidxni te yäl_rusalajz ni di nitloj, ni di xhin, ni di jiuii si'c riuii rebalajg. Yäl_rusalajzga aguluchedzu'tzni xhaguibaa par la'tu, ⁵ nani cayapdzu'tz xcäl_milaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷ te guzeñ xho rililajztu. Xcäl_rrililajztu sajcru lo oor nani rnitloj, niluxh xcäl_rrililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl_milaagwrni, näjza xcäl_rdimbicha'ni.

⁸ Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl_rbalajz ni rut rajcdi rusule', sa'ni yu' xhaguibaatis, ⁹ sa'csi xcäl_rrililajztu susläa xaimtu lo dojl, sica'tu yäl_nabaj_n par tejpas.

¹⁰ Luxh xcuent yäl_rusläa dojl_re, rebejn nani gunii xtidx Dios agujc xchero, laareni abasulexgaareni xcuent xcäl_rracnäj Diosre nani siääd lojtu. Luxh bisiedduxhrene, gunabdiidxzareni, ¹¹ te rlanjrene gacbeerene chu bejn o gucpac gac nani cagusä't Sprit xten Crist ni yu' neñ lastooreni che gunixgaani xho nungäj_l ted Jesucrist trabajw, dxejcru xcasacni yäl_rrnibee. ¹² Baluii Dios lojrene, di rediidxga soob neñ redxej ni nabaj_nrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxha_l Dios Sprit Dxan xteni te cuääzni neñ lastooreni. Näjza rexangl Dios ni rbäjz xhaguibaa rlanj gacbeerureni rediidxga.

Xcäl̄nabān̄nayanu nez loj Dios

¹³ Ni'cni, col̄sanij xcäriejntu, col̄gusudzu'tz lastootu, guideb lastootu col̄yenloj yäl̄racnäj xten Dios ni abia'n diidx xca'nu che guibisac Jesucrist lo guedxliuj. ¹⁴ Gactu si'c biuux nani rusooob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵ Dios ni gule la'tu najc dxan. Sigajcza la'tu, loj guiralii ni rujntu col̄yajc ben̄dxan. ¹⁶ Sa'csi lo xtidx Dios caj scree: "Sajctu ben̄dxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yäl̄guxhtis loj guiraa bejn̄ xcuent dzuun ni bejn̄ni, la'tu riäj̄l guidxejbtuni guiraa dxej ni nabānsijctu lo guedxliujre. ¹⁸ Anajntu di Dios nudeed yäl̄nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu, ¹⁹ badeedni rejn̄ ni sacduxh te baslaani la'tu loj xtojltu. Rejn̄ si'c xtiejn te xiil ni naya, xhetpac najcdini, xtiejn lagajc Jesucrist. ²⁰ Guliipacni che gajdli guirixtiej guedxliujre, gule Dios Jesucrist, niluxh najru, nen̄ redxelult che gajd guedxliujre nitloj, biäd̄luilojni par xcäl̄nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl̄rnibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu col̄chanälajzpac sa'tu. ²³ Sa'csi acua'tu xcäl̄nabañcoobtu xcuent xtidx Dios ni najc par tejpas, et xcuentdi xtidx ben̄ guedxliuj ni rnitloj. La'tu najctu si'c cuaan ni rliejn lo bejdz ni siäd̄ xhaguibaa, xhet lo bejdzdi ni rnitloj. ²⁴ Galooli gunii Dios scree:

Guiraa reben̄ guedxliuj najc si'c recuaan,
guiraa xcäl̄nasa'creni najc si'c reguii ni rcaj lo cuaan,
recuaan rgoļ, lirtejbza reguii xtenni,

²⁵ niluxh xtidx xtad Jesucristnu rsiudzu'tzni tejpas.
Luxh diidxre najc diidx ni basule'reni lojtu.

2

¹ Ni'cni col̄gusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. ² Si'c rioj̄l rebāznite' le'ch, si'cza col̄quiil xtidx Dios par sprittu. Col̄jioj̄l xtidx Dios te gustioobruni la'tu lo yäl̄ruslaa lo doj̄l, ³ palga agucebetu lacti hueen najc xcäl̄racnäj Jesucrist.

Crist najc si'c te guij ni nabajn̄

⁴ Col̄guibig loj Jesucrist ni najc si'c te guij ni nabajn̄. Laani suniidx yäl̄nabajn̄ par tejpas loonu. Rebejn̄ badzucaj guijga,

niluxh Dios gulenini sa'csi sacduxhni. ⁵ Sigajcza tejpgatu najctu si'c guij ni nabajñ, ni'c colgusaan xca' Dios la'tu, reguibajñ, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcälñasa'ctu con xpriit xtentu. Dee najc nani rchaglajz Dios.

⁶ Sa'csi galooli gunii Dios scree:

Agule'cä te bejñ neñ guedx Siön, nalajznu Jerusalén, ni gac si'c te guisa'c, te guiro ni rsiuj squiin te yuro.

Chutis bejñ ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te gusacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',

lagajc guijga gujc guijpac ni baliib squiin xten yu'ga

⁸ näjza:

Te guij ni rliaj ni' bejñ, ni ruzälta'reni,

laareni riajbreni sa'csi direni gusoob xtidx Dios,

luxh agunibexгаа Dios nitlojreni.

Renani gule Dios

⁹ La'tu najctu te cuaa bejñ ni agule Dios, tejpgatu najctu rebixhojz ni najc si'c reii xten Dios. La'tu najctu te beñnaya, te beñsa'c, rexpejñpacni. Aguleni la'tu te gusule'tu reyälñasacduxh ni bejñ Dios ni gurejdxtu che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh naj najctu rexpejñpac Dios. Galoo gajd Dios gulaslajztu, luxh naj abalaslajz Dios la'tu.

Colguibajñ lo xnezyuj Dios

¹¹ Rebetzä ni sanälazä, nabajñtu lo guedxliujre si'c beñzijt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl neñ lastoo bejñ te cuälazreni xnezyuj Dios. ¹² Colguibañsa'c lañ ni yu'tu loj rebeñzijt ni di gac xpejñ Israel te palga guiniyajreni la'tu gäbreni najctu beñlatsiaj, che fireni redzunsac ni rujntu, siliä'ppacreni xpala'n Dios che jädsac Jesucrist te gunni yälguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, ¹⁴ regubernadoor nani ruxhäñni te rujnreni yälguxhtis rebeñdojñ näjza te guiliä'pni xpala'n reben nani laaca rujnreni. ¹⁵ Sa'csi Dios rlanj guntu recossa'c te cuedcxitu rextidxnayääl ni rnii reni di rlanj gumbee didxlii xcuent Jesucrist.

¹⁶ Colguibajñ si'c bejñ ni rut rnibeedi, na'cza guntu latsiaj sa'csi rut rnibeeditu, colguibajñ si'c guinibee Dios. ¹⁷ Ga'ptu

yäl̄nadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

Gudejd Jesucrist trabajw te baluini xho jiennu

¹⁸ La'tu ni najc mos, guideb yäl̄nadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx. ¹⁹ Sa'csi rchaglaiz ruhuii Dios te bejn palga sa'csi rililajz te bejn xtidx Dios rujn bejn huant che rdejdnı trabajw luxh xhet bejndini. ²⁰ Palga la'tu rujntu latsiaj ni'cni rusacsıni la'tu, ¿xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejdzä Jesucrist trabajw xcuenttu te guluiini xho guntu che chanutu lo xnezyujni. ²² Laani dini niujn nicla tej dojl, laani dini nusguee nicla tej bejn con didx-xhii. ²³ Che guniyajreni lojni, dini nudzu' yäl̄rniyajga. Che cadejdnı trabajw, dini nudzu' diidx niluxh bateedni lagajc laani ladznaa Dios ni rujn yäl̄guxhtissac. ²⁴ Gudeed Jesucrist trabajw si'c te bendolduxh, bacuaarenini lo cruz te ro'c gusacsıdixh tiejxhni xcuent xtojl̄nu, te na'c gunrunu dojl, te guibaṅsa'cnu lo xnezyuj Dios. Gudil̄guijdxreni tiejxhni te basiajcnı la'tu. ²⁵ Sa'csi galoo gujctu si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

3

Xho nanab guibaṅnäjtu chäältu

¹ Sigajcza la'tu, regunaa ni abachnaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxni näjza xho rniilu nadolajz lojni, näjza xho nabaṅnäsa'cluni. ³ Na'c gusucheetu ganax lo jiaatis, si'c najc guichniil yejctu, näjza biaoar ni rcaj diajgtu, guejntu, naatu, näjza ladsa'c ni najc sacru. ⁴ Colgusuchenäj lastootu yäl̄nadolajz, yäl̄rbecdxi lajz, näjza yäl̄sanälajz, sa'csi direni nitloj, luxh sacdixhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basobreni xtidx chäälr̄eni. ⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, näjza na'c guidxejbditu.

⁷ Sigajcza la'tu, niguii ni abachnaa, colguibaṅnäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yäl̄nabajn par tejpas. Colyejn si'c, te gucuadiajg Dios che cuedx-guiniabtu lojni.

Renani rdejđ trabajw che laaca rujnreni

⁸ Dee najc ni caniä loj guiraatu, saru colguibannäj sa'tu. Colgulaslajz sa'tu, colchanälajz sa'tu si'c rinälajz te niguii bejztni. Gactu bensa'c, bennadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl'nasa'c ni guniidxni lojtu. ¹⁰ Sa'csi scree caj lo xtidx Dios:

Nani rchaglajz guibajñni,

luxh rlazžzani saru tedni redxej lo guedxliujre, sugudxoñni guinii ro'ni didxnaj näjza didx-xhii.

¹¹ Guibicajni loj redzunguijdx, sugunni redzunsac'tis.

Suquiiłni yäl'rbedxi te ni'c chanuuni.

¹² Sa'csi ruhuii Dios rebejñ ni rujn dzunsac',

rucuađajgzani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsac'? ¹⁴ Palga caxäjsi tedtu trabajw che guntu redzunsac'. ¡Chicbaatu! Na'c guntu xhigab, ni claza guidxejbtu xcäl'ruchejbreni. ¹⁵ Colgusaan guinibee Dad Jesucrist neñ lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yäl'nadolajz saru gudzu'tu diidx. ¹⁶ Colguibañsa'c te cuedxi xcäl'riejntu te che guiniyajreni la'tu sa'csi nabañsa'ctu loj Crist, jianxtujy reni rniyaj la'tu. ¹⁷ Sa'csi hueenru tedtu trabajw che cayuntu te dzunsac', palga si'c rlazž Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojłnu. Xhetliidi xtojłni guyu' nez loj Dios, niluxh gudejdni trabajwduxh xcuent rebendojl. Bejñni si'c te gac guibignu lo Dios sa'csi gujt tiejxh Jesucrist, luxh guyusac sprit xteni lo tiejxhni te gubañsacni. ¹⁹ Che gajd xpřitni guibisac lo tiejxhni, huij spritni basule'ni diidx loj resprit ni yu' latzguiib. ²⁰ Respritga najc renani di nusoob xtidx Noé che basule'ni xtidx Dios lojreni. Guläjz Dios rebejñga guiraa redxej ni cayujñ Noé barcwro agujc xchero. Basłaa Dios xcäl'nabajñ xhujñtis bejñ, xhet gujcdireni gudejdreni lo nisguiro ni biajb guideb guedxliujre.

²¹ Che robnisnu naj, rusnaalajznu rebejñga; yäl'robnisga ruluiloj xho rusłaa Diosnu lo dojl. Et sa'csi riäjť beed lo tiejxhnu neñ nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubañsac Jesucrist lo rebegut. ²² Che birii Jesucrist loj rebegut, biu'ni xhaguibaa cadro gurejni xladbee Dios te ro'c rniibeeni loj rexangł Dios, näjza loj guiraa resprit ni rajc rniibee, ni yu' lo guedxliuj näjza xhaguibaa.

4

Colyejn xtzuun Dios

¹ Ni'cni sa'csi agudejd Jesucrist trabajw cuajni lo cruuj xcuentnu, sigajcza la'tu riäjł guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajñni lo guedxliuj, guibajñni si'c rłajz Dios, diruni guibajñ te gunni redzunguijdx xten guedxliujre. ³ Sa'csi bejntu si'ctis ni rłajztu galoo, bejntu si'c rujn rebejn ni di gumbee Dios, bejntu si'cni rłajz tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtuiduxh bazuxhijbzatu loj rebanäbdxab. ⁴ Dxejcti rebejn ni rujn recosga naj, rdxelojreni sa'csi dirutu gun ni rłajzreni, ni'c rniyarenı la'tu. ⁵ Niluxh laareni suureni nez loj Jesucrist ni agojl gun yälguxhtis loj guiraa rebejn, rebejn ni nabajñ näjza renani agujt, te gusule'reni xcuent nani bejnreni. ⁶ Ni'cni basule' Jesucrist xtidx Dios loj reni agujt, te mase che gubajñreni lo guedxliuj gujcreni yälguxhtis si'ctis ni rajc bejn, dxejc gujtreni, naj sprit xtenreni sinuu guibajñ si'c ni rłajz Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiñ xcäriejntu te saru cuedx-guiniabtu lo Dios. ⁸ Niluxh ni maazru sajc najc yälsanälajz resa'tu sa'csi che rinälajztu resa'tu, rialłajztu xtojł sa'tu. ⁹ Saru gurenäj bejn ni rdzujñ rolijzlu, na'c jiejytu. ¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtı najc xtzuunni guluiini xtidx Dios, suguiini ascanu najcni xtiidxpac Dios. Palga tejtı najc xtzuunni gacnäjni sa'ni, sugunnini, guideb yälñadip yälñadaan ni rudeed Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctı. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluloj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpırit Dıan xten Dios guideb xcälrdimbicha'ni neñ lastootu. ¹⁵ Gunatıro, andi gusaantu ted tejtı trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjłdi gacheeni.

16 Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

17 Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaznu xtiidxn, jxhocha gun rebejn nani di chalilajz xtidx Dios xcuent Jesucrist! 18 Lo xtidx Dios caj scree:

Lacti naganlajz rliaa rebenaya lo dojl,
 ¿xhocha gunäjni rebejn nani di chalilajz xtidx Dios näjza rebenojojl?

19 Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprittu lo Dios ni di gusgee, ni bencheetu, te chanuutis guntu ni riäjł guntu.

5

Yälrułijdx loj renani ahuililajz xtidx Dios

1 Narä nacä te bengool, bahuiä trabajw ni gudejd Jesucrist, bahuiäza xcärdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebenool, 2 colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios. 3 Na'c guinibeetu lojreni si'c rnibee te lam loj reni rujn xtzuumni, colguluiireni xho gunreni con xcäl'nabansa'clu. 4 Che guibisac Jesucrist, ni rajp nuure, laani suniidxni xcuentnu, te yäl'nasacduxh nani dipac nitloj.

5 Sigajcza la'tu ni najc bi'n, colgusobdiajg xtidx rebenool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,
 niluxh racnäjni rebejn ni najc nadolajz.

6 Ni'cni guideb yäl'nadolajz coljiu lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni.

7 Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

8 Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguilni chu guxinni.

9 Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetzn ni nabajn lo guedxliujre. 10 Che agudejdtu trabajw tiop-choñ dxej, Dios nani rajp guiraa yäl'racnäj, nani gurejdx la'tu te näjza la'tu xca'tu xcalrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxn, bejn ni nadip

lajzni, bejn ni di guidxejb. ¹¹ Laani rajpni yälrnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guiitzre lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälracnäjpac Dios. Colsudzu'tz xcuent yälracnäjre.

¹³ Rexpejn Dios ni re' lo guedx Babilonia ruxhal xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtixtios lojtu. ¹⁴ Colguinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Guijtz Ni Rojp Ni Bacuaa Pedr

Pedr rucuaa te guijtz loj reni ahuililajz

¹ Narä nacä Simón Pedr, ni rujn xtzun Jesucrist, te apost xteni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c beñnaya xcuent Xtiosnu Jesucrist nani baslaa nuurnu lo dojl. ² Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

Xho riäjł gac rexpejñ Crist

³ Sa'csi xcälrnibee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcälñansa'cni. ⁴ Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejñni, sajcnu beñsa'c si'c najcni sa'csi abiriinu loj redzunguijdx ni chaglajz rujn rebejñ ni ruxhiñ guedxliujre. ⁵ Ni'cni nanab gacbeenu xho nabañnu lo guedxliujre. Siroobru xcälrililajztu sacnäjni la'tu te guibañsa'cnu lo Dios; luxh sa'csi nabansa'ctu, siroobru xcälñajntu xcuent dzunsa'c näjza dzunguijdx. ⁶ Luxh palga guroob xcälñajntu xcuent dzunsa'c näjza dzunguijdx sajç guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälbedxilajz, sajctu beñsa'c, beñdxan. ⁷ Che anajctu beñsa'c, beñdxan, sinälajztu resa'tu; che asanälajztu sa'tu, arajptu yälñanälajz sa'tu xten Jesucrist.

⁸ Palga la'tu rusoobtu guiraa rediidxre, luxh chanuutis ca-roobreni neñ lastootu, ditu guibañxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälajzni xho basia Dios rextojłni nani be-ñni galoo. ¹⁰ Ni'cni rniä lojtu rebetzä, colsejs, colguisieed xtidx Dios te gacbeepactu, guluilojzatu lo bejñ xho gurejdx, xho gule Dios la'tu, sa'csi lał ni chanuu gucuadiajgtu rediidxga, dipactu gunijt lo Dios. ¹¹ Palga guibañntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

¹² Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yälrililajz xten didxlii ni yu' neñ lastootu. ¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre. ¹⁴ Ananä asiäddzungajxh dxej ni

xca' Dios narä, sa'csi abaluu Dad Jesucrist ni'c loä. ¹⁵ Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yäl'nasa'c xten Crist

¹⁶ Che basule'nu lojtu xcäl'rnibee näj xcäl'rdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcäl'rdimbicha'ni. ¹⁷ Sa'csi che badeed Dios xtdnu yäl'rnibee, yäl'rdimbicha' lojni, dxejc biejn diajgnu gunii Dios, birii xse'ni neñ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹ Ni'cni naj guliiru rediidx ni gunii reprove't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jiaäd bajl xhaguibaa. Dxejc lagajc laani susanij lastoonu. ²⁰ Niluxh ganiddoo nanab gacheetu dee: nicla tej bejn sajc guinii laatisni sajc guinii xhi säloj xtidx Dios, ²¹ sa'csi nicla tej diidx ni bacuaa reprove't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpriet Djan Dios lojreni gucuaareni.

2

Rebejn nani rusguee (Judas 4-13)

¹ Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcäl'rililajzreni, sibälazreni lagajc Dad Jesucrist nani gudijx xcuent xtoj'reni. Niluxh renani rusguee, siojb nitlojreni par tejpas. ² Xhidajlza bejn sinaj'reni lo xcäl'nabañguijdxreni, dxejcti ni'c gun siniyaj xhidajl bejn xnezyuj xtidxlii Dios. ³ Sa'csi ruguilajzreni xmeeltu, xhixtentu, ni'c siädgusgueerene la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäzgjajceni agujc xchero.

⁴ Najcni si'c sa'csi di Dios niäl'lajz rextojl rexanglni nani bejn dojl, niluxh baxhañnireni gabijl, basäunireni neñ reguednacäy cadre cabäjzreni dxej ni gun Dios xcäl'guxhtisni. ⁵ Sigajcza rebejn ni guyu' galoo, banitloj Diosreni, baslaa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhañni nisguiro te biädnitlojni guiraa rebejn nani di nucuadiajg xtidx Dios. ⁶ Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. ⁷ Guläa Dios Lo't ni gujc te beñsa'c

lo reguejdxga, sa'csi guc-huin lajzni xcuent relatsiaj ni bejn rebendoj_lga. ⁸ Guideb ni guläjs Lo't, te bensa'c, lo guejdxga, dxej, yääl guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi bensa'cni. ⁹ Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsíni rebendoj_l cheni guidzujn_li dxej ni gunni xcälguxhtisreni.

¹⁰ Guliduxhni, sujnru Dios yälguxhtis loj rebejn nani rlaiz gun si'tcisi ni rlaiz tiejxhreni, näjza renani rbälaz xcälrnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. ¹¹ Niluxh nicla tej rexangl Dios ni rajpru yälrnibee lo rebejnre, direni guiniyaj, cue'creni xquejreni lo Dios.

¹² Luxh, rebejnga najc si'c reguidxaa nani xheti xcäriejnreni, cabäjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yälrusacsiduxh xcuent rextoj_lreni. Laareni rchaglaizreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu la_l ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzaren dojl, ruliireni lastooreni te säblajzreni meel, najcreni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglaizru nani rquijx yällatsiaj. ¹⁶ Niluxh gudilnäj Diosni xcuent xtoj_lni, bejn Dios gunii te mandip si'c xse' bejn, te bascuääzni profe'tga, dini nusaan niujjni nani cayujjni, cayujjni si'c te bejn ni rajc yejcn.

¹⁷ Reben latsiajre najc si'c te bisie cadro xheti nis, najzaren si'c rexcäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yälguxhtis. ¹⁸ Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlaiztis tiejxhreni, con yällatsiaj rusgueereni rebejn nani entis birii loj reni rujn sa' dzunguidxga. ¹⁹ Rusgueereni, rniireni rut gudxoindini palga jädnajlnireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn, ni'c rusäuni nen latzguiib. ²⁰ Sa'csi palga agubicaj te bejn loj redzunguidx xten guedxliuj sa'csi huililajzreni xtidx Dad Jesucrist nani rusläa rebejn lo guiraa dojl, dxejctiru gubisacni loj xtoj_lni, abixhidsacreni lo xtoj_lreni, nalajz najcreni si'c che gajdreni gumbee xtidx Dios. ²¹ Huenru direni niembee xnezyuj Dios, quela che abiembeerreni nezyujga, cuälazreni

didx dxan, xtidx Dios ni basule'reni lojreni. ²² Dxejcsii rsiojb diidx ni najc scree: "Rbisac te bā'cw loj xcälrdzujbni. Cuch ni entis gojz richusacni lo xpajñni."

3

Xho gac che guibisac Jesucrist

¹ Rebetzä, dee najc ni rojp guijtze ni caguxhalä lojtu; lo guiro'p guijtze cagusnibä la'tu xcuent reyälrulijdx ni gusnaj lajztu. ² Colgusnaj lajztu rediidx ni gunii reprofet agujc xchero, najza rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlanj tiejxhreni. ⁴ Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn cheni guc-cheeli guedxliujre." ⁵ Niluxh che rniireni si'c, rlanjpac jäällajzreni agujc xchero benchee Dios xhaguibaa xcuent xtiidxtisni, najza guniitis Dios te si'c guc-chee guedxliuj, biriini nen nis, naj tre'ni loj nisga. ⁶ Dxejcti gunitloj guira'ti ni yu' lo guedxliujga che biajb te nisguiro, gunitlojni. ⁷ Niluxh xhaguibaa najza guedxliuj ni tre' naj, cayajp Diosreni xcuent xtiidxni te checreni che guidzujñ dxej ni gunni yälguxhtis, che gunitlojni rebendojñ.

⁸ Rebetzä, na'c jäällajztu, Jesucrist ruhuii tebdxej si'c te tzu-gayuu ijz, rhuiizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäzñi gusiejch lajztu, sa'csi di rlanjñi nitloj nicla tejtü.

¹⁰ Niluxh sidzujñ dxej che guibisac Jesucrist lo guedxliujre si'c rdzujñ te gubaan, rut gacbeedi siäädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre najza guira'ti ni tre' lojni, guiragajcni sejcni.

¹¹ Sa'csi sinitloj guiraa redee, ni'c nanab guibañnayatu lo guedxliujre, na'c guntu dojñ. ¹² Colcuäjz dxejtis ni jääd Dios lo guedxliuj. Dxejc sejc xhaguibaa, sinitlojni, luxh guirali ni yu' sialni lo guiboro. ¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxtis dzunsa'c, xhetiru dojñ.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajñtu, nabañnayatu, xhetiru xtojñtu. ¹⁵ Colhuiu xhi dzuun bejn Dad Jesucrist ni'c rajpnu yälrusläa lo dojñ. Sigajcza bacuaa bejtznu Pabl ni sanälajznu. Bacuaani sa'csi badeed Dios yälñajn lojni. ¹⁶ Nen guiraa rexquijtñi bacuaani xcuent rediidxre. Yu' gaii guijtze ni bacuaani ni najc naganduxh.

Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgueetu, te na'c gunittu xcälrsiudzu'tztu lo xtidx Dios. ¹⁸ Colgustioob xcäriejntu con yälracnäjä näjza yälnejn xten Dad Jesucrist nani ruslaa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yäl nabajñ par tejpas loonu

¹ Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu. ² Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabaññäj Jesucrist Dios. Baluii Dios Jesucrist loonu. ³ Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtenu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. ⁴ Cagucuaä rediidxre lojtu te guibalazduxhtu.

Dios najc Bajl

⁵ Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷ Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

⁸ Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. ⁹ Palga guicäjpnu lo Dios guiraa redojl ni cayennu, siällajzni xtojñnu, sudzucajni rextojñnu, sa'csi laaca rujñni luxh guli najc rextiidxni. ¹⁰ Palga guinuunu dinu niujñ dojl, rniinu najc Dios si'c te bejn ni rñii didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

2

Racñäj Jesucrist nuunu nez loj Dios

¹ Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racñäj Jesucrist nuunu, rñiini xcuentnu lo Dios, sa'csi xheti xtojñni. ² Gujt Jesucrist xcuentnu lo cruzj. Gudijxni rextojñnu lo cruzj. Luxh et rextojñtisnu gudijxni. Gudijxni rextojñ guiraa rebejn ni re' lo guideb guedxliuj.

³ Palga rusoobnu rextidx Dios, huenliisi rluii riembeenu Dios. ⁴ Cheni rñii te bejn, "narä rumbeäni", niluxh dini gusoob rextiidxni, rusgueeni resabejnñni. Di lajzni nilii xtidx Dios. ⁵ Palga rusoobnu xtidx Dios, guliipac rinälaaznu Dios, ni'c

najnnu nabaññäjnuni. ⁶ Cheni rniinu nabaññäjnu Jesucrist, nanabpac guibañsa'cnu si'c gubajñ Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli. ⁸ Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yälñacäjy. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäjy.

⁹ Palga chutis tejnu rni, "nabañä lo nianij xten Dios", niluxh rdxe'chni lo resa'ni, lo yälñacäjy yu'ni. ¹⁰ Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljajz gunni dojl. ¹¹ Niluxh palga rdxe'chnu lo resa'nu, nabajñnu lo yälñacäjy sa'csi riennu dojl, sasaanu lo yälñacäjy. Nicla gacbeenu canejz chonnu, sa'csi ruscäjy beñdxab balojnu.

¹² Cagucuaä rediidxre lo guejbtu, resa'ä ni rililajz, sa'csi abadzucj Dios rextojlñu, sa'csi lo cruzj gudijx Jesucrist rextojlñu. ¹³ Cagucuaä rediidxre lo guejbtu, redad beñgool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beñdxab.

Cagucuaä rediidxre lojtu rexi'nä, sa'csi rumbeetu Dios. ¹⁴ Abacuaä rediidxre lo guejbtu, redad beñgool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx beñdxab.

¹⁵ Na'c guichagljajztu guntu renani rujñ rebejñ nani di chalilajz xtidx Jesucrist; na'cza chanälaztejtu xhixtentu ni rajptu lo guedxliuj. Palga rinälaztejtu rehxixtenti ni ra'pnu lo guedxliuj, dxejc dinu chanälajz Dios. ¹⁶ Rebeñ guedxliuj ni di chalilajz xtidx Dios rchagljajzreni rujñreni redzunguijdxre: rujñreni dzunguijdx nani rchagljajz tiejxhreni; rujñreni dzunguijdx nani rchagljajz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷ Luxh rnitlojpac guedxliuj. Sinitlojza guiraa reni rchagljajz rujñ reben guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibaññäjnuni par tejpas.

Didx gulii näjza didx-xhii

¹⁸ Guejbtu resa'ä ni rililajz xtidx Dios, asiäddzujungajxh dxej che guluiloj niguii nani rdxe'ch loj Jesucrist. Abiejñ diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracheenu asiäddzujungajxh dxejga che guluiloj

niguiiga. ¹⁹ Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰ Gule Dios Jesucrist. Jesucristre baniidx Sprit Dxaan xten Dios loonu te gacbeenu xhini'c najc redidxliipac. ²¹ Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios. ²³ Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni biejn diajgtu galooli che huililajztu rextidx Dios. Palga rusooobtu rediidxga, nabannäjtu Dios näj xi'nni Jesucrist. ²⁵ Abia'n Jesucrist diidx guniidxni yäl'nabanncoob loonu. Naj ara'pnu yäl'nabajnre, ra'pnuni par tejpas.

²⁶ Abacuaä rediidxre lojtu xcuent rebejn ni rlajz chalilajztu rediidx ni xhet guliidi. ²⁷ Baxhaļ Jesucrist Sprit Dxaan xten Dios loonu. Rbäjzni nen lastoonu. Dinu guiquiin chu stee bejn gului loonu xhi diidx najc guli, sa'csi lagajc Sprit Dxaan xten Dios ruluii xtiidxni loonu. Naj ruluiini la'tu guiraa ni najc guli, dini gusguee la'tu. Colguibannäj Jesucrist; colgusoob xtidx Jesucrist si'cni ruluii Sprit Dxaan xten Dios lojtu.

²⁸ Naj guejbtu resa'ä, colguibannäj Jesucrist, te che jiädsacni lo guedxliuj sisiutzu'tznu nejz lojni, dinu guitujy nejz lojni. ²⁹ Anajntu laaca najc Dios. Anajntu renani rusooob xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinälazduxh Dios nuure, ni'c anaj Dios nuure najcnu rexi'nni. Luxh guli najcnu rexi'n Dios. Reben guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. ² Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³ Che rnaj laaznu sidzujn dxej gac tejganu si'c ni najc Jesucrist, dxejc rban'sa'cnu si'c ni gubajn Jesucrist lo guedxliuj.

⁴ Di rebejn ni rujn dojl gusoob leii xten Dios. Che riennu dojl, runijtnu lo leii xten Dios. ⁵ Racheenu Jesucrist biäd lo guedxliuj, gujcn i niguii te gujc badzucajni rextojl^{nu}. Laani dini niujn dojl. ⁶ Che sasanäjnu Jesucrist, dinu gac be^{ng}uijdx. Di bejn nani rujn dojl chalilajz xtidx Jesucrist, dizani gum-beeni. ⁷ Resa'ä, na'c chalilajztu didx-xhii ni rnii bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist. ⁸ Rebejn nani rujn dojl najc xi'n bendxab. Galodooli rujn bendxab dojl. Ni'cni biäd Jesucrist Xi'n Dios lo guedxliuj te gudzucajni redojl nani rujn bejn xcuent bendxab.

⁹ Rebejn nani najc xi'n Dios direni guichag^{lajz} gunreni dojl, sa'csi abachaa Dios xcäriejnreni, sa'csi rbäjz Dios neⁿ lastooreni. Direni gun dojl, sa'csi najcreni xi'n Dios. ¹⁰ Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäj^l chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: co^lchanälajz resa'tu. ¹² Xhet si'c di toCain nani gujc xi'n bendxab. Bejn ni dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. ¹³ Na'c guidxelojtu che guidxech^{lajz} rebejn lojtu. ¹⁴ Racheenu dirunu sa lo xnezyuj yälgujt, sa'csi dinu guidxech^{lajz} loj resa'nu. Rajpnu yäl^{nabajⁿ} par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rd^{xech}lajzreni lo sa'reni. ¹⁵ Chutis ni rd^{xech}lajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yäl^{nabajⁿ} par tejpas. ¹⁶ Racheenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäj^l gacnäjn resa'nu, mase guetnu lacuaa guetreni. ¹⁷ Chutis tejnu ni rajp xhidajl xhixteni, luxh dini gacnäy nicla tejnu ni xhet rajpdi, di bejn ga chanälajz Dios. ¹⁸ Guejbtu resa'ä, na'c chanälaaznu resa'nu con rextiidxtisnu, na'c guiniit^{isnu} rionälaaznu resa'nu. Palga rionälaazpacnu resa'nu, sacnäjn resa'nu.

Sisiutzu'tznu nez loj Dios

¹⁹⁻²⁰ Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac be^{nsa}'c, dizanu gac xi'n Dios, nanab jiunu rextiidxtis Dios, na'c jiunu re^{xhigab}nu. Dios najn re^{xhigab}ga. Niluxh Dios anaj: renani rinälaaz resa'reni, reni'c najc rexi'n ni. ²¹ Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutijp lastoonu che rbedx-rniabnu lo Dios. ²² Xhitis ni

rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaa lajz Dios. ²³ Dee najc rediidx ni gunibee Dios gusoobnu: chalilaaaznu xtidx Dios, diidx ni rnii xho gujt Jesucrist lacuaa nuunu, chonālaazzanu resa'nu si'cni gunibee Dios. ²⁴ Palga rusoobnu guiraa nani gunibeeni, nabaññajñuni, si'cza nabaññajni nuunu. Nancheenu nabaññaj Dios nuunu, sa'csi baniidxni Sprit Dxaan xtenni te cuāaz neñ lastoonu.

4

Scree gacbeenu xhi didx najc guliipac

¹ Guejbtu renani rinālazā, na'c chalilajztu rextidx chutis bejn nani naa, “rniā rextidx Dios lojtu”. Ganiddoo colgula'tz rextiidxni te gacbeetu don chu xtidx caniini, sa'csi xhidajl bejn sinii lojtu, “nuunu rniinu rextidx Dios”, niluxh canisireni si'c. ² Scree gacbeenu xhi diidx najc guliipac. Guiraa rebejn nani guinii “Jesucrist, Xi'n Dios, ni biāad lo guedxliuj si'c niguii”, reni'c cayacñaj Sprit Dxaan xten Dios, reni'c canii xtidx Dios. ³ Guiraa rebejn nani di guinii biāad Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siāad te niguii ni rdxe'chduxh loj Jesucrist, luxh naj abidzujñ rextzuun niguiiga lo guedxliuj.

⁴ Guejbtu resa'ā, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbājz neñ lastoonu abejñni gaan lo bendxab ni nabajñ lo guedxliuj. ⁵ Rebejn ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶ Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

Rinālaz Dios rebejn

⁷ Rniā lo guejbtu nani rinālazā, nanab chanālaaznu resa'nu, renani huililajz xtidx Dios, sa'csi Dios racnāj nuunu te chanālaaznu resa'nu. Palga rinālaaznu resa'nu, dxejc najcnu rexi'n Dios, luxh guli riembeenu Dios. ⁸ Palga chutis tejnu di chanālaz resa'ni, dizani gumbee Dios, sa'csi lagajc Dios racnāj chanālaaznu Dios, racnājzani chanālaaznu resa'nu. ⁹ Abasule' Dios loonu lacti rinālazni nuunu. Yu' tejtis Xi'n Dios. Abaxhañni Xi'nni lo guedxliuj te gudijxni rextojñnu lo cruz te si'c guibaññajñuni par tejpas. ¹⁰ Si'c racbeenu rinālazpac Dios nuunu. Galoo dinu ninālaz Dios. Niluxh Dios huinālaz nuunu, ni'c baxhañni Xi'nni lo guedxliuj te gudijxni xtojñnu lo cruz.

¹¹ Rniä lo guejbtu nani rinälazä, si'cni rinälajz Dios nuunu, sigajcza rlanjzni chanälaaznu resa'nu. ¹² Nicla tej bejn gajd fii lo Dios. Niluxh palga chanälaaznu resa'nu, Dios nabajn neñ lastoonu, dxejc guli rinälaazpacnu Dios. ¹³ Nancheenu nabaññajnu Dios, sigajcza nabaññajpac Dios nuunu, sa'csi abaxhalni Sprit Dxañ xteni cuääz neñ lastoonu. ¹⁴ Narä näjza reapost abahuiinu loj Jesucrist. Caniä lojtu abaxhal Xtadnu Dios Xi'nni lo guedxliuj te guslaani rebejn lo xtojreni. ¹⁵ Chutis tejnu ni rniä "Jesucrist najc Xi'n Dios", nabaññajni Dios, nabaññajza Dios bejnnga.

¹⁶ Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabaññajnu Dios, nabaññajza Dios nuunu. ¹⁷ Naj sanälaaznu Dios si'cni rlanjzni luxh palga chanälaaznuni guidebtis ni guibajñnu, dinu guidxejb che guidzujñ dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnñnu lo guedxliuj, nabaññajnu Dios si'c nabaññaj Jesucrist Dios. ¹⁸ Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejb dinu. Nani rdxejb, rdejdn trabajw, gajd bejnnga chanälazsa'c Dios.

¹⁹ Rinälaaznu Dios sa'csi ganiddoo Dios huinälajz nuunu. ²⁰ Palga chutis tejnu naa "rinälazä Dios" niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. ²¹ Agunibee Dios, nani rinälajz Dios chanälajzni resa'ni sigajc rinälajzni Dios.

5

Riennu gaan lo guiraa redoļguijdx lo guedxliuj

¹ Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios. ² Palga rinälaaznu Dios, palga ru-soobzanu xtiidxni, dxejc najñnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. ⁴ Chutis tejnu ni najc xi'n Dios, riennu gaan lo redoļ ni re' lo guedxliuj. Riennu gaan lo redoļ lo guedxliujre sa'csi huililaaznu xtidx Jesucrist. ⁵ ¿Chuni'c cayujñ gaan lo redoļ lo guedxliuj, ä? Renani rililajz najc Jesucrist, Xi'n Dios, reni'c rujñ gaan lo redoļ lo guedxliujre.

Rediix ni baluii Dios loonu xcuent Jesucrist

⁶ Biääd Jesucrist lo guedxliujre. Birobnis Jesucrist, baxhe'zani xtiejñni lo cruzj. Xhet ganaxdi te guirobnisni biäädni, näjza te guxhe'ni xtiejñni lo cruzj che biäädni. Sprit

Dxan xten Dios canii rediidxre. Guliipac rextiidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruzj che gujtni. ⁹ Palga rililaaznu xtidx rebejn ni rbäjz lo guedxliuj, nungäjł chalilaazrunu xtidx Dios. Rediidx nani rnii jioñ reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. ¹¹ Scree najc rediidx ni rnii Dios. Abaniidx Dios loonu yälñabajñ par tejpas. Yälñabajñga biädñä Xi'nni, Jesucrist. ¹² Palga nabannäjnu Xi'nni, rajpnu yälñabajñ par tejpas. Palga dinu guibanñäj Xi'nni, dinu ga'p yälñabajñ par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextidx Jesucrist te gacbeepactu rajptu yälñabajñ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujñ dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajñ lojni. Niluxh yu' te dołroduxh. Chutis te bejn ni gun dojlga, di Dios gudeed lo bejnga yälñabajñ par tejpas. Dizana guiniä guiniabtu lo Dios xcuent bejn ni rujn dołroga. ¹⁷ Guiraa redzunguijdx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

¹⁸ Racbeenu guiraanu nani najc xi'n Dios di rlaaznu jiennu dojl. Racñäj Jesucrist nuunu te di beñdxab gun gaan nuunu, te dizanu gusoob xtidx beñdxab.

¹⁹ Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx beñdxab.

²⁰ Najnnu biäd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios guli. Nabannäjnu Dios ni najc guli, sa'csi nabannäjnu Jesucrist. Laani najc Dios ni najc guli. Caguniidxni loonu yälñabajñ par tejpas. ²¹ Resa'ä, na'c guzuxhijbtu lo rebanäjñ ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gulii näjza yälrinälaaznu resa'nu

¹ Narä nacä bengool. Cagucuaä guiitzre lojlu nane' nani agule Dios, näjza loj rexi'nlu. Rinälazäpac la'tu luxh xhet xtebädi; näjza guiraa reni rililajz xtidx Dios sanälajztu. ² Nuure rinälaaznu la'tu sa'csi yuchee neñ lastoonu rediidx nani najc gulii, luxh dilajznu jääl rediidxre. ³ Xtadnu Dios, näjza Jesucrist Xi'nni, gacnäy nuunu, jiareni nuunu, guscuecdxi lajznu con xcälñajn didxlii näjza yälrinälajz.

⁴ Bibalazduxhä che gucebeä yu' rexi'nlu ni rusoob xtidx Dios si'c gunibee Dios loonu gusoobnuni. ⁵ Nane' ni gule Dios, diidx nani rniabä gusoob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaaznu resa'nu. ⁶ Sinälaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

Rebejn ni rnii garenca diidx ni xhet guliidi

⁷ Balti bejn birii loonu, naj cagusgueereni xhidajl bejn ni re' lo guedxliuj. Caniireni di Jesucrist niajc niguii che biäadni lo guedxliuj. Sa' bejnre najc beñrusguee. Sa' bejnre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlaiz gugu'ch xtiidxpacni lo xtidx Jesucrist, di bejnğa gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jääd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'." ¹¹ Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäyzani redzunguijdx ni rujn bejnğa.

Rudeedni xtixtios

¹² Xhidalduxhru diidx rlazä guiniä lojtu, niluxh di rlazä gucuaäreni lo guiitz. Cabäzä jäädhuiä lojtu ro'c te guiniä rediidxre lojactu, te guibaalajztu. ¹³ Rexi'n bäjllu, nani aguleza Dios, ruxhał xtixtios lojtu. Ni'ctis najc ni rucuaä lojtu. Sugacni si'c.

Guijtz Ni Riojn Ni Bacuaa Juan

Cagucuaani didxsa'c lo Gayo

¹ Narä nacä te beṅgool. Caguxhalä guijszre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yälñadaanlu. ³ Bibälazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

⁵ Dad Gayo, laaca cayujnlu che racnäjlü renani rililajz xtidx Jesucrist, mase dilu gumbeereni che riädreni lojlu. ⁶ Aräjpreni lo resa'nu ni rdxagsa' ree xho huinälajzlureni näjza xho gucnäjläreni. Laaca bejnlu gucnäjlu resa'nu, badeedlu xhi biquiinreni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni rulüi xtidx Dios. ⁷ Rulüiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸ Si'cza nanab gacnäjnu rebejn ni rilüi xtidx Jesucrist neñ garen-garen guejdx, te si'c jiennänu xtzuun Dios guiraa renani rulüi xtidx Dios.

Di Diótrefes niujñ redzunsä'c

⁹ Abaxhalä te guijsz lo rexpejn Jesucrist ro'c. Niluxh Diótrefes rläjz guinibeeni lo resa'nu ro'c. Dini jiu xtidxä. ¹⁰ Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujñreni ro'c. Dizani gusaan fiitu resa'nu ni riäd ro'c, mase rläjz chu tejtü fiireni. Luxh rläjzni gudxojñni guidxagnäjtu rebejn nani ruhüi resa'nu ni rulüi xtidx Jesucrist.

¹¹ Sa'ä ni rinälazä, na'c gunlu redzunguijdx, bejn redzunsä'c. Nani rujñ dzunsä'c ni'c najc Xi'n Dios. Chutis tej ni rujñ redzunsä'c najc xpejn Dios. Chutis tej ni rujñ redzunguijdx, di ni'c gumbee Dios.

Rniireni didxsa'c xcuent Demetrio

¹² Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuaä rediidxga lo guijtzre. ¹⁴ Runä xhigab di gaclaa jiädhuiä lojlu, dxejcti jieinu diidx.

¹⁵ Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga reexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹ Narä nacä Judas, ni rujn xtzuuñ Jesucrist. Narä nacäza betz Jacob. Cagucuaä guijtzre loj renani agule xtdnu Dios, renani sanälazduxhni, nani cayapcheeni par Jesucrist. ² Rniabä lo Dios, gulaslazduxhruni la'tu, guscuecdxiduxhruni lastootu, gacnäjni la'tu, guniidxruni yälsanälajz.

Renani ruluii yälrusguee (2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yälruslaa lo rextolnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yälirililajz ni basule'reni par tejpas loj rexpejn Dios. ⁴ Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni bejguidxduxh, rutzuréreni xcälracnäj Dios, rujnreni xtujy, sanäreni te yäl'nabandxuudx. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. ⁶ Rexangl Dios nani di nucuadiajg diidx, ni birii cadro rlazj Dios churen, reni'c basäu Diosreni cadro nacäiboo te cabäjzreni gun Dios xcäl'guxhtisni lojreni. ⁷ Si'c bejnni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzaren, regunabiräax. Dxejc gudejdreni trabawduxh huejcreni nen guiboo par tejpas xcuent xtojreni, ni'c najc te yäl'rulijdx loonu.

⁸ Rebejn ni riu' lojtu najc sa'c reben galoo ni bejn dojl. Nabajreni si'c ni bisieedreni lo guiraa nani ruluii yäl'rnixcal, ruxhiñreni tiejxhreni, rbälazreni xcäl'rnibee Dios, rniyajzaren, rexangl Dios. ⁹ Miguejl ni rnibeeru loj rexangl Dios, che gudildiidxni bejdxab yejc tiejxh to Moisés, dini niniyaj bejdxab, alga räjpni: "Sugun Dad Jesucrist yäl'guxhtis lojlu." ¹⁰ Niluxh rebejn ga rniyajreni nicla ganreni xhini'c rniireni. Niluxh nani racbeepac rebejn ga najc yäl'najn nani nicla niqiiñ nisieedreni, lala sa' nani rujnza reguidxaa, ni xheti xcäriejn, reni'c sujn nitlojreni.

¹¹ ¡Aii! ¡Riazanureni! Sanajlreni xnezyuj Caín, luxh te gunreni gaan meel ruxhuñlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni. ¹² Laaren, najcreni te xtuiduxh lo rexchej ni rajc guidoo,

direni guidxejb gauxchenäjreni la'tu, sa'csi xque'tisreni ri-ureni. Najcreni si'c te xcäy ni xhet nisguij siädñäni, nani sanä bej nezree nezrec; najczareni si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx. ¹³ Laareni najc si'c nis ni räjs lo nisdoo, che cayajc te bidonduxh, sää, siädni, carii xtujuyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yälñacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xagdodoo Adán, räjpni: “Bahuii, siädñä Dios xhidalduxh xanglñi ¹⁵ te gunni yälguxhtis loj guiraa bejn te gusacsíduxhni guiraa rebejn ni di gumbee Dios xcuent redoľduxh ni bejnreni, xcuentza redidxnaj ni guniyaj rebeñdolduxhre Dios.” ¹⁶ Rebejnre laa reni rmojm, runduxhrenei quej, rujnreni si'ctis ni rlanj tiejxhrenei, rniireni guiraloj didxnaj, rniisireni didxsa'c loj rebejn te gun rebejnğa si'c ni rlanjreni gunreni.

Rulidxni rebejn nani ahuililajz xtidx Dios

¹⁷ La'tu, betzä ni sanälazä, riäjľ guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: “Neñ redxelult che guibisac Jesucrist, su' bejn ni suxhizñäjreni rextidx Dios, sujnreni si'ctis guisia' lajzreni.” ¹⁹ Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xpřit Dxan xten Dios cuäöz neñ lastooreni.

²⁰ Niluxh la'tu rebetzä nani sanälazä, coltioob loj xcälřililajztu ni siäd lo Diostis, colñab lo Dios xcuent yälřnibee xten Xpřit Dxan xtenni. ²¹ Colguibajntis lo yälřsanälajz xten Dios, colřsusintis laľ ni cayunlojtu yälřrulasajz xten Dad Jesucrist ni guniidx yälřnabajn par tejpas.

²² Colgacñäj renani di chalilazsa'c te chalilajzpacreni xtidx Dios. ²³ Colyacñäj sgaii te guibicajreni lo dojl, gudobxhajnreni, colyejn xhigab lo guiboo cayejcreni. Colyacñäj sgaii bejn, colgulasajzreni con yälřrdxejb, niluxh colñatiru te di guntu lagajc dojl ni rujnreni. Gulälaz nani rujnreni, nani ruxhñreni.

Redidx lult

²⁴ Colguiliä'p xpala'n Dios nani racñäj la'tu didi jiajbtu lo dojl, nani rujn sajc suutu lo xcälřdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yälřnajn te guslaani nuurnu lo dojl xcuent ni bejn xtdadnu Jesucrist. Colguiliä'p xpala'nni, rajpni guiralii yälřnibee, yälřdimbicha', galooli, näj ñaj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Balui loj Jesucrist lo Juan

¹ Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluiini guiraa recosga lojni. ² Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roj guijtze xcuent recos ni churu gac, renani riuza rediidxga, renani rguchee rediidxga nen lastooni sa'csi siäddzungenajxh redxej che soob rediidxga.

Juan cagucuaa guijtza lo gajdz guidoo

⁴ Narä nacä Juan. Cagucuaä guijtze loj guigajdz reguidoo ni tre' lo región Asia. Dios gupalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz respriit ni suga' guideb gabi cadro rnibeeni, ⁵ näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. ⁶ Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

⁷ ¡Colgacbee! Laani sibilacni lo rexcäy, luxh guiragajc rebejn suhuu lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc relettr A con Z —rnii Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

Bahui loj Jesucrist lo xcälrdimbicha'ni

⁹ Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. ¹⁰ Te dumingw, laj ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhal̄ guijtza loj guigajdz guidoo ni yu' nez Asia, neṅ reguejdxre: Éfeso, Esmirna, Pérgamo, Tiatira, Sardis, Filadelfia, nājza Laodicea.

¹² Dxejc gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujṅ lo ni'lini, lastoozani naliib te cinturon̄ gulajg ni najc ganaxduj oor. ¹⁴ Yejcni nājza xquidxejcti najczareni nolbäj si'c xquichlajd xiil, nolbäj si'c yejg. Dxejcru rbebajl lojni. ¹⁵ Ni'ni rdimbicha' si'c guiib ni laa bronx che cayejcni lo guiboo. Xse'ni riejn nadipduxh astoo che riäjṅ nisro neṅ regueuu. ¹⁶ Ladbee ca' ṅaani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te beṅgut. Dxejcti batzuubni ṅaani xladbeeni yecä, dxejc guniini loä, najni:

—Na'c guidxejblu, narä nacä ni gubajṅ galooli, narä nacäza ni guibajṅ lult. ¹⁸ Narä nacä ni nabajṅpac; gutä, niluxh ṅaj nabanä par tejpas. Rapä yälṅribee lo yälṅujt nājza lo gabijl. ¹⁹ Ni'cni bacuaa recos ni abahuiilu, nani cayajc ṅaj, nājza nani churu gac. ²⁰ Dee najc laa yälṅhiga'tz xten regajdz balxhaguibaa ni bahuiilu lo ṅaä ladbee nājza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejṅ guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ṅaani ladbee, nājza nani rsiaj galäii guigajdz gandilier oor, rnii rediidxre lojtu: ² Narä numbeä xhi redzuun rujntu, xhi trabajw rdejdtu rujntu dzuunga, nājza xho rsiudzu'tztu. Dizatu guchagsa'tu beṅlatsiaj; nājza bala'tztu xho rujn rebejṅ nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueerenei bejṅ. ³ Rsiudzu'tztu, rujntu huant xcuent xtidxä, gajdtu guidxajg. ⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijttu, colṅusiejch lajztu, colṅejṅ lagajc redzuun ni bejntu galoo che guslojtu huililajztu xtidxä. Palga ditu gusiechajztu, sudzucää xcandilieertu cadre suga'ni. ⁶ Laaca rujntu rbälaztu xtzuun rebejṅ ni laa nicolaítas, sa'csi

nājza narä rbixlazä xtzuunreni. ⁷ Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl_nabaj_n, ni yu' xhaguibaa cadro yu' Dios.”

Rediidx ni rniini loj rexpejn guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: ⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz be_ndxab. ¹⁰ Na'c guidxejblu trabajw nani agojl tedlu. Aree be_ndxab gusäl gaii sa'tu ne_n latzguuib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl_nabaj_n. ¹¹ Nani rlanj cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yäl_gujt ni rojppa lojni.”

Rediidx ni rniini lo rexpejn guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: ¹³ Narä nanä caro rbäjztu, rbäjztu lo guejdx cadro rnibee Be_ndxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase ne_n redxey cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni ne_n guejdx cadro rnibee Be_ndxab. ¹⁴ Niluxh yu' tiop-chon xtojltu. Lojtu nadxaag gaii bejn ni rujn si'c bejn toBalaam agujc xchero. Laani basedni Balac xho gunni te jiajb rexpejn Israel ne_n dojl, basednireni gaureni recos ni gurej lo dxan nez loj rebanäjb, basedzani rexpejn Israel guesnäjreni chutis gunaa. ¹⁵ Sigajcza nadxaag lojtu gaii bejn ni riu rediidx ni rusule' reni laa nicolaítas. ¹⁶ Colgusiechxgaa lajztu, te di jiäl_gacä lojtu te gucuanääreni spaad ni yu' ro'ä. ¹⁷ Nani rlanj cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

Rediidx nani rniini lo rexpejn guidoo ni yu' Tiatira

¹⁸ Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz,

ni'c rnii rediidxre lojtu: ¹⁹ Ananä xtzuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰ Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcäl'ruseedni cagusgueeni rexpenä nani ahuililajz xtidxä, te naj rujnreni cosguijdx, si'c yälresnäj ni di gac chäälni, rajwzareneni nani gurej lo dxan xten rebanäjb. ²¹ Aguläzä xchej te gusiechlajzni, gusaanni gunni dojl, luxh naaddini gusiechlajzni xcuent redzunguijdx ni rujnni. ²² Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. ²³ Sugutxhiä, sunitloä rexi'n gunaaga, te si'c gabee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rililajz ni yu' neñ lastooreni. Te gabeezareneni narä sunidxä lo tejgatu ni riäj'l xca'tu xcuent redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten ben'dxab, xhetru rniädi lojtu, dirunä gutalä xtzuuntu. ²⁵ Colyapdzu'tz rextidxä nani arajptu dxejli ni guibisacä lojtu. ²⁶ Nani gunaan lo dojl, näjza nani cagusoob xtidxä dxe lultli, lojni susedä yälrnibee te guinibeeni renacion. ²⁷ Si'cni baniidx Xtaä yälrnibee loä, susedä yälrnibee lojni, te guinibeeni guiraa reben guedxliuj, gunnäjni yäl'guxhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibannäjnu Dios). ²⁹ Nani rlanj cuadiajg sucuadiajgni diidx ni rnii Sprit Dxan xten Dios loj reguidoo."

3

Rediidx nani rniini lo rexpejn guidoo ni yu' Sardis

¹ Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä. ² Colguibajñ, colgula'tzru nani rapsijctu xcuent rextidxä nani ameer nitloj neñ lastootu. Narä ruhuiä ditu niunsa'c dzuun xtenä nez loj Dios. ³ Colgusnaj lajztu redidix ni basule'reni lojtu, nani abacuadiajgtu, colgusoob redidixga, colgusiech lajztu. Palga ditu guibajñ, palga ditu guchaa xmoodtu, sidzunä nez lojtu si'c te gubaan, nicla gaantu cor

guidzunä lojtu. ⁴ Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjlrēni. ⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadro caj laj renani sibajnnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejnğa najc rexpenä. ⁶ Nani rlanj cuadiajg diidx, sucuadiajgni diidx ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäii toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹ Suhuiitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusgueereni bejn. Narä sunäpac jiadzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibeä sutijptu, na'c jjeedtu, ni'cni narä sacnäätzatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj. ¹¹ Narä di gaclaa jialä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajčni te bejn nani gac guinibee cadro yu' Dios. Sibajnni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najčni xpenä. ¹³ Nani rlanj cuadiajg diidx, sucuadiajgni ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree: ¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! ¹⁶ Ni'cni, sa'csi najctu si'c nistiib, ditu gac si'c nisnajl, niclaza gactu si'c nislaa, sibäro'ä la'tu. ¹⁷ Sa'csi rniilu: Ri'cw narä, rapä

xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäälü nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäälü; gusiiza unguent loä te chää balojlu, te jien lojlu. ¹⁹ Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. ²⁰ Colhuii, ana suga'ä roxlä' lastootu, cagusezä, cabedxa'ä. Palga yu' chu tejtu ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibansa'czani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtaädä cadro rnibeeni xhaguibaa. ²² Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo."

4

Calä'preni xpala'n Dios xhaguibaa

¹ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

² Lagajc dxeje astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagxhilga, rieni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda.

⁴ Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejpgareni. ⁵ Nez lo yagxhilro cadro rnibeeni rii reyälrdinya' näjza guzii. Nez loj cadro rnibeeni cayaiguuj gajdz bajl ni najc gajdz Sprit Dxan xten Dios. ⁶ Nez loj cadro rnibeeni yu' astoocanu te nisdoo ni rien si'c te guiuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzeneni yu' balojni. ⁷ Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa. ⁸ Niluxh guidap remanga tejpgareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yälrnibeduxh,

nani yu' galooli, nani yu' naj, nani churu jiaäd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzarenini xquixtios loj nani rnibee par tejpas.

¹⁰ Dxejc guigalbitap rebengool, suzuxhijbzarenini loj nani rbej lo yagxhilro, te ganreni nani nabajn par tejpas. Sucuaarenini xcoronrenini nez loj xyagxhilroni, siniirenini lojni, säjpreni:

¹¹ Dad Dios baxhuaannu, Guejbpac lu riäj l xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' naj, yu'reni sa'csi rlajz Guejblu chureni, ni'cni benchee Guejblu guiraarenini.

5

Te guijtz näj te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te bilu guijtz. Caj diidx nez lojni caj diidx nez dejtzn, nadxe'ni, caj gajdz seii lojni.

² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj l guxhal guijtzre? ¿Chuni'c riäj l gutiäjs reseire?

³ Niluxh nicla tej bejn di nidxäj l ni riäj l gutiäjs reseiiga te guxhalni guijtzga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäj l chu niajc nuhuii lo guijtzga. ⁴ Narä ronduxhä sa'csi nicla tej rut riäj l di gutiäjs reseiiga, niclaza ni riäj l gol guijtzga, niclaza ni riäj l fiitis lo guijtzga. ⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniirenini Lion, xagdoo toJudá, xagdoo toDavid, abejnni gaan lo yälgujt ni'c naj riäj l guxhalni guijtzga, gutiäjszani guigajdz reseiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guijtzga, guläänini naa ladbee xten nani sobga' lo yagxhilroga canibee. ⁸ Che cua'ni guijtzga, guidap remanga näjza guigalbitap rebengool bazuxhijbrenini nez loj Xiilga. Tejga rebengoolga ca' te arp, ca'zarenini taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejn Dios. ⁹ Cayolzarenini te dicoob ni najc scree:

Guejblu sacduxh,

riäj lpac xca' Guejblu guijtzga,

gutiäjs Guejblu reseiiga, sa'csi bagu't rebejnlu,

näjza xtiejnlu gudijx xcuent bejn lo Dios.

Gudijxlu xcuent bejn ni najc garen-garen r̄az,
ni r̄ni garen-garen didxsaj,
ni siäd garen-garen guejdx lo garen-garen ladxbejn.

¹⁰ Badeedlu gacreni r̄ei näjza bixhojz lo Dios.

Laareni sinibeereni reben guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilo cadre rbej nani rnibee, näjza xse' guidap reman, näjza xse' guiraa reben̄gool. Luxh di gacdi guigab xangl Dios ni tre' ro'c sa'csi xhidalduxhtej najczeni, xhidalduxh miyon najczeni. ¹² Dipduxh najc xse'reni, caniireni scree:

Sacduxh Xiil nani bagu'treni,

ni'c riäj̄l xca'ni yäl̄rnibeduxh, yäl̄rapduxh, yäl̄nanduxh,
yäl̄milagwr.

Riäj̄lza guiliä'pnu xpala'nni, guzuxhijbnu lojni gan̄nuni,
gudeednu xquixtios lojni.

¹³ Dxejcti biejn diagä xse' guiragajczeni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neñ guedxliuj näj lo nisdoo, biejn diagä caniireni scree:

Loj nani sobga' lo yagxhilo cadre rnibeeni,

näjza loj ni najc Xiil xten Dios, laatisni sacduxhni,

guiliä'pnu xpala'nni, guzuxhijbnu nez lojni gan̄nuni,

gäbzanu rinibeeni par tejpas.

¹⁴ Dxejcti guidap remanga rnigajczeni scree:

—Sugacni si'c.

Dxejcti guigalbitap reben̄gool bazuxhijbreni nez loj nani nabajn par tejpas, gojn̄renini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

² Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴ Dxejc bahuiä lo te cabai xniaa. Loj nani bijb cabai xni-aaga badeedreni yäl̄rnibee gudzucajni yäl̄nadoo, yäl̄rbedxilajz, lo guedxliujre, te ju't sa' rebejn. Badeedreni te spadro cua'ni.

⁵ Dxejcti che batiäjsni ni riojn̄ seiiga, biejn diagä gunii ni riojn̄ manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäi guidap remanga, birii xse' te ni canii scree:

—Tej kil xob xca'lu gunlu dzuun tebdxej; choṅ kil salbaad xca'lu gunlu dzuun tebdxej. Niluxh na'c guhuaḷlu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzn siädnałgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebeṅguedxliuj te ju'treni rebejnṅa con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt teygareni. Dxejc räjpreni lojreni cuäzsjcreni, gusilajzreni, laḷ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴ Dxejcti gunitloj guibaa si'cni rnitloj te guijtz che re'ni, rajcni te bilii. Guiraa redajn näjza reyuj ni re' galäi lo nisdoo biniibreni, bidxaa xłajdreni. ¹⁵ Ni'cni guiraa rebeṅ guedxliuj, rebejn nani rnibee, näjza rebeṅro, näjza recapitán, näjza rebeṅ rapduxh, näjza rebeṅ ni nadiplajzreni, näjza remos, näjza renani rut lojdi yu'reni, guiragajcreni baxuṅreni, huicuatłojreni neṅ rebiliää neṅ redajn. ¹⁶ Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilo xhaguibaa näjza loj yälguxhtis xten nani najc Xiil xten Dios. ¹⁷ Sa'csi abidzujṅ dxero xten xcälguxhtisni, ¿chuni'c sajc suu nez lojni?

7

Tegayuu tiubitajp miḷ rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ² Bahuiä lo stee xangl Dios, ni siääd nez cadro rliejn gubijdx, ca'ni seii xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³ Räjpnj lojreni:

—Guläzsjctero, laḷ ni guicuaanu te seen lo cuaj reni najc xpejn Dios, te dxejcru sajg guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cua-jreni, basa'reni tegayuu tiubitajp miḷ bejn ni bibee loj rexpejn Israel. ⁵ Loj rexpejn Judá bibee tzubitio'p miḷ; loj rexpejn Rubén bibee tzubitio'p miḷ; loj rexpejn Gad bibee tzubitio'p miḷ; ⁶ loj rexpejn Aser bibee tzubitio'p miḷ; loj rexpejn Neftalí bibee tzubitio'p miḷ; loj rexpejn Manasés bibee tzubitio'p miḷ; ⁷ loj rexpejn Simeón bibee tzubitio'p miḷ; loj rexpejn Leví bibee tzubitio'p miḷ; loj rexpejn Isacar bibee tzubitio'p miḷ; ⁸ loj rexpejn Zabulón bibee tzubitio'p miḷ; loj rexpejn José bibee tzubitio'p miḷ; loj rexpejn Benjamín bibee tzubitio'p miḷ.

Benquixhuj ni najcw ladnolbäj

⁹ Dxejcti bahuiä lo xhidalduxh bejn, beṅquixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenj zijn. ¹⁰ Dipduxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojḷnu.

¹¹ Suga'za guiraa rexangl Dios guideb gabi yagxhilo cadro rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, ¹² räjpreni:

Sugacni si'c. Loj Xtiostisnu colye'tz sacduxhni;

colguiliä'p xpala'nni;

laatisni rajpni yäl'najn;

lojtisni colgudeed xquixhtios, laatisni colgan,

colsuxhijb lojni; laatisni rajpni yälrnibee näjza yälmilagwr.

Sugacni si'c par tejpas.

¹³ Dxejc gunii te beṅgool loä, najni:

—Renani najcw reladnolbäjre, ¿chu najcreni? ¿Casiäädreni?

¹⁴ Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwduxh, renani abia rextojlreni sa'csi xtiejn Xiil xten Dios agudijx xtojreni. ¹⁵ Ni'cni suga'reni nez loj yagxhilro xten Dios dxej-yääl cayujnreni xtzuunni nen xquidooi. Ni'cni sacnäy nani sobga' lo yagxhilroga guiraa renani suga' nez lojni, sunäjtisni laareni. ¹⁶ Dirureni guiliaan, niclaza jiojlreni, diza gubijdx guze'c lojreni, dizareni gacnanlaa. ¹⁷ Sa'csi nani najc Xiil xten Dios ni sobga' galäii loj yagxhilro xten Dios, laani cayajpnireni si'c xilbäz, sinänireni cadre yu' nisyä ni ruded yäl'nabajn par tejpas. Suspijdz Dios nisbee balojreni, dirureni goon par tejpas.

8

Ni rajc gajdz seiiga

¹ Che batiäjsni ni rajc gajdz seiiga, gucdxi xhaguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴ Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusiñreni te guisloj golreni retrompe'tga.

⁷ Che bil trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejczä ni riojn la' reyajc näjza guiralii recuaan.

⁸ Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn. ⁹ Dxejcti gujt ni riojn la' rebäj näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, näjza cadre rliejn nis. ¹¹ Laj bajlga najc Ajenjo, ni säloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisanlaaga.

¹² Che bil ni rdajp xangl Dios trompe't ni ca'ni, guxhijn ni riojn la' gubijdx, näjza ni riojn la' bäii, näjza ni riojn la' rebal

xhaguibaa, bicäjyreni. Dxejcti dirureni guzanij ni riojn la' dxej, näj ni riojn la' yääl.

¹³ Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini redi-idxre:

—¡Aii! ¡Aii! ¡Aii! Riaduxhä reben guedxliuj che guisloj gol schon rexangl Dios retrompe't ni ca'reni. Sidejd reben guedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. ² Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii betzsu gusujreni guideb lo guedxliuj. Cua'reni yälrnibee gacreni nialajz si'c nialajz renaxejb. ⁴ Cua' remanga yälrnibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsíreni. ⁵ Cua'reni yälrnibee na'c ju'tni bejn, gaii bäii gusacsíreni xcäl'nayanreni bejn. Luxh xcäl'nayanreni najc si'c yäl'nayan cadro rauya' te naxejb te bejn. ⁶ Nen redxejga, siguiil rebejn yälgujt, luxh direni guidxälni. Luxh mase rlanjreni guetreni, sibicaj yälgujt lojreni.

⁷ Rebetzsure najc si'c recabaii ni suchee te chääreni lo guer. Yejceni yu' te ni najc si'c te coron oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläjyreni najc si'c läjy lion. ⁹ Luxh guideb tiejxhreni caj si'c guiib ni rusäudzu'tzreni. Rubeduxh rexhigaareni, si'c rubej che ruxun xhidalduxh cabaii näj xcarreni che agojl chääreni guer. ¹⁰ Xhibaanreni najc si'c xhibaan naxejb, xcuchreni yu' yäl'nayan te gusacsíreni reben guedxliuj gaii bäii. ¹¹ Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siädni galäii guidajp reca'ch ni caj loj xpiändxan ni nac-chee ganax oor; ni yu' nez loj Dios. ¹⁴ Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani cadu nez rogueuu ni laa Eufrates.

¹⁵ Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. ¹⁶ Biejn diagä bal najc guiraa resoldaad ni rbijb cabaii: najczeni tio'p gayuu miyon.

17 Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guuib, najcni xniaa näj zul näj gojtz. Dxej cru yejc recabaiiga najc si'c yejc te beedz. Ro'reni carii bajl näj gujxh, näj sufr. 18 Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr. 19 Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

20 Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni reben dxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fireni, di diajgreni jiejn, di gacdi sareni. 21 Diza rebejnga nusiejch lajzreni xcuent xcäl rugu'treni, xcäl rujnreni yäl bidxaa, xcäl resnäjreni bejn ni di gac chääl ni, niclaza xcäl gubaanreni.

10

Te angl ni ca' te guijtz

1 Bahuiä stee xangl Dios ni rajp yäl r nibeduxh, siädjiäjt ni xhaguibaa, li yu'ni neñ bäj, yejcn i dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. 2 Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, 3 dxejc guredxaduxh anglga si'c rbedxa' beedz. Dxej cru gunii guigajdz guzii sigajcsa. 4 Che gulujx gunii guziiga, narä rlazä nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucaaluni.

5 Angl nani suj ni'ni loj nisdoo näjza loj yuj, guläs naani ladbee nez xhaguibaa. 6 Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjpn i:

—Diru redxejre gaclaa. 7 Che guidzujntis dxej ni agojl goļ ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

8 Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

9 Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajnci nejxh si'c dzujn.

¹⁰ Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rereii.

11

Tio'p niguii ni rusule' xtidx Dios

¹ Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, bal-abza balti bejn rusuxhijb neŋga. ² Na'c gutiexhlu gabi lole' guidooga, sa'csi ni'c acua' rebenzijtni te tiubitio'p bäii chaläjsreni guedxdxan si'ctis ni rlanjreni. ³ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mil tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni.

⁶ Guiro'p redade'ga rajp yälrnibee te gusaureni xhaguibaa te na'c jiajb nisguij guideb neŋ redxey nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jädgusacsí xhitis plaag lo guedxliuj, si'ctis huält ni rlanjreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijl te jädchagdijłni guiro'preni. Sujnni gaanreni, sugu'tnireni. ⁸ Dxejcti jia'n guiro'p rebenğutga lad caii xten guejdx cadre bacuaareni Dad Jesucrist lo crujz. Guejdxroga rbälajzareni Sodoma näjza Egipto. ⁹ Choŋ dxej garol guiraa rebejn ni siääd guedxbäz, ni siääd guedxro, ni najc garen-garen raz, ni rnii garen-garen xtidx guiraa rebejn guedxliuj, suhüii loj guiro'p rebenğutga, direni gusaan guiga'tzreni neŋ baa. ¹⁰ Guiraa renani nabajn lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni.

¹¹ Che gudejd choŋ dxej garolga, baspaŋsac Diosreni, dxejcti huitiesacreni. Guiraa reni bahüii lojreni, bidxebduxhrene.

¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³ Lagajc orġa gujc te xuduxh, gurebä'n tej lo tzuu la' guejdxga, gujt gajdz miġ bejn lo xu ni gujc ro'c. Rebejn ni bia'n ro'c bidxeb-duxhreni, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujn ni riojnġa.

Ni rajc gajdz xangl Dios goġ trompe't

¹⁵ Che biġ ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni: Xcäl'rnibee guedxliuj agudejd ladznāa Dad Dios näjza Jesucrist; luxh laani sinibeeni par tejpas.

¹⁶ Galbitajp rebenġool nani sobga' lo tron xtenreni cadro rnibee Dios, biabrojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yäl'rnibeduxh, nani najclu, nani gujclu, nani churu gac, sa'csi acua'lu xcäl'rnibeduxhlu te agusloj canibeelu.

¹⁸ Bidxe'ch rebenġ guedxliuj lojlu, luxh abidzujn dxej guidxe'chlu lojreni, gunlu yäl'guxhtis rebenġut, te gudeedlu cossa'c loj rexpejnlu, lo renani gunii xtidx Dios, lo renani huililajz xtiidxlu, lo renani rusuxhibni nez lojlu;

rebenġroob sigajc rebenġro.

Abidzujnza dxej che cuäcajlu renani bejn daan guedxliujre, te nitlojreni par tejpas.

¹⁹ Dxejc bixal xquidoo Dios ni yu' xhaguibaa, nenġ guidooga bienġ te guiġn cadro yu' guiġ cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

12

Te gunaa näj te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnġi yu' te coronġ ni nac-chee tzubitio'p balxhaguibaa. ² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajw-duxh. ³ Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcnġi, sojb tzuu xca'chni. Tejga yejcnġi yu' te coronġ, najcreni gajdz coronġ. ⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga, najcnġi te niguii, luxh te bar guiib nungäjl guinibenäjni lo guiraa rebenġ guedxliuj. Guläsgajcreni bāzga te sanärenini xhaguibaa cadro

rnibee Dios. ⁶ Dxejcti baxun gunaaga, siini nez loj reyubijdz cadre yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

⁷ Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexan-glni gudilduxhreni, ⁸ niluxh direni niujn gaan, luxh di ni-ajcdiru nia'n manga näjza resa'ni xhaguibaa. ⁹ Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Beñdxab, ni laaza Satanás, ni rusguee guideb guedxliujre.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujn yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yäl.

¹¹ Laareni gujc bejnreni gaan loj beñdxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹² Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt beñdxab lo guedxliuj, luxh cadxechduxhni sa'csi ana-jni guxii dxej räjpni.

¹³ Che gucbee gutiatzroga abacuaarenini lo guedxliuj, biri-najlni gunaa nani guyu' xi'ngaanni te gusacsínini. ¹⁴ Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadre nac-chee cadre cuääzni. Choñ ijz garol guyu'ni ro'c, nacuatzlojni lo bälga. ¹⁵ Dxejcti ro' gutiatzrore birii nis si'c te gueuu te nuslo'ni gunaaga. ¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷ Dxejc bidxechduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesu-crist.

13

Tio'p manduxh

¹ Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcn cadro caj diidx ni rniyaj Dios. ² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmilaagwrni lojni, näjza tron cadre rbejni, näjza xcälrnibeduxhni. ³ Dxejcti bahuiä te yejcn najc ascanu yu' chu batiuugni con madxed, ameer guetni, luxh biajc cadre gurujg yejcn. Ni'cni rdxeloduxh guiralii rebejn guedxliuj,

sanajlreni manduxhga. ⁴ Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlni, gucuanäjnnini?

⁵ Yu' chu badeedza lo manroga diidx dxejcti gusloj canini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlanjni. ⁶ Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷ Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. ⁸ Dxejcti guiraa reben guedxliuj sazuxhijbreni, sagajjnreni manroga, guiraa rebejn nani di lajreni nicaaj lo libr xten yäl nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpejn Dios.

⁹ Palga yu' chu rlanj cuadiajgni, sugucuadiagsa'cni. ¹⁰ Palga yu' chu nungäjlni jiauu nen latzguiib, siaupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjlni gunreni huant, chanuutis chalilazsa'creni xtidx Dios.

¹¹ Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rnii te gutiatz. ¹² Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcn, luxh biaj yejcn. ¹³ Manroga ni birii nen yuj rujnzani remilagwro, rujnni rtejb bal-guiboo xhaguibaali, rtejbni lo guedxliuj nez loj rebejn. ¹⁴ Rusgueeni rebejn nani nabajn lo guedxliuj xcuent remilagwro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcn, luxh biajcz yejcn. ¹⁵ Dxejcti man ni rojpga baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini. ¹⁶ Gunibeezani chu bejn te seen lo cuajni o naani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz. ¹⁷ Gunibeezani digacdi sii, digac diza guto' bejn palga xhet seendi caj naani o lo cuajni. Seenga najc laj manga o numbr xten laj manga. ¹⁸ Dee rquiin yäl najn. Renani rajp yäl najn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

14

Dij ni roĵ te gayuu tiubitajp miĵ

¹ Che bahuiä stee, bahuiä suga' Xiil xten Dios yejc dajn ni laa Siön. Suganäjni te gayuu tiubitajp miĵ bejn nani caj lo cuajreni laj Xiil näj laj Xtadni. ² Biejn diagä rubej xhaguibaali, rubeduxh, riejni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni roĵ arp. ³ Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebeṅgool. Rutliidi gujc bisieeddi dijga, xtebtis tegayuu tiubitajp miĵ bejn nani guĵaa lo reben guedxliuj. ⁴ Reniguiire najc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis säani. Redee guĵaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch. ⁵ Nicla tej didx-xhii di guirii ro'reni, sa'csi xhetliidi xtojlneni, nayareni suga'reni nez loj tron cadro rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rni garen-garen xtiidreni. ⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

⁸ Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcäl-latsiajni, xcuent dojl ni bejnni guideb lagaa; najcni si'c reni rä'nejp.

⁹ Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani, ¹⁰ sidxecheduxh Dios lojni, di xcälguxhtisduxh Dios tedcaj lojni. Sidejdpacni trabajwduxh nen balro näjza azufr nez loj rexangl Dios näjza nez loj Xiil xten Dios. ¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxañ xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yäl_nasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguui. Yu' te coron ganaxduj oor yejcní, dxejcti ñaani ca'ni te guiboz ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bájga, rájpní:

—Basäl xquibozlu, batiuug, te batie' yäl_nasa'c, sa'csi agojl or guire' yäl_nasa'c, guideb guedxliuj aguyajlní.

¹⁶ Dxejcti nani sobga' lo bájga basniibni xquibozni, batiuugni yäl_nasa'c ni caj lo guedxliujre.

¹⁷ Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. ¹⁸ Dxejcti birii stee xangl Dios nez loj piändxañ xten Dios. Laani rajpni yäl_nribee lo balro. Dipduxh guniini, rájpní loj ni ca' guiboz ni caduxh ro'ni, rájpní:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlní.

¹⁹ Dxejc batiuug anglga guiraa reresim uub ni yu' lo guedxliujre nalajznu rebenguidx, basäl_nireni neñ tanc cadro guläjreni yejcní sa'csi rdexchduxh Dios lojreni. ²⁰ Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujñ rejnga ro'li recabaii, gujcní si'c che riu' nisro gueuu, biäjtní si'cti choñ gayuu mil metr guideb gabi cadro baläjreni yejc reuub.

15

Guigajdz xangl Dios näj lult xcäl_guxhtis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejpgareni ca' te plaag ni gusacsí rebeñ guedxliuj. Redeetis najc lult, sa'csi che ted redee ati agulujx yäl_rdxe'ch xten Dios.

² Dxejcti bahuiä loj tej ni najc si'c te nisdoo ni najc si'c biidr nu'chní bajl. Dxejcti galäii nisdooğa suga' renani bejn gaan loj manroğa näjza lo banäjñ ni najc si'c manroğa, ni bejnza gaan di nica'reni seen xten lajni. Ca'reni arp xten Dios. ³ Cayol_rreni dij xten toMoisés ni gujc xpejn Dios, cayol_rzarení dij xten Xiil xten Dios. Scree najc dijga:

Sacduxh, ruscheloj guiraa redzuun ni rujñ Guejblu, Dad Dios, ni rajp guiraa yäl_nribee.

Rujñ Guejblu ganax dzunsa'c, rnii Guejblu ganax didxlii. Guejblu rnibee loj guiralii reguejdx ni yu' lo guedxliuj.

4 Bahuii, Dad, ¿chu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloj guiraa rextzunsac'cpac Guejblu.

5 Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guij cadro caj xleii toMoisés. 6 Ro' yudxanroga birii gajdz xangl Dios ni ca' plaag te gusacsíreni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor. 7 Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälguxhtisro Dios nani nabajñ par tejpas. 8 Gudxaj guidoo ni najc yudxanroruga gujxh ni siädä xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

1 Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

2 Anglalo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

3 Dxejc ni rojp anglga baslojni ni yu' neñ xhijg ni ca'ni loj nisdoo, te bejñni gubixhloj nisdooa gujçni si'c rejn xten te bengut. Dxejcti gujt guiralii reman ni yu' lo nisdoo.

4 Ni riojñ anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujçreni rejn. 5 Dxejcti biejn diagä gunii angl ni rajp yälñnibee lo nis räjpni:

—Huenduxh najc Guejblu Dad ni najc ñaj sigajc gujç Guejblu galoo, dxanduxh najc Guejblu sa'csi cayujñ Guejblu yälguxhtis redzunguijdx. 6 Sa'csi laareni baxhe'reni rejn, bagu'treni rexpejñlu näjza renani gunii xtiidxlu, luxh ñaj badeed Guejblu rejn cayä'reni. Si'cpac nungäjñ gacreni.

7 Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälñnibee, xcälguxhtis Guejblu najc laaca, si'c riäjñ gacni.

8 Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñnibee

guze'cnäjni rebejn guiboo. ⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechljazreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäyj guideb cadro rnibee manduxhga, luxh rebejn rauya'tisreni lujdxreni sa'csi cayajcreni yäl'nayanduxh. ¹¹ Guniyajreni Guejb Dios ni yu' xhaguibaa sa'csi rajcreni yäl'nayanduxh, xcuentza rexquedxnayanreni. Luxh direni nusiechljazreni xcuent xtojlneni.

¹² Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezuyj xten rereii ni jiäd nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choñ spritguijdx ni najc si'c bedz, ¹⁴ sa'csi najcreni respit xten bendxab, rujnreni milagw, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälrnibee che guidzujn ni lo guedxliuj. ¹⁵ “Narä siädxhiga'tzä si'c riäd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajn, te na'c guiga'ni xhabääl ni, jianxtujyni che guibi'ä.” ¹⁶ Dxejc gutie'reni guiraa rebejnre te lajt ni laa lo didx hebre “Armagedón”.

¹⁷ Dxejcti ni najc rgajdz anglga cua'ni xhijgni baslojni ni yu' neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yälrdinya' näj guziro. Gujcza te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcn i choñ la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yäl'guxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcn i.

17

Gun Dios yäl'guxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijl nis. ² Guiraa rerei lo guedxliujre bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

³ Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuvejctni, sojbza tzuu xca'chni. ⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. ⁵ Caj te diidx lo cuajni, luxh rut raceeedi xhi sälojni. Scree rni diidxga: “Babilonro, xnan regunadxab, xnan recosdxab ni rajc lo guedxliuj.” ⁶ Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuvejctni näj tzuu xca'chni. ⁸ Manroga ni bahuiilu gubajjni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtzt xten yäl nabajn xten Dios, guijtzt ni guc-chee che birixtiejli guedxliuj, rebejnğa sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

⁹ 'Ree nanab ga'pni yäl najn. Gajdz rebitiujejctni säloj gajdz dajn cadro sobga' gunaaga, ¹⁰ sälojzareni gajdz reii. Agujc gaii reiiga ni cayajb. Tej rereiiga canibee naj. Stee reiiga churu jääd. Luxh che jääd lult reiiga, guxii dxej guinibeeni. ¹¹ Manro ni gubajn galoo, ni agunitloj naj, ni'c rac xhujn reii, najczani tej loj guigajdz rerei, luxh sinitlojni, sejtni par tejpas.

¹² 'Guidzuo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl rnibee teb or, nalajznu guxii dxej. ¹³ Tejtis xhigab gun rereiiga, gudeedreni xcäl nadipreni, xcäl rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rerei. Luxh renani siäd najni najc reni agurejdxni, reni aguleni, sisiudzu'tznäjrenini.

¹⁵ Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa ben guedxliuj, guiraa bejn ni rni garen-garenca xtiidxreni, ni siäd garen-garen reguejdx. ¹⁶ Guitzuo

reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sajwreni bältiejxhni, suze'creni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcälrnibeereni lo manroga che guidzujnli dxej ni chale' guira'ti ni gunii Dios gac. ¹⁸ Gunadxabga ni bahuiilu säloj guedxro ni rnibee loj guiraa rereii loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre.

² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj nacni guejdx cadro rbäjz reben_udxab, ro'c rcanzaj guiralii cuaa spritdxab, najczani xpitiääz guiraa reman xhaguibaa ni najc mandxab, mandxuudx. ³ Sa'csi guiraa reben_u guedxliuj agusojzreni xcuent dojl ni bennäjreni gunadxabga, guiraa rereii loj guedxliuj bejn dojl guläsnäjreni gunadxabga, luxh guiraa reben_u guedxliuj ni ruto' abejnreni ganduxh, agujczeni ri'cw xcuent recosdxab ni rujn gunabdxabga.

⁴ Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xtenni.

⁵ Sa'csi yuduxh rextojlni, abidzujnreni xhaguibaali, luxh abanajza lajz Dios rextojlni. ⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnna laani. Nen_u co'p cadro badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajnni si'ctis ni rla-jzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajnni, sigajcza gac-huin lastooni sa'csi bejnna xhigab nen_u lastooni: “Narä sobga'ä ree si'c te rein, te ben_uroduxh, dina gacä biuud, niclaza gac-huin lazä.” ⁸ Ni'cni tejsi dxej siajb yejcnii guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gunxcälguxhtisni.

⁹ Guiraa rereii lo guedxliujre ni bennäj gunaadxabga cosgujdx, reni cuansanäjnini, sonduxhreni, siaduxhreni che fiireni gujxh ni carii cadro cayejcni. ¹⁰ Zijtru sisiujreni sa'csi rdxejbreni replaag xten gunadxabga, dxejc siniizarenii:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujn yälguxhtis yejclu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, najza guiraloj barajd yagdoo, naj guiraloj cos saru, ni nacchee lai elefant, naj cos saru ni nacchee bronz, naj guuib, naj marm, ¹³ najza caneel, guiraloj laj comiid, najza yalnejh, naj perfum, najza yaal, najza bin, najza se't oliib, najza arinsa'c, najza triuu, najza gon, najza rexiil, najza cabaii, najza gare't, najza bejn ni ruto'reni tiejxhreni, xaimreni. Guiraa reni'c ruto'reni. ¹⁴ Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxal bejn reni'c.

¹⁵ Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinuxh lajzreni, ¹⁶ sajbrei:

—Aii, aii, riaduxhnu guedxrore, naiti gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijreni.

Guiraa recapitan xte barcw, najza guiraa remarineer, najza rebejn ni rij biaj lo rebarcw najza guiraa reni rujn dzuun lo nisdoo, gusujreni zijt, ¹⁸ najza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhij guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenti, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yalguxhtis xcuent ni bejn ni lojtu.

²¹ Dxejcti te xangl Dios ni rajp yalrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcaiiu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jiejn xse' bi'n naj dxa'p loj te sa' sa'csi rexpejnlu ni ruto' gujcreni bejroduxh lo guedxliuj sa'csi basguezalu reben guedxliuj xcuent rextzundxablu.

²⁴ Neñ guejdxga bidxäjzla xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälrusläa lo dojl,

näj yälrdimbicha', näj yälmilagwr.

² Sa'csi xcälguixhtisni najc ganax laaca,

huentis najcni, sa'csi abejnni yälguixhtis gunadxabga nani caguxhiñ reben guedxliuj xcuent xcälñadxabni.

Abejn Dios yälguixhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebenool näjza guidap remanbajnga bazuxhijbreni, biabrlojreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuun Dios,

guira'tu ni rajntu Dios, rebenro sigajc rebenñadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

⁸ Abadeedreni ladliñ ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza angla loä:

—Bacuaa diidxre: “Chicbaa renani bidon jiaäd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te gañäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'pacni diidx, rniizani ganax didxgulii. Entis laaca rujnni yälguxhtis, entis laaca rucuaani che rujnni guer. ¹² Rebalojni rbebajl, yejcnii yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. ¹³ Najcwni te lajd ni nadiini rejn; lajni najcza Xtidx Dios. ¹⁴ Guiraa resoldaad guibaa xten Dios siädnajni najcwreni ladanol, ladanaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee. ¹⁶ Lo xhajbni näjza cuä' cujdni caj lajni: “Reii xten re'reii, Dad xten redad.”

¹⁷ Bahuiä loj te angl suga'ni galäii gubijdx, cabedxa'ni canini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl re'reii, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbáz sigajc rebenro.

¹⁹ Dxejcti bahuiä loj manro näjza loj re'reii guedxliuj, abire'reni te gucuanäjreni nani rbijb cabainol näjza guiraa resoldaad xtenni. ²⁰ Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni nen te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mil ijz

¹ Dxejcti bahuiä loj te xangl Dios ni siädjiäjt xhaguibaa, siädnäni läii ni ruxhal guedro ni laa gabijl. Ca'zani te cadenro. ² Anglre gunaaz gutiatzroga, ni gujc bäl galooli, ni najcza benxgab, ni laaza Satanás. Bacuaduunini te mil ijz. ³ Basälñini nen gabijl, te ro'c basäunini, bacuaani läii te na'cru gusgueeni reben guedxliuj laj ni guiza' te mil ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcti sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubañsacreni loj rebengut, gurenäjreni Jesucrist te laani gunibenäjreni te mił ijz. ⁵ Dee najc yälrbansac galoo lo rebengut. Niluxh stecuaa rebengut, direni guibansac che guisa'li te mił ijz. ⁶ Chicbaa rebejn nani guibansac ganid-doo, najcreni bendxan ni agubicaaj xtojreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mił ijz.

⁷ Che guiza' te mił ijzga, suslasacni Satanás neñ gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huä'preni lo te camp cadro gulagduxh. Gudäyjreni guideb gabig cadro rnibee rexpejn Dios neñ guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsírenini sidejdreni trabawduxh dxej-yääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjł par laareni. ¹² Bahuiä lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejn ni yälgutxhtis rebengut xcuent ni bejnreni, xcuentza rediidx nani caj loj reguijtzga. ¹³ Guiranejz biäd rebengut: nisdoo batzuug rebengut ni yu' lojni, gabijl näjza yälgujt batzuugza rebengut ni yu' lojreni. Dxejcti bejn Dios yälguxhtis teygareni xcuent ni bejnreni. ¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. ¹⁵ Guiraa bejn ni di lajni nidxäjł lo xlibr yälñabajn bacuaazani reni'c lo bajlga.

21

Xhaguibacoob näjza guedxliucoob

¹ Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzä nisdoo. ² Narä Juan, bahuiä lo guedx Jerusaléncoob, guedxdxan, siädjiäjtnei xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. ³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejñni. Sibannäj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:
—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajch chalilajz bejn rediidxre.

⁶ Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälñabajñ par tejpas. ⁷ Chutis nani gun gaan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. ⁸ Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejc guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälguhxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

¹⁰ Dxejcti bejnni gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtnei nez lo Dios. ¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubitio'p cuaa xten rexpejn Israel. ¹³ Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäjw, yu'za chon portonga cadro räaz gubijdx. ¹⁴ Yu' tzubitio'p guiro lo cimient xten guejdxga. Lo tejsa reguijga caj laj tej retzubitio'p apost xten Xiil xten Dios.

¹⁵ Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. ¹⁶ Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil' tio'p gayuu kilómetros tejga laad. Sigajc siolni, sigajcza gulajgni, sigajcza jjaani. ¹⁷ Dxejcti barejxni padeerga, yu'ni gayonbitajp metr seguñ mediid xten bejn, sa'csi ni'c najc ni cagutiexhnäjza anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹ Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

²² Dina nuhuiä nicla tej guidoo neñ guejdxga, sa'csi suga' Gueb Dios ni rajp guiralii yäl'rnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusanij nicla gubijdx niclaza bäii, sa'csi lagajc xcäl'rdimbicha' Dios näjza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajc sareni lo bianijga, luxh rereii ni siääd lo guedxliujre siäd'näzareni xcäl'rnibeereni, näj xpala'nreni ro'c. ²⁵ Di ro' reportanga jiäuu rdxej, luxh ro'c xhettiza yääl. ²⁶ Ro'c chanäzareni yäl'nasa'c näj xpala'n reguejdxro ni yu' lo guedxliuj. ²⁷ Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

22

¹ Dxejc baluii anglga te gueuro loä, cadre yu' nisya xten yäl'nabajn. Rdimbicha'ni si'c te guihuajn, luxh cariini lo tron cadre rnibee Dios näjza Xiil xten Dios, ² rdejdn loj nezyujro ni rdejdn galäii guejdxga. Guiro'p laad gueuga sojb reyajg xten yäl'nabajn, lojreni rcay tzubitio'p cuaa ninejxh neñ tebijz, tejga cuaani tejga bäii; luxh rebalajg ni rcay lo reyajgga najc te gusajcni reben guedxliuj. ³ Dxejcti ro'c xhettiru yäl'rdzubde, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpejñni, rajñreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu. Luxh reni rbäjz ro'c di guiquiin nicla bajl, niclaza

xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶ Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluilojni loj rexpejn ni guira'ti nani agojl gac.

⁷ —Sajngalu gan, siojb jiälä. ¡Chicbaa nani riu rediidx ni caj lo librré!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo librré. Bazuxhijb loj Diostis.

¹⁰ Dxejc najni loä:

—Na'c gusäuulu guijtzc cadro caj rediidxre xcuent nani churu gac, sa'csi asiäddzungajxh redxej ni chale'reni. ¹¹ Luxh läl ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

¹² Gunajtiro:

—Siojb jiälä, luxh siädnää xhi gunidxä loj tejgatu si'c ni riäjł xca'tu xcuent dzuun ni bejntu. ¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ 'Chicbaa renani riu xtidx Dios, najcreni si'c ni rguuib xhajbreni te sajcz jiu'reni nez porton xten guejdxga, sajcz gauni ninejxh ni caj lo yajg xten yäl nabajn par tejpas. ¹⁵ Per dejtzc guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rnii didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä te xajg torei David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxcn xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädza chutis ni cayojł, sujiädäxlia'ni nis yäl nabajn par tejpas.

18 Sa'csi narä rniliä'ppac lojtu, guiraatu ni riejn diajgtu rediidx ni caj lo guijtzre xcuent recos ni churu gac, palga yu' chu tejtü gutajlru diidx ni caj guijtzre, sutedru Dios bejn̄ga replaag yejcn̄i loj ni caj lo guijtzre. 19 Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yäl̄nabajn̄ par tejpas, näjza lo guedx Dxan, ni caj xcuentreni lo guijtzre.

20 Nani cagusule' diidx xcuent guiraa redee guniini, najni:

—Guliipacni siojb jiäl̄ä.

Sugacni si'c. Gudaa Dad Jesucrist.

21 Sujiääd xcäl̄racnäj Dad Jesucrist lo guiraatu. Sugacni si'c.